

Namo tassa bhagavato arahato sammāsambuddhassa

## Aṅguttaranikāye

### Pañcakanipāta-aṭṭhakathā

#### 1. Paṭhamapaṇṇāsakaṃ

##### 1. Sekhabalavaggo

##### 1. Saṃkhittasuttavaṇṇanā

1. Pañcakanipātassa (3.0001) paṭhame sattannaṃ sekhānaṃ balānīti **sekhabalāni**. Saddhābalādīsu assaddhiye na kampaṭīti **saddhābalaṃ**. Ahirike na kampaṭīti **hirībalaṃ**. Anottappe na kampaṭīti **ottappabalaṃ**. Kosajje na kampaṭīti **vīriyabalaṃ**. Avijjāya na kampaṭīti **paññābalaṃ**. **Tasmā**ti yasmā imāni sattannaṃ sekhānaṃ balāni, tasmā.

##### 2. Vitthatasuttavaṇṇanā

2. Dutiye **kāyaduccaritenā**ti-ādīsu upayogathe karaṇavacanaṃ, hiriyitabbāni kāyaduccaritādīni hiriyati jigucchatīti attho. Ottappaniddese hetvatthe karaṇavacanaṃ, kāyaduccaritādīhi ottappassa hetubhūtehi ottappati bhāyatīti attho.

**Āraddhavīriyoti** (3.0002) paggaḥitavīriyo anosakkitaṃ mānaso. **Pahānāyā**ti pahānatthāya. **Upasampadāyā**ti paṭilābhatthāya. **Thāma**vāti vīriyathāmena samannāgato. **Daḥaparakkamoti** thiraparakkamo. **Anikkhittadhuro kusalesu dhammesū**ti kusalesu dhammesu anoropitadhuro anosakkitaṃ vīriyo.

**Udayatthagāminiyā**ti pañcannaṃ khandhānaṃ udayavayagāminiyā udayaṅca vayaṅca paṭivijjhituṃ samatthāya. **Paññāya samannāgatoti** vipassanāpaññāya ceva maggapaññāya ca samaṅgibhūto. **Ariyāyā**ti vikkhambhanavasena ca samucchedavasena ca kilesehi ārakā ṭhitāya parisuddhāya. **Nibbedhikāyā**ti sā ca abhinivijjanato nibbedhikāti vuccati, tāya samannāgatoti attho. Tattha maggapaññā samucchedavasena anibbidhappubbaṃ appadālitapubbaṃ lobhakkhandhaṃ dosakkhandhaṃ mohakkhandhaṃ nibbijjhati padāletīti nibbedhikā, vipassanāpaññā tadaṅgavasena nibbedhikā, maggapaññāya paṭilābhasaṃvattanato tabbi-

passanā nibbedhikāti vattum vaṭṭati. **Sammā dukkhakkhayagāminiyāti** idhāpi maggapaññā sammā hetunā nayena vaṭṭadukkhañca kilesadukkhañca khepayamānā gacchatīti sammā dukkhakkhayagāminī nāma, vipassanāpaññā tadaṅgava-sena vaṭṭadukkhañca kilesadukkhañca khepayamānā gacchatīti dukkhakkhayagāminī. Dukkakkhayagāminiyā vā maggapaññāya paṭilābhāya saṃvattanatopesā dukkhakkhayagāminīti veditabbā. Iti imasmiṃ sutte pañca balāni missakāneva kathitāni, tathā pañcame.

## 6. Samāpattisuttavaṇṇanā

6. Chaṭṭhe **akusalassa samāpattīti** akusaladhammassa samāpajjanā, tena saddhiṃ samaṅgibhāvoti attho. **Pariyuṭṭhāya tiṭṭhatīti** pariyonandhitvā tiṭṭhati.

## 7. Kāmasuttavaṇṇanā

7. Sattame **kāmesu laḷitāti** vatthukāmakilesakāmesu laḷitā abhiratā. **Asitabyābhāṅginti** tiṇalāyana-asitañceva tiṇavahanakājañca. **Kulaputtoti** ācārakulaputto. **Ohāyāti** pahāya. **Alaṃ** (3.0003) **vacanāyāti** yuttaṃ vacanāya. **Labbhāti** sulabhā sakkā labhitum. **Hīnā kāmāti** pañcannaṃ nīcakulānaṃ kāmā. **Majjhimā kāmāti** majjhima-sattānaṃ kāmā. **Paṇitā kāmāti** rājarājamahāmattānaṃ kāmā. **Kāmātveva saṅkhaṃ gacchantīti** kāmanavasena kāmetabbavasena ca kāmā-icceva saṅkhaṃ gacchanti. **Vuddho hotīti** mahallako hoti. **Alaṃpaññoti** yuttapañño. **Attaguttoti** attanāva gutto rakkhito, attānaṃ vā gopetum rakkhitum samattho. **Nālaṃ pamādāyāti** na yutto pamajjitum. **Saddhāya akataṃ hotīti** yaṃ saddhāya kusalesu dhammesu kātum yuttaṃ, taṃ na kataṃ hoti. Sesapadesupi eseva nayo. **Anapekkho dānāhaṃ, bhikkhave, tasmīṃ bhikkhusmiṃ homīti** evaṃ saddhādīhi kātappaṃ katvāva sotāpattiphale patiṭṭhite tasmīṃ puggale anapekkho homīti dasseti. Imasmiṃ sutte sotāpattimaggo kathito.

## 8. Cavanasuttavaṇṇanā

8. Aṭṭhame **saddhammeti** sāsanasaddhamme. **Assaddhoti** okappanasaddhāya ca pakkhandanasaddhāya cāti dvīhipi saddhāhi virahito. **Cavati nappatiṭṭhātīti** imasmiṃ sāsane guṇehi cavati, patiṭṭhātum na sakkoti. Iti imasmiṃ sutte appatiṭṭhānañca patiṭṭhānañca kathitaṃ.

## 9. Paṭhama-agāravasuttavaṇṇanā

9. Navame nāssa gāravoti **agāravo**. Nāssa patissoti **appatisso**, ajeṭṭhako anīcavutti. Sesamettha purimasadisameva.

## 10. Dutiya-agāravasuttavaṇṇanā

10. Dasame **abhabboti** abhājanaṃ. **Vuddhinti** vadḍhiṃ. **Virūḷhinti** virūḷhamūla-tāya niccalabhāvaṃ. **Vepullanti** mahantabhāvaṃ. Sesam sabbattha uttānamevāti.

Sekhabalavaggo paṭhamo.

## 2. Balavaggo

### 1. Ananussutasuttavaṇṇanā

11. Dutiya (3.0004) paṭhame **pubbāhaṃ**, **bhikkhave**, **ananussutesu dhamme-sūti** ahaṃ, **bhikkhave**, **pubbe ananussutesu catūsu saccadhammesu**. **Abhiññāvosa-napāramippatto paṭijānāmīti** catūsu saccesu catūhi maggehi soḷasavidhassa kiccassa karaṇena abhijānitvā vosānapāramiṃ sabbesaṃ kiccānaṃ niṭṭhitattā katakiccabhāvaṃ pāraṃ patto paṭijānāmīti mahābodhipallaṅke attano āgamaṇiya-guṇaṃ dasseti. **Tathāgatassāti** aṭṭhahi kāraṇehi tathāgatassa. **Tathāgatabalānīti** yathā tehi gantabbaṃ, tatheva gatāni pavattāni ñāṇabalāni. **Āsabhaṃ ṭhānanti** seṭṭhaṭṭhānaṃ. **Sīhanādanti** abhītanādaṃ. **Brahmacakkanti** seṭṭhacakkaṃ. **Pavatte-tīti** katheti.

### 2. Kūṭasuttavaṇṇanā

12. Dutiye **sekhabalānīti** sekhānaṃ ñāṇabalāni. **Agganti** uttamaṃ. Sesabalāni gopānasiyo kūṭaṃ viya saṅgaṇhātīti **saṅgāhikaṃ**. Tāneva balāni saṃhatāni karo-tīti **saṅghātaniyaṃ**.

### 3. Saṃkhittasuttavaṇṇanā

13. Tatiye tattha muṭṭhassacce na kampaṭīti **satibalaṃ**. Uddhacce na kampaṭīti **samādhibalaṃ**.

### 4. Vitthatasuttavaṇṇanā

14. Catutthe **satinepakkenāti** ettha nepakkaṃ vuccati paññā, sā satiyā upakāra-kabhāvena gahitā.

### 5. Daṭṭhabbasuttavaṇṇanā

15. Pañcame savisayasmiṃyeva lokiyalokuttaradhamme kathetuṃ **kattha ca**, **bhikkhave**, **saddhābalaṃ daṭṭhabbanti-ādimāha**. Yathā hi cattāro seṭṭhiputtā,

rājāti rājapañcomesu sahāyesu “nakkhattaṃ kiḷissāmā”ti vīthiṃ otiṇṇesu ekassa seṭṭhiputtassa gehaṃ gatakāle itare cattāro (3.0005) tuṇhī nisīdanti, gehasāmikova “imesaṃ khādaniyaṃ bhojaniyaṃ detha, gandhamālālaṅkāradīni dethā”ti gehe vicāreti. Dutiyatatiyacatutthassa gehaṃ gatakāle itare cattāro tuṇhī nisīdanti, gehasāmikova “imesaṃ khādaniyaṃ bhojaniyaṃ detha, gandhamālālaṅkāradīni dethā”ti gehe vicāreti. Atha sabbapacchā rañño gehaṃ gatakāle kiñcāpi rājā sabbattha issaro, imasmiṃ pana kāle attano geheya “imesaṃ khādaniyaṃ bhojaniyaṃ detha, gandhamālālaṅkāradīni dethā”ti vicāreti, evamevaṃ saddhāpañcomesu balesu tesu sahāyesu ekato vīthiṃ otarantesu viya ekārammaṇe uppajjamānesupi yathā paṭhamassa gehe itare cattāro tuṇhī nisīdanti, gehasāmikova vicāreti, evaṃ sotāpattiyaṅgāni patvā adhimokkhalakkhaṇaṃ saddhābalameva jeṭṭhakaṃ hoti pubbaṅgamaṃ, sesāni tadanvayāni honti. Yathā dutiyassa gehe itare cattāro tuṇhī nisīdanti, gehasāmikova vicāreti, evaṃ sammappadhānāni patvā paggahalakkhaṇaṃ vīriyabalameva jeṭṭhakaṃ hoti pubbaṅgamaṃ, sesāni tadanvayāni honti. Yathā tatiyassa gehe itare cattāro tuṇhī nisīdanti, gehasāmikova vicāreti, evaṃ satipaṭṭhānāni patvā upaṭṭhānalakkhaṇaṃ satibalameva jeṭṭhakaṃ hoti pubbaṅgamaṃ, sesāni tadanvayāni honti. Yathā catutthassa gehe itare cattāro tuṇhī nisīdanti, gehasāmikova vicāreti, evaṃ jhānavimokkhe patvā avikkhepalakkhaṇaṃ samādhibalameva jeṭṭhakaṃ hoti pubbaṅgamaṃ, sesāni tadanvayāni honti. Sabbapacchā rañño gehaṃ gatakāle pana yathā itare cattāro tuṇhī nisīdanti, rājāva gehe vicāreti, evameva ariyasaccāni patvā pajānanalakkhaṇaṃ paññābalameva jeṭṭhakaṃ hoti pubbaṅgamaṃ, sesāni tadanvayāni hontīti evamidha pañca balāni missakāni kathitāni. Chaṭṭhaṃ uttānatthameva. Evaṃ purimavagge ca idha ca aṭṭhasu suttesu sekhabalāneva kathitāni. Karaṇḍakolavāsī mahādattatthero panāha- “heṭṭhā catūsu suttesu sekhabalāni kathitāni, upari catūsu asekkhabalāni”ti.

## 7. Paṭhamahitasuttavaṇṇanā

17. Sattame sīlādayo missakāva kathitā. **Vimuttīti** arahattaphalavimuttiyeva. **Vimuttiñāṇadassanaṃ** paccavekkhaṇañāṇaṃ, taṃ lokiyameva.

## 8-10. Dutiyahitasuttādivaṇṇanā

18-20. Aṭṭhame (3.0006) dussīlo bahussuto kathito, navame appassuto dussīlo, dasame bahussuto khīṇāsavoti.

Balavaggo dutiyo.

## 3. Pañcaṅgikavaggo

## 1. Paṭhama-agāraṇasuttavaṇṇanā

21. Tatiyassa paṭhame **asabhāgavuttikoti** asabhāgāya visadisāya jīvitavuttiyā samannāgato. **Ābhisamācārikaṃ dhammanti** uttamasamācārabhūtaṃ vattava-sena paññattasīlaṃ. **Sekhaṃ dhammanti** sekhapapaṇṇattisīlaṃ. **Silānīti** cattāri mahā-silāni. **Sammādiṭṭhinti** vipassanāsammādiṭṭhiṃ. **Sammāsamādhinti** maggasamā-dhiñceva phalasangāhāni. Imasmiṃ sutte silādāni missakāni kathitāni.

## 2. Duttiya-agāraṇasuttavaṇṇanā

22. Duttiye **sīlakkhandhanti** sīlarāsiṃ. Sesadvayepi eseṇa nayo. Ime pana tayopi khandhā missakāva kathitāni.

## 3. Upakkilesasuttavaṇṇanā

**23.** Tatiye na ca pabhassaranti na ca pabhāvantaṃ. **Pabhaṅgu cāti** pabhijjana-sabhāvaṃ. **Ayoti** kāḷalohaṃ. **Lohanti** ṭhapetvā idha vuttāni cattāri avasesaṃ lohaṃ. **Sajjhanti** rajataṃ. **Cittassāti** cātubhūmakakusalacittassa. Tebhūmakassa tāva upakkilesā hontu, lokuttarassa kathaṃ hontīti? Uppajjituṃ appadānena. Yadaggena hi uppajjituṃ na denti, tadaggeneva te lokiyassapi lokuttarassapi upakkilesā nāma honti. **Pabhaṅgu cāti** ārammaṇe cuṇṇavicuṇṇabhāvūpagamanena bhijjanasa-bhāvaṃ. **Sammā samādhiyati āsavānaṃ khayāyā** Ti āsavānaṃ khayasaṅkhā-tassa arahattassa atthāya hetunā kāraṇena samādhiyati. Ettāvatā (3.0007) cittaṃ visodhetvā arahatte patiṭṭhitaṃ khīṇāsavaṃ dasseti. Idānissa abhiññāpaṭivedhaṃ dassento **yassa yassa cāti**-ādimāha. Taṃ uttānatthamevāti.

#### 4. Dussīlasuttavaṇṇanā

**24.** Catutthe **hatūpanisoti** hata-upanissayo hatakāraṇo. **Yathābhūtañānadassananti** nāmarūpaparicchedañāṇaṃ ādiṃ katvā taruṇavipassanā. **Nibbidāvirāgoti** nibbidā ca virāgo ca. Tattha nibbidā balavavipassanā, virāgo maggo. **Vimuttiñāṇadassananti** phalavimutti ca paccavekkhaṇañāṇaṃca.

#### 5. Anuggahitasuttavaṇṇanā

**25.** Pañcame **sammādiṭṭhīti** vipassanāsammādiṭṭhi. **Cetovimuttiphālāti**-ādīsu **cetovimuttīti** maggaphalasaṃmādhī. **Paññāvimuttīti** phalañāṇaṃ. **Sīlānuggahitā** Ti sīlena anuggahitā anurakkhitā. **Sutānuggahitā** Ti bāhusaccena anuggahitā. **Sākacchānuggahitā** Ti dhammasākacchāya anuggahitā. **Samathānuggahitā** Ti cittekaggatāya anuggahitā.

Imassa panatthassa āvibhāvatthaṃ madhurambabījaṃ ropetvā samantā mariyādaṃ bandhitvā kālānukālaṃ udakaṃ āsiñcitvā kālānukālaṃ mūlāni sodhetvā kālānukālaṃ patitapāṇake hāretvā kālānukālaṃ makkaṭajālaṃ luñcitvā ambaṃ paṭijagganto puriso dassetabbo. Tassa hi purisassa madhurambabījaropanaṃ viya vipassanāsammādiṭṭhi daṭṭhabbā, mariyādabandhanaṃ viya sīlena anuggaṇhanaṃ, udakāsecanaṃ viya sutena anuggaṇhanaṃ, mūlaparisodhanaṃ viya sākacchāya anuggaṇhanaṃ, pāṇakaharaṇaṃ viya jhānavipassanāpāripanthikasodhanavasena samathānuggaṇhanaṃ, makkaṭajālaluñcanaṃ viya balavavipassanānuggaṇhanaṃ, evaṃ anuggahitassa rukkhassa khippameva vaḍḍhitvā phalappadānaṃ viya imehi sīlādīhi anuggahitāya mūlasammādiṭṭhiyā khippameva maggavasena vaḍḍhitvā cetovimuttipaññāvimuttiphālappadānaṃ veditabbaṃ.

#### 6. Vimuttāyatanasuttavaṇṇanā

**26.** Chaṭṭhe (3.0008) **vimuttāyatanānīti** vimuccanakāraṇāni. **Yatthā** Ti yesu vimuttāyatanesu. **Satthā dhammaṃ desetīti** catusaccadhammaṃ desetī. **Atthapaṭisaṃvedinoti** pāḷi-atthaṃ jānantassa. **Dhammapaṭisaṃvedinoti** pāḷiṃ jānantassa. **Pāmo-**

**jjanti** taruṇapīti. **Pīti**ti tuṭṭhākārabhūtā balavapīti. **Kāyoti** nāmakāyo. **Passambhatī**ti paṭippassambhati. **Sukhaṃ vedetī**ti sukhaṃ paṭilabhati. **Cittaṃ samādhiyatī**ti arahattaphalasangāhāni samādhiyati. Ayañhi taṃ dhammaṃ suṇanto āgatāgata-  
 ṭṭhāne jhānavipassanāmaggaṃ paṭipattāni jānāti, tassa evaṃ jānato pīti uppajjati. So  
 tassā pītiyā antarā osakkituṃ na dento upacāra-kammaṭṭhāniko hutvā vipassanaṃ  
 vaḍḍhetvā arahattaṃ pāpuṇāti. Taṃ sandhāya vuttaṃ- “cittaṃ samādhiyatī”ti.  
 Sesesupī eseva nayo. Ayaṃ pana viseso- **samādhinimittanti** aṭṭhatimsāya āra-  
 mmaṇesu aññataro samādhiyeva samādhinimittaṃ. **Suggahitaṃ hotī**ti-ādisu āca-  
 riyassa santike kammaṭṭhānaṃ uggaṇhantena suṭṭhu gahitaṃ hoti suṭṭhu manasi-  
 kataṃ suṭṭhu upadhāritaṃ. **Suppaṭividdhaṃ paññāyāti** paññāya suṭṭhu  
 paccakkhaṃ kataṃ. **Tasmiṃ dhammeti** tasmiṃ kammaṭṭhānapāḷidhamme. Iti  
 imasmiṃ sutte pañcapi vimuttāyatanāni arahattaṃ pāpetvā kathitānīti.

## 7. Samādhisuttavaṇṇanā

**27.** Sattame **appamāṇanti** pamāṇakaradhammarahitaṃ lokuttaraṃ. **Nipakā pati-**  
**ssatāti** nepakkena ca satiyā ca samannāgatā hutvā. **Pañca ñāṇānī**ti pañca paccavekkhaṇāñāṇāni. **Paccattaññeva uppajjantī**ti attaniyeva uppajjanti. **Ayaṃ samādhi paccuppannasukho cevāti**-ādisu arahattaphalasangāhāni adhippeto. Maggasamādhīti vadantiyeva. So hi appitappitakkhaṇe sukhattā **paccuppannasukho**, purimo purimo pacchimassa pacchimassa samādhisukhassa paccayattā **āyatim sukhavipāko**, kilesehi ārakattā **ariyo**, kāmāmisavaṭṭāmisalokāmisānaṃ abhāvā **nirāmisō**. Buddhādīhi mahāpurisehi sevitattā **akāpurisasevito**. Aṅgasanta-  
 tāya ārammaṇasantatāya sabbakilesadarathasantatāya ca **santo**, atappaniya-  
 ṭṭhena **paṇīto**. Kilesappaṭippassaddhiyā laddhattā kilesappaṭippassaddhibhāvaṃ  
 vā laddhattā **paṭippassaddhaladdho**. Paṭippassaddhaṃ paṭippassaddhīti hi idaṃ  
 atthato ekaṃ. Paṭippassaddhakilesena (3.0009) vā arahatā laddhattāpi **paṭippassa-**  
**ddhaladdho**, ekodibhāvena adhigatattā ekodibhāvameva vā adhigatattā **ekodibhā-**  
**vādhigato**. Appaguṇasāsavasamādhi viya sasaṅkhārena sappayogena cittena  
 paccanīkadhamme niggayha kilese vāretvā anadhigatattā **na sasaṅkhāraniggayha-**  
**vāritagato**. Taṃ samādhim samāpajjanto tato vā vuṭṭhahanto sativepullappattattā  
**satova samāpajjati, satova vuṭṭhahati**. Yathāparicchinna-kālavasena vā sato samā-  
 pajjati, sato vuṭṭhahati. Tasmā yadettha “ayaṃ samādhi paccuppannasukho ceva  
 āyatiñca sukhavipāko cā”ti evaṃ paccavekkhamānassa paccattaṃyeva aparappa-  
 ccayañāṇaṃ uppajjati, taṃ ekaṃ ñāṇaṃ. Eseva nayo sesesu. Evaṃ imāni pañca  
 ñāṇāni paccattaññeva uppajjantīti.

## 8. Pañcaṅgikasuttavaṇṇanā

**28.** Aṭṭhame **ariyassāti** vikkhambhanavasena pahīnakilesehi ārakā ṭhitassa. **Bhāvanam desessāmī**ti brūhanaṃ vaḍḍhanaṃ pakāsayissāmi. **Imameva kāyanti** imaṃ karajakāyaṃ. **Abhisandeti**ti temeti sneheti, sabbattha pavattapītisukhaṃ

karoti. **Parisandetīti** samantato sandeti. **Paripūretīti** vāyunā bhastam viya pūreti. **Parippharatīti** samantato phusati. **Sabbāvato kāyassāti** assa bhikkhuno sabbako-  
ṭṭhāsavato kāyassa kiñci upādinna kasantatipavattiṭṭhāne chavimaṃsalohitānu-  
gataṃ aṇumattampi ṭṭhānaṃ paṭhamajjhānasukhena aphutaṃ nāma na hoti.

**Dakkhoti** cheko paṭibalo nhāniyacunṇāni kātuñceva yojetuñca sannetuñca. **Kaṃsathāleti** yena kenaci lohena katabhājane. Mattikābhājanaṃ pana thiraṃ na hoti, sannentassa bhijjati. Tasmā taṃ na dassesi. **Paripphosakaṃ paripphosa-**  
**kanti** siñcitvā siñcitvā. **Sanneyyāti** vāmahatthena kaṃsathālaṃ gahetvā dakkhiṇa-  
hatthena pamāṇayuttaṃ udakaṃ siñcitvā siñcitvā parimaddanto piṇḍaṃ kareyya. **Snehānugatāti** udakasinehena anugata. **Snehaparetāti** udakasinehena parigga-  
hitā. **Santarabāhirāti** (3.0010) saddhiṃ antopadesena ceva bahipadesena ca, sabbatthakameva udakasinehena phuṭāti attho. **Na ca pagghariṇīti** na bindu bindu udakaṃ paggharati, sakkā hoti hatthenapi dvīhipi aṅgulīhi gahetuṃ ovaṭṭikāyapi kātunti attho.

Dutiyaajjhānasukha-upamāyaṃ **ubbidodakoti** ubbhinna-udako, na heṭṭhā ubbhi-  
jjitvā uggacchana-udako, antoyeva pana uppajjana-udakoti attho. **Āyamukhanti**  
āgamanamaggo. **Devoti** megho. **Kālena kālanti** kāle kāle, anvadḍhamāsaṃ vā  
anudasāhaṃ vāti attho. **Dhāranti** vuṭṭhiṃ. **Nānuppaveccheyyāti** nappaveseyya, na  
vasseyyāti attho. **Sītā vāridhārā ubbhijjivāti** sītā vāridhārā taṃ rahadaṃ pūraya-  
mānā ubbhijjivā. Heṭṭhā uggacchana-udakañhi uggantvā bhijjantaṃ udakaṃ  
khobheti, catūhi disāhi pavisana-udakaṃ purāṇapaṇṇatiṇakaṭṭhadaṇḍakādīhi  
udakaṃ khobheti. Vuṭṭhi-udakaṃ dhārānipātabubbuḷakehi udakaṃ khobheti,  
sannisinnameva pana hutvā iddhinimmitamiva uppajjamānaṃ udakaṃ imaṃ  
padesaṃ pharati, imaṃ na pharatīti natthi. Tena aphuṭokāso nāma na hoti. Tattha  
rahado viya karajakāyo, udakaṃ viya dutiyaajjhānasukhaṃ, sesaṃ purimanaye-  
neva veditabbaṃ.

Tatiyaajjhānasukha-upamāyaṃ uppalāni ettha santīti **uppalinī**. Sesapadadva-  
yepi eseva nayo. Ettha ca setarattanīlesu yaṃkiñci uppalameva, ūnakasatapattaṃ  
puṇḍarīkaṃ, satapattaṃ padumaṃ. Pattaniyamaṃ vā vināpi setaṃ padumaṃ,  
rattaṃ puṇḍarīkanti ayamettha vinicchayo. **Udakānuggatānīti** udakato na ugga-  
tāni. **Antonimuggaposinīti** udakatalassa anto nimuggāniyeva hutvā posanti  
vaḍḍhantīti attho. Sesaṃ purimanayeneva veditabbaṃ.

Catutthajjhāna-upamāyaṃ **parisuddhena cetasā pariyodātenā** Ti ettha nirupa-  
kkilesaṭṭhena parisuddhaṃ, pabhassaraṭṭhena pariyodātaṃ veditabbaṃ. **Odātena**  
**vatthenā** ti idaṃ utupharaṇatthaṃ vuttaṃ. Kiliṭṭhavatthena hi utupharaṇaṃ na hoti,  
tañkhaṇadhotaparisuddhena utupharaṇaṃ balavaṃ hoti. Imissā hi upamāya  
vatthaṃ viya karajakāyo, utupharaṇaṃ viya catutthajjhānasukhaṃ. Tasmā yathā  
sunhātassa purisassa parisuddhaṃ vatthaṃ sasīsaṃ pārupitvā nisinnassa (3.0011)  
sarīrato utu sabbameva vatthaṃ pharati, na koci vatthassa aphuṭokāso hoti, evaṃ  
catutthajjhānasukhena bhikkhuno karajakāyassa na koci okāso aphuṭo hotīti eva-  
mettha attho daṭṭhabbo. Catutthajjhānacittameva vā vatthaṃ viya, taṃsamuṭṭhāna-  
rūpaṃ utupharaṇaṃ viya. Yathā hi katthaci katthaci odātavatthe kāyaṃ aphusa-



ntepi taṃsamuṭṭhānena utunā sabbatthakameva kāyo phuṭo hoti, evaṃ catutthajjhānasamuṭṭhāpitena sukhumarūpena sabbatthakameva bhikkhuno kāyo phuṭo hotīti evamettha attho daṭṭhabbo.

**Paccavekkhaṇanimittanti** paccavekkhaṇaññaṃameva. **Suggahitaṃ hotīti** yathā tena jhānavipassanāmaggā suṭṭhu gahitā honti, evaṃ paccavekkhaṇanimittaṃ aparāparena paccavekkhaṇanimittena suṭṭhu gahitaṃ hoti. **Añño vā aññanti** añño eko aññaṃ ekaṃ, attanoyeva hi attā na pākaṭo hoti. **Ṭhito vā nisinnanti** ṭhitakassāpi nisinno pākaṭo hoti, tenevaṃ vuttaṃ. Sesesupi eseva nayo. **Udakamaṇikoti** samekhalā udakacāṭi. **Samatittikoti** samabharito. **Kākapeyyāti** mukhavatṭiyaṃ nisīditvā kākena gīvaṃ anāmetvāva pātabbo.

**Subhūmiyanti** samabhūmiyaṃ. “Subhūme sukhette vihatakhāṇuke bījāni patiṭṭhāpeyyā”ti (dī. ni. 2.438) ettha pana maṇḍabhūmi subhūmiti āgatā. **Catumahāpātheti** dvinnaṃ mahāmaggānaṃ vinivijjhivā gataṭṭhāne. **Ājaññarathoti** vinīta-assaratho. **Odhasapatodoti** yathā rathaṃ abhiruhivā ṭhitena sakkā hoti gaṇhituṃ, evaṃ ālambanaṃ nissāya tiriyato ṭhapitapatodo. **Yoggācariyoti** assācariyo. Sveva assadamme sāretīti **assadammasārathi**. **Yenicchakanti** yena yena maggena icchati. **Yadicchakanti** yaṃ yaṃ gatiṃ icchati. **Sāreyyāti** ujukaṃ purato peseyya. **Paccāsāreyyāti** paṭinivatteyya.

Evaṃ heṭṭhā pañcahi aṅgehi samāpattiparikammaṃ kathetvā imāhi tīhi upamāhi paguṇasamāpattiyā ānisaṃsaṃ dassetvā idāni khīṇāsavassa abhiññāpaṭi-pāṭiṃ dassetuṃ **so sace ākaṅkhatīti**-ādimāha. Taṃ uttānatthamevāti.

## 9. Caṅkamasuttavaṇṇanā

29. Navame (3.0012) **addhānakkhamo hotīti** dūraṃ addhānamaggaṃ gacchanto khamati, adhivāsetuṃ sakkoti. **Padhānakkhamoti** vīriyakkhamo. **Caṅkamādhigato samādhīti** caṅkamaṃ adhiṭṭhahantena adhigato aṭṭhannaṃ samāpattīnaṃ aññatarasamādhī. **Ciraṭṭhitiko hotīti** ciraṃ tiṭṭhati. Ṭhitakena gahitanimittāñhi

nisinnassa nassati, nisinnena gahitanimittam nipannassa. Caṅkamaṃ adhiṭṭhahantena calitārammaṇe gahitanimittam pana ṭhitassapi nisinnassapi nipannassapi na nassatīti.

## 10. Nāgitasuttavaṇṇanā

**30.** Dasame uddham uggatattā ucco, rāsibhāvena ca mahā saddo etesanti **uccā-saddamahāsaddā**. Tesu hi uggatuggatesu khattiyamahāsāla-brāhmaṇamahāsālādīsu mahāsakkāram gahetvā āgatesu “asukassa okāsam detha, asukassa okāsam dethā”ti vutte “mayam paṭhamataram āgatā, mayham paṭhamataram āgatā, natthi okāso”ti evam aññamaññam kathentānam saddo ucco ceva mahā ca ahosi. **Kevaṭṭā maññe macchavilopeti** kevaṭṭā viya macchavilope. Tesañhi macchaccham gahetvā āgatānam vikkiṇanaṭṭhāne “mayham detha mayham dethā”ti vadato mahājanassa evarūpo saddo hoti. **Miḷhasukhanti** asucisukham. **Middhasukhanti** niddāsukham. **Lābhasakkārasilokasukhanti** lābhasakkārañceva vaṇṇabhāṇaṇca nissāya uppannasukham.

**Taṃninnāva gamissantīti** tam tadeva bhagavato gataṭṭhānam gamissantī, anubandhissantiyevāti vuttam hoti. **Tathā hi, bhante, bhagavato sīlapaññāṇanti** yasmā tathāvidham tumhākam sīlañca ñāṇaṇcāti attho. **Mā ca mayā yasoti** mayā saddhim yasopi mā samāgacchatu. **Piyānanti** piyajanānam. **Eso tassa nissandoti** esā piyabhāvassa nipphatti. **Asubhanimittānuyoganti** asubhakammaṭṭhānānuyogam. **Subhanimitteti** rāgaṭṭhāniye iṭṭhārammaṇe. **Eso tassa nissandoti** esā tassa asubhanimittānuyogassa nipphatti. Evamimasmim sutte imesu pañcasu ṭhānesu vipassanāva kathitāti.

Pañcaṅgikavaggo tatiyo.

## 4. Sumanavaggo

### 1. Sumanasuttavaṇṇanā

**31.** Catutthassa (3.0013) paṭhame **sumanā rājakumārīti** mahāsakkāram katvā patthanam patthetvā evam laddhanāmā rājakaññā. Vipassisammāsambuddhakālasimim hi nāgaresu “yuddhampi katvā sathāram amhākam gaṇhissāmā”ti senāpatim nissāya buddhappamukham saṅgham labhitvā paṭipāṭiyā puññāni kātuṃ āraddhesu sabbapaṭhamadivaso senāpatissa vāro ahosi. Tasmim divase senāpati mahādānam sajjetvā “ajja yathā añño koci ekabhikkhampi na deti, evam rakkhathā”ti samantā purise ṭhapesi. Tamdivasam seṭṭhibhāriyā rodamānā pañcahi kumārīkāsatehi saddhim kilītvā āgataṃ dhītaram āha- “sace, amma, tava pitā jīveyya, ajjāham paṭhamam dasabalam bhojeyyan”ti. Sā tam āha- “amma, mā

cintayi, ahaṃ tathā karissāmi, yathā buddhappamukho saṅgho amhākaṃ paṭhamam bhikkham bhuñjissati”ti. Tato satahassagghanikāya suvaṇṇapātiyā nirudakapāyāsaṃ pūretvā sappimadhusakkharādīhi abhisankharitvā aññissā pātiyā paṭikujjitvā taṃ sumanamālāguḷehi parikkhipitvā mālāguḷasadiṣaṃ katvā bhagavato gāmaṃ pavisanavelāya sayameva ukkhipitvā dhātigaṇaparivutā gharā nikkhami.

Antarāmagge senāpatino upaṭṭhākā, “amma, mā ito āgamā”ti vadanti. Mahāpuññā nāma manāpakathā honti, na ca tesam punappunaṃ bhaṇantānaṃ kathā paṭikkhipitum sakkā hoti. Sā “cūḷapita, mahāpita, mātula, kissa tumhe gantum na dethā”ti āha. Senāpatinā “aññassa kassaci khādaniyaṃ bhojanīyaṃ mā dethā”ti ṭhapitamha, ammāti. Kiṃ pana mama hatthe khādaniyaṃ bhojanīyaṃ passathāti? Mālāguḷam passāmāti. Kiṃ tumhākaṃ senāpati mālāpūjampi katum na detīti? Deti, ammāti. Tena hi apethāti bhagavantaṃ upasaṅkamtivā “mālāguḷam gaṇhatha bhagavā”ti āha. Bhagavā ekaṃ senāpatissa upaṭṭhākaṃ oloketvā mālāguḷam gaṇhāpesi. Sā bhagavantaṃ vanditvā “bhavābhavābhinibbattiyaṃ me sati paritassanaḷivitaṃ nāma mā hotu, ayaṃ sumanamālā viya nibbattanibbattaṭṭhāne piyāva (3.0014) homi, nāmena ca sumanāyevā”ti patthanaṃ katvā satthārā “sukhinī hohī”ti vuttā vanditvā padakkhiṇam katvā pakkāmi.

Bhagavāpi senāpatissa geḥam gantvā paññattāsane nisīdi. Senāpati yāgum gahetvā upagañchi, satthā hatthena pattam pidahi. Nisinno, bhante, bhikkhusaṅghoti. Atthi no eko antarāmagge piṇḍapāto laddhoti? Mālam apanetvā piṇḍapātam addasa. Cūḷupaṭṭhāko āha- “sāmi mālāti maṃ vatvā mātugāmo vañcesi”ti. Pāyāso bhagavantaṃ ādiṃ katvā sabbabhikkhūnaṃ pahosi. Senāpati attano deyyadhammaṃ adāsi. Satthā bhattakiccaṃ katvā maṅgalaṃ vatvā pakkāmi. Senāpati “kā nāma sā piṇḍapātamadāsi”ti pucchi. Seṭṭhidhītā sāmīti. Sappaññā itthī, evarūpāya ghare vasantiyā purisassa saggasampatti nāma na dullabhāti kaṃ ānetvā jeṭṭhakaṭṭhāne ṭhapesi?

Sā pitugehe ca senāpatigehe ca dhanam gahetvā yāvatāyukaṃ tathāgatassa dānaṃ datvā puññāni karitvā tato cutā kāmāvacaradevaloke nibbatti. Nibbattakkhaṇeyeva jāṇupparamāṇena odhinā sakalam devalokaṃ paripūrayamānaṃ sumanavassaṃ vassi. Devatā “ayaṃ attanāva attano nāmaṃ gahetvā āgatā”ti “sumanā devadhītā”tvevassā nāmaṃ akamsu. Sā ekanavutikappe devesu ca manussesu ca saṃsarantī nibbattanibbattaṭṭhāne avijahitasumanavassā “sumanā sumanā”tveva nāmā ahosi. Imasmiṃ pana kāle kosalarañño aggamaḥesiyā kucchismiṃ paṭisandhiṃ gaṇhi. Tāpi pañcasatā kumārikā taṃdivasaññeva tasmim tasmim kule paṭisandhiṃ gahetvā ekadivaseyeva sabbā mātukucchito nikkhamimṃsu. Taṃkhaṇaṃyeva jāṇupparamāṇena odhinā sumanavassaṃ vassi. Taṃ disvā rājā “pubbe katābhinihārā esā bhavissati”ti tuṭṭhamānaso “dhītā me attanāva attano nāmaṃ gahetvā āgatā”ti sumanātvevassā nāmaṃ katvā “mayham dhītā na ekikāva nibbattissati”ti nagaram vicināpento ‘pañca dārikāsātāni jātāni”ti sutvā sabbā attanāva posāpesi. Māse māse sampate “ānetvā mama dhītu dassethā”ti āha. Evamesā mahāsakkāram katvā patthanaṃ patthetvā evaṃladdhanā-

māti veditabbā.

Tassā (3.0015) sattavassikakāle anāthapiṇḍikena vihāraṃ niṭṭhāpetvā tathāgata-  
tassa dūte pesite satthā bhikkhusaṅghaparivāro sāvattiṃ agamāsi. Anāthapi-  
ṇḍiko gantvā rājānaṃ evamāha- “mahārāja, satthu idhāgamaṃ amhākampi  
maṅgalaṃ tumhākampi maṅgalameva, sumanaṃ rājakumāriṃ pañcahi dārikāsa-  
tehi saddhiṃ puṇṇaghaṭe ca gandhamālādīni ca gāhāpetvā dasabalassa paccu-  
ggamaṃ pesethā”ti. Rājā “sādhu mahāsetṭhi”ti tathā akāsi. Sāpi raññā vuttana-  
yeneva gantvā satthāraṃ vanditvā gandhamālādīhi pūjetvā ekamantaṃ aṭṭhāsi.  
Satthā tassā dhammaṃ desesi. Sā pañcahi kumārikāsatehi saddhiṃ sotāpatti-  
phale paṭiṭṭhāsi. Aññānīpi pañca dārikāsatāni pañca mātuḡāmasatāni pañca upā-  
sakasatāni tasmīṃyeva khaṇe sotāpattiphalaṃ pāpuṇiṃsu. Evaṃ tasmīṃ divase  
antarāmaggeyeva dve sotāpannasahassāni jātāni.

**Yena bhagavā tenupasaṅkamīti** kasmā upasaṅkamīti? Pañhaṃ pucchitukāma-  
tāya. Kassapasammāsambuddhakāle kira sahāyakā dve bhikkhū ahesuṃ. Tesu  
eko sāraṇiyadhammaṃ pūreti, eko bhattaggavattaṃ. Sāraṇiyadhammapūra-  
ko itaraṃ āha- “āvuso, adinnassa phalaṃ nāma natthi, attanā laddhaṃ paresaṃ  
datvā bhujjituṃ vaṭṭati”ti. Itaro pana āha- “āvuso, tvaṃ na jānāsi, deyyadhammaṃ  
nāma vinipātetuṃ na vaṭṭati, attano yāpanamattameva gaṇhantena bhattagga-  
vattaṃ pūretuṃ vaṭṭati”ti. Tesu ekopi ekaṃ attano ovāde otāretuṃ nāsakkhi.  
Dvepi attano paṭipattiṃ pūretvā tato cutā kāmāvacaradevaloke nibbattiṃsu.  
Tattha sāraṇiyadhammapūra-ko itaraṃ pañcahi dhammehi adhigaṇhi.

Evaṃ te devesu ca manussesu ca saṃsarantā ekaṃ buddhantaraṃ khepetvā  
imasmīṃ kāle sāvattiyaṃ nibbattiṃsu. Sāraṇiyadhammapūra-ko kosalarañño  
aggamahesiyā kucchismiṃ paṭisandhiṃ gaṇhi, itaro tassāyeva upaṭṭhāka-itthiyā  
kucchismiṃ paṭisandhiṃ gaṇhi. Te dvepi janā ekadivaseneva jāyīṃsu. Te nāma-  
ggahaṇadivase nhāpetvā sirigabbhe nipajjāpetvā dvinnampi mātaro bahi  
sakkāraṃ saṃvidahiṃsu. Tesu sāraṇiyadhammapūra-ko akkhīni ummīletvā  
mahantaṃ setacchattaṃ supaññattaṃ sirisayanaṃ alaṅkatapaṭiyattañca nive-  
sanaṃ disvā “ekasmīṃ rājakule nibbattosmi”ti aññāsi. So “kiṃ (3.0016) nu kho  
kammaṃ katvā idha nibbattosmi”ti āvajjento “sāraṇiyadhammanissandenā”ti  
ñatvā “sahāyo me kuhiṃ nu kho nibbatto”ti āvajjento nīcasayane nipannaṃ disvā  
“ayaṃ bhattaggavattaṃ pūremīti mama vacanaṃ na gaṇhi, imasmīṃ idāni taṃ  
ṭhāne niggaṇhituṃ vaṭṭati”ti “samma mama vacanaṃ nākāsi”ti āha. Atha kiṃ  
jātanti. Passa mayhaṃ sampattiṃ, setacchattassa heṭṭhā sirisayane nipannosmi,  
tvaṃ nīcamañce thaddha-attharaṇamate nipannosīti. Kiṃ pana tvaṃ etaṃ  
nissāya mānaṃ karosi, nanu veḷusalākāhi katvā pilotikāya paliveṭṭhitāṃ sabba-  
metaṃ pathavīdhātumattamevāti?

Sumanā tesāṃ kathaṃ sutvā “mama bhātikānaṃ santike koci natthi”ti tesāṃ  
samīpaṃ gacchanti dvāraṃ nissāya ṭhitā “dhātū”ti vacanaṃ sutvā “idaṃ dhātūti  
vacanaṃ bahiddhā natthi. Mama bhātikā samaṇadevaputtā bhavissantī”ti cintetvā-  
“sacāhaṃ ‘ime evaṃ kathenti’ti mātāpitūnaṃ kathessāmi, ‘amanussā ete’ti nīharā-  
pessanti. Idaṃ kāraṇaṃ aññassa akathetvā kaṅkhacchedakaṃ purisaheraññikaṃ

mama pitaraṃ mahāgotamadasabalamaṃyeva pucchissāmi”ti bhuttapātarāsā rājānaṃ upasaṅkavitvā “dasabalassa upaṭṭhānaṃ gamissāmi”ti āha. Rājā pañca rathasatāni yoḷāpesi. Jambudīpatalasmiñhi tissova kumāriyo pitūnaṃ santikā pañca rathasatāni labhiṃsu- bimbisārarañño dhītā cundī rājakaññā, dhanañca- yassa seṭṭhissa dhītā visākhā, ayaṃ sumanā rājakaññāti. Sā gandhamālaṃ ādāya rathe ṭhitā pañcarathasataparivārā “imaṃ pañhaṃ pucchissāmi”ti yena bhagavā tenupasaṅkami.

**Idhassūti** idha bhavyeṃ. **Eko dāyakoti** eko attanā laddhalābhato parassa datvā paribhuñjanako sāraṇiyadhammapūraḷo. **Eko adāyakoti** eko attanā laddhaṃ parassa adatvā paribhuñjanako bhattaggavattapūraḷo. **Devabhūtānaṃ pana nesanti** devabhūtānaṃ etesaṃ. **Adhigaṇhātīti** adhibhavitvā gaṇhāti ajjhottharati atiseti. **Āhipateyyenāti** jeṭṭhakakāraṇena. **Imehi pañcahi ṭhānehīti** sesadeve sakko devarājā viya imehi pañcahi kāraṇehi adhigaṇhāti. **Mānusakenāti-ādīsu** (3.001) āyunā mahākassapatthero viya bākulatthero viya ānandatthero viya ca, vaṇṇena mahāgatimba-abhayatthero viya bhaṇḍāgāra-amacco viya ca, sukkena raṭṭhapāla- kulaputto viya soṇasetṭhiputto viya yasadāraḷo viya ca, yasena dhammāsoko viya, tathā āhipaccenāti imehi pañcahi kāraṇehi atireko jeṭṭhako hoti.

**Yācitova bahulanti** bākulatthera-sīvalitthera-ānandattherādayo viya yācitova bahulaṃ cīvarādīni paribhuñjatīti imehi kāraṇehi atireko hoti jeṭṭhako. **Yadidaṃ vimuttiyā vimuttinti** yaṃ ekassa vimuttiyā saddhiṃ itarassa vimuttiṃ ārabbhā nānākaraṇaṃ vattabbaṃ bhavyeṃ, taṃ na vadāmīti attho. Sattavassikadāraḷo vā hi vimuttiṃ paṭivijjhatu vassasatikatthero vā bhikkhu vā bhikkhunī vā upāsako vā upāsikā vā devo vā māro vā brahmā vā, paṭividdhalokuttaramagge nānattaṃ nāma natthi. **Alamevāti** yuttameva. **Yatra hi nāmāti** yāni nāma.

**Gacchaṃ ākāśadhātuyāti** ākāśena gacchanta. **Saddhoti** ratanattayaguṇānaṃ saddhātā. **Thanayanti** gajjanta. **Vijjumālīti** mālāsadisāya meghamukhe carantiyā vijjulātāya samannāgato. **Satakkakūti** satakūṭo, ito cito ca uṭṭhitena valāhakakūṭa- satena samannāgatoti attho. **Dassanasampannoti** sotāpanno. **Bhogaparibyūḷhoti** udakoghena viya dānavasena dīyamānehi bhogehi paribyūḷho, devalokaṃ sampā- pitoti attho. **Peccāti** paraloke. **Sagge pamodatīti** yasmīṃ sagge uppajjati, tattheva modatīti.

## 2. Cundīsuttavaṇṇanā

**32.** Dutiye **pañcahi rathasatehīti** bhuttapātarāsā pitu santikaṃ pesetvā pañca rathasatāni yo jāpetvā tehi parivutāti attho. **Upasaṅkamīti** bhātarā saddhiṃ pavattitaṃ pañhasākacchaṃ pucchissāmīti gandhamālacuṇṇādīni ādāya upasaṅkami. **Yadeva so hotīti** yadā eva so hoti. Atha vā yo eva so hoti. **Ariyakantāni sīlāni** maggaphalasampayuttāni (3.0018) sīlāni. Tāni hi ariyānaṃ kantāni honti, bhavāntarepi na pariccajanti. Sesāṃ catukkanipāte aggappasādasutte vuttanayeneva veditabbaṃ.

### 3. Uggahasuttavaṇṇanā

**33.** Tatiye **bhaddiyeti** bhaddiyanagare. **Jātiyāvaneti** sayamaṃjāte aropite himavāntena saddhiṃ ekābaddhe vanasaṇḍe, taṃ nagaraṃ upanissāya tasmaṃ vane viharatīti attho. **Attacattutthoti** attanā cattuttho. Kasmā panesa bhagavantaṃ attacattutthaṃyeva nimantesi? Gehe kirassa maṅgalaṃ mahantaṃ, tattha mahāntena saṃvidhānena bahū manussā sannipatissanti. Te bhikkhusaṅghaṃ parivisāntena dussaṅgahā bhavissanti attacattutthaṃyeva nimantesi. Api cassa evampi ahosi—“daharakumārikāyo mahābhikkhusaṅghamajjhe satthari ovadante olināmanā ovādaṃ gaheṭṭuṃ na sakkuṇeyyūn”ti. Imināpi kāraṇena attacattutthameva nimantesi. **Ovadamū tāsaṃ, bhanteti**, bhante bhagavā, etāsaṃ ovadamū, etā ovadamūti attho. Upayogattasmiñhi etāsaṃ sāmivacanaṃ. **Yaṃ tāsaṃti** yaṃ ovādānusāsanaṃ etāsaṃ. Evañca pana vatvā so seṭṭhi “imā mama santike ovādaṃ gaṇhamānā harāyeyyūn”ti bhagavantaṃ vanditvā pakkāmi.

**Bhattūti** sāmikassa. **Anukampaṃ upādāyāti** anuddayaṃ paṭicca. **Pubbuṭṭhāyiniyoti** sabbapaṭhamāṃ uṭṭhānasīlā. **Pacchānipātiniyoti** sabbapaccā nipajjanasīlā. Itthiyā hi paṭhamataraṃ bhūñjitvā sayanaṃ āruyha nipajjituṃ na vaṭṭati, sabbe pana gehaparijane bhojetvā upakaraṇabhaṇḍaṃ saṃvidhāya gorūpādīni āgatānāgatāni ñatvā sve kattabbakammaṃ vicāretvā kuñcīkāmuddikaṃ hatthe katvā sace bhojanaṃ atthi, bhūñjitvā, no ce atthi, aññaṃ pacāpetvā sabbe santappetvā pacchā nipajjituṃ vaṭṭati. Nipannāyapi yāva sūriyuggamanā niddāyituṃ na vaṭṭati, sabbapaṭhamāṃ pana uṭṭhāya dāsakammakare pakkosāpetvā “idañcidañca kammaṃ karoṭhā”ti kammantaṃ vicāretvā dhenuyo duhāpetvā sabbaṃ gehe kattabbakiccaṃ attano paccakkhaṃyeva kātuṃ vaṭṭati (3.0019). Etamatthaṃ sandhāya “pubbuṭṭhāyiniyo pacchānipātiniyo”ti āha. “**Kiṃkārapaṭṭissāviniyo** Ti kiṃ karoma kiṃ karomā”ti mukhaṃ oloketvā vicāraṇasīlā. **Manāpacāriniyoti** manāpaṃyeva kiriyaṃ karaṇasīlā. **Piyavādinīyoti** piyameva vacanaṃ vādanasīlā. **Pūjessāmāti** catupaccayapūjāya pūjayissāma.

**Abbhāgateti** attano santikaṃ āgate. **Āsanodakena paṭipūjessāmāti** āsanena ca pādadhovana-udakena ca pūjayissāma. Ettha ca mātāpitūnaṃ devasikaṃ sakkāro kātabbo. Samaṇabrāhmaṇānaṃ pana abbhāgatānaṃ āsanaṃ datvā pādadhovanañca dātābbaṃ, sakkāro ca kātabbo.

**Uṇṇāti** eḷakalomaṃ. **Tattha dakkhā bhavissāmāti** eḷakalomānaṃ vijaṭṭanadhovanarajanaveṇīkaraṇādīsu kappāsassa ca vaṭṭanapisanaphoṭanakantaṇādīsu chekā

bhavissāma. **Tatrupāyāyāti** tasmim̐ uṇṇākappāsasaṃvidhāne upāyabhūtāya “imasmim̐ kāle idaṃ nāma kātum̐ vaṭṭati”ti evaṃ pavattāya vīmaṃsāya samannāgatā. **Alaṃ kātum̐ alaṃ saṃvidhātunti** attanā kātumpi parehi kārāpetumpi yuttā ceva samatthā ca bhavissāmāti attho.

**Katañca katato jānissāma, akatañca akatatoti** sakaladivasam̐ idaṃ nāma kammaṃ katvā āgatānaṃ, upaḍḍhadivasam̐ idaṃ nāma kammaṃ katvā āgatānaṃ, nikkammānaṃ gehe nisinnānaṃ idaṃ nāma dātuñca evañca kātum̐ vaṭṭatīti evaṃ jānissāma. **Gilānakānañca balābalanti** sace hi gilānakāle tesaṃ bhesajjabhojanā-dīni datvā rogaṃ phāsuṃ na karonti, “ime arogakāle amhe yaṃ icchanti, taṃ kārenti. Gilānakāle atthi bhāvampi no na jānanti”ti virattarūpā pacchā kiccāni na karonti, dukkaṭāni vā karonti. Tasmā nesam̐ balābalaṃ ñatvā dātabbañca kātābbañca jānissāmāti evaṃ tumhehi sikkhitabbanti dasseti. **Khādaniyaṃ bhojaniyañcassāti** khādaniyañca bhojaniyañca assa antojanassa. **Paccam̐senāti** paṭilabhita-bbena aṃsena, attano attano laddhabbakoṭṭhāsānurūpenāti attho. **Sam̐vibhajissāmāti** dassāma. **Sampādessāmāti** sampādayissāma.

**Adhuttīti** (3.0020) purisadhuttasurādhattatāvasena adhuttiyo. **Athenīti** atheniyo acoriyo. **Asoṇḍīti** surāsoṇḍatādivasena asoṇḍiyo.

Evaṃ suttantaṃ niṭṭhapetvā idāni gāthāhi kūṭam̐ gaṇhanto **yo naṃ bharaṭi sabbadāti**-ādimāha. Tattha **bharatīti** posati paṭijaggati. **Sabbakāmaharanti** sabbakāmadadaṃ. **Sothhīti** su-itthī. **Evaṃ vattatīti** ettakaṃ vattaṃ pūretvā vattati. **Manāpā nāma te devāti** nimmānaratī devā. Te hi icchiticchitaṃ rūpaṃ māpetvā abhiramaṇato nimmānaratīti ca manāpāti ca vuccantīti.

#### 4. Sīhasenāpatisuttavaṇṇanā

**34.** Catutthe **sandiṭṭhikanti** sāmaṃ passitabbakaṃ. **Dāyakoti** dānasūro. Na so saddhāmattakeneva tiṭṭhati, pariccajitumpi sakkotīti attho. **Dānapatīti** yaṃ dānaṃ deti, tassa pati hutvā deti, na dāso, na sahāyo. Yo hi attanā madhuraṃ bhuñjati, paresaṃ amadhuraṃ deti, so dānasaṅkhātassa deyyadhammassa dāso hutvā deti. Yo yaṃ attanā bhuñjati, tadeva deti, so sahāyo hutvā deti. Yo pana attanā yena kenaci yāpeti, paresaṃ madhuraṃ deti, so pati jeṭṭhako sāmī hutvā deti. Tādisaṃ sandhāya vuttaṃ- “dānapatī”ti.

**Amañkubhūtoti** na nittejabhūto. **Visāradoti** ñāṇasomanassappatto. **Sahabyataṃ gatāti** sahabhāvaṃ ekībhāvaṃ gatā. **Katāvakāsāti** yena kammaṃ tattha avakāso hoti, tassa katattā katāvakāsā. Taṃ pana yasmā kusalameva hoti, tasmā **katakusalāti** vuttaṃ. **Modareti** modanti pamodanti. **Asitassāti** anissitassa tathāgatassa. **Tādinoti** tādilakkhaṇaṃ pattassa.

#### 5. Dānānisamsasuttavaṇṇanā

**35.** Pañcame **gihidhammā anapagato hotīti** akhaṇḍapañcasīlo hoti. **Sataṃ dhammaṃ anukkamanti** sappurisānaṃ mahāpurisānaṃ dhammaṃ anukkamanto

(3.0021). **Santo naṃ bhajantīti** sappurisā buddhapaccekabuddhatathāgatasāvakā etaṃ bhajanti.

## 6. Kāladānasuttavaṇṇanā

**36.** Chaṭṭhe **kāladānānīti** yuttadānāni, pattadānāni anucchavikadānānīti attho. **Navasassānīti** aggasassāni. **Navaphalānīti** ārāmato paṭhamuppannāni aggaphalāni. **Paṭhamam sīlavantesu paṭiṭṭhāpetīti** paṭhamam sīlavantānaṃ datvā pacchā attanā paribhuñjati. **Vadaññūti** bhāsitaññū. **Kālena dinnanti** yuttappattakālena dinnam. **Anumodantīti** ekamante ṭhitā anumodanti. **Veyyāvaccanti** kāyena veyyāvaṭṭikakammaṃ karonti. **Appaṭivānacittoti** anukkaṇṭhitacitto. **Yattha dinnam mahapphalanti** yasmim ṭhāne dinnam mahapphalaṃ hoti, tattha dadeyya.

## 7. Bhojanasuttavaṇṇanā

**37.** Sattame **āyum detīti** āyudānaṃ deti. **Vaṇṇanti** sarīravaṇṇam. **Sukhanti** kāyikacetāsikasukhaṃ. **Balanti** sarīrathāmaṃ. **Paṭibhānanti** yuttamuttappaṭibhānaṃ.

## 8. Saddhasuttavaṇṇanā

**38.** Aṭṭhame **anukampantīti** anuggaṇhanti. **Khandhimāva mahādumoti** khandhasampanno mahārukkho viya. **Manorame āyataneti** ramaṇīye samosaraṇaṭṭhāne. **Chāyaṃ chāyatthikā yantīti** chāyāya atthikāva chāyaṃ upagacchanti. **Nivātavuttinti** nīcavuttiṃ. **Atthaddhanti** kodhamānathaddhatāya rahitaṃ. **Soratanti** sora-cena sucisīlena samannāgataṃ. **Sakhilanti** sammodakaṃ.

## 9. Puttasuttavaṇṇanā

**39.** Navame **bhato vā no bharissatīti** amhehi thaññapāyanahatthapādavaḍḍhanādīhi bhato paṭijaggito amhe mahallakakāle hatthapādadhovana-nhāpanayāgubhattadānādīhi bharissati. **Kiccaṃ vā no karissatīti** attano kammaṃ ṭhapetvā amhākaṃ rājakulādīsu uppannaṃ kiccaṃ gantvā karissati (3.0022). **Kulavaṃso ciraṃ ṭhassatīti** amhākaṃ santakaṃ khattavatthuhiraññasuvaṇṇādīṃ avināsetvā rakkhante putte kulavaṃso ciraṃ ṭhassati, amhehi vā pavattitāni salākabhattādīni anupacchinditvā pavattessati, evampi no kulavaṃso ciraṃ ṭhassati. **Dāyajjam paṭipajjissatīti** kulavaṃsānurūpāya paṭipattiyā attānaṃ dāyajjārahaṃ karonto amhākaṃ santakaṃ dāyajjam paṭipajjissati. **Dakkhiṇam anuppadassatīti** patti-dānaṃ katvā tatiyadivasato paṭṭhāya dānaṃ anuppadassati.

**Santo sappurisāti** imasmim ṭhāne mātāpitūsu sammā paṭipattiyā santo sappurisāti veditabbā. **Pubbe katamanussaranti** mātāpitūhi paṭhamataraṃ katagaṇaṃ anussarantā. **Ovādakārīti** mātāpitūhi dinnassa ovādassa kattā. **Bhataposīti** yehi bhato, tesam posako. **Pasaṃsiyoti** diṭṭheva dhamme mahājanena pasaṃsitabbo



hoti.

## 10. Mahāsālaputtasuttavaṇṇanā

40. Dasame **mahāsālā**ti mahārukkhā. **Sākhāpattapalāsena vaḍḍhanti** Ti khudda-kasākhāhi ca pattasaṅkhātena ca palāsena vaḍḍhanti. **Araññasminti** agāmake padese. **Brahāvaneti** mahāvane aṭaviyaṃ. Sesam sabbattha uttānatthamevāti.

Sumanavaggo catuttho.

## 5. Muṇḍarājavaggo

### 1. Ādiyasuttavaṇṇanā

41. Pañcamassa paṭhame **bhogānaṃ ādiyāti** bhogānaṃ ādātābbakāraṇāni. **Uṭṭhānavīriyādihigatehī**ti uṭṭhānasaṅkhātena vīriyena adihigatehi. **Bāhābalaparicitehī**ti bāhubalena saṅcītehi. **Sedāvakkhittehī**ti sedaṃ avakkhipetvā uppāditehi. **Dhammikehī**ti dhammayuttehi. **Dhammaladdhehī**ti dasakusalakammaṃ akopetvā laddhehi. **Piṇeti** Ti piṇitaṃ (3.0023) thūlaṃ karoti. Sesamettha catukkanipāte vuttanayeneva veditabbaṃ. Dutiyaṃ uttānatthameva.

### 3. Iṭṭhasuttavaṇṇanā

43. Tatiye **āyusaṃvattanikā paṭipadāti** dānasīlādikā puñṇapaṭipadā. Sesesupi eseva nayo. **Atthābhisamayāti** atthassa abhisamāgamena, atthappaṭilābhenāti vuttaṃ hoti.

### 4. Manāpadāyīsuttavaṇṇanā

44. Catutthe **uggoti** guṇehi uggatattā evaṃladdhanāmo. **Sālapupphakaṃ khādanīyanti** catumadhurayojitena

sālipiṭṭhena kataṃ sālappupphasadisamaṃ khādaniyaṃ. Tañhi paññāya mānavaṇṭapa-ttakesaramaṃ katvā jīrakādisambhārayutte sappimhi pacitvā sappiṃ vinivattetvā kolumbe pūretvā gandhavāsaṃ gāhāpetvā pidahitvā lañchetvā ṭhapitaṃ hoti. Taṃ so yāguṃ pivitvā nisinnassa bhagavato antarabhatte dātukāmo evamāha. **Paṭiggahesi bhagavāti** desanāmettametaṃ, upāsako pana taṃ bhagavato ca pañcannañca bhikkhusatānaṃ adāsi. Yathā ca taṃ, evaṃ sūkaramaṃsādīnipi. Tattha **sampannakolakanti** sampannabadaramaṃ. **Sūkaramaṃsanti** madhurarasehi badarehi saddhiṃ jīrakādisambhārehi yojetvā pakkaṃ ekasaṃvaccharikasūkaramaṃsaṃ. **Nibbattatelakanti** vinivattitelaṃ. **Nāliyasākanti** sālipiṭṭhena saddhiṃ madditvā jīrakādisamaṃyutte sappimhi pacitvā catumadhurena yojetvā vāsaṃ gāhāpetvā ṭhapitaṃ nāliyasākaṃ. **Netamaṃ bhagavato kappatīti** ettha akappiyaṃ upādāya kappiyampi na kappatīti vuttaṃ, seṭṭhi pana sabbampi taṃ āharāpetvā rāsiṃ katvā yaṃ yaṃ akappiyaṃ, taṃ taṃ antarāpaṇaṃ paḥiṇitvā kappiyaṃ upabhoga-paribhogabhaṇḍamaṃ adāsi. Candanaphalakaṃ nātimahantaṃ dīghato aḍḍhateyyaratanamaṃ, tiriyaṃ diyaḍḍharatanamaṃ, sāravarabhaṇḍattā pana mahagghamaṃ ahosi. Bhagavā taṃ paṭiggahetvā khaṇḍākhaṇḍikaṃ chedāpetvā bhikkhūnaṃ añjanapi-sanatthāya dāpesi.

**Ujjubhūtesūti** (3.0024) kāyavācācittēhi ujukesu. **Chandasāti** pemena. **Cattanti-ā-**dīsu pariccāgavasena **cattaṃ**. Muttacāgatāya **muttaṃ**. Anapekkhacittatāya cittaena na uggahitanti **anuggahitaṃ**. **Khettūpameti** viruhanaṭṭhena khettsadise.

**Aññataramaṃ manomayanti** suddhāvāsesu ekaṃ jhānāmanena nibbattaṃ devakāyaṃ. **Yathādhippāyoti** yathājjhāsayo. Iminā kiṃ pucchati? Tassa kira manussakāle arahattatthāya ajjhāsayo ahosi, taṃ pucchāmiti pucchati. Devaputtopi arahattaṃ pattatāya **taggha me bhagavā yathādhippāyoti** āha. **Yattha yatthūpapajjati** tīsu vā kulasampattīsu chasu vā kāmasaggesu yattha yattha uppajjati, tattha tattha dīghāyu yasavā hotīti. Pañcamaṃ catukkanipāte vuttanayeneva veditabbaṃ. Chaṭṭhasattamāni uttānatthāneva.

## 8. Alabbhaniyathānasuttavaṇṇanā

**48.** Aṭṭhame **alabbhaniyānīti** aladdhabbāni, na sakkā labhituṃ. **Ṭhānānīti** kāraṇāni. **Jarādhammaṃ mā jīrīti** yaṃ mayhaṃ jarāsabhāvaṃ, taṃ mā jīratu. Sesapa-desupi eseva nayo. **Nacchādeyyāti** na rucceyya. **Abbhūti** nīhari.

**Yatoti** yasmim kāle. **Āpadāsūti** upaddavesu. **Na vedhatīti** na kampati nānuso-cati. **Atthavinicchayaññūti** kāraṇatthavinicchaye kusalo. **Purāṇanti** nibbikāratāya porāṇakameva. **Jappenāti** vaṇṇabhaṇṇanena. **Mantenāti** mahānubhāvamantapari-vattanena. **Subhāsitenāti** subhāsita-kathanena. **Anuppadānenāti** satassa vā sahas-sassa vā dānena. **Paveṇiyā vāti** kulavaṃsena vā, “idaṃ amhākaṃ paveṇiyā āciṇṇaṃ, idaṃ anāciṇṇaṃ”ti evaṃ paveṇikathanenāti attho. **Yathā yathā yattha labhetha atthanti** etesu jappādīsu yena yena yattha yattha ṭhāne jarādhammā-dīnaṃ ajjiraṇatādi-atthaṃ labheyya. **Tathā tathā tattha parakkameyyāti** tena tena tasmim tasmim ṭhāne parakkamaṃ kareyya. **Kammaṃ daḷhanti** vaṭṭagāmi-

kammaṃ mayā thiraṃ katvā āyūhitaṃ, svāhaṃ idāni kinti karomīti evaṃ paccavekkhitvā adhivāseyyāti.

## 9. Kosalasuttavaṇṇanā

49. Navame (3.0025) **upakaṇṇaketi** kaṇṇamūle. **Dummanoti** duṭṭhumano. **Pattakkhandhoti** patitakkhandho. **Pajjhāyantoti** cintayanto. **Appaṭibhānoti** nippaṭibhāno hutvā. Sesam heṭṭhā vuttanayameva.

## 10. Nāradasuttavaṇṇanā

50. Dasame **ajjomucchitoti** adhi-omucchito gilitvā pariniṭṭhapetvā gahaṇasa-bhāvāya atirekamucchāya taṇhāya samannāgato. **Mahaccā rājānubhāvenāti** mahatā rājānubhāvena, aṭṭhārasahi senīhi parivārito mahatiyā rājiddhiyā pāyāsīti attho. **Tagghāti** ekaṃsatthe nipāto, ekaṃseneva sokasallaharaṇoti attho. Iti rājā imaṃ ovādaṃ sutvā tasmim ṭhito dhammena samena rajjaṃ kāretvā saggaparāyaṇo ahoṣi.

Muṇḍarājavaggo pañcama.

Paṭhamapaṇṇāsakaṃ niṭṭhitaṃ.

## 2. Dutiyaṇṇāsakaṃ

### (6) 1. nīvaraṇavaggo

## 1. Āvaraṇasuttavaṇṇanā

51. Dutiyaṣsa (3.0026) paṭhame āvaraṇavasena **āvaraṇā**. Nīvaraṇavasena **nīvaraṇā**. Ceto ajjhāruhantīti **cetaso ajjhāruhā**. Vipassanāpaññaṅca maggapaññaṅca uppattinivāraṇaṭṭhena dubbalaṃ karontīti **paññāya dubbalīkaraṇā**. Yā vā etehi saddhiṃ vokiṇṇā paññaṅca uppajjati, taṃ dubbalaṃ karontītipi **paññāya dubbalīkaraṇā**. **Abalāyāti** pañcanīvaraṇapariyonaddhattā apagatabalāya. **Uttari vā manussa-dhammā alamariyañāḍassanavisesanti** dasakusalakammapaṭhasaṅkhātā manussadhammā uttari ariyabhāvaṃ kātuṃ samatthaṃ ñāḍassanavisesaṃ. **Hārahārinīti** haritabbaṃ harituṃ samatthā. **Naṅgalamukhānīti** mātikāmukhāni. Tāni hi naṅgalasarikkhakattā naṅgalehi ca khatattā naṅgalamukhānīti vuccanti.

**Evameva khoti** ettha sotaṃ viya vipassanāññaṃ daṭṭhabbaṃ, ubhato naṅgala-

mukhānaṃ vivaraṇakālo viya chasu dvāresu saṃvarassa vissaṭṭhakālo, majjhena-  
diyā rukkhapāde koṭṭetvā palālatiṇamattikāhi āvaraṇe kate udakassa vikkhittavisa-  
ṭabyādiṇṇakālo viya pañcahi nīvaraṇehi pariyonaddhakālo, evaṃ āvaraṇe kate  
vihatavegassa udakassa tiṇapalālādīni parikaḍḍhitvā samuddaṃ pāpuṇituṃ asa-  
matthakālo viya vipassanāññaṇena sabbākusale viddhaṃsetvā nibbānasāgaraṃ  
pāpuṇituṃ asamatthakālo veditabbo. Sukkapakkhe vuttavipallāsena yojanā  
kātabbā. Imasmiṃ sutte vaṭṭavivaṭṭaṃ kathitaṃ. Dutiyāṃ uttānatthameva.

### 3. Padhāniyaṅgasuttavaṇṇanā

53. Tatiye **padhāniyaṅgānīti** padhānaṃ vuccati padahanabhāvo, padhāna-  
massa atthīti padhāniyo, padhāniyassa bhikkhuno aṅgānīti padhāniyaṅgāni.  
**Saddhoti** saddhāya samannāgato. Saddhā panesā āgamasaddhā adhigama-  
saddhā okappanasaddhā pasādasaddhāti catubbidhā. Tattha sabbaññubodhis-  
sattānaṃ saddhā, abhinīhārato paṭṭhāya āgatattā **āgamasaddhā** nāma. Ariyasāva-  
kānaṃ (3.0027) paṭivedhena adhigatattā **adhigamasaddhā** Nāma. Buddho  
dhammo saṅghoti vutte acalabhāvena okappanaṃ **okappanasaddhā** nāma. Pasā-  
duppatti **pasādasaddhā** nāma. Idha okappanasaddhā adhippetā. **Bodhinti** catuma-  
ggaññaṃ. Taṃ suppaṭividdhaṃ tathāgatenāti saddahati. Desanāsīsameva cetaṃ,  
iminā pana aṅgena tīsupi ratanesu saddhā adhippetā. Yassa hi buddhādīsu  
pasādo balavā, tassa padhānavīriyaṃ ijjhati.

**Appābādhoti** arogo. **Appātaṅkoti** niddukkho. **Samavepākiniyāti** samavipākiniyā.  
**Gahaṇiyāti** kammajatejodhātuyā. **Nātisītāya nāccuṇḥayāti** atisītalaggahaṇiko hi  
sītabhīruko hoti, accuṇḥaggahaṇiko uṇhabhīruko, tesāṃ padhānaṃ na ijjhati,  
majjhimaggaṇikassa ijjhati. Tenāha- **majjhimāya padhānakkhamāyāti**. **Yathā-**  
**bhūtaṃ attānaṃ āvikattāti** yathābhūtaṃ attano aguṇaṃ pakāsetā. **Udayatthagāmi-**  
**niyāti** udayaṅca atthaṅca gantuṃ paricchindituṃ samatthāya. Etena paññāsala-  
kkhaṇapariggāhakaṃ udayabbayaññaṃ vuttaṃ. **Ariyāyāti** parisuddhāya. **Nibbe-**  
**dhikāyāti** anibiddhapubbe lobhakkhandhādayo nibbijjhituṃ samatthāya. **Sammā**  
**dukkhakkhayagāminiyāti** tadaṅgavasena kilesānaṃ pahīnattā yaṃ dukkhaṃ  
khīyati, tassa dukkhassa khayagāminiyā. Iti sabbehipi imehi padehi vipassanāpa-  
ññāva kathitā. Duppaññassa hi padhānaṃ na ijjhati.

### 4. Samayasuttavaṇṇanā

54. Catutthe **padhānāyāti** vīriyakaraṇatthāya. **Na sukaraṃ uñchena paggahena**  
**yāpetunti** na sakkā hoti pattaṃ gahetvā uñchācariyāya yāpetuṃ. Imasmimpi sutte  
vaṭṭavivaṭṭameva kathitaṃ.

### 5. Mātāputtasuttavaṇṇanā

55. Pañcame **pariyādāya tiṭṭhatīti** pariyādiyitvā gahetvā khepetvā tiṭṭhati. **Ugghāti-**

tāti uddhumātā.

**Asihatthenāti** sīsacchedanatthāya asim ādāya āgatenāpi. **Pisācenāti** khāditum āgatayakkhenāpi. **Āsīdeti** ghaṭṭeyya. **Mañjunāti** mudukena. **Kāmoghavulhānanti** kāmoghena vulhānaṃ kaḍḍhitānaṃ. **Kālaṃ gati bhavābhavanti** (3.0028) vaṭṭa-kālaṃ gatiñca punappunabbhave ca. **Purakkhatāti** purecārikā purato gatāyeva. **Ye ca kāme pariññāyāti** ye paṇḍitā duvidhepi kāme tīhi pariññāhi pariññitvā. **Caranti akutobhayāti** khīṇāsavānaṃ kutoci bhayaṃ nāma natthi, tasmā te akutobhayā hutvā caranti. **Pāraṅgatāti** pāraṃ vuccati nibbānaṃ, taṃ upagatā, sacchikatvā ṭhitāti attho. **Āsavakkhayanti** arahattaṃ. Imasmiṃ sutte vaṭṭameva kathetvā gāthāsu vaṭṭavivaṭṭaṃ kathitaṃ.

## 6. Upajjhāyasuttavaṇṇanā

**56.** Chaṭṭhe **madhurakajātoti** sañjātagarubhāvo. **Disā ca me na pakkhāyantīti** catasso disā ca anudisā ca mayhaṃ na upaṭṭhahantīti vadati. **Dhammā ca maṃ nappaṭibhantīti** samathavipassanādhammāpi me na upaṭṭhahanti. **Anabhirato ca brahmacariyaṃ carāmīti** ukkaṅṭhito hutvā brahmacariyavāsaṃ vasāmi. **Yena bhagavā tenupasaṅkamīti** tassa kathaṃ sutvā “buddhaveneyyapuggalo ayan”ti taṃ kāraṇaṃ bhagavato ārocetum upasaṅkami. **Avipassakassa kusalānaṃ dhammānanti** kusaladhamme avipassantassa, anesantassa agavesantassāti attho. **Bodhipakkhiyānaṃ dhammānanti** satipaṭṭhānādīnaṃ sattatiṃsadhammānaṃ.

## 7. Abhiñhapaccavekkhitabbaṭhānasuttavaṇṇanā

**57.** Sattame **jarādhammomhīti** jarāsabhāvo amhi. **Jaraṃ anatītoti** jaraṃ anatikkanto, antojarāya eva carāmi. Sesapadesupi eseva nayo. **Kammassakoti-ādīsu** kammaṃ mayhaṃ sakaṃ attano santakanti kammassako amhi. Kammaṃ dāyādoti **kammadāyādo**, kammaṃ mayhaṃ dāyajjaṃ santakanti attho. Kammaṃ mayhaṃ yoni kāraṇanti **kammayoni**. Kammaṃ mayhaṃ bandhūti **kammabandhu**, kammañātakoti attho. Kammaṃ mayhaṃ paṭisaraṇaṃ patiṭṭhāti **kammaṃpaṭisaraṇo**. **Tassa dāyādo bhavissāmīti** tassa kammaṃ dāyādo tena dinnaphalapaṭiggāhako bhavissāmīti attho. **Yobbanamadoti** yobbanānaṃ ārabba uppannamado. Sesesupi eseva nayo. **Maggo sañjāyatīti** lokuttaramaggo sañjāyati. **Samyojanāni sabbaso pahīyantīti** dasa samyojanāni sabbaso pahīyanti. **Anusayā byantīhontīti** satta anusayā vigatantā paricchinnā parivaṭṭumā (3.0029) honti. Evamettha heṭṭhā pañcasu ṭhānesu vipassanā kathitā, imesu pañcasu lokuttaramaggo.

nirūpadhinti upadhirahitaṃ arahattamaggaṃ ñatvā. Sabbe made abhibhosmīti  
 Idāni gāthāhi kūṭaṃ gaṇhanto **byādhidhammā**ti-ādimāha. Tattha **ñatvā dhammaṃ**  
**nirūpadhinti** upadhirahitaṃ arahattamaggaṃ ñatvā. **Sabbe made abhibhosmīti**  
 sabbe ime tayopi made adhibhaviṃ, atikkamma ṭhitosmīti attho. **Nekkhammaṃ**  
**daṭṭhu khematoti** pabbajjaṃ khemato disvā. **Tassa me ahu ussāho, nibbānaṃ**  
**abhipassatoti** tassa mayhaṃ nibbānaṃ abhipassantassa vāyāmo ahosi. **Anivatti**  
**bhavissāmīti** pabbajjato anivattiko bhavissāmi, brahmacariyavāsato anivattiko,  
 sabbaññutaññāṇato anivattiko bhavissāmi. **Brahmacariyaparāyaṇoti** maggabrah-  
 macariyaparāyaṇo. Iminā lokuttaro aṭṭhaṅgiko maggo kathitoti.

## 8. Licchavikumārakasuttavaṇṇanā

**58.** Aṭṭhame **sajjāni dhanūnīti** sajjiyāni āropitadhanūni. **Addasūti** addasaṃsu.  
**Bhavissanti vajjīti** vaḍḍhissanti vajjirājāno. **Apānubhāti** avaḍḍhinissitā māna-  
 thaddhā. **Pacchāliyaṃ khipantīti** pacchato gantvā piṭṭhiṃ pādena paharanti. **Raṭṭhi-**  
**kassāti-ādīsu** raṭṭhaṃ bhuñjatīti **raṭṭhiko**. Pitarā dattaṃ sāpateyyaṃ bhuñjatīti **petta-**  
**niko**. Senāya pati jeṭṭhakoti **senāpatiko**. **Gāmagāmaṇikassāti** gāmānaṃ gāmaṇi-  
 kassa, gāmasāmikassāti attho. **Pūgagāmaṇikassāti** gaṇajeṭṭhakassa. **Kulesūti**  
 tesu tesu kulesu. **Paccekāhipaccaṃ kārentīti** paccekaṃ jeṭṭhakaṭṭhānaṃ kārenti.  
**Kalyāṇena manasā anukampantīti** sundarena cittena anuggaṇhanti. **Khettakamma-**  
**ntasāmantasabyohāreti** ye ca attano khettakammantānaṃ sāmantā anantarakkhet-  
 tāsāmino, te ca rajjudaṇḍehi bhūmippamaṇaggāhake sabbohāre ca. **Balipaṭiggā-**  
**hikā devatāti** kulappaveṇiyā āgatā ārakkhadevatā. **Sakkarotīti** tā devatā aggayāgu-  
 bhattādīhi sakkaroti.

**Kiccakaroti** uppannānaṃ kiccānaṃ kāraṅko. **Ye cassa anujīvinoti** ye ca etaṃ upa-  
 nissāya jīvanti. **Ubhinnañceva atthāyāti** ubhinnaṃpi hitatthāya paṭipanno hotīti  
 attho. **Pubbapetānanti** paralokagatānaṃ. **Diṭṭhe dhamme ca jīvatanti** ye ca diṭṭhe  
 dhamme (3.0030) jīvanti. Iti padadvayenāpi atītapaccuppanne ñātayo dasseti. **Vitti-**  
**sañjananoti** tuṭṭhijanano. **Gharamāvasanti** gharāvāsaṃ vasanto. **Pujjo hoti pasam-**  
**siyoti** pūjetabbo ca pasamsitabbo ca hotīti.

## 9-10. Vuḍḍhapabbajitasuttadvayaṇṇanā

**59-60.** Navame **nipuṇoti** saṇho sukhumakāraṇaṇṇū. **Ākappasampannoti** sama-  
 ṇākappena sampanno. Dasame **padakkhiṇaggāhīti** dinnovādaṃ padakkhiṇato  
 gaṇhanto. Sesam sabbattha uttānamevāti.

Nīvaraṇavaggo paṭhamo.

(7) 2. saññāvaggo

## 1-2. Saññāsuttadvayaṇṇanā

**61-62.** Dutiyaṣṣa paṭhame **mahapphalā**ti vipākaphalena mahapphalā. Vipākāni-saṃseneva **mahānisamsā**. **Amatogadhā**ti nibbānapatiṭṭhā. **Sabbaloke anabhiratisa-**  
**ññā**ti sabbasmim̐ tedhātusannivese loke ukkaṇṭhitassa uppajjanakasaññā. Dutiyaṃ uttānatthameva.

## 3-4. Vaḍḍhasuttadvayaṇṇanā

**63-64.** Tatiye **varādāyī**ti uttamassa varassa ādāyako. Sesamettha catutthe ca uttānatthamevāti.

## 5. Sākacchasuttavaṇṇanā

**65.** Pañcame **alaṃsākaccho**ti sākacchāya yutto. **Āgataṃ pañhanti** pucchitaṃ pañhaṃ. **Byākattā hotī**ti vissajjitā hoti.

## 6. Sājīvasuttavaṇṇanā

**66.** Chaṭṭhe (3.0031) **alaṃsājīvoti** sājīvāya yutto. **Sājīvoti** pañhapucchanañceva pañhavissajjanañca. Sabbepi hi sabrahmacārino pañhaṃ upajīvanti, tenetaṃ pañhapucchanavissajjanaṃ samānājīvatāya sājīvoti vuttaṃ. **Kataṃ pañhanti** abhi-saṅkhatam̐ pañhaṃ.

## 7-10. Paṭhama-iddhipādasuttādivaṇṇanā

**67-70.** Sattame **usso**hīti adhimattavīriyaṃ. Aṭṭhame attano bodhimaṇḍe paṭi-viddhe āgamana-iddhipāde kathetvā upari attanova cha abhiññā kathesīti. Navamadasamesu vipassanā kathitā. Sesam̐ sabbattha uttānamevāti.

Saññāvaggo dutiyo.

## (8) 3. yodhājīvavaggo

### 1. Paṭhamacetovimuttiphalasuttavaṇṇanā

**71.** Tatiyaṣṣa paṭhame **yato kho, bhikkhave**ti heṭṭhā vuttanayena vipassanaṃ vaḍḍhetvā arahattaṃ pattassa bhikkhuno idāni vaṇṇabhaṇanattaṃ idaṃ

āraddhaṃ. Tattha **yato khoti** yadā kho. **Ukkhittapalighoti** avijjāpalighaṃ ukkhipitvā apanetvā t̥hito. **Samkiṇṇaparikhoti** saṃsāraparikhaṃ saṃkiritvā vināsetvā t̥hito. **Abbūlhesikoti** taṇhāsaṅkhātaṃ esikāthambhaṃ abbuyha luñcitvā t̥hito. **Niragga-** **loti** nīvaraṇakavāṭaṃ ugghāṭetvā t̥hito. **Pannaddhajo pannabhāroti** mānaddha- jaṅca khandhābhisaṅkhārakilesabhāraṅca pātetvā otāretvā t̥hito. **Visaṃyuttoti** vaṭṭena visaṃyutto. Sesāṃ pāḷinayeneva veditabbaṃ. Ettāvata bhagavatā maggena kilese khepetvā nirodhasayanavaragatassa nibbānārammaṇaṃ phala- samāpattiṃ appetvā viharato khīṇāsavassa kālo dassito.

Yathā hi dve nagarāni ekaṃ coranagaraṃ ekaṃ khemanagaraṃ. Atha ekassa mahāyodhassa evaṃ bhaveyya- “yāvimaṃ coranagaraṃ tiṭṭhati, tāva khemana- garaṃ bhayato (3.0032) na muccati, coranagaraṃ anagaraṃ karissāmī”ti sannāhaṃ katvā khaggaṃ gahetvā coranagaraṃ upasaṅkamtivā nagaradvāre ussāpīte esikāthambhe khaggena chinditvā saddhiṃ dvārabāhāhi kavāṭaṃ bhinditvā palighaṃ ukkhipitvā pākāraṃ bhinditvā parikhaṃ vikiritvā nagarasobha- tthāya ussite dhaje pātetvā nagaraṃ agginā jhāpetvā khemanagaraṃ pavisitvā pāsādaṃ āruya ṅātigaṇaparivuto surasabhojanaṃ bhuñjeyya. Evaṃ corana- garaṃ viya sakkāyo, khemanagaraṃ viya nibbānaṃ, mahāyodho viya yogāvaca- ro. Tassevaṃ hoti- “yāva sakkāyavaṭṭaṃ vaṭṭati, tāva dvattiṃsakammakāraṇā-aṭṭha- navutirogapañcavīsati mahābhayehi parimuccanaṃ natthī”ti. So mahāyodho sannāhaṃ viya sīlasannāhaṃ katvā paññākhaggaṃ gahetvā khaggena esikā- thambhe viya arahattamaggena taṇhesikaṃ luñcitvā, so yodho sadvārabāhakaṃ nagarakavāṭaṃ viya pañcorambhāgiyasamyojana-aggalaṃ ugghāṭetvā, so yodho palighaṃ viya avijjāpalighaṃ ukkhipitvā, so yodho pākāraṃ bhindanto parikhaṃ viya kammābhisaṅkhāraṃ bhindanto jātisaṃsāraparikhaṃ vikiritvā, so yodho nagaraṃ sobhatthāya ussāpitaddhaje viya mānaddhaje pātetvā sakkāyanagaraṃ jhāpetvā, so yodho khemanagare uparipāsāde subhojanaṃ viya kilesaparinnibbā- nanagaraṃ pavisitvā amataṃ nirodhārammaṇaṃ phalasaṃpattisukhaṃ anubha- vamāno kālaṃ vītīnāmeti.

## 2. Dutiyacetovimutti phalasuttavaṇṇanā

72. Dutīye **aniccasaññāti** khandhapañcakaṃ hutvā abhāvākārena aniccanti uppajjanakasaññā. **Anicce dukkhasaññāti** yadaniccaṃ, taṃ paṭipīḷanākārena dukkhanti uppajjanakasaññā. **Dukkhe anattasaññāti** yaṃ dukkhaṃ, taṃ avasava- ttanākārena anattāti uppajjanakasaññā. Sesāṃ heṭṭhā vuttanayameva. Imesu pana dvīsūpi suttesu vipassanāphalaṃ nāma kathitanti.

## 3. Paṭhamadhammavīhārīsuttavaṇṇanā

73. Tatiye **divasaṃ atināmetīti** divasaṃ atikkāmeti. **Riñcati paṭisallānanti** ekī- bhāvaṃ vissajjeti. **Desetīti** katheti pakāseti. **Dhammapaññattiyāti** (3.0033) dhammassa paññāpanāya. **Dhammaṃ pariyāpuṇātīti** navaṅgavasena catusacca-



dhammaṃ pariyāpuṇāti vaḷaṅjeti katheti. **Na riñcati paṭisallānanti** ekībhāvaṃ na vissajjeti. **Anuyuñjati ajjhataṃ cetosamathanti** niyakajjhatte cittasamādhiṃ āsevati bhāveti, samathakammaṭṭhāne yuttappayutto hoti.

**Hitesināti** hitaṃ esantena. **Anukampakenāti** anukampamānena. **Anukampaṃ upādāyāti** anukampaṃ cittaena pariggahetvā, paṭiccātipi vuttaṃ hoti. **Kataṃ vo taṃ mayāti** taṃ mayā ime pañca puggale desentena tumhākaṃ kataṃ. Ettakameva hi anukampakassa satthu kiccaṃ yadidaṃ aviparītadhammadesanā, ito paraṃ pana paṭipatti nāma sāvakanāṃ kiccaṃ. Tenāha- **etāni bhikkhu rukkhāmūlāni ...pe... amhākaṃ anusāsanīti**. Tattha ca **rukkhamūlānīti** iminā rukkhāmūlasenāsanāṃ dasseti. **Suññāgārānīti** iminā janavivittaṭṭhānaṃ. Ubhayenāpi ca yogānurūpaṃ senāsanamācikkhati, dāyajjaṃ niyyātetī. **Jhāyathāti** ārammaṇūpanijjhānena aṭṭhatiṃsārammaṇāni, lakkhaṇūpanijjhānena ca aniccādito khandhāyatanādīni upanijjhāyatha, samathañca vipassanañca vaḍḍhethāti vuttaṃ hoti. **Mā pamādatthāti** mā pamajjittha. **Mā pacchā vippaṭisārino ahuvatthāti** ye hi pubbe daharakāle ārogyakāle sattasappāyādisampattikāle satthu sammukhībhāvakāle ca yonisomanasikāravirahitā rattindivaṃ maṅkulabhataṃ hutvā seyyasukhamiddhasukhamanuyuttā pamajjanti, te pacchā jarākāle rogakāle maraṇakāle vipattikāle satthu parinibbānakāle ca taṃ pubbe pamādavihāraṃ anussarantā sappāṭisandhikālakeriyañca bhāriyaṃ sampassamānā vippaṭisārino honti. Tumhe pana tādisā mā ahuvatthāti etamatthaṃ dassento āha- “mā pacchā vippaṭisārino ahuvatthā”ti. **Ayaṃ vo amhākaṃ anusāsanīti** ayaṃ amhākaṃ santikā “jhāyatha mā pamādatthā”ti tumhākaṃ anusāsanī, ovādoti vuttaṃ hoti.

#### 4. Dutiyadhammavihārīsuttavaṇṇanā

74. Catutthe **uttari cassa paññāya atthaṃ nappajānātīti** tato pariyattito uttari tassa dhammassa sahavipassanāya maggapaññāya atthaṃ nappajānāti (3.0034), cattāri saccāni na passati nappaṭivijjhatīti attho. Sesavāresupi eseva nayo. Evame-tesu dvīsipi suttesu bahussutabhikkhu vipassanākammiko sotāpanno sakadāgāmī anāgāmī khīṇāsavoti cha janā dhammavihārino nāmāti veditabbā.

#### 5. Paṭhamayodhājīvasuttavaṇṇanā

75. Pañcame **yodhājīvāti** yuddhūpajīvino. **Rajagganti** hatthi-assādīnaṃ pādappahārabhinnāya bhūmiyā uggataṃ rajakkhandhaṃ. **Na santhambhatīti** santhambhitvā ṭhātuṃ na sakkoti. **Sahati rajagganti** rajakkhandhaṃ disvāpi adhivāseti. **Dhajagganti** hatthi-assādīnaṃ piṭṭhesu vā rathesu vā ussāpitānaṃ dhajānaṃ aggaṃ. **Ussāraṇanti** hatthi-assarathānañceva balakāyassa ca uccāsaddamahāsaddaṃ. **Sampahāreti** samāgate appamattakepi pahāre. **Haññatīti** vihaññati vighātaṃ āpajjati. **Byāpajjati** vipattiṃ āpajjati, pakatibhāvaṃ jahati. **Sahati sampahāranti** dve tayo pahāre patvāpi sahati adhivāseti. **Tameva saṅgāmasīanti** taṃyeva jayakkhandhāvāraṭṭhānaṃ. **Ajjhāvasatīti** sattāhamattaṃ abhibhavitvā

āvasati. Kiṃ kāraṇā? Laddhapahārānaṃ pahārajagganatthañceva katakammānaṃ visesaṃ ñatvā ṭhānantaradānatthañca issariyasukhānubhavanatthañca.

pañca puggale dassetuṃ idaṃ opammaṃ ābhataṃ. Tasmā te puggale dassento **evameva khoti-ādimāha**. Tattha **saṃsīdatī** micchāvitakkasmiṃ saṃsīdati anuppa-visati. **Na sakkoti brahmacariyaṃ sandhāretunti** brahmacariyavāsaṃ anupacchijjamānaṃ gopetuṃ na sakkoti. **Sikkhādubbalyaṃ āvikatvāti** sikkhāya dubbala-bhāvaṃ pakāsetvā. **Kimassa rajaggasminti** kiṃ tassa puggalassa rajaggaṃ nāmāti vadati. **Abhirūpāti** abhirūpavatī. **Dassaniyāti** dassanayoggā. **Pāsādikāti** dassaneneva cittappasādāvahā. **Paramāyāti** uttamāya. **Vaṇṇapokkharatāyāti** sarī-ravaṇṇena ceva aṅgasaṅṭhānena ca. **Ūhasatī** avahasati. **Ullapatī** katheti. **Ujjhaggatī** (3.0035) pāṇiṃ paharivā mahāhasitaṃ hasati. **Uppaṇḍetī** uppaṇḍana-kathaṃ katheti. **Abhinisīdatī** abhibhavivā santike vā ekāsane vā nisīdati. Dutiya-padepi eseva nayo. **Ajhottharatī** avattharati. **Viniveṭhetvā vinimocetvāti** gahita-ṭṭhānato tassā hatthaṃ vinibbeṭhetvā ceva mocetvā ca. Sesamettha uttānatthamevāti. Imasmiṃ sutte vaṭṭavivaṭṭaṃ kathitaṃ.

## 6. Dutiya-yodhājīvasuttavaṇṇanā

76. Chaṭṭhe **asicammaṃ gahetvāti** asiñca cammañca gahetvā. **Dhanukalāpaṃ sannayhitvāti** dhanuñca sarakalāpañca sannayhitvā. **Viyūḷhanti** yuddhasannivesa-vesena ṭhitaṃ. **Saṅgāmaṃ otaratī** mahāyuddhaṃ otarati. **Ussahati vāyamatī** ussāhañca vāyāmañca karoti. **Hanantī** ghātentī. **Pariyāpādentī** pariyāpādayanti. **Upalikkhantī** vijjhanti. **Apanentī** sakasenaṃ gahetvā gacchanti. **Apanetvā ñāta-kānaṃ nentī** sakasenaṃ netvā tato ñātakānaṃ santikaṃ nenti. **Niyamānoti** attano gehaṃ vā sesaṅṅāntisantikāṃ vā niyyamāno. **Upaṭṭhahanti paricarantī** pahā-rasodhanavaṇṇakappaṇādīni karontā jagganti gopayanti.

**Arakkhiteneva kāyenāti** arakkhitena kāyadvārena. **Arakkhitāya vācāyāti** arakkhitena vacīdvārena. **Arakkhitena cittenāti** arakkhitena manodvārena. **Anupaṭṭhitāya satiyāti** satim supaṭṭhitaṃ akatvā. **Asaṃvutehi indriyehī** manacchaṭṭhehi indriyehi apihitehi agopitehi. **Rāgo cittaṃ anuddhamsetī** rāgo uppajjamānova samathavipassanācittaṃ dhamseti, dūre khipati. **Rāgapariyutṭhitomhi, āvuso, rāgaparetoti** ahaṃ, āvuso, rāgena ratto, rāgena anugato.

**Aṭṭhikaṅkalūpamāti-ādīsu aṭṭhikaṅkalūpamā** appassādaṭṭhena. **Maṃsapesūpamā** bahusādhāraṇaṭṭhena. **Tiṇukkūpamā** anudhanaṭṭhena. **Aṅgārakāsūpamā** mahābhītāpaṭṭhena. **Supinakūpamā** ittarapaccupaṭṭhānaṭṭhena. **Yācitakūpamā** tāvakālikaṭṭhena. **Rukkhaphalūpamā** sabbaṅgapaccaṅgapalibhañjanaṭṭhena. **Asisūnūpamā** adhikuṭṭhanaṭṭhena. **Sattisūlūpamā** vinivijjanaṭṭhena. **Sappasirūpamā** sāsāṅkasappaṭibhayaṭṭhena (3.0036). **Ussahissāmī** Ti ussāhaṃ karissāmi. **Dhārayissāmī** samaṇabhāvaṃ dhārayissāmi. **Abhiraṃsissāmī** abhiraṃsissāmi. **Abhiraṃsissāmī** abhiraṃsissāmi. Sesamettha uttānatthameva. Imasmiṃ sutte vaṭṭavivaṭṭaṃ kathitanti.

## 7. Paṭhama-anāgatabhayasuttavaṇṇanā

77. Sattame **āraññakenā**ti araññavāsina. **Appattassā**ti asampattassa jhānavipassanāmaggaṭṭhapabbhedassa viśesassa pattiya. Sesapadesupi eseva nayo. **So mamassa antarāyoti** so mama jīvitantarāyo ca brahmacariyantarāyo ca, puthujjanakālakiriyaṃ karontassa saggantarāyo ca maggantarāyo ca bhavēyya. **Handā**ti vavassaggaṭṭhe nipāto. **Vīriyaṃ ārabhāmī**ti duvidhampi vīriyaṃ karomi. **Satthakā**ti satthaṃ viya sandhibandhanacchedakavātā. **Vālehi**ti kakkhaḷehi. **Māṇavehi**ti corehi. **Katakammehi vā akatakammehi vā**ti ettha corikaṃ katvā nikkhantā katakammā nāma, corikaṃ kātuṃ gacchantā akatakammā nāma. Tattha katakammā kammaṃ nippahantā sattānaṃ galalohitaṃ gahetvā devatānaṃ baliṃ karonti, akatakammā “evaṃ no kammaṃ nippahajjissati”ti paṭhamataraṃ karonti. Idaṃ sandhāya **te maṃ jīvitā voropeyyunti** vuttaṃ. **Vāḷā amanussā**ti kakkhaḷā duṭṭhā yakkhādayo amanussā.

### 8. Dutiya-anāgatabhayasuttavaṇṇanā

78. Aṭṭhame **purā maṃ so dhammo āgacchatī**ti yāva so dhammo maṃ na upagacchati, tāva ahaṃ puretameva vīriyaṃ ārabhāmīti attho. **Khīrodakībhūtā**ti khīrodakaṃ viya bhūtā ekībhāvaṃ upagatā. **Piyacakkhūhi**ti mettacakkhūhi.

### 9. Tatiya-anāgatabhayasuttavaṇṇanā

79. Navame **dhammasandosā vinayasandosoti** dhammasandosena vinayasandoso hoti. Kathaṃ pana dhammasmiṃ dussante vinayo dussati nāma? Samathavipassanādhamesu gabbhaṃ aggaṇhantesu pañcavidho vinayo na hoti (3.0037), evaṃ dhamme dussante vinayo dussati. Dussīlassa pana saṃvaravinayo nāma na hoti, tasmīṃ asati samathavipassanā gabbhaṃ na gaṇhāti. Evaṃ vinayasandosēnapi dhammasandoso veditabbo. **Abhidhammakathanti** sīlādi-uttamadhammakathaṃ. **Vedallakathanti** vedapaṭisaṃyuttaṃ ñāṇamissakakathaṃ. **Kaṇhadhammaṃ okkamamānā**ti randhagavesitāya upārambhapariyesanavasena kāḷākadhammaṃ okkamamānā. Apica duṭṭhacittena puggalaṃ ghaṭṭentāpi taṃ kaṇhadhammaṃ attano dahantāpi lābhasakkāratthaṃ kathentāpi kaṇhadhammaṃ okkamantiyeva.

**Gambhīrā**ti pāḷigambhīrā. **Gambhīratthā**ti atthagambhīrā. **Lokuttarā**ti lokuttaradhammadīpakā. **Suññatāpaṭisaṃyuttā**ti khandhadhātu-āyatanapaccayākārapaṭisaṃyuttā. **Na aññā cittaṃ upaṭṭhapessanti**ti jānanatthāya cittaṃ na ṭhapessanti. **Uggahetabbaṃ pariyāpuṇitabbanti** uggahetabbe ca vaḷañjetabbe ca. **Kavitā**ti silokādibandhanavasena kavīhi katā. **Kāveyyā**ti tasseva vevacanaṃ. **Bāhirakā**ti sāsānato bahiddhā ṭhitā. **Sāvaka bhāsītā**ti bāhiraśāvakehi bhāsītā. Sesamettha heṭṭhā vuttanayattā suviññeyyattā ca uttānatthameva.

### 10. Catuttha-anāgatabhayasuttavaṇṇanā

**80.** Dasame **kalyāṇakāmā**ti sundarakāmā. **Rasaggānī**ti uttamarasāni. **Saṃsaṭṭhā viharissanti**Ti pañcavidhena saṃsaggena saṃsaṭṭhā viharissanti. **Sannidhikārapa-ribhoganti** sannidhikatassa paribhogam. **Oḷārikampi nimittanti** ettha pathaviṃ khaṇantopi khaṇāhīti āṇāpentopi pathaviyaṃ oḷārikaṃ nimittaṃ karoti nāma. Tiṇa-kaṭṭhasākhāpalāsaṃ chindantopi chindāti āṇāpentopi haritagge oḷārikaṃ nimittaṃ karoti nāma. Ājīvatthāya paṇṇanivāpa-ādīni gāhāpento phalāni ocinante vā ocinā-pentena vattabbameva natthi. Imesu catūsu suttesu sathārā sāsane vuddhipari-hāni kathitāti.

Yodhājīvavaggo tatiyo.

## (9) 4. theravaggo

### 1. Rajaniyasuttavaṇṇanā

**81.** Catutthassa (3.0038) paṭhame **rajanīyesū**ti rāgassa paccayesu āramma-ṇesu. Sesesupi eseva nayo.

### 2. Vitarāgasuttavaṇṇanā

**82.** Dutiye **makkhī**ti guṇamakkhako. **Paḷāsī**ti yugaggāhalakkhaṇena paḷāsena samannāgato.

### 3. Kuhakasuttavaṇṇanā

**83.** Tatiye **kuhakoti** tīhi kuhanavatthūhi samannāgato. **Lapakoti** lābhasannissitāya lapanāya samannāgato. **Nemittikoti** nimittakiriyakārako. **Nippesikoti** nippesakātāya samannāgato. **Lābhena ca lābham nijigīsītāti** lābhena lābhagavesako. Sukkapakkho vuttavipallāsavasena veditabbo. Catutthaṃ uttānameva.

### 5. Akkhamasuttavaṇṇanā

**85.** Pañcame **akkhamo hoti rūpānanti** rūpārammaṇānaṃ anadhivāsako hoti, tadārammaṇehi rāgādīhi abhibhuyyati. Eseva nayo sabbattha.

### 6. Paṭisaṃbhidāppattasuttavaṇṇanā

**86.** Chaṭṭhe **atthapaṭisaṃbhidāppatto**ti pañcasu atthesu pabhedagataṃ ñāṇaṃ patto. **Dhammapaṭisaṃbhidāppatto**Ti catubbidhe dhamme pabhedagataṃ ñāṇaṃ

patto. **Niruttiṭṭapaṭisambhidāppatto**ti dhammaniruttīsu pabhedagataṃ ñāṇaṃ patto. **Paṭibhānapaṭisambhidāppatto**ti tesu tīsu ñāṇesu pabhedagataṃ ñāṇaṃ patto. So pana tāni tīni ñāṇāneva jānāti, na tesam kiccaṃ karoti. **Uccāvacānī**ti mahantakhu-ddakāni. **Kimkaraṇīyānī**ti iti kattabbāni.

## 7. Sīlavantasuttavaṇṇanā

**87.** Sattamaṃ (3.0039) uttānatthameva. Sīlaṃ panettha khīṇāsavasīlameva, bāhusaccampi khīṇāsavabāhusaccameva, vācāpi khīṇāsavassa kalyāṇavācāva, jhānānīpi kiriyajjhānāneva kathitānīti veditabbāni.

## 8. Therasuttavaṇṇanā

**88.** Aṭṭhame **thero**Ti thirabhāvappatto. **Rattaññū**ti pabbajitadivasato paṭṭhāya atikkantānaṃ bahūnaṃ rattīnaṃ ñātā. **Ñā**toti paññāto pākaṭo. **Yasassī**ti yasani-ssito. **Micchādiṭṭhiko**ti ayāthāvadiṭṭhiko. **Saddhammā vuṭṭhāpetvā**ti dasakusalakammamapathadhammato vuṭṭhāpetvā. **Asaddhamme patiṭṭhāpetī**ti akusalakammamapathesu patiṭṭhāpeti.

## 9. Paṭhamasekhasuttavaṇṇanā

**89.** Navame **sekhassā**ti sikkhakassa sakaraṇīyassa. **Parihānāyā**ti upariguṇehi parihānatthāya. **Kammārāmatā**ti navakamme ramanakabhāvo. **Bhassārāmatā**ti ālāpasallāpe ramanakabhāvo. **Niddārāmatā**ti niddāyane ramanakabhāvo. **Saṅgaṇīkārāmatā**ti gaṇasaṅgaṇīkāya ramanakabhāvo. **Yathāvimuttaṃ cittaṃ na paccavekkhatī**ti yathā yaṃ cittaṃ vimuttaṃ, ye ca dosā pahīnā, guṇā ca paṭiladdhā, te paccavekkhitvā upariguṇapaṭilābhāya vāyāmaṃ na karotīti attho. Iti imasmīṃ sutte sattannaṃ sekhānaṃ upariguṇehi parihānikāraṇaṅca vuddhikāraṇaṅca kathitaṃ. Yaṅca nāma sekhassa parihānakāraṇaṃ, taṃ puthujjanassa paṭhamameva hotīti.

## 10. Dutiyasekhasuttavaṇṇanā

**90.** Dasame **viyattoti** byatto cheko. **Kimkaraṇīyesū**ti iti kattabbesu. **Cetosamathanti** samādhikammaṭṭhānaṃ. **Ananulomikenā**ti sāsanassa ananucchavikena. **Atikālenā**ti atipātova. **Atidivā**ti divā vuccati majjhanhiko, taṃ atikkamitvā. **Ābhisallekhikā**ti ativiya kilesasallekhikā. **Cetovivaraṇasappāyā**ti cittavivaraṇasaṅkhātānaṃ samathavipassanānaṃ

sappāyā. **Appicchakathā** Ti appicchā hothāti (3.0040) kathanakathā. **Santuṭṭhikathā** ti catūhi paccayehi santuṭṭhā hothāti kathanakathā. **Pavivekakathā** ti tīhi vivekehi vivittā hothāti kathanakathā. **Asaṃsaggakathā** ti pañcavidhena saṃsaggena asaṃsaṭṭhā hothāti kathanakathā. **Vīriyārambhakathā** ti duvidhaṃ vīriyaṃ ārabhathāti kathanakathā. **Sīlakathā** Disu sīlaṃ ārabha kathā sīlakathā. Samādhiṃ ārabha, paññaṃ ārabha, pañcavidhaṃ vimuttiṃ ārabha, ekūnavīsati paccavekkhaṇasaṅkhātaṃ vimuttiñāṇadassanaṃ ārabha kathā vimuttiñāṇadassana-kathā. **Na nikāmalābhī**-ādīsu na icchiticchitalābhī, dukkhalābhī na vipulalābhīti attho. Sesam uttānatthamevāti.

Theravaggo catuttho.

## (10) 5. kakudhavaggo

### 1-2. Sampadāsuttadvayaṇṇanā

**91-92.** Pañcamassa paṭhame pañca sampadā missikā kathitā. Dutiye purimā catasso missikā, pañcamī lokikāva.

### 3. Byākaraṇasuttavaṇṇanā

**93.** Tatiye **aññābyākaraṇānī**ti arahattabyākaraṇāni. **Mandattā**ti mandabhāvena aññāṇena. **Momūhattā**ti atimūḷhabhāvena. **Aññaṃ byākarotī**ti arahattaṃ patto-smīti katheti. **Ichhāpakatoti** icchāya abhibhūto. **Adhimānenāti** adhigatamānena. **Sammadevāti** hetunā nayena kāraṇeneva.

### 4-5. Phāsuvihārasuttādivaṇṇanā

**94-95.** Catutthe **phāsuvihārāti** sukhavihārā. Pañcame **akuppanti** arahattaṃ.

### 6. Sutadharasuttavaṇṇanā

**96.** Chaṭṭhe (3.0041) **appaṭṭhoti** appasamārambho. **Appakiccoti** appakaraṇīyo. **Subharoti** sukkena bharitabbo suposo. **Susantosoti** tīhi santosehi suṭṭhu santoso. **Jīvitaparikkhāresūti** jīvitasambhāresu. **Appāhāroti** mandāhāro. **Anodarikattanti** na odarikabhāvaṃ amahagghasabhāvaṃ anuyutto. **Appamidhoti** na bahuniddo. Sattamaṭṭhamāni uttānatthāni.

### 9. Sīhasuttavaṇṇanā

99. Navame **sakkaccaññeva deti no asakkaccanti** anavaññāya avirajjhivāva deti, no avaññāya virajjhivā. **Mā me yoggapatho nassāti** mayā katayoggapatho mayhaṃ mā nassatu, “eko sīho uṭṭhāya biḷāraṃ paharanto virajjhivā paharī”ti evaṃ vattāro mā hontūti attho. **Annabhāranesādānanti** ettha annaṃ vuccati yava-bhattaṃ, taṃ bhāro etesanti annabhārā. Yācakānaṃ etaṃ nāmaṃ. Nesādā vuccanti sākuṇikā. Iti sabbapacchimāya koṭiyā etesaṃ yācakanesādānampi sakkaccameva deseti.

## 10. Kakudhatherasuttavaṇṇanā

100. Dasame **attabhāvapaṭilābhoti** sarīrapaṭilābho. **Dve vā tīṇi vā māgadhakāni gāmakkhetānīti** ettha māgadhikaṃ gāmakkhettaṃ atthi khuddakaṃ, atthi majjhimaṃ, atthi mahantaṃ. Khuddakaṃ gāmakkhettaṃ ito cattālīsaṃ usabhāni, ito cattālīsanti gāvutaṃ hoti, majjhimaṃ ito gāvutaṃ, ito gāvutanti aḍḍhayajanaṃ hoti, mahantaṃ ito diyaḍḍhagāvutaṃ, ito diyaḍḍhagāvutanti tigāvutaṃ hoti. Tesu khuddakena gāmakkhettena tīṇi, khuddakena ca majjhimena ca dve gāmakkhetānī tassa attabhāvo. Tigāvutañhissa sarīraṃ. **Pariharissāmīti** paṭijaggissāmi gopayissāmi. **Rakkhassetanti** rakkhassu etaṃ. **Moghapurisoti** tucchapuriso. **Nāssa-ssāti** na (3.0042) etassa bhavēyya. **Samudācareyyāmāti** katheyyāma. **Sammanna-tīti** sammānaṃ karoti. **Yaṃ tumo karissati tumova tena paññāyissatīti** yaṃ esa karissati, esova tena kammena pākaṭo bhavissati. Sesāṃ sabbattha uttānatthamevāti.

Kakudhavaggo pañcamaṃ.

Dutiyapaṇṇāsakaṃ niṭṭhitaṃ.

### 3. Tatiyapaṇṇāsakaṃ

(11) 1. phāsuvihāravaggo

#### 1. Sārajjasuttavaṇṇanā

101. Tatiyassa (3.0043) paṭhame **vesārajjakaraṇāti** visāradabhāvāvahā. **Sārajjam hotīti** domanassaṃ hoti.

#### 2. Ussaṅkitasuttavaṇṇanā



**102.** Dutiye **ussaṅkitaparisaṅkitoti** ussaṅkito ca parisaṅkito ca. **Api akuppadhammopīti** api akuppadhammo khīṇāsavo samānopi parehi pāpabhikkhūhi ussaṅkita-parisaṅkito hotīti attho. **Vesiyāgocaroti**-ādīsu vesiyā vuccanti rūpūpajīviniyo, tā gocarō assāti vesiyāgocarō, tāsam geham abhiṇhagamanoti attho. Sesapadesupī eseva nayo. Tattha pana **vidhavāti** matapatikā. **Thullakumārikāti** mahallikakumārikāyo.

### 3. Mahācorasuttavaṇṇanā

**103.** Tatiye **ito bhogena paṭisantharissāmīti** ito mama sāpateyyato bhogaṃ gahetvā tena paṭisanthāraṃ karissāmi, tassa ca mama ca antaraṃ pidahissāmīti attho. **Gahaṇānīti** parasantakānaṃ bhaṇḍānaṃ gahaṇāni. **Guyhamantāti** guhitabbamantā. **Antaggāhikāyāti** sassataṃ vā ucchedaṃ vā gahetvā ṭhitāya. Sesa-mettha uttānathameva. Catutthe sabbaṃ heṭṭhā vuttanayameva.

### 5. Phāsuvihārasuttavaṇṇanā

**105.** Pañcame **mettaṃ kāyakammanti** mettacittena pavattitaṃ kāyakammaṃ. **Āvi ceva raho cāti** sammukhe ceva parammukhe ca. Itaresupī eseva nayo. **Yāni tāni sīlānīti**-ādi catupārisuddhisīlavasena vuttaṃ. **Samādhisaṃvattanikānīti** (3.0044) maggasamādhīphalāsamādhīnibbattakāni. **Sīlasāmaññagatoti** samānasīlataṃ gato, ekasadisāsilo hutvāti attho. **Takkarassā** Ti yo naṃ karoti, tassa. Iti imasmiṃ sutte sīlaṃ missakaṃ kathitaṃ, diṭṭhi vipassanāsammādiṭṭhīti.

### 6. Ānandasuttavaṇṇanā

**106.** Chaṭṭhe **no ca paraṃ adhisīle sampavattā hotīti** paraṃ sīlabhāvena na garahati na upavadati. **Attānupekkhīti** attanova katākataṃ jānanavasena attānaṃ anupekkhitā. **No parānupekkhīti** parassa katākatesu abyāvaṭo. **Apaññātoti** apākaṭo appapuñño. **Apaññātakenāti** apaññātabhāvena apākaṭatāya mandapuññatāya. **No paritassatīti** paritāsaṃ nāpajjati. Iti imasmiṃ sutte khīṇāsavova kathito.

### 7-8. Sīlasuttādivaṇṇanā

**107-108.** Sattame sīlasamādhīpaññā missikā kathitā, vimutti arahattaphalaṃ, vimuttiñāḍadassanaṃ paccavekkhaṇaññaṃ lokiya-meva. Aṭṭhamepi eseva nayo. Paccavekkhaṇaññaṃ panettha asekhassa pavattattā asekhanti vuttaṃ.

### 9-10. Cātuddhisuttādivaṇṇanā

**109-110.** Navame **cātuddisoti** catūsu disāsu appaṭihatacāro. Imasmimpi sutte khīṇāsavova kathito. Dasame **alanti** yutto. Idhāpi khīṇāsavova kathito.

Phāsuvihāravaggo paṭhamo.

## (12) 2. andhakavindavaggo

### 1. Kulūpakasuttavaṇṇanā

111. Dutiyaṣṣa paṭhame **asanthavavissāsī**Ti attanā saddhiṃ santhavaṃ akarontesu vissāsaṃ anāpajantesuyeva vissāsaṃ karoti. **Anissaravikappī**ti (3.0045) anissarova samāno “imaṃ detha, imaṃ gaṇhathā”ti issaro viya vikappeti. **Vissaṭṭhupasevī**ti vissaṭṭhāni bhinnakulāni ghaṭanathāya upasevati. **Upakaṇṇakajappī**ti kaṇṇamūle mantāṃ gaṇhāti. Sukkapakkho vuttavipariyāyena veditabbo.

### 2. Pacchāsamaṇasuttavaṇṇanā

112. Dutiye **pattapariyāpannaṃ na gaṇhātī**ti upajjhāye nivattitvā ṭhite attano tucchapattaṃ datvā tassa pattaṃ na gaṇhāti, tato vā dīyamānaṃ na gaṇhāti. **Na nivāretī**Ti idaṃ vacanaṃ āpattivītikamavacanaṃ nāmāti na jānāti. Ñatvā vāpi, “bhante, evarūpaṃ nāma vattaṃ na vaṭṭatī”ti na nivāreti. **Kathaṃ opātetī**ti tassa kathaṃ bhinditvā attano kathaṃ paveseti. **Jaḷo**Ti jaḷo. **Eḷamūgoti** paggharitakheḷamukho. Tatiyaṃ uttānameva.

### 4. Andhakavindasuttavaṇṇanā

114. Catutthe **sīlavā hothāti** sīlavantā hotha. **Ārakkhasatinoti** dvārarakkhikāya satiyā samannāgatā. **Nipakkasatinoti** dvārarakkhanakeneva ñāṇena samannāgatassatino. **Satārakkhena cetasā samannāgatā**ti satārakkhena cittena samannāgatā. **Appabhassāti** appakathā. **Sammādiṭṭhikā**ti kammassakatajjhāna-vipassanā-magga-phalavasena pañcavidhāya sammādiṭṭhiyā samannāgatā. Apica paccavekkhaṇañāṇampi sammādiṭṭhiyevāti veditabbā.

### 5. Maccharinīsuttavaṇṇanā

115. Pañcame **āvāsamaccharinī**ti āvāsaṃ maccharāyati, tattha aññesaṃ vāsaṃ na sahati. **Kulamaccharinī**ti upaṭṭhākakulaṃ maccharāyati, aññesaṃ tattha upasaṅkamaṃ na sahati. **Lābhamaccharinī**ti lābhaṃ maccharāyati, aññesaṃ taṃ uppajjantaṃ na sahati. **Vaṇṇamaccharinī**ti guṇaṃ maccharāyati, aññesaṃ guṇakathaṃ na sahati. **Dhammaccharinī**ti pariyattidhammaṃ maccharāyati, aññesaṃ dātuṃ na icchati.

## 6-7. Vaṇṇanāsuttādivaṇṇanā

116-117. Chaṭṭhe (3.0046) **saddhādeyyaṃ vinipātetī** Ti parehi saddhāya dinna-piṇḍapātato aggaṃ aggahevā parassa deti. Sattame **issukinīti** issāya samannā-gatā. Sesam sabbattha uttānamevāti.

Andhakavindavaggo dutiyo.

### (13) 3. gilānavaggo

## 4. Dutiya-upaṭṭhākasuttavaṇṇanā

124. Tatiyassa catutthe **nappaṭibaloti** kāyabalena ca ñāṇabalena ca asamannā-gato. **Āmisantaroti** āmisahetuko cīvarādīni paccāsīsamāno.

## 5-6. Anāyussāsuttadvayaṇṇanā

125-126. Pañcame **anāyussāti** āyupacchedanā, na āyuvaḍḍhanā. Chaṭṭhepi eseva nayo.

## 7. Vapakāsasuttavaṇṇanā

127. Sattame **nālaṃ saṅghamhā vapakāsitunti** saṅghato nikkhamitvā ekako vasitum na yutto. Kāmañcesa saṅghamajjhepi vasitum ayuttova asaṅghasobhanatāya, ovādānusāsanippaṭibaddhattā pana nippariyāyeneva saṅghamhā vapakāsitum na yutto. **Alaṃ saṅghamhā vapakāsitunti** cātuddisattā saṅghamhā nikkhamma ekako vasitum yutto, saṅghasobhanatāya pana saṅghepi vasitum yuttoyeva. Aṭṭhamam uttānatthameva.

## 9. Parikuppasuttavaṇṇanā

129. Navame **āpāyikā** Ti apāyagāmino. **Nerayikā** ti nirayagāmino. **Parikuppāti** parikuppanasabhāvā purāṇavaṇasadisā. **Atekkicchāti** akattabbaparikkammā. Dasamam uttānatthamevāti.

Gilānavaggo tatiyo.

## (14) 4. rājavaggo

### 1. Paṭhamacakkānuvattanasuttavaṇṇanā

131. Catutthassa (3.0047) paṭhame **dhammenāti** dasakusaladhammena. **Cakkanti** āṇacakkaṃ. **Atthaññūti** rajjatthaṃ jānāti. **Dhammaññūti** paveṇidhammaṃ jānāti. **Mattaññūti** daṇḍe vā balamhi vā pamāṇaṃ jānāti. **Kālaññūti** rajjasukhānubhavanakālaṃ, vinicchayakaraṇakālaṃ, janapadacārikākālañca jānāti. **Parisaññūti** ayaṃ parisā khattiyaparisā, ayaṃ brāhmaṇavessasuddasamaṇaparisāti jānāti.

Tathāgatavāre **atthaññūti** pañca atthe jānāti. **Dhammaññūti** cattāro dhamme jānāti. **Mattaññūti** catūsu paccayesu paṭiggahaṇaparibhogamattaṃ jānāti. **Kālaññūti** ayaṃ kālo paṭisallīnassa, ayaṃ samāpattiyā, ayaṃ dhammadesanāya, ayaṃ janapadacārikāyāti evaṃ kālaṃ jānāti. **Parisaññūti** ayaṃ parisā khattiyaparisā ...pe... ayaṃ samaṇaparisāti jānāti. **Anuttaranti** navahi lokuttaradhammehi anu-

ttaraṃ. **Dhammacakkanti** seṭṭhacakkaṃ.

## 2. Dutiyacakkānūvattanasuttavaṇṇanā

**132.** Dutīye **pitarā pavattitaṃ cakkanti** cakkavattimhi pabbajite vā kālakate vā cakkaratanāṃ sattāhamattaṃ ṭhatvā antaradhāyati, kathamesa taṃ anuppavatteti nāma? Pitu paveṇiyaṃ ṭhatvā cakkavattivattaṃ pūretvā cakkavattirajjaṃ kārentopi pitarā pavattitameva anuppavatteti nāma.

## 3. Dhammarājāsuttavaṇṇanā

**133.** Tatiyaṃ tikanipāte vuttanayameva. Sevitabbāsevitabbe panettha pacchi-mapadadvayameva viseso. Tattha sammā-ājīvo sevitabbo, micchā-ājīvo na sevitabbo. Sappāyo gāmanigamo sevitabbo, asappāyo na sevitabbo.

## 4. Yassaṃdisaṃsuttavaṇṇanā

**134.** Catutthe (3.0048) **ubhatoti** dvīhipi pakkhehi. **Mātito ca pitito cāti** yassa hi mātā khattiyā, mātumātā khattiyā, tassāpi mātā khattiyā. Pitā khattiyo, pitupitā khattiyo, tassapi pitā khattiyo. So ubhato sujāto mātito ca pitito ca. **Samṣuddhagaḥaṇikoti** saṃsuddhāya mātukucchiyā samannāgato. “Samavepākiniyā gahaṇiyā”-ti ettha pana kammajatejodhātu gahaṇīti vuccati. **Yāva sattamā pitāmahayugāti** ettha pitupitā pitāmaho, pitāmahassa yugaṃ pitāmahayugaṃ. Yuganti āyuppa-māṇaṃ vuccati. Abhilāpamattameva cetāṃ, atthato pana pitāmahoyeva pitāmahayugaṃ. Tato uddhaṃ sabbepi pubbapurisā pitāmahaggahaṇeneva gahitā. Evaṃ yāva sattamo puriso, tāva saṃsuddhagahaṇiko, atha vā akkhitto anupakkuṭṭho jātivādenāti dasseti. **Akkhittoti** “apanetha etaṃ, kiṃ iminā”-ti evaṃ akkhitto anavakkhitto. **Anupakkuṭṭhoti** na upakkuṭṭho na akkosāṃ vā nindaṃ vā pattapubbo. Kena kāraṇenāti? **Jātivādena**, “itipi hīnajātiko eso”-ti evarūpena vacanenāti attho.

**Aḍḍhoti**-ādīsu yo koci attano santakena vibhavana aḍḍho hoti. Idha pana na kevalaṃ aḍḍhoyeva, **mahaddhano** mahatā aparimāṇasaṅkhena dhanena samannāgatoti attho. Pañcakāmaguṇavasena mahantā uḷārā bhogā assāti **mahābhogo**. **Paripuṇṇakosakoṭṭhāgāro**ti koso vuccati bhaṇḍāgāraṃ, nidahitvā ṭhapitena dhanena paripuṇṇakoso, dhaññaṃ ca paripuṇṇakoṭṭhāgāroti attho. Atha vā catubbidho koso hatthī assā rathā raṭṭhanti, tividhaṃ koṭṭhāgāraṃ dhanakoṭṭhāgāraṃ dhaññaṃ koṭṭhāgāraṃ vatthakoṭṭhāgāraṃ. Taṃ sabbampi paripuṇṇamassāti paripuṇṇakosakoṭṭhāgāro. **Assavāyāti** kassaci bahumpi dhaṇaṃ dentassa senā na suṇāti, sā anassavā nāma hoti. Kassaci adentassāpi suṇātiyeva, ayaṃ assavā nāma. **Ovādapaṭikarāyāti** “idaṃ vo kattabba, idaṃ na kattabban”-ti dinna-ovādakarāya. **Paṇḍitoti** paṇḍiccena samannāgato. **Byattoti** paññāveyyattiyena yutto. **Medhāvīti** ṭhānuppattikapaññāya (3.0049) samannāgato. **Paṭibaloti** samattho. **Atthe cintetunti** vaḍḍhi-atthe cintetuṃ. So hi paccuppanna-atthavaseneva “atītepi evaṃ

ahesum, anāgatepi evaṃ bhavissanti”ti cinteti. **Vijitāvīnanti** vijitavijayānaṃ, mahāntena vā vijayena samannāgatānaṃ. **Vimuttacittānanti** pañcahi vimuttīhi vimuttamānasānaṃ.

## 5-6. Patthanāsuttadvayaṇṇanā

**135-136.** Pañcame **negamajānapadassāti** nigamavāsino ca raṭṭhavāsino ca janassa. **Hatthisinti-ādīhi** hatthi-assarathatharudhanulekhamuddāgaṇanādīni soḷasa mahāsippāni dassitāni. **Anavayoti** samattho paripuṇṇo. Sesamettha heṭṭhā vuttanayeneva veditabbaṃ. Chaṭṭhe **oparajjanti** uparājabhāvaṃ.

## 7. Appaṃsupatisuttavaṇṇanā

**137.** Sattame **purisādhippāyāti** assaddhamavasena purise uppannādhippāyā purisajjhāsayā. **Ādānādhippāyoti** idāni gahetuṃ sakkhissāmi, idāni sakkhissāmīti evaṃ gahaṇādhippāyo. **Visaṃyogādhippāyoti** idāni nibbānaṃ pāpuṇissāmi, idāni pāpuṇissāmīti evaṃ nibbānajjhāsayo.

## 8. Bhattādakasuttavaṇṇanā

**138.** Aṭṭhame **bhattādakoti** bhattakkhādako, bahubhattabhuñjoti attho. **Okāsapharaṇoti** okāsaṃ pharivā aññesaṃ sambādhaṃ katvā ṭhānena okāsapharaṇo. Tattha tattha laṇḍaṃ sāreti pātetīti **laṇḍasāraṇo**. Ettakā hatthīti gaṇanakāle salākaṃ gaṇhātīti **salākaggāhī**. Nisīdanasayanavasena mañcapīṭhaṃ maddatīti **mañcapīṭhamaddano**. Bhikkhugaṇanakāle salākaṃ gaṇhātīti **salākaggāhī**.

## 9. Akkhamasuttavaṇṇanā

**139.** Navame **hatthikāyanti** hatthighaṭaṃ. Sesesupi eseva nayo. Saṅgāme avacarantīti **saṅgāmāvacarā**. **Ekissā vā tiṇodakadattiyā vimānitoti** (3.0050) ekadivasam ekena tiṇodakadānena vimānito, ekadivasamattaṃ aladdhatiṇodakoti attho. Ito parampi eseva nayo. **Na sakkoti cittaṃ samādahitunti** ārammaṇe cittaṃ sammā ṭhapetuṃ na sakkoti. Sesamettha uttānameva. Imasmiṃ pana sutte vaṭṭa-vivaṭṭaṃ kathitanti veditabbaṃ.

## 10. Sotasuttavaṇṇanā

**140.** Dasame **duruttānanti** na suṭṭhu vuttānaṃ dosavasena pavattitānaṃ pharusavacanānaṃ. **Durāgatānanti** dukkhuppādanākārena sotadvāraṃ āgatānaṃ. **Vacana-pathānanti** vacanānaṃ. **Dukkhānanti** dukkhamānaṃ. **Tibbānanti** bahalānaṃ tāpanasabhāvānaṃ vā. **Kharānanti** pharusānaṃ. **Kaṭukānanti** tikhiṇānaṃ. **Asātānanti** amadhurānaṃ. **Amanāpānanti** manaṃ appāyituṃ vaḍḍhetuṃ asamatthānaṃ.

**Pāṇaharānanti** jīvitaharānaṃ. **Yā sā disāti** sabbasaṅkhārasamathādivasena dissati apadissatīti nibbānaṃ disāti veditabbaṃ. Yasmā pana taṃ āgamma sabbe saṅkhārā samathaṃ gacchanti, tasmā **sabbasaṅkhārasamathoti** vuttaṃ. Sesama sabbattha uttānameva. Imasmiṃ pana sutte sīlasamādhipaṅṅā missikā kathitāti.

Rājavaggo catuttho.

## (15) 5. tikaṇḍakāvaggo

### 1. Avajānātisuttavaṇṇanā

**141.** Pañcamassa paṭhame **saṃvāsenāti** ekatovāsenā. **Ādeyyamukhoti** ādiyanamukho, gahaṇamukhoti attho. **Tamenaṃ datvā avajānātīti** “ayaṃ dinnamaṃ paṭiggahetumeva jānātī”ti evama avamaṅṅati. **Tamenaṃ saṃvāsenā avajānātīti** appamattake kismiṅcīdeva kujjhivā “jānāmaṃ tayā katakammaṃ, ettamaṃ addhānaṃ ahaṃ kiṃ karonto vasiṃ, nanu tuyhameva katākataṃ vīmaṃsanto”ti-ādīni vattā hoti. Atha itaro “addhā koci mayhaṃ doso bhavissatī”ti kiṅci paṭippharituṃ na sakkoti. **Taṃ khippaṅṅeva adhimuccitā hotīti** taṃ vaṇṇamaṃ vā avaṇṇamaṃ vā sīghameva (3.0051) saddahati. Saddahanaṭṭhena hi ādānena esa ādiyanamukhoti vutto. **Ādheyyamukhoti** pāḷiyā pana ṭhapitamukhoti attho. Magge khaṭa-āvāṭo viya āgatāgataṃ udakaṃ vaṇṇamaṃ vā avaṇṇamaṃ vā saddahanavasena sampaṭicchituṃ ṭhapitamukhoti vuttaṃ hoti.

**Ittarasaddhoti** parittakasaddho. **Kusalākusale dhamme na jānātīti**-ādīsu kusale dhamme “ime kusalā”ti na jānāti, akusale dhamme “ime akusalā”ti na jānāti. Tathā sāvajje sadosadhamme “ime sāvajjā”ti, anavajje ca niddosadhamme “ime anavajjā”ti, hīne hīnāti, paṇīte paṇītātī. **Kaṇhasukkasappaṭibhāgeti** “ime kaṇhā sukke paṭibāhetvā ṭhitattā sappaṭibhāgā nāma, ime ca sukkā kaṇhe paṭibāhitvā ṭhitattā sappaṭibhāgā”ti na jānāti.

### 2. Ārabhatisuttavaṇṇanā

**142.** Dutiye **ārabhati ca vippaṭisārī ca hotīti** āpattivīkkamanavasena ārabhati ceva, tappaccayā ca vippaṭisārī hoti. **Cetovimuttiṃ paṅṅāvimuttinti** arahattasamādhīnceva arahattaphalaṅṅaṅca. **Nappajānātīti** anadhigatattā na jānāti. **Ārabhati na vippaṭisārī hotīti** āpattiṃ āpajjati, vuṭṭhitattā pana na vippaṭisārī hoti. **Nārabhati vippaṭisārī hotīti** sakīṃ āpattiṃ āpajjitvā tato vuṭṭhāya pacchā kiṅcāpi nāpajjati, vippaṭisāraṃ pana vinodetuṃ na sakkoti. **Nārabhati na vippaṭisārī hotīti** na ceva āpattiṃ āpajjati, na ca

vippaṭṭisārī hoti. **Tañca cetovimuttiṃ ...pe... nirujjhantīti** arahattaṃ pana appatto hoti. Pañcamanayena khīṇāsavo kathito.

**Ārambhajāti** āpattivītikkamasambhavā. **Vippaṭṭisārajāti** vippaṭṭisārato jātā. **Pavaḍḍhantīti** punappunaṃ uppajjanena vaḍḍhanti. **Ārambhaje āsave pahāyāti** vitikkamasambhave āsave āpattidesanāya vā āpattivuṭṭhānena vā pajahitvā. **Paṭivinode tvā** Ti suddhante ṭhitabhāvapaccavekkhaṇena nīharitvā. **Cittaṃ paññañca bhāvetūti** vipassanācittañca taṃsampayuttaṃ paññañca bhāvetu. Sesamaṃ iminā upāyeneva veditabbanti.

### 3. Sārandadasuttavaṇṇanā

**143.** Tatiye (3.0052) **kāmādhimuttānanti** vatthukāmakilesakāmesu adhimuttānaṃ. **Dhammānudhammappaṭipannoti** navalokuttaradhammatthāya sahasīlakaṃ pubbhāgappaṭipadaṃ paṭipanno paṭipattipūraḥko puggalo dullabho lokasmiṃ.

### 4. Tikaṇḍakīsuttavaṇṇanā

**144.** Catutthe **appaṭikūleti** appaṭikūlārammaṇe. **Paṭikūlasaññīti** paṭikūlanti evamaññī. Esa nayo sabbattha. Kathaṃ panāyaṃ evaṃ viharatīti? Itthasmiṃ vatthusmiṃ pana asubhāya vā pharati, aniccato vā upasaṃharati. Evaṃ tāva appaṭikūle paṭikūlasaññī viharati. Anitthasmiṃ vatthusmiṃ mettāya vā pharati, dhātuto vā upasaṃharati. Evaṃ paṭikūle appaṭikūlasaññī viharati. Ubhayasmiṃ pana purimanayassa ca pacchimanayassa ca vasena tatiyacatutthavārā vuttā, chaḷaṅgupekkhāvasena pañcama. Chaḷaṅgupekkhā cesā khīṇāsavassa upekkhāsadisā, na pana khīṇāsavupekkhā. Tattha **upekkhako vihareyyāti** majjhatabhāve ṭhito vihareyya. **Kvacanīti** kismiñci ārammaṇe. **Katthacīti** kismiñci padese. **Kiñcānati** koci appamattakopi. Iti imasmiṃ sutte pañcasu ṭhānesu vipassanāva kathitā. Taṃ āraddhavipassako bhikkhu kātuṃ sakkoti, ñāṇavā paññuttaro bahussutasamaṇopi kātuṃ sakkoti. Sotāpannasakadāgāmi-anāgāmino kātuṃ sakkontiyeva, khīṇāsava vattabbameva natthīti. Pañcamaṃ uttānameva.

### 6. Mittasuttavaṇṇanā

**146.** Chaṭṭhe **kammantaṃ kāretīti** khetṭādikammantaṃ kāreti. **Adhikaraṇaṃ ādiyati** cattāri adhikaraṇāni ādiyati. **Pāmokkhesu bhikkhūsūti** disāpāmokkhesu bhikkhūsūti. **Paṭiviruddho hotīti** paccanīkaggāhitāya viruddho hoti. **Anavatthacārikanti** anavatthānacārikaṃ.

### 7. Asappurisdānasuttavaṇṇanā

**147.** Sattame (3.0053) **asakkaccaṃ detīti** na sakkaritvā suciṃ katvā deti. **Acittī-**



**katvā detīti** acittikārena agāravavasena deti. **Apaviddham detīti** na nirantaram deti, atha vā chaḍḍetukāmo viya deti. **Anāgamanadiṭṭhiko detīti** katassa nāma phalam āgamissatīti na evaṃ āgamanadiṭṭhiṃ na uppādetvā deti.

Sukkapakkhe **cittikatvā detīti** deyyadhamme ca dakkhiṇeyyesu ca cittikāram upaṭṭhapetvā deti. Tattha deyyadhammaṃ paṇitaṃ ojavantaṃ katvā dento deyyadhamme cittikāram upaṭṭhapeti nāma. Puggalam vicinitvā dento dakkhiṇeyyesu cittikāram upaṭṭhapeti nāma. **Sahatthā detīti** āṇattiyā parahatthena adatvā “anama-tagge saṃsāre vicarantena me hatthapādānaṃ aladdhakālassa pamāṇaṃ nāma natthi, vaṭṭamokkhaṃ bhavanissaraṇaṃ karissāmi”ti sahattheneva deti. **Āgamana-diṭṭhikoti** “anāgatabhavassa paccayo bhavissatī”ti kammañca vipākañca sadda-hitvā detīti.

## 8. Sappurisdānasuttavaṇṇanā

**148.** Aṭṭhame **saddhāyā**ti dānañca dānaphalañca saddahitvā. **Kālenā**ti yuttappattakālena. **Anaggahitacitto**ti aggahitacitto muttacāgo hutvā. **Anupahaccā**ti anupaghātetvā guṇe amakkhetvā. **Kālāgatā cassa atthā pacurā hontīti** atthā āgacchamānā vayovuḍḍhakāle anāgantvā yuttappattakāle paṭhamavayasmimyeva āgacchanti ceva bahū ca honti.

## 9. Paṭhamasamayavimuttasuttavaṇṇanā

**149.** Navame **samayavimuttassā**ti appitappitakkhaṇeyeva vikkhambhitehi kilesehi vimuttattā samayavimuttisaṅkhātāya lokiyavimuttiyā vimuttacittassa. Dasamaṃ uttānatthameva.

Tikaṇḍakivaggo pañcamao.

Tatīyapaṇṇāsakaṃ niṭṭhitaṃ.

## 4. Catutthapaṇṇāsakaṃ

(16) 1. saddhammavaggo

## 1. Paṭhamasammattaniyāmasuttavaṇṇanā

**151.** Catutthassa (3.0054) paṭhame **abhabbo niyāmaṃ okkamituṃ kusalesu dhammesu sammattanti** kusalesu dhammesu sammattabhūtaṃ magganīyāmaṃ

okkamituṃ abhabbo abhājanaṃ. **Kathaṃ paribhotīti**-ādīsu “kiṃ kathā nāma esā”ti vadanto **kathaṃ paribhoti** nāma. “Kiṃ nāmesa katheti, kiṃ ayaṃ jānāti”ti vadanto **kathikaṃ paribhoti** nāma. “Mayaṃ kiṃ jānāma, kuto amhākaṃ etaṃ sotuṃ balan”ti vadanto **attānaṃ paribhoti** Nāma. Vipariyāyena sukkapakkho vedītabbo.

## 2. Dutiyasammattaniyāmasuttavaṇṇanā

152. Dutīye **anaññāte aññātamānīti** aviññātasmiṃyeva “viññātamidaṃ mayā”ti evaṃmānī.

## 3. Tatiyasammattaniyāmasuttavaṇṇanā

153. Tatiye **makkhī dhammaṃ suṇātīti** makkhī hutvā guṇamakkhanacittena dhammaṃ suṇāti. **Upārambhacittoti** niggahāropanacitto. **Randhagavesīti** guṇa-randhaṃ guṇacchiddaṃ gavesanto.

## 4. Paṭhamasaddhammasammosasuttavaṇṇanā

154. Catutthe **na sakkaccaṃ dhammaṃ suṇantīti** ohitasotā sukatakārino hutvā na suṇanti. **Na pariyāpuṇantīti** yathāsutaṃ dhammaṃ vaḷaṅjantāpi sakkaccaṃ na vaḷaṅjenti. Pañcamaṃ uttānameva.

## 6. Tatiyasaddhammasammosasuttavaṇṇanā

156. Chaṭṭhe **appaṭisaraṇoti** appaṭiṭṭho. Ācariyā hi suttantassa paṭisaraṇaṃ nāma, tesaṃ abhāvā appaṭisaraṇo hoti. Sesamettha heṭṭhā vuttanayameva.

## 7. Dukkathāsuttavaṇṇanā

157. Sattame (3.0055) **puggalaṃ upanidhāyāti** taṃ taṃ puggalaṃ upanikkhipivā, sakkhiṃ katvāti attho. **Kacchamānāyāti** kathiyamānāya. Sesamettha aṭṭhamāñca uttānatthamevāti.

## 9. Udāyīsuttavaṇṇanā

159. Navame **anupubbiṃ kathaṃ kathessāmīti** dānānantaraṃ silaṃ, silānantaraṃ sagganti evaṃ desanānupubbiṃ kathaṃ vā, yaṃ yaṃ suttapadaṃ vā gāthāpadaṃ vā nikkhittaṃ hoti, tassa tassa anurūpakathaṃ kathessāmīti cittaṃ upaṭṭhapetvā paresaṃ dhammo desetabbo. **Pariyāyadassāvīti** tassa tassa atthassa taṃ taṃ kāraṇaṃ dassento. Kāraṇaṅhi idha pariyāyoti vuttaṃ. **Anuddayaṃ paṭiccāti** “mahāsambādhappatte satte sambādhato mocessāmī”ti anu-

kampaṃ āgamma. **Na āmisantaroti** na āmisahetuko, attano catupaccayalābhaṃ anāsīsantoti attho. **Attānañca parañca anupahaccāti** attukkaṃsanaparavambhanā-divasena attānañca parañca guṇupaghātena anupahantvā.

## 10. Duppaṭṭivinodayasuttavaṇṇanā

**160.** Dasame **duppaṭṭivinodayāti** yāni hassādīni kiccāni nipphādetuṃ ṭhānāni uppannāni honti, tesu matthakaṃ asampattesu antarāyeva dunnihārā duvikkhambhayā honti. **Paṭibhānanti** kathetukāmatā vuccati. Imāni pañca duppaṭṭivinodayāni, na suppaṭṭivinodayāni. Upāyena pana kāraṇena anurūpāhi paccavekkhaṇa-anusāsanādīhi sakkā paṭivinodetunti.

Saddhammavaggo paṭhamo.

### (17) 2. āghātavaggo

#### 1. Paṭhama-āghātaṭṭivinayasuttavaṇṇanā

**161.** Dutiyassa (3.0056) paṭhame āghātaṃ paṭivinenti vūpasamentīti **āghātaṭṭivinayā**. **Yattha bhikkhuno uppanno āghāto sabbaso paṭivinetabboti** yattha āramaṇe bhikkhuno āghāto uppanno hoti, tattha so sabbo imehi pañcahi paṭivinode-tabboti attho. **Mettā tasmimṃ puggale bhāvetabbāti** tikacatukkajjhānavasena mettā bhāvetabbā. **Karuṇāyapi** eseva nayo. **Upekkhā** pana catukkapañcakajjhānavasena bhāvetabbā. Yasmā pana yaṃ puggalaṃ passato cittaṃ na nibbāti, tasmimṃ muditā na saṅghahati, tasmā sā na vuttā. **Asati-amanasikāroti** yathā so puggalo na upaṭṭhāti, kuṭṭādīhi antarito viya hoti, evaṃ tasmimṃ asati-amanasikāro āpajjitabbo. Sesam heṭṭhā vuttanayattā uttānameva.

#### 2. Dutiya-āghātaṭṭivinayasuttavaṇṇanā

**162.** Dutīye āghāto etesu paṭivinetabboti **āghātaṭṭivinayā**. Āghāto etehi paṭivinetabbotipi **āghātaṭṭivinayā**. Paṭivinayoti hi paṭivinayavatthūnampi paṭivinayakāraṇānampi etaṃ adhivacanaṃ, tadubhayampi idha vaṭṭati. Pañca hi puggalā paṭivinayavatthū honti pañcahi upamāhi pañca paṭipattiyo paṭivinayakāraṇāni. **Labhati ca kālena kālaṃ cetaso vivaraṃ cetaso pasādanti** kāle kāle samathavipassanācittassa uppannokāsasaṅkhātaṃ vivarañceva saddhāsampannabhāvasaṅkhātaṃ pasādañca labhati.

**Rathiyāyāti** antaravīthiyaṃ. **Nantakanti** pilotikakhaṇḍaṃ. **Niggahetvāti** akkamitvā. **Yo tattha sāroti** yaṃ tattha thiraṭṭhānaṃ. **Taṃ paripātetvāti** taṃ luñcitvā. **Eva-meva khoti** ettha paṃsukūliko viya mettāvihārī daṭṭhabbo, rathiyāya nantakaṃ

viya veripuggalo, dubbalaṭṭhānaṃ viya aparisuddhakāyasaṃcāratā, thiraṭṭhānaṃ viya parisuddhavaśisaṃcāratā, dubbalaṭṭhānaṃ chaḍḍetvā thiraṭṭhānaṃ ādāya gantvā sibbitvā rajitvā pārūpitvā (3.0057) vicaraṇakālo viya aparisuddhakāyasaṃcāratam aṃasaṃkatvā parisuddhavaśisaṃcāratam maṃasaṃkatvā verimhi cittuppaḍaṃ nibbāpetvā phāsuviḥāraḃālo daṭṭhabbo.

**Sevālapaṇakapariyonaddhāti** sevālena ca udakapappaṭakena ca paṭicchannā. **Ghammaparetoti** ghammena anugato. **Kilantoti** maggakilanto. **Tasitoti** taṇhābhībhūto. **Pipāsitoti** pāṇiyaṃ pātukāmo. **Apaviyūhitvāti**

apanetvā. **Pivivāti** pasanna-udakaṃ pivivā. **Evameva khoti** ettha ghammābhittatto puriso viya mettāvihārī daṭṭhabbo, sevālapaṇakaṃ viya aparisuddhavadācīsamācārātā, pasanna-udakaṃ viya parisuddhakāyavasamācārātā, sevālapaṇakaṃ apabyūhitvā pasannodakaṃ pivivā gamanaṃ viya aparisuddhavadācīsamācārātā amanasikatvā parisuddhakāyavasamācārātā manasikatvā verimhi cittuppādaṃ nibbāpetvā phāsuvihāraḷo daṭṭhabbo.

**Khobhessāmīti** cālessāmi. **Loḷessāmīti** ākulaṃ karissāmi. **Apeyyampi taṃ kari-ssāmīti** pivituṃ asakkuṇeyyaṃ karissāmi. **Catukkuṇḍikoti** jāṇūhi ca hatthehi ca bhūmiyaṃ patitthānena catukkuṇḍiko hutvā. **Gopītakam pivivāti** gāviyo viya mukhena ākaḍḍhento pivivā. **Evameva khoti** ettha ghammābhittatto puriso viya mettāvihārī daṭṭhabbo, gopadaṃ viya veripuggalo, gopade paritta-udakaṃ viya tassabbhantare parittaguṇo, catukkuṇḍikassa gopītakam pivivā pakkamanaṃ viya tassa aparisuddhakāyavadācīsamācārātā amanasikatvā yaṃ so kālena kālaṃ dhammassavanaṃ nissāya cetaso vivarappasādasāṅkhātāṃ pītipāmojjaṃ labhati, taṃ manasikatvā cittuppādanibbāpanaṃ veditabbaṃ.

**Ābādhikoti** iriyāpathabhañjanakena visabhāgābādhena ābādhiko. **Puratopi-ssāTi** puratopi bhavēya. **Anayabyasananti** avaḍḍhivināsaṃ. **Evameva khoti** ettha so anāthagilāno viya sabbakaṇhadhammasamannāgato puggalo, addhānamaggo viya anamataggasaṃsāro, purato ca pacchato ca gāmānaṃ dūrabhāvo viya nibbānassa dūrabhāvo, sappāyabhojanānaṃ alābho viya sāmāññaphalabhojanānaṃ alābho, sappāyabhesajjānaṃ alābho (3.0058) viya samathavipassanānaṃ abhāvo, patirūpa-upaṭṭhākānaṃ alābho viya ovādānusāsanihi kilesatikicchakānaṃ abhāvo, gāmantanāyakassa alābho viya nibbānasampāpakassa tathāgatassa vā tathāgatasāvakaṃ vā aladdhabhāvo, aññatarassa purisassa disvā kāruññupaṭṭhānaṃ viya tasmim puggale mettāvihārikassa kāruññaṃ uppādetvā cittanibbāpanaṃ veditabbaṃ.

**Acchodakāti** pasannodakā. **Sātodakāti** madhurodakā. **SītodakāTi** tanusītasalilā. **SetakāTi** ūmibhijjanaṭṭhānesu setavaṇṇā. **Supatitthāti** samatitthā. **Evameva khoti** ettha ghammābhittatto puriso viya mettāvihārī daṭṭhabbo, sā pokkharaṇī viya parisuddhasabbadvāro puriso, nhatvā pivivā paccuttarivā rukkhacchāyāya nipajjitvā yathākāmaṃ gamanaṃ viya tesu dvāresu yaṃ icchati, taṃ ārammaṇaṃ katvā cittanibbāpanaṃ veditabbaṃ. Tatiyacatutthāni heṭṭhā vuttanayāneva.

## 5. Pañhapucchāsuttavaṇṇanā

165. Pañcame **paribhavanti** paribhavanto, evaṃ paribhavissāmīti paribhavantaṭṭhāya pucchati attho. **Aññātukāmoti** jānitukāmo hutvā.

## 6. Nirodhasuttavaṇṇanā

166. Chaṭṭhe **atthetaṃ thānanti** atthi etaṃ kāraṇaṃ. **No ce dittheva dhamme aññaṃ ārādheyyāti** no ce imasmimyeva attabhāve arahattaṃ pāpuṇeyya. **Kabalīkā-**

**rāhārabhakkhānaṃ devānanti** kāmāvacaradevānaṃ. **Aññataraṃ manomayaṃ kāyanti** jhānāmanena nibbattaṃ aññataraṃ suddhāvāsabrahmakāyaṃ. **Udāyīti** lāḷudāyī. So hi “manomayan”ti sutvā “āruppe na bhavitabban”ti paṭibāhi. Thero “sāriputto kiṃ jānāti, yassa sammukhā evaṃ bhikkhū vacanaṃ paṭikkosanti”ti evaṃ bālānaṃ laddhi-uppattipaṭibāhanatthaṃ taṃ vacanaṃ anadhivāsetvā yena bhagavā tenupasaṅkami.

**Atthi nāmāti** amarisanatthe nipāto. Teneva cettha “ajjupekkhissathā”ti anāgatavacanaṃ kataṃ. Ayañhetthattho- ānanda, tumhe therāṃ (3.0059) bhikkhuṃ viheṭṭhiyamānaṃ ajjupekkhatha, na vo etaṃ marisayāmi na sahāmi nādhivāsemīti. Kasmā pana bhagavā ānandatheraṃyeva evamāhāti? Dhammabhaṇḍāgārikattā. Dhammabhaṇḍāgārikassa hi evaṃ vadanto paṭibāhituṃ bhāro. Apicesa sāriputta-ttherassa piyasahāyo, tenāpissa esa bhāro. Tattha kiñcāpi bhagavā ānanda-ttherāṃ garahanto evamāha, na panesā tasseva garahā, sammukhībhūtānaṃ sabbesaṃyeva garahāti veditabbā. **Vihāranti** gandhakuṭiṃ.

**Anacchariyanti** na acchariyaṃ. **Yathāti** kāraṇavacanaṃ. **Āyasmantaṃyevettha upavānaṃ paṭibhāseyyāti** ettha bhagavatā ca evaṃ etadeva kāraṇaṃ ārabha udāhaṭṭe āyasmato yeva upavānassa paṭivacanaṃ paṭibhātu upaṭṭhātūti dīpeti. **Sārajjam okkantanti** domanassaṃ anupaviṭṭhaṃ. **Silavāti**-ādīhi khīṇāsavasīlādīni yeva kathitāni. **Khaṇḍiccenāti**-ādīni sakkārādīnaṃ kāraṇapucchāvasena vuttāni. Kiṃ khaṇḍiccādīhi kāraṇehi taṃ taṃ sabrahmacāriṃ sakkareyyunti ayañhettha adhippāyo.

## 7. Codanāsuttavaṇṇanā

**167.** Sattame **codakenāti** vatthusandassanā āpattisandassanā saṃvāsappaṭi-kkhepo sāmīcippaṭikkhepoti catūhi codanāvattūhi codayamānena. **Kālena vakkhāmi no akālenāti** ettha cuditakassa kālo kathito, na codakassa. Paraṃ code-ntena hi parisamajjhe vā uposathapavāraṇagge vā āsanāsālābhojanasālādīsu vā na codetabbo, divāṭṭhāne nisinnakāle “karotāyasmā okāsaṃ, ahaṃ āyasmantaṃ vattukāmo”ti evaṃ okāsaṃ kāretvā codetabbo. Puggalaṃ pana upaparikkhitvā yo lolapuggalo abhūtaṃ vatvā bhikkhūnaṃ ayasaṃ āropeti, so okāsakammaṃ vināpi codetabbo. **Bhūtenāti** tacchena sabhāvena. **Sanhenāti** maṭṭhena mudukena. **Atthasamhitenāti** atthakāmatāya hitakāmatāya upetena. **Avippaṭisāro upadahāta-****bboti** amaṅkubhāvo upanetabbo. **Alaṃ** (3.0060) **te avippaṭisārāyāti** yuttaṃ te ama-ṅkubhāvāya. Sesamettha uttānamevāti. Aṭṭhamaṃ heṭṭhā vuttanayattā pākaṭa-meva.

## 9. Khippanisantisuttavaṇṇanā

**169.** Navame khippaṃ nisāmayati upadhāretīti **khippanisanti**. Suggahitaṃ katvā gaṇhātīti **suggahitaggāhī**. **Atthakusaloti** aṭṭhakathāya cheko. **Dhammakusaloti** pāliyaṃ cheko. **Niruttikusaloti** niruttivacanesu cheko. **Byañjanakusaloti** akkhara-

ppabhede cheko. **Pubbāparakusaloti** atthapubbāparam, dhammapubbāparam, akkharapubbāparam, byañjanapubbāparam, anusandhipubbāparanti imasmiṃ pañcavidhe pubbāpare cheko. Tattha **atthapubbāparakusaloti** heṭṭhā atthena upari atthaṃ jānāti, upari atthena heṭṭhā atthaṃ jānāti. Kathaṃ? So hi heṭṭhā atthaṃ ṭhapetvā upari atthe vutte “heṭṭhā attho atthī”ti jānāti. Upari atthaṃ ṭhapetvā heṭṭhā atthe vuttepi “upari attho atthī”ti jānāti. Ubhato ṭhapetvā majjhe atthe vutte “ubhato attho atthī”ti jānāti. Majjhe atthaṃ ṭhapetvā ubhatobhāgesu atthe vutte “majjhe attho atthī”ti jānāti. **Dhammapubbāparādīsupi** eseva nayo. **Anusandhipubbāpare** pana sīlaṃ ādiṃ katvā āraddhe suttante matthake chasu abhiññāsu āgatāsu “yathānusandhiṃ yathānuparicchedaṃ suttanto gato”ti jānāti. Diṭṭhivasena āraddhe upari saccesu āgatesupi “yathānusandhinā gato”ti jānāti. Kalahabhaṇḍanavasena āraddhe upari sāraṇīyadhammesu āgatesupi, dvattiṃsati racchānakathāvasena āraddhe upari dasakathāvattūsu (a. ni. 10.69; udā031) āgatesupi “yathānusandhinā gato”ti jānātīti.

## 10. Bhaddajisuttavaṇṇanā

**170.** Dasame **abhibhūti** abhibhavitvā ṭhito jeṭṭhako. **Anabhibhūtoti** aññehi ana-bhibhūto. **Aññadatthūti** ekaṃsavacane nipāto. Dassanavasena **daso**, sabbaṃ passatīti adhippāyo. **Vasavattīti** sabbaṃ janaṃ vase vatteti. **Yathā passatoti** iṭṭhārammaṇaṃ vā hotu aniṭṭhārammaṇaṃ vā (3.0061), yenākārena taṃ passantassa. **Anantarā āsavānaṃ khayō hotīti** anantarāyeva arahattaṃ uppajjati. **Yathā suṇatoti** etthāpi eseva nayo. Atha vā yaṃ cakkhunā rūpaṃ disvā nirantameva vipassanaṃ paṭṭhapetvā arahattaṃ pāpuṇāti, taṃ tassa arahattaṃ cakkhuvīññāṇānantaraṃ nāma hoti. Taṃ sandhāya vuttaṃ- **idaṃ dassanānaṃ agganti**. Dutiya-padepi eseva nayo.

**Yathā sukhitassāti** yena maggasukhena sukhitassa. **Anantarā āsavānaṃ khayō hotīti** samanantameva arahattaṃ uppajjati. **Idaṃ sukhānaṃ agganti** idaṃ maggasukhaṃ sukhānaṃ uttamaṃ. **Yathā saññissāti** idhāpi maggasaññāva adhippetā. **Yathā bhūtassāti** yasmīṃ bhava yasmīṃ attabhāve ṭhitassa. **Anantarāti** anantarāyena arahattaṃ uppajjati. **Idaṃ bhavānaṃ agganti** ayaṃ pacchimo attabhāvo bhavānaṃ aggaṃ nāma. Atha vā **yathā bhūtassāti** yehi khandhehi magga-kkhaṇe bhūtassa vijjamānassa. **Anantarā āsavānaṃ khayō hotīti** maggānantarameva phalaṃ uppajjati. **Idaṃ bhavānaṃ agganti** idaṃ maggakkhaṇe khandhapañcakaṃ bhavānaṃ aggaṃ nāmāti.

Āghātavaggo dutiyo.

(18) 3. upāsakavaggo

### 1-3. Sārajjasuttādivaṇṇanā

171-173. Tatiyassa paṭhamadutiyatatiyesu agāriyappaṭipatti kathitā. Sotāpanna-sakadāgāminopi hontu, vaṭṭantiyeva.

### 4. Verasuttavaṇṇanā

174. Catutthe **bhayānī**ti cittutrāsabhayāni. **Verānī**ti akusalaverānīpi puggalaverānīpi. **Cetasikanti** cittanissitaṃ. **Dukkhanti** kāyapasādavatthukaṃ dukkhaṃ. **Domanassanti** domanassavedanaṃ. Imasmiṃ sutte viratipahānaṃ kathitaṃ.

### 5. Caṇḍālasuttavaṇṇanā

175. Pañcame (3.0062) **upāsakapatikuṭṭhoti** upāsakapacchimako. **Kotūhalamaṅgalikoti** “iminā idaṃ bhavissati”ti evaṃ pavattattā kotūhalasaṅkhātena diṭṭhasutamutamaṅgalena samannāgato. **Maṅgalaṃ pacceti no kammanti** maṅgalaṃ oloketi, kammaṃ na oloketi. **Ito ca bahiddhā**ti imamhā sāsanaṃ bahiddhā. **Pubbakāraṃ karotī**ti dānādikaṃ kusalakiccaṃ paṭhamataraṃ karoti.

### 6. Pītisuttavaṇṇanā

176. Chaṭṭhe **kinti mayanti** kena nāma upāyena mayaṃ. **Pavivekaṃ pītinti** paṭhamadutiyajjhānāni nissāya uppajjanakapītiṃ. **Kāmūpasamhitanti** kāmanissitaṃ duvidhe kāme ārabha uppajjanakaṃ. **Akusalūpasamhitanti** “migasūkarādayo vijjhissāmī”ti saraṃ khipitvā tasmīṃ viraddhe “viraddhaṃ mayā”ti evaṃ akusale nissāya uppajjanakaṃ. Tādisesu pana ṭhānesu avirajjhantassa “suṭṭhu me viddhaṃ, suṭṭhu me pahaṭan”ti uppajjanakaṃ **akusalūpasamhitam sukhaṃ somanassaṃ** nāma. Dānādi-upakaraṇānaṃ asampattiyā uppajjamānaṃ pana **kusalūpasamhitam dukkhaṃ domanassanti** veditabbaṃ.

### 7. Vaṇijjāsuttavaṇṇanā

177. Sattame **vaṇijjāti** vāṇijakammāni. **Upāsakenāti** tisaraṇagatena. **Satthavaṇijjāti** āvudhabhaṇḍaṃ kāretvā tassa vikkayo. **Sattavaṇijjāti** manussavikkayo. **Maṃsa-vaṇijjāti** sūkaramigādayo posetvā tesaṃ vikkayo. **Majjavaṇijjāti** yaṃkiñci majjaṃ kāretvā tassa vikkayo. **Visavaṇijjāti** visaṃ kāretvā tassa vikkayo. Iti sabbampi imaṃ vaṇijjaṃ neva attanā kātuṃ, na pare samādapetvā kāretuṃ vaṭṭati.



## 8. Rājasuttavaṇṇanā

178. Aṭṭhame **pabbājentīti** raṭṭhamhā pabbājenti. **Yathāpaccayaṃ vā karontīti** yathādhippāyaṃ yathājjhāsayaṃ karonti. **Tatheva pāpakammaṃ pavedentīti** yathā tena kataṃ, taṃ tatheva aññesaṃ ārocenti kathenti.

## 9. Gihisuttavaṇṇanā

179. Navame (3.0063) **saṃvutakammantanti** pihitakammantaṃ. **Ābhicetasikānanti** uttamacittanissitānaṃ. **Diṭṭhadhammasukhavihārānanti** paccakkheyeva dhamme pavattikkhaṇe sukhavihārānaṃ. **Ariyakantehīti** ariyānaṃ kantehi magga-phalasīlehi.

**Ariyadhammaṃ samādāyāti** ettha ariyadhammoti pañca sīlāni kathitāni. **Merayaṃ vāruṇinti** catubbidhaṃ merayaṃ pañcavidhañca suraṃ. **Dhammañcānuditakka-** **yeti** navavidhaṃ lokuttaradhammaṃ anussativaseneva vitakkeyya. **Abyāpajjhaṃ hitaṃ cittanti** niddukkhaṃ mettādibrahmavihāraccittaṃ. **Devalokāya bhāvayeti** brahmalokatthāya bhāveyya. **Puññatthassa jigīsato**ti puññena atthikassa puññaṃ gavesantassa. **Santesūti** buddhapaccekabuddhatathāgatasāvakesu. **Vipulā hoti dakkhiṇāti** evaṃ dinnadānaṃ mahapphalaṃ hoti. **Anupubbenāti** sīlapūraṇādinā anukkamena. Sesāṃ tikanipāte vuttatthameva.

## 10. Gavesīsuttavaṇṇanā

180. Dasame **sitaṃ pātvākāsīti** mahāmaggeneva gacchanto taṃ sālavanaṃ oloketvā “atthi nu kho imasmiṃ ṭhāne kiñci sukāraṇaṃ uppannapubban”ti addasa kassapabuddhakāle gavesinā upāsakena kataṃ sukāraṇaṃ. Athassa etadahosi- “idaṃ sukāraṇaṃ bhikkhusaṅghassa apākaṭaṃ paṭicchannaṃ, handa naṃ bhikkhusaṅghassa pākaṭaṃ karomī”ti maggā okkamma aññatarasmiṃ padese ṭhitova sitapātukammaṃ akāsi, aggaggadante dassetvā mandahasitaṃ hasi. Yathā hi lokiyamanussā udaraṃ paharantā “kahaṃ kahan”ti hasanti, na evaṃ buddhā. Buddhānaṃ pana hasitaṃ haṭṭhapahaṭṭhākāramattameva hoti.

Hasitañca nāmetaṃ terasahi somanassasahagatacittehi hoti. Tattha lokiyama-hājano akusalato catūhi, kāmāvacarakusalato catūhīti aṭṭhahi cittehi hasati, sekhā akusalato diṭṭhigatasampayuttāni dve apanetvā chahi cittehi hasanti, khīṇāsavā catūhi sahetukakiriyacittehi, ekena ahetukakiriyacittenāti pañcahi cittehi (3.0064) hasanti. Tesupi balavārammaṇe āpāthamāgate dvīhi ñāṇasampayuttacittehi hasanti, dubbalārammaṇe duhetukacittadvayena ca ahetukacittena cāti tīhi cittehi hasanti. Imasmiṃ pana ṭhāne kiriyāhetukamanoviññāṇadhātusomanassasahagatacittaṃ bhagavato pahaṭṭhākāramattahasitaṃ uppādeti.

Taṃ panetaṃ hasitaṃ evaṃ appamattakampi therassa pākaṭaṃ ahosi. Kathaṃ? Tathārūpe hi kāle tathāgatassa catūhi dāṭṭhāhi cātuddīpikamahāmeghamukhato

samosaritā vijjulatā viya virocamānā mahātālakkhādhappamāṇā rasmivaṭṭiyo utṭhahitvā tikkhattuṃ siravaraṃ padakkhiṇaṃ katvā dāṭhaggesuyeva antaradhāyanti. Tena saññāṇena āyasmā ānando bhagavato pacchato gacchamānopi sita-pātubhāvaṃ jānāti.

**Iddhanti** samiddhaṃ. **Phīanti** atisamiddhaṃ sabbapāliphullaṃ viya. **Ākiṇṇama-nussanti** janasaṃmāhulaṃ. **Sīlesu aparipūrakārīti** pañcasu sīlesu asamattakārī. **Paṭi-desitānīti** upāsakabhāvaṃ paṭidesitāni. **Samādapitānīti** saraṇesu paṭiṭṭhāpitānīti attho. **Iccetaṃ samasamanti** iti etaṃ kāraṇaṃ sabbākārato samabhāveneva samaṃ, na ekadesena. **Natthi kiñci atirekanti** mayhaṃ imehi kiñci atirekaṃ natthi. **Handāti** vavassaggatthe nipāto. **Atirekāyāti** visesakāraṇatthāya paṭipajjāmīti attho. **Sīlesu paripūrakārīṃ dhārethāti** pañcasu sīlesu samattakārīti jānātha. Ettāvatā tena pañca sīlāni samādinnaṃ nāma honti. **Kimaṅga pana na mayanti** mayaṃ pana keneva kāraṇena paripūrakārīno na bhavissāma. Sesamettha uttānamevāti.

Upāsakavaggo tatiyo.

## (19) 4. araṇṇavaggo

### 1. Āraṇṇikasuttavaṇṇanā

**181.** Catutthassa paṭhame **mandattā momūhattāti** neva samādānaṃ jānāti, na ānisaṃsaṃ. Attano pana mandattā momūhattā aṇṇāṇeneva āraṇṇako (3.0065) hoti. **Pāpiccho icchāpakatoti** “araṇṇe me viharantassa ‘ayaṃ āraṇṇako’ti catupaccayasakkāraṃ karissanti, ‘ayaṃ bhikkhu lajjī pavivitto’ti-ādīhi ca guṇehi sambhāvessanti”ti evaṃ pāpikāya icchāya ṭhatvā tāya eva icchāya abhibhūto hutvā āraṇṇako hoti. Ummādasena araṇṇaṃ pavisitvā viharanto pana **ummādā citta-kkhepā** āraṇṇako nāma hoti. **Vaṇṇitanti** idaṃ āraṇṇakaṅgaṃ nāma buddhehi ca buddhasāvakehi ca vaṇṇitaṃ pasatthanti āraṇṇako hoti. **Idamatthitanti** imāya kalyāṇāya paṭipattiyā attho etassāti idamatthī, idamatthino bhāvo idamatthitā. Taṃ idamatthitaṃyeva nissāya, na aṇṇaṃ kiñci lokāmisanti attho. Sesamettha ito paresu ca uttānatthameva.

Araṇṇavaggo catuttho.

## (20) 5. brāhmaṇavaggo

### 1. Soṇasuttavaṇṇanā

191. Pañcamassa paṭhame **brāhmaṇadhammā**ti brāhmaṇasabhāvā. **Sunakhe-**sūTi kukkuresu. **Neva kiṇanti na vikkiṇantī**ti na gaṇhantā kiṇanti, na dadantā vikki-  
ṇanti. **Sampiyeneva samvāsaṃ saṃbandhāya sampavattentī**ti piyo piyaṃ upasa-  
ṅkamtivā paveṇiyā bandhanatthaṃ samvāsaṃ pavattayanti. **Udarāvadehakanti**  
udaraṃ avadihitvā upacinitvā pūretvā. **Avasesaṃ ādāya pakkamantī**ti yaṃ  
bhuñjituṃ na sakkonti, taṃ bhaṇḍikaṃ katvā gaḥetvā gacchanti. Imasmimṃ sutte  
vaṭṭameva kathitaṃ.

## 2. Doṇabrāhmaṇasuttavaṇṇanā

192. Dutiye **tvampi noti tvampi nu. Pavattāro**ti pavattayitāro. **Yesanti** yesaṃ  
santakaṃ. **Mantapadanti** vedasaṅkhātaṃ mantameva. **Gītanti** aṭṭhakādīhi dasahi  
porāṇakabrāhmaṇehi sarasampattivāsena sajjhāyitaṃ. **Pavuttanti** aññesaṃ  
vuttaṃ, vācitantī attho. **Samīhitanti** samupabyūḷhaṃ rāsikataṃ, piṇḍaṃ (3.0066)  
katvā ṭhapitantī attho. **Tadanugāyantī**ti etarahi brāhmaṇā taṃ tehi pubbehi gītaṃ  
anugāyanti anusajjhāyanti. **Tadanubhāsantī**ti taṃ anubhāsanti. Idaṃ purimasseva  
vevacanaṃ. **Bhāsitamanubhāsantī**ti tehi bhāsitaṃ anubhāsanti. **Sajjhāyitamanusa-**  
**jjhāyantī**ti tehi sajjhāyitaṃ anusajjhāyanti. **Vācitamānuvācentī**ti tehi aññesaṃ  
vācitaṃ anuvācentī. **Seyyathidanti** te katameti attho. **Aṭṭhakoti-**ādīni tesāṃ  
nāmāni. Te kira dibbena cakkhunā oloketvā parūpaghātaṃ akatvā kassapasa-  
mmāsambuddhassa bhagavato pāvacanena saha saṃsandetvā mante  
ganthesuṃ. Aparāpare pana brāhmaṇā pāṇātipātādīni pakkhipitvā tayo vede  
bhinditvā buddhavacanena saddhiṃ viruddhe akaṃsu. **Tyāssu'**meti ettha **assūti**  
nipātamattaṃ, te brāhmaṇā ime pañca brāhmaṇe paññāpentīti attho.

**Mante adhiyamānoti** vede sajjhāyanto gaṇhanto. **Ācariyadhananti** ācariyada-  
kkhiṇaṃ ācariyabhāgaṃ. **Na issatthenā**ti na yodhājīvakammena uppādeti. **Na rāja-**  
**porisenā**ti na rājupaṭṭhākabhāvena. **Kevalaṃ bhikkhācariyāyā**ti suddhāya bhikkhā-  
cariyāya eva. **Kapālaṃ Anatimañña**mānoTi taṃ bhikkhābhājanaṃ anatimañña-  
māno. So hi puṇṇapattaṃ ādāya sīsaṃ nhāto kuladvāresu ṭhatvā “ahaṃ aṭṭhaca-  
ttālīsa vassāni komārabrahmacariyaṃ carimṃ, mantāpi me gaḥitā, ācariyassa āca-  
riyadhanaṃ dassāmi, dhanaṃ me dethā”ti yācati. Taṃ sutvā manussā yathāsatti  
yathābalaṃ aṭṭhapi soḷasapi satampi saḥassampi denti. Evaṃ sakalagāmaṃ  
caritvā laddhadhanaṃ ācariyassa niyyādeti. Taṃ sandhāyetaṃ vuttaṃ. **Evaṃ kho**  
**doṇa brāhmaṇo brahmasamo hotī**ti evaṃ brahmavihārehi samannāgatattā  
brāhmaṇo brahmasamo nāma hoti.

**Neva kayena na vikkayenā**ti neva attanā kayaṃ katvā gaṇhāti, na parena  
vikkayaṃ katvā dinnaṃ. **Udakūpassaṭṭhanti** udakena upassaṭṭhaṃ pariccattaṃ.  
So hi yasmimṃ kule vayappattā dārikā atthi, gantvā tassa dvāre tiṭṭhati. “Kasmā  
ṭṭhito”ti vutte “ahaṃ aṭṭhacattālīsa vassāni komārabrahmacariyaṃ carimṃ, taṃ  
sabbaṃ tumhākaṃ demi, tumhe mayhaṃ dārikaṃ dethā”ti vadati. Te dārikaṃ  
ānetvā tassa hatthe udakaṃ pātetvā denti. So taṃ udakūpassaṭṭhaṃ bhariyaṃ  
gaṇhitvā gacchati. **Atimīlhajoti** atimīlḥe (3.0067) mahāgūtharāsīmhi jāto. **Tassa**

sāti tassa esā. **Na davatthāti** na kīlanatthā. **Na ratatthāti** na kāmarati-atthā. **Methunaṃ uppādetvāti** dhītaṃ vā puttāṃ vā uppādetvā “idāni paveṇi ghaṭṭiyissatī”ti nikkhamitvā pabbajati. **Sugatiṃ saggāṃ lokanti** brahmalokameva sandhāyetāṃ vuttāṃ. **Devasamo hotīti** dibbavīhārehi samannāgatattā devasamo nāma hoti.

**Tameva puttassādaṃ nikāmayamānoti** yvāssa dhītaṃ vā puttāṃ vā jātāṃ disvā puttāpemaṃ puttassādo uppajjati, taṃ patthayamāno icchamāno. **Kuṭumbaṃ ajjhāvasatīti** kuṭumbaṃ saṅṭhapetvā kuṭumbamajjhe vasati. Sesamettha uttānamevāti.

### 3. Saṅgārasuttavaṇṇanā

**193.** Tatiye **pagevāti** paṭhamaññeva. **Kāmarāgapariyuṭṭhitenāti** kāmarāgaggahitena. **Kāmarāgaparetenāti** kāmarāgānugatena. **Nissaraṇanti** tividhāṃ kāmarāgassa nissaraṇāṃ vikkhambhananissaraṇāṃ, tadanānissaraṇāṃ, samucchedanissaraṇanti. Tattha asubhe paṭhamajjhānaṃ vikkhambhananissaraṇāṃ nāma, vipassanā tadanānissaraṇāṃ nāma, arahattamaggo samucchedanissaraṇāṃ nāma. Taṃ tividhampi nappajānātīti attho. **Attatthampīti**-ādīsu arahattasaṅkhāto attano attho attattho nāma, paccayadāyakānaṃ attho parattho nāma, sveva duvidho ubhayattho nāma. Iminā nayena sabbavāresu attho veditabbo.

Ayaṃ pana viseso- **byāpādassa nissaraṇanti**-ādīsu hi dveva nissaraṇāni vikkhambhananissaraṇāṃca samucchedanissaraṇāṃca. Tattha byāpādassa tāva mettāya paṭhamajjhānaṃ vikkhambhananissaraṇāṃ nāma, anāgāmi maggo samucchedanissaraṇāṃ, thinamiddhassa ālokasaññā vikkhambhananissaraṇāṃ, arahattamaggo samucchedanissaraṇāṃ. Uddhaccakukkuccassa yo koci samatho vikkhambhananissaraṇāṃ, uddhaccassa panettha arahattamaggo, kukkuccassa anāgāmi maggo samucchedanissaraṇāṃ. Vicikicchāya dhammavavatthānaṃ vikkhambhananissaraṇāṃ, paṭhamamaggo samucchedanissaraṇāṃ.

Yā panettha **seyyathāpi, brāhmaṇa, udapatto saṃsaṭṭho lākhāya vāti**-ādīkā upamā vuttā, tāsu **udapattoti** udakabharitā pāti. **Saṃsaṭṭhoti** (3.0068) vaṇṇabhedakaraṇavasena saṃsaṭṭho. **Ukkudhitoti** kudhito. **Ussadakajāto** Ti usumakajāto. **Sevā-lapaṇakapariyonaddhoti** tilabijakādibhedena sevālena vā nīlamanḍūkapiṭṭhivaṇṇena vā udakapiṭṭhiṃ chādetvā nibbattena paṇakena pariyonaddho. **Vāteritoti** vātena erito kampito. **Āviloti** appasanno. **Luḷitoti** asannisinno. **Kalalībhūtoti** kaddamībhūto. **Andhakāre nikkhittoti** koṭṭhakantarādibhede anālokaṭṭhāne ṭhapito. Imasmiṃ sutte bhagavā tīhi bhavēhi desanaṃ nivaṭṭetvā arahattanikūṭena niṭṭhapesi, brāhmaṇo pana saraṇamatte patiṭṭhitoti.

#### 4. Kāraṇapālīsuttavaṇṇanā

194. Catutthe **kāraṇapālī**ti pālōti tassa nāmaṃ, rājakulānaṃ pana kammante kāretīti kāraṇapālī nāma jāto. **Kammantaṃ kāretīti** pātova uṭṭhāya dvāraṭṭālakapā-kāre akate kāreti, jiṇṇe paṭijaggāpeti. **Piṅgiyāniṃ brāhmaṇanti** evaṃnāmakam anāgāmiphale paṭiṭṭhitam ariyasāvakaṃ brāhmaṇam. So kira pātova uṭṭhāya gandhamālādīni gāhāpetvā satthu santikaṃ gantvā vanditvā gandhamālādīhi pūjetvā nagaram āgacchati, idaṃ brāhmaṇassa devasikaṃ vattanti. Taṃ so evaṃ vattaṃ katvā āgacchantaṃ addasa. **Etadvocāti** “ayaṃ brāhmaṇo paññavā ñāṇuttaro, kahaṃ nu kho pātova gantvā āgacchati”ti cintetvā anukkamena santikaṃ āgataṃ sañjānitvā “handā kuto nū”ti-ādivacanaṃ avoca.

Tattha **divā divassāti** divasassāpi divā, majjhanhikakāleti attho. **Paṇḍito maññeti** bhavaṃ piṅgiyānī samaṇam gotamaṃ paṇḍitoti maññati, udāhu noti aya-mettha attho. **Ko cāham, bhoti, bho,** samaṇassa gotamassa paññāveyyattiyajā-nane aham ko nāma? **Ko ca samaṇassa gotamassa paññāveyyattiyam jānissā-mīti** kuto cāham samaṇassa gotamassa paññāveyyattiyam jānissāmi, kena nāma kāraṇena jānissāmīti evaṃ sabbathāpi attano ajānanabhāvaṃ dīpeti. **Sopi nūnassa tādisovāti** yo samaṇassa gotamassa paññāveyyattiyam jāneyya, sopi nūna dasa pāramiyo pūretvā sabbaññutaṃ patto tādiso (3.0069) buddhoyeva bhaveyya. Sineruṃ vā hi pathaviṃ vā ākāsaṃ vā pametukāmena tappamāṇo daṇḍo vā rajju vā laddhuṃ vaṭṭati, samaṇassa gotamassa paññam jānantenapi tassa ñāṇasadisa-meva sabbaññutaññāṇam laddhuṃ vaṭṭatīti dīpeti. Ādaravasena panettha āme-ditaṃ kataṃ. **Uḷārāyāti** uttamāya seṭṭhāya. **Ko cāham, bhoti, bho,** aham sama-ṇassa gotamassa pasamsane ko nāma. **Ko ca samaṇam gotamaṃ pasamsissā-mīti** kena kāraṇena pasamsissāmi.

**Pasatthappasatthoti** sabbaguṇānaṃ upari carehi sabbalokapasatthehi attano guṇeheva pasattho, na tassa aññehi pasamsanakiccaṃ atthi. Yathā hi campaka-pupphaṃ vā niluppalaṃ vā padumaṃ vā lohita-candanaṃ vā attano vaṇṇagandha-siriyāva pāsādikañceva sugandhañca, na tassa āgantukehi vaṇṇagandhehi thoma-nakiccaṃ atthi. Yathā ca maṇirātanaṃ vā candamaṇḍalaṃ vā attano ālokeneva obhāsati, na tassa aññena obhāsanakiccaṃ atthi, evaṃ samaṇo gotamo sabbalo-kapasatthehi attano guṇeheva pasattho thomito, sabbalokassa seṭṭhataṃ pāpito. Na tassa aññena pasamsanakiccaṃ atthi.

Pasatthehi vā pasatthotipi **pasatthappasattho**. Ke pana pasatthā nāma? Rājā pasenadi kosalo kāsikosalavāsikehi pasattho, bimbisāro aṅgamagadhavāsīhi, vesālikā licchavī vajjitaṭṭhavāsīhi pasatthā, pāveyyakā mallā kosinārakā mallā aññepi te te khattiyā tehi tehi jānapadehi pasatthā, caṅki-ādayo brāhmaṇā brāhma-ṇagaṇehi, anāthapiṇḍikādayo upāsakā upāsakagaṇehi, visākhā-ādikā upāsikā anekasatāhi upāsikāhi, sakuludāyi-ādayo paribbājakā anekehi paribbājakasatehi, uppalavaṇṇattheri-ādikā mahāsāvikā anekehi bhikkhunisatehi, sārīputtattherā-dayo mahātherā anekasatehi bhikkhūhi, sakkādayo devā anekasahasseehi devehi,

mahābrahmādayo brahmāno anekasahasseehi brahmehi pasatthā. Te sabbepi dasabalaṃ thomenti vaṇṇenti pasamsantīti bhagavā “pasatthappasattho”ti vuccati. **Atthavasanti** atthānisamsaṃ.

Athassa (3.0070) so attano pasādakāraṇaṃ ācikkhanto **seyyathāpi, bho, puriso-**ti-ādimāha. Tattha **aggarasaparititto**ti bhojanarasesu pāyāso sneharasesu gosappi, kasāvarasesu khuddakamadhu aneḷakaṃ, madhurarasesu sakkarāti eva-mādayo aggarasā nāma. Tesu yena kenaci parititto ākaṇṭhappamāṇaṃ bhuñjitvā ṭhito. **Aññesaṃ hīnānanti** aggarasehi aññesaṃ hīnārasānaṃ. **Suttaso**ti suttato, suttabhāvenāti attho. Sesupi eseva nayo. **Tato tatoti** suttādīsu tato tato. **Aññesaṃ puthusamaṇabrāhmaṇāppavādānanti** ye aññesaṃ puthūnaṃ samaṇabrāhmaṇānaṃ laddhisāṅkhātappavādā, tesam. **Na pihetīti** na pattheti, te kathiyamāne sotumpi na icchati. **Jighacchādubbalyaparetoti** jighacchāya ceva dubbalabhāvena ca anugato. **Madhupiṇḍikanti** sālipiṭṭhaṃ bhajjitvā catumadhurena yojetvā kataṃ baddhasattupiṇḍikaṃ, madhurapūvameva vā. **Adhigaccheyyāti** labheyya. **Asecana-**kanti madhurabhāvakaraṇatthāya aññena rasena anāsittakaṃ ojavantaṃ paṇīta-rasaṃ.

**Haricandanassāti** suvaṇṇavaṇṇacandanassa. **Lohitacandanassāti** rattavaṇṇacandanassa. **Surabhigandhanti** sugandhaṃ. **Darathādayo** vaṭṭadarathā, vaṭṭakilamathā, vaṭṭapariḷāhā eva. **Udānaṃ udānesīti** udāhāraṃ udāhari. Yathā hi yaṃ telaṃ mānaṃ gahetuṃ na sakkoti, vissanditvā gacchati, taṃ avasekoti vuccati. Yañca jalaṃ taḷākaṃ gahetuṃ na sakkoti, ajjhottharivitvā gacchati, taṃ oghoti vuccati. Evamevaṃ yaṃ pītivacanaṃ hadayaṃ gahetuṃ na sakkoti, adhikaṃ hutvā anto asaṇṭhahitvā bahi nikkhamati, taṃ udānanti vuccati. Evarūpaṃ pītimayavacanaṃ nicchāresīti attho.

## 5. Piṅgiyānisuttavaṇṇanā

**195.** Pañcame **nīlāti** idaṃ sabbasaṅgāhikaṃ. **Nīlavaṇṇāti-ādi** tasseva vibhāga-dassanaṃ. Tattha na tesam pakatavaṇṇo nīlo, nīlavilepanavilittattā panetaṃ vuttaṃ. **Nīlavatthāti** paṭadukūlakoseyyādīnipi tesam nīlāneva honti. **Nīlālaṅkāraṇāti** nīlamanīhi nīlapupphehi alaṅkatā, tesam hatthālaṅkāra-assālaṅkāra-rathālaṅkāra-sāṇivī-tānakañcukāpi sabbe nīlāyeva honti. Iminā nayena sabbapadesu attho veditabbo.

**Padumaṃ** (3.0071) **yathāti** yathā satapattaṃ rattapadumaṃ. **Kokanadanti** tasseva vevacanaṃ. **Pātoti** pageva suriyuggamanakāle. **Siyāti** bhaveyya. **Avītaga-**ndhanti avigatagandhaṃ. **Āṅgīrasanti** bhagavato āṅgamaṅgehi rasmiyo niccharanti, tasmā āṅgīrasoti vuccati. **Tapantamādiccamivantalikkhe**ti dvisahassadīpa-parivāresu catūsu mahādīpesu ālokakaraṇavasena antalikkhe tapantaṃ ādiccaṃ viya virocamaṇaṃ. **Āṅgīrasaṃ passāti** attānameva vā mahājanaṃ vā sandhāya evaṃ vadati.

## 6. Mahāsupīnasuttavaṇṇanā

196. Chaṭṭhe **mahāsupināti** mahantehi purisehi passitabbato mahantānañca atthānaṃ nimittabhāvato mahāsupinā. **Pāturahesunti** pākaṭā ahesuṃ. Tattha supinaṃ passanto catūhi kāraṇehi passati dhātukkhobhato vā anubhūtapubbato vā devatopasaṃhārato vā pubbanimittato vāti.

Tattha pittādīnaṃ khobhakaṇapaccayappayogena khubhitadhātuko **dhātukkhobhato** supinaṃ passati. Passanto ca nānāvidhaṃ supinaṃ passati pabbatā patanto viya, ākāseṇa gacchanto viya, vāḷamigahatthacorādīhi anubaddho viya ca. **Anubhūtapubbato** passanto pubbe anubhūtapubbaṃ ārammaṇaṃ passati. **Devatopasaṃhārato** passantassa devatā atthakāmatāya vā anathakāmatāya vā atthāya vā anathāya vā nānāvidhāni ārammaṇāni upasaṃharanti. So tāsamaṃ devatānaṃ ānubhāvena tāni ārammaṇāni passati. **Pubbanimittato** passanto puññāpuññava-sena uppajjitukāmassa atthassa vā anathassa vā pubbanimittabhūtaṃ supinaṃ passati bodhisattamātā viya puttapaṭilābhanimittaṃ, kosalarājā viya soḷasa supine, ayameva bhagavā bodhisattabhūto ime pañca mahāsupine viya cāti.

Tattha yaṃ dhātukkhobhato anubhūtapubbato ca supine passati, na taṃ saccaṃ hoti. Yaṃ devatopasaṃhārato passati, taṃ saccaṃ vā hoti alikaṃ vā. Kuddhā hi devatā upāyena vināsetukāmā viparītampi katvā dassenti. Yaṃ pana pubbanimittato passati, taṃ ekantaṃ saccameva (3.0072) hoti. Etesaṃ catunnaṃ mūlakāraṇānaṃ saṃsaggabhedatopi supinabhedo hotiyeva.

Taṃ panetaṃ catubbidhampi supinaṃ sekhaputhujjanāva passanti appahīnavipallāsattā, asekhā na passanti pahīnavipallāsattā. Kiṃ panetaṃ passanto sutto passati paṭibuddho, udāhu neva sutto na paṭibuddhoti? Kiñcetta yaḍi tāva sutto passati, abhidhammavirodho āpajjati. Bhavaṅgacittena hi supati, taṃ rūpanimittādi-ārammaṇaṃ rāgādisampayuttaṃ vā na hoti. Supinaṃ passantassa ca īdisāni cittāni uppajjanti. Atha paṭibuddho passati, vinayavirodho āpajjati. Yañhi paṭibuddho passati, taṃ sabbohārikacittena passati. Sabbohārikacittena ca kate vītikame anāpatti nāma natthi. Supinaṃ passantena pana katepi vītikame ekantaṃ anāpatti eva. Atha neva sutto na paṭibuddho passati, na nāma passati. Evañca sati supinassa abhāvo ca āpajjati? Na abhāvo. Kasmā? Yasmā kapimiddhapareto passati. Vuttañhetama- “kapimiddhapareto kho, mahārāja, supinaṃ passati” ti.

**Kapimiddhapareto**ti makkaṭaniddāya yutto. Yathā hi makkaṭassa niddā lahuparivattā hoti, evamaṃ yā niddā punappunaṃ kusalādicittavokiṇṇattā lahuparivattā, yassā pavattiyamaṃ punappunaṃ bhavaṅgato uttaraṇaṃ hoti, tāya yutto supinaṃ passati. Tenāyamaṃ supino kusalopi hoti akusalopi abyākatopi. Tattha supinante cetiyavandanadhammassavanadhammadesanādīni karontassa kusalo, paṇātipātādīni karontassa akusalo, dvīhi antehi mutto āvajjanatadārammaṇakkhaṇe abyākatoti veditabbo. Svāyamaṃ dubbalavatthukattā cetaṇāya paṭisandhiṃ ākaḍḍhituṃ asamatto. Pavatte pana aññehi kusalākusalehi upatthambhito vipākaṃ deti. Kiñcāpi vipākaṃ deti, atha kho avisaye uppannattā abbohārikāva supinantacetanā. So panesa supino kālavasenapi divā tāva diṭṭho na sameti, tathā paṭhama-yāme majjhimayāme pacchimayāme ca. Balavapaccūse pana asitapītakhāyite sammā pariṇāmaṃ gate kāyasmimaṃ ojāya paṭiṭṭhitāya aruṇe uggacchamaṇeva

diṭṭho (3.0073) supino sameti. Iṭṭhanimittam supinam passanto iṭṭham paṭilabhati, anīṭṭhanimittam passanto anīṭṭham.

Ime pana pañca mahāsupine neva lokiyamahājano passati, na mahārājāno, na cakkavattirājāno, na aggasāvaka, na paccekabuddhā, na sammāsambuddhā, eko sabbaññubodhisattoyeva passati. Amhākam pana bodhisatto kadā ime supine passīti? “Sve buddho bhavissāmī”ti cātuddasiyam pakkhassa rattivibhāyanakāle passi. Terasiyantipi vadantiyeva. So ime supine disvā uṭṭhāya pallaṅkam ābhūñjitvā nisinno cintesi- “sace mayā kapilavatthunagare ime supinā diṭṭhā assu, pitu mahārājassa katheyyam. Sace pana me mātā jiveyya, tassā katheyyam. Imasmiṃ kho pana ṭhāne imesam paṭiggāhako nāma natthi, ahameva paṭigaṇhissāmī”ti. Tato “idaṃ imassa pubbanimittam idaṃ imassā”ti sayameva supine paṭiggaṇhitvā uruvelagāme sujātāya dinnam pāyāsam paribhuñjitvā bodhimaṇḍam āruyha bodhiṃ patvā anukkamena jetavane viharanto attano makulabuddhakāle diṭṭhe pañca mahāsupine vitthāretum bhikkhū āmantetvā imam desanam ārabhi.

Tattha **mahāpathavī**ti cakkavāḷagabbham pūretvā ṭhitā mahāpathavī. **Mahāsāyanam ahoṣī**ti sirisayanam ahoṣi. **Ohitoti** ṭhapito. So pana na udakasmimyeva ṭhapito ahoṣi, atha kho pācīnasamuddassa uparūparibhāgena gantvā pācīnaccakkavāḷamatthake ṭhapito ahoṣī veditabbo. **Pacchime samudde dakkhiṇe samudde**ti etesupi eseva nayo. **Tiriyā nāma tiṇajātī**ti dabbatiṇam vuccati. **Nābhiyā uggantvā nabham āhacca ṭhitā ahoṣī**ti naṅgalamattena rattadaṇḍena nābhito uggantvā passantassa passantasseva vidatthimattam ratanamattam byāmamattam yaṭṭhimattam gāvutamattam aḍḍhayojanamattam yojanamattanti evam uggantvā uggantvā anekayojanasahassam nabham āhacca ṭhitā ahoṣi. **Pādehi ussakkivā**ti agganakhato paṭṭhāya pādehi abhiruhitvā. **Nānāvaṇṇā**ti eko nīlavaṇṇo, eko pītavaṇṇo, eko lohītavaṇṇo, eko paṇḍupalāsavaṇṇoti evam nānāvaṇṇā. **Setā**ti paṇḍarā parisuddhā. **Mahato mīhapabbatassā**ti tiyojanubbedhassa gūthapabbatassa. **Uparūpari caṅkamatī**ti matthakamatthake



caṅkamati (3.0074). Dīghāyukabuddhā pana tiyojanike miḷhapabbate anupavisitvā nisinnā viya honti.

Evam ettakena ṭhānena pubbanimittāni dassetvā idāni saha pubbanimittēhi paṭilābham dassetum **yampi, bhikkhavi-**ādimāha. Tattha sabbaguṇadāyakattā buddhānaṃ arahattamaggo **anuttarā sammāsambodhi** nāma. Tasmā yaṃ so cakkavāḷamahāpathaviṃ sirisayanabhūtaṃ addasa, taṃ buddhabhāvassa pubbanimittaṃ. Yaṃ himavantapabbatarājānaṃ bimbohanaṃ addasa, taṃ sabbaññutaññāṇabimbohanassa pubbanimittaṃ. Yaṃ cattāro hatthapāde cakkavāḷamatthake ṭhite addasa, taṃ dhammacakkassa appaṭivattiyabhāve pubbanimittaṃ. Yaṃ attānaṃ uttānaṃ nipannaṃ addasa, taṃ tisu bhavesu avakujjānaṃ sattānaṃ uttānamukhabhāvassa pubbanimittaṃ. Yaṃ akkhīni ummiletvā passanto viya ahosi, taṃ dibbacakkhupaṭilābhassa pubbanimittaṃ. Yaṃ yāva bhavaggā ekālokaṃ ahosi, taṃ anāvarenañāṇassa pubbanimittaṃ. Sesam pāḷivaseneva vedita-

## 7. Vassasuttavaṇṇanā

**197.** Sattame **nemittāti** nimittapāṭhakā. **Tejodhātu pakuppatīti** mahā-aggi-kkhandho uppajjati. **Pāṇinā udakaṃ sampaṭicchitvāti** uppannaṃ utusamuṭṭhānaṃ udakaṃ tiyojanasatena hatthena paṭiggahetvā. **Pamattā hontīti** attano kiḷāya pamattā honti vippavuṭṭhasatino. Tesañhi sakāya ratiyā “ramāmā”ti citte uppanne akālepi devo vassati, tadabhāve na vassati. Taṃ sandhāyetaṃ vuttaṃ- “na kālava-

## 10. Nissāraṇīyasuttavaṇṇanā

**200.** Dasame **nissāraṇīyāti** nissaṭṭā visaññuttā. **Dhātuyoti** attasuññasabhāvā. **Kāmaṃ manasikarototi** kāmaṃ manasikarontassa, asubhājjhānato vuṭṭhāya agadaṃ gahetvā viṣaṃ vīmaṃsanto viya vīmaṃsanatthaṃ kāmābhimukhaṃ cittaṃ pesentassāti attho. **Na pakkhandatīti** nappavisati. **Nappasīdatīti** pasādaṃ nāpajjati. **Na santiṭṭhatīti** nappatiṭṭhahati. **Na vimuccatīti** na adhimuccati. Yathā pana kukkuṭapattaṃ vā nhārudaddulaṃ vā aggimhi pakkhittaṃ paṭilīyati patikuṭati pativaṭṭati na saṃpasārīyati, evaṃ paṭilīyati (3.0075) na saṃpasārīyati. **Nekkhammaṃ kho panāti** idha nekkhammaṃ nāma asubhesu paṭhamajjhānaṃ, tadassa manasikaroto cittaṃ pakkhandati. **Tassa taṃ cittanti** tassa taṃ asubhājjhānacittaṃ. **Sugatanti** gocare gatattā suṭṭhu gataṃ. **Subhāvīanti** ahānabhāgiyattā suṭṭhu bhāvitaṃ. **Suvuṭṭhitanti** kāmato vuṭṭhitaṃ. **Suvimuttanti** kāmehi suṭṭhu vimuttaṃ. **Kāmapaccayā āsavā** nāma kāmahetukā cattāro āsavā. **Vighātīti** dukkhā. **Pariḷāhāti** kāmarāgapariḷāhā. **Na so taṃ vedanaṃ vediyatīti** so taṃ kāmavedanaṃ vighātapariḷāhavedanañca na vediyati. **Idamakkhātaṃ kāmānaṃ nissara-**  
**ṇanti** idaṃ asubhājjhānaṃ kāmehi nissaṭṭattā kāmānaṃ nissaraṇanti akkhātaṃ. Yo pana taṃ jhānaṃ pādakaṃ katvā saṅkhāre sammāsanto tatiyamaggaṃ patvā

anāgāmiphaleṇa nibbānaṃ disvā “puna kāmā nāma natthī”ti jānāti. Tassa cittaṃ accantanissaraṇameva. Sesapadesupi eseva nayo.

Ayaṃ pana vireso- dutiyavāre mettājhānāni byāpādassa nissaraṇaṃ nāma. Tatiyavāre karuṇājhānāni vihiṃsāya nissaraṇaṃ nāma. Catutthavāre arūpajjhānāni rūpānaṃ nissaraṇaṃ nāma. Accantanissaraṇañcetta arahattaphalaṃ yojettabbaṃ. Pañcamavāre **sakkāyaṃ manasikarototi** suddhasaṅkhāre pariggaṇhitvā arahattaṃ pattassa sukkhavipassakassa phalasaṃpattito vuṭṭhāya vīmaṃsa- natthaṃ pañcupādānakkhandhābhimukhaṃ cittaṃ pesentassa. **Idamakkhātaṃ sakkāyassa nissaraṇanti** idaṃ arahattamaggena ca phaleṇa ca nibbānaṃ disvā ṭhitassa bhikkhuno “puna sakkāyo natthī”ti uppannaṃ arahattaphalasaṃpatticittaṃ sakkāyassa nissaraṇanti akkhātaṃ. Idāni evaṃ sakkāyanissaraṇaṃ nirodhaṃ patvā ṭhitassa khīṇāsavassa vaṇṇaṃ kathento **tassa kāmanandīpi nānusetīti-ādimāha**. Tattha **nānusetīti** na nibbattati. **Ananusayāti** anibbattiyā. Sesa- mettha uttānatthamevāti.

Brāhmaṇavaggo pañcamaṃ.

Catutthapaṇṇāsakaṃ niṭṭhitaṃ.

## 5. Pañcamapaṇṇāsakaṃ

### (21) 1. kimilavaggo

#### 1. Kimilasuttavaṇṇanā

**201.** Pañcamassa (3.0076) paṭhame **kimilāyanti** evaṃnāmake nagare. **Niculava-** **neti** mucalindavane. **Etadvocā** Ti ayaṃ kira thero tasmimyeva nagare seṭṭhiputto satthu santike pabbajitvā pubbenivāsaññaṃ paṭilabhi. So attanā nivutthaṃ khandhasantānaṃ anussaranto kassapadasabalassa sāsano sakkanakāle pabba- jitvā catūsu parisāsu sāsane agāraṃ karontisu nisseṇiṃ bandhitvā pabbataṃ āruya tattha samaṇadhammaṃ katvā attano nivutthabhāvaṃ addasa. So “sathāraṃ upasaṅkamitvā taṃ kāraṇaṃ pucchissāmi”ti etaṃ “ko nu kho, bhante”- ti-ādivacanaṃ avoca.

**Sathari agāravā viharanti appatissāti** sathari gāraṇaṃ ceva jeṭṭhakabhāvaṃca anupaṭṭhapetvā viharanti. Sesesupi eseva nayo. Tattha cetiyaṅgaṇādīsu chattaṃ dhāretvā upāhanā āruya vicaranto nānappakāraṇaṃcā niraṭṭhakakathaṃ kathento sathari agāraṃ viharati nāma. Dhammassavanagge pana nisīditvā niddāyanto ceva nānappakāraṇaṃcā niraṭṭhakakathaṃ kathento dhamme agāraṃ viharati nāma.

Saṅghamajjhe bāhāvikkhepakam nānattakatham kathento theranavamajjhimesu ca cittikāram akaronto saṅghe agāravo viharati nāma. Sikkham aparipūrento sikkhāya agāravo viharati nāma. Aññamaññaṃ kalahabhaṇḍanādīni karonto añña-  
maññaṃ agāravo viharati nāma. Dutiyam uttānatthameva.

### 3. Assājānīyasuttavaṇṇanā

203-204. Tatiye **ajjavenā**ti ujubhāvena avaṅkagamanena. **Javenā**ti padajavena. **Maddavenā**ti sarīramudutāya. **Khantiyā**ti adhivāsanakkhantiyā. **Soraccenā**ti sucisīlatāya. Bhikkhuvāre **ajjavanti** ñāṇassa ujukagamanam. **Javoti** sūram hutvā ñāṇassa gamanabhāvo. **Maddavanti** (3.0077) sīlamaddavam. **Khantī**ti adhivāsana-  
kkhantiyeva. **Soraccam** sucisīlatāyeva. Catutthe pañca balāni missakāni kathitāni.

### 5. Cetokhīlasuttavaṇṇanā

205. Pañcame **cetokhī**lāti cittassa thaddhabhāvā, kacavarabhāvā, khāṇuka-  
bhāvā. **Satthari kaṅkhatī**ti satthu sarīre vā guṇe vā kaṅkhati. Sarīre kaṅkhamāno  
“dvattiṃsavarapurisalakkaṇapaṭimaṇḍitam nāma sarīram atthi nu kho natthī”ti  
kaṅkhati, guṇe kaṅkhamāno “atītānāgatapaccuppannajānanasamattham sabba-  
ññutaññāṇam atthi nu kho natthī”ti kaṅkhati. **Vicikicchati**ti vicinanto kicchati,  
dukkham āpajjati, vinicchetum na sakkoti. **Nādhimuccati**ti evametanti adhi-  
mokkham na paṭilabhati. **Na sampasīdatī**ti guṇesu otarivā nibbicikicchabhāvena  
pasīditum anāvilo bhavitum na sakkoti. **Ātappāyā**ti kilesasantāpakavīriyakaraṇa-  
tthāya. **Anuyogāyā**ti punappunam yogāya. **Sātaccāyā**ti satatakiriya. **Padhānā-**  
**yā**ti padahanatthāya. **Ayam paṭhamo cetokhī**loti ayam satthari vicikicchāsāṅkhāto  
paṭhamo cittassa thaddhabhāvo evametassa bhikkhuno appahīno hoti.

**Dhammeti** pariyattidhamme ca paṭivedhadhamme ca. Pariyattidhamme kaṅkha-  
māno “tepiṭakam buddhavacanam caturāsītiddhammakhandhasahassānīti  
vadanti, atthi nu kho etam natthī”ti kaṅkhati. Paṭivedhadhamme kaṅkhamāno  
“vipassanānissando maggo nāma, magganissandam phalam nāma, sabbasaṅkhā-  
rapaṭinissaggo nibbānam nāmāti vadanti, tam atthi nu kho natthī”ti kaṅkhati.  
**Saṅghe kaṅkhatī**ti “ujuppaṭipanno”ti-ādīnam padānam vasena “evarūpam paṭi-  
padaṃ paṭipanno cattāro maggaṭṭhā cattāro phalaṭṭhāti aṭṭhannaṃ puggalānam  
samūhabhūto saṅgho nāma atthi nu kho natthī”ti kaṅkhati. **Sikkhāya** kaṅkhamāno  
“adhisīlasikkhā nāma adhicitta-adhipaññāsikkhā nāmāti vadanti, sā atthi nu kho  
natthī”ti kaṅkhati. **Ayam pañcamoti** ayam sabrahmacārīsu kopasaṅkhāto  
pañcamo cittassa thaddhabhāvo kacavarabhāvo khāṇukabhāvo.

### 6. Vinibandhasuttavaṇṇanā

206. Chaṭṭhe **cetasovinibandhā**ti cittam vinibandhitvā muṭṭhiyam katvā viya-  
gaṇhantīti cetasovinibandhā. **Kāmeti** vatthukāmepe kilesakāmepe. **Kāyeti** (3.0078)

attano kāye. **Rūpeti** bahiddhārūpe. **Yāvadatthanti** yattakaṃ icchati, tattakaṃ. **Udarā-vadehakanti** udarapūraṃ. Tañhi udaraṃ avadehanato udarāvadehakanti vuccati. **Seyyasukhanti** mañcapīṭhasukhaṃ, utusukhaṃ vā. **Passasukhanti** yathā samparivattakaṃ sayantassa dakkhiṇapassa vāmapassānaṃ sukhaṃ hoti, evaṃ uppannasukhaṃ. **Middhasukhanti** niddāsukhaṃ. **Anuyuttoti** yuttappayutto viharati. **Pañidhāyāti** patthayitvā. **Silenāti**-ādīsu **sīlanti** catupārisuddhisīlaṃ. **Vatanti** vatasamādānaṃ. **Tapoti** tapacaraṇaṃ. **Brahmacariyanti** methunavirati. **Devo vā bhavissāmīTi** mahesakkhadevo vā bhavissāmi. **Devaññataro vāti** appesakkhadevesu vā aññataroti.

## 7-8. Yāgusuttādivaṇṇanā

**207-208.** Sattame **vātaṃ anulometīti** vātaṃ anulometvā harati. **Vatthiṃ sodhetīti** dhamaniyo suddhā karoti. **Āmāvasesaṃ pācetīti** sace āmāvasesakaṃ hoti, taṃ pāceti. Aṭṭhame **acakkhussanti** na cakkhūnaṃ hitaṃ, cakkhuṃ visuddhaṃ na karoti.

## 9. Gītassarasuttavaṇṇanā

**209.** Navame **āyatakenāti** dīghena, paripuṇṇapadabyañjanakaṃ gāthāvattañca vināsetvā pavattena. **Sarakuttimpi nikāmayamānassāti** evaṃ gītassaro kātabboti sarakiriyaṃ patthayamānassa. **Samādhissa bhaṅgo hotīti** samathavipassanācittassa vināso hoti.

## 10. Muṭṭhassatisuttavaṇṇanā

**210.** Dasame **dukkhaṃ supatīti** nānāvidhaṃ supinaṃ passanto dukkhaṃ supati. **Dukkhaṃ paṭibujjhatīti** paṭibujjhantopi uttasitvā salomahaṃso paṭibujjhati. Imasmiṃ sutte satisampajaññaṃ missakaṃ kathitaṃ.

Kimilavaggo paṭhamo.

### (22) 2. akkosakavaggo

#### 1. Akkosakasuttavaṇṇanā

**211.** Dutiyaṃ (3.0079) paṭhame **akkosakaparibhāsakoti** dasahi akkosavattūhi akkosako, bhayadassanena paribhāsako. **Chinnaparipanthoti** lokuttaraparipanthassa chinnattā chinnaparipantho. **Rogātaṅkanti** rogoyeva kicchajīvikāyāvanato rogātaṅko nāma.

## 2. Bhaṇḍanakāraḥasuttavaṇṇanā

**212.** Dutiye **adhikaraṇakāra**koti catunnaṃ adhikaraṇānaṃ aññatarassa kāra<sup>ko</sup>. **Anadhigatanti** pubbe appattavisesaṃ.

### 3. Sīlasuttavaṇṇanā

**213.** Tatiye **dussīlo**ti asīlo nissīlo. **Sīlavipanno**ti vipannasīlo bhinnasaṃvaro. **Pamādādhikaraṇanti** pamādakāraṇā. Idañca suttaṃ gahaṭṭhānaṃ vasena āgataṃ, pabbajitānampi pana labbhateva. Gahaṭṭho hi yena yena sippaṭṭhānena jīvikaṃ kappeti, yadi kasiyā, yadi vaṇijjāya, pāṇātipātādivasena pamatto taṃ taṃ yathā-kālaṃ sampādetuṃ na sakkoti, athassa mūlaṃ vinassati. Māghātakālepi pāṇātipātaṃ adinnādānādīni ca karonto daṇḍavasena mahatiṃ bhogajāniṃ nigacchati. Pabbajito dussīlo pamādakāraṇā sīlato buddhavacana<sup>to</sup> jhānato satta-ariyadhana<sup>to</sup> ca jāniṃ nigacchati. Gahaṭṭhassa “asuko asukakule jāto dussīlo pāpa<sup>dh</sup>ammo pariccatta-idhalokaparaloko salākabhattamattampi na deti”ti catuparisama<sup>j</sup>jhe pāpako kittisaddo abbhuggacchati. Pabbajitassa “asuko nāsakkhi sīlaṃ rakkhituṃ buddhavacanaṃ gahetuṃ, vejjakammādīhi jīvati, chahi agāravehi sama<sup>n</sup>nāgato”ti evaṃ abbhuggacchati.

**Avisāradoti** gahaṭṭho tāva “avassaṃ bahūnaṃ sannipātaṭṭhāne koci mama kammaṃ jānissati, atha maṃ niggaṇhissanti vā, rājakulassa vā dassanti”ti sabhayo upasaṅkamati. **Maṅkubhūto** ca patitakkhandho adhomukho (3.0080) aṅguṭṭhakena bhūmiṃ kasanto nisīdati, visārado hutvā kathetuṃ na sakkoti. Pabbajitopi “bahū bhikkhū sannipatitā, avassaṃ koci mama kammaṃ jānissati, atha me uposathampi pavāraṇampi ṭhapetvā sāmāññā cāvetvā nikkadḍhissanti”ti sabhayo upasaṅkamati, visārado hutvā kathetuṃ na sakkoti. Ekacco pana dussīlopi dappito viya carati, sopi ajjhāsayena maṅku hotiyeva.

**Sammūḷho kālaṃ karotīti** tassa hi maraṇamañce nipannassa dussīlakammaṃ samādāya vattitaṭṭhānaṃ āpāthaṃ āgacchati. So ummīletvā idhalokaṃ passati, nimmīletvā paralokaṃ. Tassa cattāro apāyā upaṭṭhahanti, sattisatena sīse pahariyamāno viya hoti. So “vāretha vārethā”ti viravanto marati. Tena vuttaṃ-“sammūḷho kālaṃ karoti”ti. Pañcamapadaṃ uttānameva. Ānisaṃsakathā vuttavi<sup>pari</sup>viyāyena veditabbā.

### 4. Bahubhāṇisuttavaṇṇanā

**214.** Catutthe **bahubhāṇis**minti paññāya aparicchinditvā bahuṃ bhaṇante. **Manta<sup>b</sup>hāṇis**minti mantā vuccati paññā, tāya paricchinditvā bhaṇante.

### 5. Paṭhama-akkhantisuttavaṇṇanā

**215.** Pañcame **verabahu**loti puggalaverenapi akusalaverenapi bahuvero. **Vajjabahu**loti dosabahulo.

## 6. Dutiya-akkhantisuttavaṇṇanā

216. Chaṭṭhe **luddoti** dāruṇo kakkhaḷo. **Vipparisārīti** maṅkubhāvena samannāgato.

## 7Paṭhama-apāsādikasuttavaṇṇanā

217. Sattame **apāsādiketi** apāsādikehi kāyakammādihi samannāgate. **Pāsādiketi** pasādāvahe parisuddhasamācāre. Aṭṭhamanavamāni uttānatthāneva.

## 10. Madhurāsuttavaṇṇanā

220. Dasame (3.0081) **pañcime**, **bhikkhave**, **ādīnavā madhurāyanti** ekaṃ samayaṃ bhagavā bhikkhusaṅghaparivuto cārikaṃ caramāno madhurānagaraṃ sampāpuṇitvā antonagaraṃ pavisituṃ ārabhi. Athekā micchādiṭṭhikā yakkhinī acelā hutvā dve hatthe pasāretvā jivhaṃ nillāletvā dasabalassa purato aṭṭhāsi. Sathā antonagaraṃ appavisitvā tatova nikkhamitvā vihāraṃ agamāsi. Mahājano khādaniyabhojanīyañceva sakkārasammānañca ādāya vihāraṃ gantvā buddhappamukhassa bhikkhusaṅghassa dānaṃ adāsi. Sathā tassa nagarassa niggaṇhanatthāya imaṃ suttaṃ ārabhi. Tattha **visamāti** na samatalā. **Bahurajāti** vātapaharaṇakāle uddhatena rajakkhandhena pariyonaddhā viya hoti. Sesam sabbattha uttānamevāti.

Akkosakavaggo dutiyo.

## (23) 3. dīghacārikavaggo

### 1. Paṭhamadīghacārikasuttavaṇṇanā

221. Tatiyassa paṭhame **anavatthacārikanti** avavatthitacārikaṃ. **Sutaṃ na pari-yodapetīti** yampissa sutaṃ atthi, taṃ pariyodapetuṃ na sakkoti. **Sutenekaccena avisārado hotīti** thokathokena sutena vijjamānenāpi ñāṇena somanassappatto na hoti. **Samavatthacāreti** samavatthitacāre. Dutiyam uttānatthameva.

### 3-4. Atinivāsasuttādivaṇṇanā

223-224. Tatiye **bahubhaṇḍoti** bahuparikkhāro. **Bahubhesajjoti** sappinavanītā-dīnaṃ bahutāya bahubhesajjo. **Byattoti** byāsatto. **Saṃsaṭṭhoti** pañcavidhena saṃsaggena saṃsaṭṭho hutvā. **Ananulomikenāti** sāsanaṃ ananucchavikena. Catutthe **vaṇṇamaccharīti** guṇamaccharī. **Dhammaccharīti** pariyattimaccharī.

## 5-6. Kulūpakasuttādivaṇṇanā

**225-226.** Pañcame (3.0082) **anāmantacāre āpajjati** “nimantito sabhatto samāno santaṃ bhikkhuṃ anāpucchā purebhattaṃ vā pacchābhattaṃ vā kulesu cārittaṃ āpajjeyyā”ti sikkhāpade (pārā. 294) vuttaṃ āpattiṃ āpajjati. **Raho nisajjāyā**ti-ādīnīpi tesam tesam sikkhāpadānaṃ vasena veditabbāni. Chaṭṭhe **ativelanti** atikkantapamāṇakālaṃ. Sattamaṃ uttānameva.

## 8. Ussūrabhattasuttavaṇṇanā

**228.** Aṭṭhame **ussūrabhatteti** atidivāpacanabhatte. **Na kālena paṭipūjenti**ti yāgu-kāle yāguṃ, khajjakakāle khajjakaṃ, bhojanakāle bhojanaṃ apacantā yuttappayuttakālassa atināmitattā na kālena paṭipūjenti, attano citteneva denti nāma. Tato tepi tesu attano gehaṃ āgatesu tatheva karonti. Kulapaveṇiyā āgatā balipaṭiggāhikā devatāpi yuttappayuttakālena lābhaṃ labhamānāyeva rakkhanti gopayanti pīlaṃ akatvā. Akāle labhamānā pana “ime amhesu anādarā”ti ārakkhaṃ na karonti.

Samaṇabrāhmaṇāpi “etesam gehe bhojanavelāya bhojanaṃ na hoti, ṭhitamajjhanhike denti”ti maṅgalāmaṅgalesu kātappaṃ na karonti. **Vimukhā kammaṃ karonti**ti “pāto kiñci na labhāma, khudāya paṭipīlitā kammaṃ kātuṃ na sakkomā”ti kammaṃ vissajjetvā nisīdanti. **Anojavantam hoti**ti akāle bhuttaṃ ojaṃ harituṃ na sakkoti. Sukkapakkho vuttavipallāsena veditabbo.

## 9. Paṭhamakaṇhasappasuttavaṇṇanā

**229.** Navame **sabhīrūti** saniddo mahāniddaṃ niddāyati. **Sappaṭibhayoti** taṃ nissāya bhayaṃ uppajjati, tasmā sappaṭibhayo. **Mittadubbhīti** pānabhojanadāyakaṃpī mittaṃ dubbhati hiṃsati. Mātugāmepe eseva nayo.

## 10. Dutiyakaṇhasappasuttavaṇṇanā

**230.** Dasame (3.0083) **ghoravisoti** kakkhaḷaviso. **Dujjivhoti** dvidhā bhinnajivho. **Ghoravisatāti** ghoravisatāya. Sesadvayepi eseva nayo.

Dīghacārikavaggo tatiyo.

(24) 4. āvāsikavaggo

1. Āvāsikasuttavaṇṇanā



231. Catutthassa paṭhame **na ākappasampannoti** samaṇākappena sampanno. **Abhāvaniyo hotīti** vaḍḍhaniyo na hoti. Dutiyam uttānameva.

### 3. Sobhanasuttavaṇṇanā

233. Tatiye **paṭibaloti** kāyabalena ca ñāṇabalena ca samannāgatattā paṭibalo.

### 4. Bahūpakārasuttavaṇṇanā

234. Catutthe **khaṇḍaphullanti** patitaṭṭhānañca bhinnaṭṭhānañca. **Paṭisañkharo-**  
**tīti** paṭipākatikaṃ karoti. **Ārocetīti** idaṃ pavāritakulānaṃ vasena vuttaṃ.

### 5. Anukampasuttavaṇṇanā

235. Pañcame **adhisīlesūti** pañcasu sīlesu. **Dhammadassane nivesetīti** catusa-  
ccadhammadassane patiṭṭhāpeti. **Arahaggatanti** sabbasakkārānaṃ arahe ratana-  
ttayeva gataṃ, tīsu vatthūsu garucittikāraṃ upaṭṭhapethāti attho. Chaṭṭhaṃ uttāna-  
meva.

### 7. Dutiya-avaṇṇārahasuttavaṇṇanā

237. Sattame (3.0084) **āvāsapaligedhīti** āvāsaṃ balavagiddhivasena gilitvā viya-  
ṭhito. Sesam sabbam uttānamevāti.

Āvāsikavaggo catuttho.

### (25) 5. duccharitavaggo

### 1. Paṭhamaduccharitasuttavaṇṇanā

241. Pañcamassa paṭhame **duccarite sucariteti** idaṃ abhedato vuttaṃ, **kāyadu-**  
**ccariteti-**ādi kāyadvārādīnaṃ vasena bhedato. **Saddhammāti** dasakusalakamma-  
pathadhammato. **Asaddhammeti** akusalakammamathasañkhāte assaddhamme.

### 9. Sivathikasuttavaṇṇanā

249. Navame **sivathikāyāti** susāne. **Ārodanāti** ārodanaṭṭhānaṃ. **Asucināti** jigu-  
cchanīyena.

## 10. Puggalappasādasuttavaṇṇanā

250. Dasame **puggalappasādeti** ekapuggalasmim̐ uppannappasāde. **Ante nisīdāpetīti** bhikkhūnaṃ āsanapariyante nisīdāpeti. Sesam̐ sabbattha uttānatthamevāti.

Duccaritavaggo pañcamo.

Pañcamapaṇṇāsakaṃ niṭṭhitaṃ.

## (26) 6. upasampadāvaggo

### 1-3. Upasampādetabbasuttādivaṇṇanā

**251-253.** Chaṭṭhassa (3.0085) paṭhame **upasampādetabbanti** upajjhāyena hutvā upasampādetabbaṃ. Dutiye **nissayo dātabboti** ācariyena hutvā nissayo dātabbo. Tatiye **sāmaṇero upaṭṭhāpetabboti** upajjhāyena hutvā sāmaṇero gahe-  
tabbo. Iti imāni tīṇipi suttāni paṭhamabodhiyaṃ khīṇāsavavasena vuttāni. Catutthā-  
dīni anupadavaṇṇanāto uttānatthāneva.

### 1. Sammutipeyyālādivaṇṇanā

**272.** Bhattuddesakādīnaṃ vinicchayakathā samantapāsādikāya vinayaṭṭhaka-  
thāyaṃ (cūḷava. aṭṭha. 325) vuttanayena veditabbāti. **Sammato na pesetabbo** Ti  
pakatiyā sammato “gaccha bhattāni uddisāhi” ti na pesetabbo.

**273-285. Sāṭiyaggāhāpakoti** vassikasāṭikāya gāhāpako. **Pattaggāhāpako** Ti “yo  
ca tassā bhikkhuparisāya pattapariyanto, so tassa bhikkhuno padātabbo” ti ettha  
vuttapattaggāhāpako.

**293-302. Ājīvakoti** naggaparibbājako. **Nigaṇṭhoti** purimabhāgappaṭicchanno.  
**Muṇḍasāvako** ti nigaṇṭhasāvako. **Jaṭīlakoti** tāpaso. **Paribbājako** Ti channaparibbā-  
jako. **Māgaṇḍikā** dayopi titthiyā eva. Etesaṃ pana sīlesu paripūrakāritāya abhā-  
vena sukkaṃpakko na gahito. Sesamettha uttānamevāti.

Manorathapūraṇiyā aṅguttaranikāya-aṭṭhakathāya

Pañcakanipātassa saṃvaṇṇanā niṭṭhitā.

Namo tassa bhagavato arahato sammāsambuddhassa

Aṅguttaranikāye

Chakkanipāta-aṭṭhakathā

1. Paṭhamapaṇṇāsakaṃ

## 1. Āhuneyyavaggo

### 1. Paṭhama-āhuneyyasuttavaṇṇanā

1. Chakkanipātassa (3.0087) paṭhame **idha, bhikkhave, bhikkhū** Ti, bhikkhave, imasmiṃ sāsane bhikkhu. **Neva sumano hoti na dummanoti** iṭṭhārammaṇe rāgasahagatena somanassena sumano vā aniṭṭhārammaṇe dosasahagatena domanassena dummano vā na hoti. **Upekkhako viharati sato sampajānoti** majjhattārammaṇe asamapekkhanena aññāṇupekkhāya upekkhakabhāvaṃ anāpajjitvā sato sampajāno hutvā ārammaṇe majjhatto viharati. Imasmiṃ sutte khīṇāsavassa sata-tavhāro kathito.

### 2. Dutiya-āhuneyyasuttavaṇṇanā

2-4. Dutiye **anekavihitam iddhividhanti-ādīni** visuddhimagge vuttāneva. **Āsavānaṃ khayā anāsavanti** āsavānaṃ khayena anāsavaṃ, na cakkhuviññāṇādīnaṃ viya abhāvenāti. Imasmiṃ sutte khīṇāsavassa abhiññā paṭipāṭiyā kathitā. Tatiyaca-tutthesu khīṇāsavo kathito.

### 5-7. Ājānīyasuttattayavaṇṇanā

5-7. Pañcame **aṅgehī** Ti guṇaṅgehi. **Khamoti** adhivāsako. **Rūpānanti** rūpārammaṇānaṃ. **Vaṇṇasampannoti** sarīravaṇṇena sampanno. Chaṭṭhe **balasampannoti** kāyabalena sampanno. Sattame **javasampannoti** padajavena sampanno.

### 8-9. Anuttariyasuttādivaṇṇanā

8-9. Aṭṭhame **anuttariyānī** ti aññena uttaritarena rahitāni niruttarāni. **Dassanānuttariyanti** rūpadassanesu anuttaraṃ. Esa nayo sabbapadesu (3.0088). Hatthiratanādīnañhi dassanaṃ na dassanānuttariyaṃ, niviṭṭhasaddhassa pana niviṭṭhapemavasena dasabalassa vā bhikkhusaṅghassa vā kasiṇa-asubhanimittādīnaṃ vā aññatarassa dassanaṃ dassanānuttariyaṃ nāma. Khattiyādīnaṃ guṇakathāsavanaṃ na savanānuttariyaṃ, niviṭṭhasaddhassa pana niviṭṭhapemavasena tiṇṇaṃ vā ratanānaṃ guṇakathāsavanaṃ tepiṭakabuddhavacanasavanaṃ vā savanānuttariyaṃ nāma. Maṇiratanādīnaṃ lābho na lābhānuttariyaṃ, sattavidha-ariyadhanalābho pana lābhānuttariyaṃ nāma. Hatthisippādisikkhanaṃ na sikkhānuttariyaṃ, sikkhāttayassa pūraṇaṃ pana sikkhānuttariyaṃ nāma. Khattiyādīnaṃ pāricariyā na pāricariyānuttariyaṃ, tiṇṇaṃ pana ratanānaṃ pāricariyā pāricariyānuttariyaṃ nāma. Khattiyādīnaṃ guṇānussaraṇaṃ na anussatānuttariyaṃ, tiṇṇaṃ pana ratanānaṃ guṇānussaraṇaṃ anussatānuttariyaṃ nāma. Iti imāni cha anuttariyāni lokiyaloku-

ttarāni kathitāni. Navame **buddhānussatī**ti buddhaguṇārammaṇā sati. Sesapadesupī eseva nayo.

## 10. Mahānāmasuttavaṇṇanā

10. Dasame **mahānāmo**ti dasabalassa cūlapitu putto eko sakyarājā. **Yena Bhagavā tenupasaṅkamī**ti bhuttapātarāso hutvā dāsaparijanaparivuto gandhamālādīni gāhāpetvā yattha satthā, tattha agamāsi. Ariyaphalaṃ assa āgatanti **āgata-phalo**. Sikkhāttayasāsanam etena viññātanti **viññātasāsono**. Iti ayaṃ rājā “sotāpannassa nissayavihāraṃ pucchāmi”ti pucchanto evamāha.

**Nevassa rāgapariyuṭṭhanti** na uppajjamānena rāgena uṭṭhahitvā gahitaṃ. **Ujugatanti** buddhānussatikammaṭṭhāne ujukameva gataṃ. **Tathāgataṃ ārabbhā**ti tathāgataguṇe ārabbhā. **Atthavedanti** aṭṭhakathaṃ nissāya uppannaṃ pītipāmojjaṃ. **Dhammavedanti** pāliṃ nissāya uppannaṃ pītipāmojjaṃ. **Dhammūpasañhitanti** pāliṃca aṭṭhakathaṃca nissāya uppannaṃ. **Pamuditassā**ti duvidhena pāmojjena pamuditassa. **Pīti jāyatī**ti pañcavidhā pīti nibbattati. **Kāyo passambhatī**ti nāmakāyo ca karajakāyo ca darathapaṭippassaddhiyā paṭippassambhati. **Sukhanti** kāyikacetasikasukhaṃ. **Samādhīyatī**ti ārammaṇe sammā ṭhapitaṃ hoti. **Visamagatāya pajāyā**ti rāgadosamohavisamagatesu sattesu. **Samappattoti** samaṃ upasamaṃ patto hutvā. **Sabyāpajjhāyā**ti sadukkhāya. **Dhammasotaṃ** (3.0089) **samāpannoti** vipassanāsaṅkhātaṃ dhammasotaṃ samāpanno. **Buddhānussatiṃ bhāvetī**ti buddhānussatikammaṭṭhānaṃ brūheti vaḍḍheti. Iminā nayena sabbattha attho veditabbo. Iti mahānāmo sotāpannassa nissayavihāraṃ pucchi. Satthāpissa tameva kathesi. Evaṃ imasmiṃ sutte sotāpannova kathitoti.

Āhuneyyavaggo paṭhamo.

## 2. Sāraṇiyavaggo

### 1. Paṭhamasāraṇīyasuttavaṇṇanā

11. Dutiyassa paṭhame **sāraṇīyā**ti saritabbayuttakā. **Mettaṃ kāyakammanti** mettena cittaṃ kātappaṃ kāyakammaṃ. **Vacīkammamanokammesupī** eseva nayo. Imāni ca pana bhikkhūnaṃ vasena āgatāni, gihīsipi labbhanti. Bhikkhūnañhi mettena cittaṃ ābhisamācārikadhammapūraṇaṃ mettaṃ kāyakammaṃ nāma. Gihīnaṃ cetiyavandanatthāya bodhivandanatthāya saṅghanimantana-tthāya gamanaṃ, gāmaṃ piṇḍāya pavitṭhe bhikkhū disvā paccuggamaṃ, patta-paṭiggahaṇaṃ, āsanapaññāpanaṃ, anugamananti evamādikaṃ mettaṃ kāyakammaṃ nāma.

Bhikkhūnaṃ mettena cittaṃ ācārapaṇṇattisikkhāpanaṃ, kammaṭṭhānaka-

thanaṃ, dhammadesanā, tepiṭakampi buddhavacanaṃ mettaṃ vacīkammaṃ nāma. Gihīnaṃ “cetiyaṅvandanāya gacchāma, bodhivandanāya gacchāma, dhammassavanaṃ karissāma, dīpamālāpupphapūjaṃ karissāma, tīṇi sucaritāni samādāya vattissāma, salākabhaddāni dassāma, vassāvāsikaṃ dassāma, ajja saṅghassa cattāro paccaye dassāma, saṅghaṃ nimantetvā khādanīyādīni saṃvi-dahatha, āsanāni paññāpetha, pāṇiyaṃ upaṭṭhāpetha, saṅghaṃ paccuggantvā ānetha, paññattāsane nisīdāpetvā ussāhajātā veyyāvaccaṃ karoṭhā”ti-ādivacana-kāle mettaṃ vacīkammaṃ nāma.

Bhikkhūnaṃ pātova uṭṭhāya sarīrapaṭijagganaṃ cetiyaṅgaṇavattādīni ca katvā vivittāsane nisīditvā “imasmim vihare bhikkhū sukhī hontu averā abyāpajjhā”ti (3.009) cintanaṃ mettaṃ manokammaṃ nāma. Gihīnaṃ “ayyā sukhī hontu averā abyāpajjhā”ti cintanaṃ mettaṃ manokammaṃ nāma.

**Āvi ceva raho cāti** sammukhā ca parammukhā ca. Tattha navakānaṃ cīvarakammādīsu sahāyabhāvagamaṇaṃ sammukhā mettaṃ kāyakammaṃ nāma, therānaṃ pana pādadhovanadānādibhedaṃ sabbampi sāmīcīkammaṃ sammukhā mettaṃ kāyakammaṃ nāma. Ubhayehipi dunnikkhittānaṃ dārubhaṅḍādīnaṃ tesu avaññaṃ akatvā attanā dunnikkhittānaṃ viya paṭisāmanaṃ parammukhā mettaṃ kāyakammaṃ nāma. “Devatthero tissatthero”ti evaṃ paggayha vacanaṃ sammukhā mettaṃ vacīkammaṃ nāma. Vihāre asantaṃ pana paṭipucchantassa “kahaṃ amhākaṃ devatthero, kahaṃ amhākaṃ tissatthero, kadā nu kho āgamissatī”ti evaṃ mamāyanavacanaṃ parammukhā mettaṃ vacīkammaṃ nāma. Mettāsinehasiniddhāni pana nayanāni ummīletvā pasannena mukhena olokanaṃ sammukhā mettaṃ manokammaṃ nāma. “Devatthero tissatthero arogo hotu appābādho”ti samannāharaṇaṃ parammukhā mettaṃ manokammaṃ nāma.

**Lābhāti** cīvarādayo laddhapaccayā. **Dhammikāti** kuhanādibhedaṃ micchājīvaṃ vajjetvā dhammena samena bhikkhācariyavattena uppannā. **Antamaso pattapariyāpannamattampīti** pacchimakoṭiyā pattapariyāpannaṃ pattassa antogataṃ dvattikaṭacchubhikkhāmattampi. **Appaṭivibhattabhogīti** ettha dve paṭivibhattāni nāma āmisapaṭivibhattaṃ pana puggalapaṭivibhattañca. Tattha “ettakaṃ dassāmi, ettakaṃ na dassāmi”ti evaṃ cittaṇa paṭivibhajaṇaṃ āmisapaṭivibhattaṃ nāma. “Asukassa dassāmi, asukassa na dassāmi”ti evaṃ cittaṇa vibhajaṇaṃ pana puggalapaṭivibhattaṃ nāma. Tadubhayampi akatvā yo appaṭivibhattaṃ bhuñjati, ayaṃ appaṭivibhattabhogī nāma. **Sīlavantehi sabrahmacārīhi sādharmaṇabhogīti** ettha sādharmaṇabhogino idaṃ lakkhaṇaṃ- yaṃ yaṃ paṇītaṃ labhati, taṃ taṃ neva lābhenalābhaṃ-nijigīsanatāmukhena gihīnaṃ deti, na attanā paribhuñjati, paṭiggaṇhanto ca “saṅghena sādharmaṇaṃ hotū”ti gahetvā ghaṇṭim paharivā paribhuñjitabbaṃ saṅghasantakaṃ viya passati.

Imaṃ pana sāraṇīyadhammaṃ ko pūreti, ko na pūreti? Dussīlo tāva na pūreti. Na hi tassa santakaṃ sīlavantā gaṇhanti. Parisuddhasīlo pana (3.0091) vattaṃ akhaṇḍento pūreti. Tatridaṃ vattaṃ- yo hi odissakaṃ katvā mātu vā pitu vā ācariyupajjhāyādīnaṃ vā deti, so dātappaṃ deti. Sāraṇīyadhammo panassa na hoti, palibodhajagganaṃ nāma hoti. Sāraṇīyadhammo hi muttapalibodhassa vaṭṭati.

Tena pana odissakaṃ dentena gilānagilānupaṭṭhāka-āgantukagamikānañceva navapabbajitassa ca saṅghāṭipattaggahaṇaṃ ajānantassa dātabbaṃ. Etesaṃ datvā avasesaṃ therāsanato paṭṭhāya thokaṃ thokaṃ adatvā yo yattakaṃ gaṇhāti, tassa tattakaṃ dātabbaṃ. Avasiṭṭhe asati puna piṇḍāya caritvā therāsanato paṭṭhāya yaṃ yaṃ paṇītaṃ, taṃ taṃ datvā sesaṃ bhujjitaṃ. “Sīlavante-hī”ti vacanato dussīlassa adātumpi vaṭṭati.

Ayaṃ pana sāraṇiyadhammo susikkhitāya parisāya supūro hoti, susikkhitāya hi parisāya yo aññato labhati, so na gaṇhāti. Aññato alabhantopi pamāṇayutta-meva gaṇhāti, na atirekaṃ. Ayaṃ pana sāraṇiyadhammo evaṃ punappunaṃ piṇḍāya caritvā laddhaṃ laddhaṃ dentassāpi dvādasahi vassehi pūreti, na tato oraṃ. Sace hi dvādasame vasse sāraṇiyadhammapūraṃ piṇḍapātapūraṃ pattaṃ āsanāsālāyaṃ ṭhapetvā nhāyitum gacchati, saṅghatthero ca “kasseso patto”ti vatvā “sāraṇiyadhammapūrakassā”ti vutte “āharatha nan”ti sabbaṃ piṇḍapātaṃ vicāretvāva bhuñjitvā rittapattaṃ ṭhapeti. Atha kho so bhikkhu rittapattaṃ disvā “mayhaṃ asesetvāva paribhuñjimsū”ti domanassaṃ uppādeti, sāraṇiyadhammo bhijjati, puna dvādasā vassāni pūretabbo hoti. Titthiyaparivāsasadiṣṭhe hesa, sakiṃ khaṇḍe jāte puna pūretabbova. Yo pana “lābhā vata me, suladdhaṃ vata me, yassa me pattaṃ anāpucchāva sabrahmacārī paribhuñjanti”ti somanassaṃ janeti, tassa puṇṇo nāma hoti.

Evaṃ pūritasāraṇiyadhammassa pana neva issā na macchariyaṃ hoti, manu-ssānaṃ piyo hoti, amanussānaṃ piyo hoti, sulabhapaccayo. Pattaṃ tamassa diyyamānampi na khīyati, bhājanīyabhaṇḍaṭṭhāne aggabhaṇḍaṃ labhati, bhaye vā chātaka vā patte devatā ussukkaṃ āpajjanti.

Tatrimāni (3.0092) vatthūni- **senagirivāsī tissaṭthero** kira mahāgiriḡāmaṃ upani-ssāya vasati, paññāsa mahātherā nāgadīpaṃ cetiyavandanatthāya gacchantā giriḡāme piṇḍāya caritvā kiñci aladdhā nikkhamimsu. Thero pavisanto te disvā pucchi- “laddhaṃ, bhante”ti? Vicarimhā, āvusoti. So aladdhabhāvaṃ ṇatvā āha- “bhante, yāvāhaṃ āgacchāmi, tāva idheva hothā”ti. Mayaṃ, āvuso, paññāsa janā pattatemanamattampi na labhimhāti. Bhante, nevāsikā nāma paṭibālā honti, alabhantāpi bhikkhācāramaggasabhāgaṃ jānantīti. Therā āgamesuṃ. Thero gāmaṃ pāvīsi. Dhuraḡeheyeva mahā-upāsikā khīrabhattaṃ sajjetvā therā olokayamānā ṭhitā therassa dvāraṃ sampattasseva pattaṃ pūretvā adāsi. So taṃ ādāya therānaṃ santikaṃ gantvā “gaṇhatha, bhante”ti saṅghattheraṃ āha. Thero “amhehi ettakehi kiñci na laddhaṃ, ayaṃ sīḡhameva gahetvā āgato, kiṃ nu kho”ti sesānaṃ mukhaṃ olokesi. Thero olokanākāreneva ṇatvā, “bhante, dhammena samena laddho, nikkukkuccā gaṇhathā”ti ādito paṭṭhāya sabbesaṃ yāvadatthaṃ datvā attanāpi yāvadatthaṃ bhuñji.

Atha naṃ bhattakiccāvasāne therā pucchiṃsu- “kadā, āvuso, lokuttara-dhammaṃ paṭivijjhī”ti? Natthi me, bhante, lokuttaradhammoti. Jhānalābhīsi, āvusoti. Etampi, bhante, natthīti? Nanu, āvuso, paṭihāriyanti. Sāraṇiyadhammo me, bhante, pūrito, tassa me pūritakālato paṭṭhāya sacepi bhikkhusatasahassaṃ hoti, pattaṃ tamassa na khīyatīti. Sādhu sādhu, sappurisa, anucchavikamidaṃ tuyhanti. Idaṃ tāva **pattaṃ tamassa na khīyatīti** ettha vatthu.

Ayameva pana thero cetiyapabbate giriḡāmaṃ mahāpūjāya dānaṭṭhānaṃ gantvā “imasmim dāne kiṃ varabhaṇḍaṃ”ti pucchi. Dve sātākā, bhanteti. Ete mayhaṃ pāpuṇissantīti? Taṃ sutvā amacco rañño ārocesi- “eko daharo evaṃ vadati”ti. “Daharassa evaṃ cittaṃ, mahātherānaṃ pana sukhumasātākā (3.0093) vaṭṭanti”ti vatvā “mahātherānaṃ dassāmi”ti ṭhapesi. Tassa bhikkhusaṅghe paṭipā-



ṭiyā ṭhite dentassa matthake ṭhapitāpi te sāṭakā hatthaṃ nārohanti, aññeva āro-  
hanti. Daharassa dānakāle pana hatthaṃ āruḷhā. So tassa hatthe ṭhapetvā ama-  
ccassa mukhaṃ oloketvā daharaṃ nisīdāpetvā dānaṃ datvā saṅghaṃ vissajjetvā  
daharassa santike nisīditvā “kadā, bhante, imaṃ dhammaṃ paṭivijjhithā”ti āha.  
So pariyāyenapi asantaṃ avadanto “natthi mayhaṃ, mahārāja, lokuttaradhammo”-  
ti āha. Nanu, bhante, pubbeva avacutthāti. Āma, mahārāja, sāraṇiyadhammapū-  
rako ahaṃ, tassa me dhammassa pūritakālato paṭṭhāya bhājanīyabhaṇḍaṭṭhāne  
aggabhaṇḍaṃ pāpuṇātīti. “Sādhu sādhu, bhante, anucchavikamidaṃ tumhā-  
n”ti vatvā pakkāmi. Idaṃ **bhājanīyabhaṇḍaṭṭhāne aggabhaṇḍaṃ pāpuṇātīti** ettha  
vatthu.

Brāhmaṇatissabhaye pana bhātaragāmaṃvāsino nāgattheriyā anārocetvāva palā-  
yīṃsu. Therī paccūsasamaye “ativiya appanigghoso gāmo, upadhāretha tāvā”ti  
daharabhikkhuniyo āha. Tā gantvā sabbesaṃ gatabhāvaṃ ṇatvā āgamma theriyā  
ārocesuṃ. Sā sutvā “mā tumhe tesāṃ gatabhāvaṃ cintayittha, attano uddesapari-  
pucchāyonisomanasikāresuyeva yogaṃ karothā”ti vatvā bhikkhācāraṇāyaṃ  
pārūpitvā attadvādasamā gāmadvāre nigrodharukkhamūle aṭṭhāsi. Rukkhe adhi-  
vatthā devatā dvādasannampi bhikkhunīnaṃ piṇḍapātaṃ datvā, “ayye, aññattha  
mā gacchatha, niccaṃ idheva āgaccheyyāthā”ti āha. Theriyā pana kaniṭṭhabhātā  
nāgatthero nāma atthi. So “mahantaṃ bhayaṃ, na sakkā yāpetuṃ, paratīraṃ  
gamissāmi”ti attadvādasamova attano vasaṇṭṭhānā nikkhanto “theriṃ disvā  
gamissāmi”ti bhātaragāmaṃ āgato. Therī “therā āgatā”ti sutvā tesāṃ santikaṃ  
gantvā “kiṃ ayyā”ti pucchi. So taṃ pavattiṃ ārocesi. Sā “ajja ekadivasaṃ vihā-  
reva vasitvā sve gamissathā”ti āha. Therā vihāraṃ agamiṃsu.

Therī punadivase rukkhamūle piṇḍāya caritvā therāṃ upasaṅkamtivā “imaṃ  
piṇḍapātaṃ paribhuñjathā”ti āha. Thero “vaṭṭissati therī”ti vatvā tuṅhī aṭṭhāsi.  
Dhammiko, tāta, piṇḍapāto, kukkuccaṃ akatvā paribhuñjathāti (3.0094). Vaṭṭi-  
ssati therīti? Sā pattaṃ gahetvā ākāse khipi, patto ākāse aṭṭhāsi. Thero “sattatāla-  
matte ṭhitampi bhikkhunībhattameva therī”ti vatvā “bhayaṃ nāma sabbakālaṃ na  
hoti, bhaye vūpasante ariyavaṃsaṃ kathayamāno, ‘bho piṇḍapātika, bhikkhunī-  
bhattaṃ bhūñjitvā vītināmayitthā’ti cittaṃ anuvadiyamāno santhambhituṃ na  
sakkhissāmi, appamattā hotha theriyo”ti maggaṃ paṭipajji.

Rukkhadevatāpi “sace thero theriyā hatthato piṇḍapātaṃ paribhuñjissati, na taṃ  
nivattessāmi. Sace na paribhuñjissati, nivattessāmi”ti cintayamānā ṭhatvā  
therassa gamanaṃ disvā rukkhaṃ oruyha “pattaṃ, bhante, dethā”ti vatvā pattaṃ  
gahetvā therāṃ rukkhamūlaṃyeva ānetvā āsanaṃ paññāpetvā piṇḍapātaṃ datvā  
katabhattakiccaṃ paṭiññaṃ kāretvā dvādasa bhikkhuniyo dvādasa ca bhikkhū  
satta vassāni upaṭṭhahi. Idaṃ **devatā ussukkaṃ āpajjantīti** ettha vatthu. Tatra hi  
therī sāraṇiyadhammapūrikā ahoṣi.

**Akhaṇḍānīti**-ādīsu yassa sattasu āpattikkhandhesu ādimhi vā ante vā sikkhā-  
padaṃ bhinnaṃ hoti, tassa sīlaṃ pariyante chinnaṣāṭako viya **khaṇḍaṃ** Nāma.  
Yassa pana vemajjhe bhinnaṃ, tassa chiddasāṭako viya **chiddaṃ** nāma hoti.  
Yassa paṭipāṭiyā dve tīṇi bhinnāni, tassa piṭṭhiyaṃ vā kucchiyaṃ vā utṭhitena visa-

bhāgavaṇṇena kāḷarattādīnaṃ aññataravaṇṇā gāvī viya **sabalaṃ** nāma hoti. Yassa antarantarā bhinnāni, tassa antarantarā visabhāgabindu vicitrā gāvī viya **kammāsaṃ** nāma hoti. Yassa pana sabbena sabbaṃ abhinnāni, tassa tāni sīlāni **akhaṇḍāni acchiddāni asabalāni akammāsāni** nāma honti. Tāni panetāni taṇhādā-sabyato mocetvā bhujissabhāvakaraṇato **bhujissāni**, buddhādīhi viññūhi pasa-tthattā **viññuppasatthāni**, taṇhādiṭṭhīhi aparāmaṭṭhattā “idaṃ nāma tvaṃ āpanna-pubbo”ti kenaci parāmaṭṭhuṃ asakkuṇeyyattā ca **aparāmaṭṭhāni**, upacārasa-mādhiṃ appanāsamādhiṃ vā saṃvattayantīti **samādhisaṃvattanikānīti** vuccanti.

**Sīlasāmaññagato** (3.0095) **viharatīti** tesu tesu disābhāgesu viharantehi bhikkhūhi saddhiṃ samānabhāvūpagatasīlo viharati. Sotāpannādīnañhi sīlaṃ samuddantarepi devalokepi vasantānaṃ aññesaṃ sotāpannādīnaṃ sīlena samā-nameva hoti, natthi maggasīle nānattaṃ. Taṃ sandhāyetaṃ vuttaṃ.

**Yāyaṃ diṭṭhīti** maggasampayuttā sammādiṭṭhi. **Ariyāti** niddosā. Niyyātīti **niyyā-nikā**. **Takkarassāti** yo tathākārī hoti. **Dukkhakkhayāyāti** sabbadukkhakkhayatthaṃ. **Diṭṭhisāmaññagatoti** samānadiṭṭhibhāvaṃ upagato hutvā viharatīti.

## 2. Dutiyasāraṇiyasuttavaṇṇanā

**12.** Dutiye yo te dhamme pūreti, taṃ sabrahmacārīnaṃ piyaṃ karontīti **piyaka-raṇā**. Garuṃ karontīti **garukaraṇā**. **Saṅgahāyāti** saṅgaṇhanatthāya. **Avivādāyāti** avivadanatthāya. **Sāmaggiyāti** samaggabhāvattāya. **Ekībhāvāyāti** ekabhāva-tthāya ninnānākaraṇāya. **Saṃvattantīti** vattanti pavattanti.

## 3. Nissāraṇiyasuttavaṇṇanā

**13.** Tatiye **nissāraṇiyā dhātuyoti** nissaraṇadhātuyova. **Mettā hi kho me cetovimu-ttīti** ettha paccanīkadhammehi vimuttattā tikacatukkajjhānikā mettāva mettācetovi-mutti nāma. **Bhāvitāti** vaḍḍhitā. **Bahulikatāti** punappunaṃ katā. **Yānikatāti** yuttayā-nasadisā katā. **Vatthukatāti** patiṭṭhā katā. **Anuṭṭhitāti** adhiṭṭhitā. **Paricitāti** sama-ntato citā ācitā upacitā. **Susamāraddhāti** suppaguṇakaraṇena suṭṭhu samāraddhā. **Pariyādāya tiṭṭhatīti** pariyādiyitvā gahetvā tiṭṭhati. **Mā hevantissa vacanīyoti** yasmā abhūtabyākaraṇaṃ byākaroti, tasmā “mā evaṃ bhaṇī”ti vattabbo. **Yadidaṃ mettā-cetovimuttīti** yā ayaṃ mettācetovimutti, idaṃ nissaraṇaṃ byāpādassa, byāpādato nissaṭṭhāti attho. Yo pana mettāya tikacatukkajjhānato vuṭṭhito saṅkhāre samma-sitvā tatiyamaggaṃ patvā “puna (3.0096) byāpādo natthī”ti tatiyaphalena nibbānaṃ passati, tassa cittaṃ accantanissaraṇaṃ byāpādassa. Etenupāyena sabbattha attho veditabbo.

**Animittācetovimuttīti** balavavipassanā. Dīghabhāṇakā pana arahattaphalasaṃpā-pattīti vadanti. Sā hi rāganimittādīnañceva rūpanimittādīnañca niccanimittādī-nañca abhāvā animittāti vuttā. **Nimittānusārīti** vuttappabhedaṃ nimittaṃ anusara-ṇasabhāvaṃ.

**Asmīti** asmimāno. **Ayamahasmīti** pañcasu khandhesu ayaṃ nāma ahaṃ

asmīti. Ettāvatā arahattaṃ byākataṃ hoti. **Vicikicchākathaṃkathāsallanti** vicikicchābhūtaṃ kathaṃkathāsallaṃ. **Mā hevantissa vacaniyo** Ti sace te paṭhamamaggavajjhā vicikicchā uppajjati, arahattabyākaraṇaṃ micchā hoti, tasmā “mā abhūtaṃ gaṇhī”ti vāretabbo. **Asmīti mānasamuggahōti** arahattamaggo. Arahattamaggaphalavasena hi nibbāne diṭṭhe puna asmimāno natthīti arahattamaggo “asmīti mānasamuggahō”ti vutto. Iti imasmiṃ sutte abhūtabyākaraṇaṃ nāma kathitaṃ.

#### 4. Bhaddakasuttavaṇṇanā

**14.** Catutthe **na bhaddakanti** na laddhakaṃ. Tattha yo hi bhītabhīto marati, tassa na bhaddakaṃ maraṇaṃ hoti. Yo apāye paṭisandhiṃ gaṇhāti, tassa na bhaddikā kālakiriyā hoti. **Kammārāmoti**-ādīsu āramaṇaṃ ārāmo, abhiratīti attho. Vihāraṇādīdimhi navakamme ārāmo assāti **kammārāmo**. Tasmimyeva kamme ratoti **kammarato**. Tadeva kammārāmataṃ punappunaṃ yuttoti **anuyutto**. Esa nayo sabbattha. Ettha ca **bhassanti** ālāpasallāpo. **Niddāti** soppaṃ. **Saṅgaṇikāti** gaṇasaṅgaṇikā. Sā “ekassa dutiyo hoti, dvinnaṃ hoti tatiyako”ti-ādinā nayena veditabbā. **Saṃsaggoti** dassanasavanasamullāpasambhogakāyasasaṃsaggavasena pavatto saṃsaṭṭhabhāvo. **Papañcoti** taṇhādiṭṭhimānavasena pavatto madanākārasaṅghito kilesapapañco. **Sakkāyanti** tebhūmakavaṭṭaṃ. **Sammā dukkhassa antakiriyāyāti** hetunā nayena sakalavaṭṭadukkhassa parivaṭṭumaparicchedakaraṇatthaṃ. **Magoti** magasadiso. **Nippapañcapadeti** nibbānapade. **Ārādhayīti** paripūrayi taṃ sampādesīti.

#### 5. Anutappiyasuttavaṇṇanā

**15.** Pañcame (3.0097) **anutappāti**

anusocitabbā anutāpakārī. Imesu dvīsipi suttesu gāthāsu ca vaṭṭavivaṭṭaṃ kathitaṃ.

## 6. Nakulapitusuttavaṇṇanā

16. Chaṭṭhe **bāḷhagilānoti** adhimattagilāno. **Etadavocāti** sāmikassa bhesajjaṃ katvā byādhiṃ vūpasametum asakkontī idāni sīhanādaṃ naditvā saccakiriyāya byādhiṃ vūpasametum santike nisīditvā etaṃ “mā kho tvaṃ”ti-ādivacanaṃ avoca. **Sāpekkhoti** sataṇho. **Na nakulamātāti** ettha na-kāro na sakkhatiti evaṃ parapadena yojetabbo. **Santharitunti** nicchiddaṃ kātum, saṅṭhapetunti attho. **Veṇiṃ olikhitunti** eḷakalomāni kappetvā vijaṭetvā veṇiṃ kātum.

**Aññaṃ gharaṃ gamissatīti** aññaṃ sāmikaṃ gaṇhissati. **Soḷasa vassāni gahaṭṭhakaṃ brahmacariyaṃ samāciṇṇanti** ito soḷasavassamatthake gahaṭṭhabrahmacariyavāso samāciṇṇo. **Dassanakāmatarāti** atirekena dassanakāmā. Imehi tīhi aṅgehi sīhanādaṃ naditvā “iminā saccena tava sarīre byādhi phāsu hotū”ti saccakiriyaṃ akāsi.

Idāni bhagavantaṃ sakkhiṃ katvā attano sīlādiguṇehipi saccakiriyaṃ kātum **siyā kho pana teti-ādimāha**. Tattha **paripūrakārīnīti** samattakārīnī. **Cetosamathassāti** samādhikammaṭṭhānassa. **Ogādhappattāti** ogādhaṃ anuppavesaṃ pattā. **Patigādhappattāti** patigādhaṃ patiṭṭhaṃ pattā. **Assāsappattāti** assāsaṃ avassayaṃ pattā. **Vesārajappattāti** somanassañāṇaṃ pattā. **Aparappaccayāti** parappaccayo vuccati parasaddhā parapattiyāyanā, tāya virahitāti attho. Imehi tīhi aṅgehi attano guṇe ārabha saccakiriyaṃ akāsi. **Gilānā vuṭṭhitoti** gilāno hutvā vuṭṭhito. **Yāvatāti** yattikāyo. **Tāsaṃ aññatarāti** tāsaṃ antare ekā. **Anukampikāti** hitānukampikā. **Ovādikāti** ovādadāyikā. **Anusāsikāti** anusīṭṭhidāyikā.

## 7. Soppasuttavaṇṇanā

17. Sattame (3.0098) **paṭisallānā vuṭṭhitoti** ekībhāvāya dhammanijjhānakkhantito phalasaṃpattivihārato vuṭṭhito. **Yathāvihāranti** attano attano vasaṇavihāraṃ. **Navā**Ti pabbajjāya navakā. Te pañcasatamattā ahesum. **Kākacchamānāti** kākasaddaṃ karontā dante khādantā. **Therāti** thirabhāvaṃ pattā. **Tena noti** tena nu. **Seyyasukhādīni** heṭṭhā vuttatthāneva. **Raṭṭhikoti** yo raṭṭhaṃ bhuñjati. **Pettaṇikoti** yo pitarā bhuttānubhuttaṃ bhuñjati. **Senāpatikoti** senāya jeṭṭhako. **Gāmagāmaṇikoti** gāmaḥojako. **Pūgagāmaṇikoti** gaṇajeṭṭhako. **Avipassako kusalānaṃ dhammānanti** kusalānaṃ dhammānaṃ anesako agavesako hutvā. **Bodhipakkhiyānaṃ dhammānanti** sattatiṃsāya bodhipakkhiyadhammānaṃ.

## 8. Macchabandhasuttavaṇṇanā

18. Aṭṭhame **macchikanti** macchaghātakaṃ. Hatthinā yātīti **hatthiyāyī**. Paratopi eseva nayo. **Vajjheti** vadhitaḥbe. **Vadhāyanīteti** vadhāya upanīte. **Pāpakena mana-**

sāti lāmakena vadhakacittena. Pāḷiyaṃ pana vadhāyupanīteti likhanti. **Māgavikoti** migaghātako. **Ko pana vādo manussabhūtanti** yo manussabhūtaṃ pāpakena manasā anupekkhati, tassa sampattiyā abhāve kimeva vattabbaṃ. Idaṃ pāpa-kassa kammuno anīṭṭhaphalabhāvaṃ dassetuṃ vuttaṃ. Yesaṃ pana tādisaṃ kammaṃ karontānampi yasapaṭilābho hoti, tesaṃ taṃ akusalaṃ nissāya kusalaṃ vipaccatīti veditabbaṃ. Tena panassa akusalakammena upahatattā vipāko na cira-ṭṭhitiko hoti. Imasmiṃ sutte akusalapakkhova kathito.

## 9. Paṭhamamaraṇassatisuttavaṇṇanā

19. Navame **nātiketi** evaṃnāmake gāme. **Giñjakāvasatheti** iṭṭhakāmaye pāsāde. **Amatogadhāti** nibbānogadhā, nibbānapatiṭṭhāti attho. **Bhāvetha noti** bhāvetha nu. **Maraṇassatinti** maraṇassatikammaṭṭhānaṃ. **Aho vatāti** patthanatthe nipāto. **Bahuṃ vata me kataṃ assāti** (3.0099) tumhākaṃ sāsane mama kiccaṃ bahu kataṃ assa. **Tadantaranti** taṃ antaraṃ khaṇaṃ okāsaṃ. **Assasivā vā passasāmīti** ettha assāso vuccati anto pavisanavāto, passāso bahi nikkhamanavāto. Iti ayaṃ bhikkhu yāva anto pavīṭṭhavāto bahi nikkhamati, bahi nikkhanto vāto anto pavisati, tāva jīvitaṃ patthento evamāha. **Dandhanti** mandaṃ garukaṃ asīghappavattaṃ. **Āsavānaṃ khayāyāti** arahattaphalathāya. Imasmiṃ sutte maraṇassati arahattaṃ pāpetvā kathitāti.

## 10. Dutiyamaraṇassatisuttavaṇṇanā

20. Dasame **patigatāyāti** paṭipannāya. **Iti paṭisañcikkhatīti** evaṃ paccavekkhati. **So mamassa antarāyoti** ettha tividho antarāyo jīvitantarāyo, samaṇadhammantarāyo, puthujjanakālakiriyaṃ karontassa saggantarāyo ceva maggantarāyo cāti. Taṃ sabbampi sandhāyevamāha. **Byāpajjeyyāti** ajiṇṇakādivasena vipajjeyya. **Adhi-mattoti** balavā. **Chandoti** kattukamyatāchando. **Vāyāmoti** payogavīriyaṃ. **Ussā-hoti** ussāpanavīriyaṃ. **Ussolhīti** sampādanavīriyaṃ. **Appaṭivānīti** anukkaṇṭhanā appaṭisaṅgharaṇā. Sesam sabbattha uttānatthamevāti.

Sāraṇīyavaggo dutiyo.

## 3. Anuttariyavaggo

### 1-2. Sāmakasuttādivaṇṇanā

21-22. Tatiyassa paṭhame **sāmagāmake**ti sāmakānaṃ ussannattā evaṃladdhanāme gāmake. **Pokkharāṇiyāyanti** pokkharāṇiyānāmake vihāre. **Abhikkantāya ratti-yāti** rattiyā paṭhamayāmaṃ atikkamma majjhimayāme sampatte. **Abhikkantava-**

ṇṇāti abhikkanta-atimanāpavaṇṇā. **Kevalakappanti sakalakappaṃ. Pokkharāṇiyaṃ obhāsetvāti** pokkharāṇiyānāmakappaṃ mahāvihāraṃ attano obhāsenā pharivā. **Samanuñṇoti samāna-anuñṇo samānacitto. Dovacassatā** Ti dubbacabhāvo. **Pāpamittatāti** lāmakamittatā (3.0100). Imasmiṃ sutte parihāniyadhammāva kathitā. Dutīye aparihāniyadhammā lokuttaramissakā kathitā.

### 3. Bhayasuttavaṇṇanā

23. Tatiye **kāmarāgarattāyanti** kāmarāgaratto ayaṃ. **Chandarāgavinibaddho** Ti chandarāgena vinibaddho. **Bhayāti** cittutrāsabhayā. **Paṅkāti** kilesapaṅkato. **Saṅgo paṅko ca ubhayanti** saṅgo ca paṅko ca idampi ubhayaṃ. **Ete kāmā pavuccanti, yattha satto puthujjanoti** yasmiṃ saṅge ca paṅke ca puthujjano satto laggo laggito palibuddho. **Upādāneti** catubbidhe upādāne. **Jātimaraṇasambhaveti** jātiyā ca maraṇassa ca sambhave paccayabhūte. **Anupādā Vimuccantīti** anupādiyitvā vimuccanti. **Jātimaraṇasaṅkhayeti** jātimaraṇānaṃ saṅkhayasaṅkhāte nibbāne, nibbānārammaṇāya vimuttiyā vimuccantīti attho. Imasmiṃ ṭhāne vivatṭetvā arahattameva patto esa bhikkhu. Idāni taṃ khīṇāsavaṃ thomento **te khemappattā** Ti-ādī-māha. Tattha **khemappattāti** khemabhāvaṃ pattā. **Sukhinoti** lokuttarasukhena sukhitā. **Diṭṭhadhammābhinibbutāti** abbhantare kilesābhāvena diṭṭhadhammeyeva abhinibbutā. Imasmiṃ sutte vaṭṭameva kathetvā gāthāsu vaṭṭavivaṭṭaṃ kathitaṃ.

### 4. Himavantasuttavaṇṇanā

24. Catutthe **padāleyyāti** bhindeyya. **Chavāyāti** lāmikāya. **Samādhissa samāpa-ttikusalō hotīti** āhārasappāya-utusappāyāni pariggahetvā samādhim samāpajjituṃ kusalo hoti cheko samattho paṭibalo. **Samādhissa ṭhitikusalo** ti samādhissa ṭhitiyaṃ kusalo, samādhim ṭhapetuṃ sakkotīti attho. **Samādhissa vuṭṭhānakusaloti** samādhissa vuṭṭhāne kusalo, yathāparicchedena vuṭṭhātuṃ sakkotīti attho. **Samādhissa kallitakusaloti** samādhissa kallatāya kusalo, samādhicittaṃ hāsetuṃ kallaṃ kātuṃ sakkotīti attho. **Samādhissa gocarakusaloti** samādhissa asappāye anupakārake dhamme vajjetvā sappāye upakārake sevantopi, “ayaṃ samādhinimittārammaṇo (3. ayaṃ lakkhaṇārammaṇo” ti jānantopi samādhissa gocarakusalō nāma hoti. **Samādhissa abhinīhārakusaloti** upari-uparisamāpattisamāpajjanatthāya paṭhamajjhānādisamādhim abhinīharituṃ sakkonto samādhissa abhinīhārakusalō nāma hoti. So paṭhamajjhānā vuṭṭhāya dutiyaṃ samāpajjati, dutiyajjhānā ...pe... tatiyajjhānā vuṭṭhāya catutthaṃ samāpajjati.

### 5. Anussatiṭṭhānasuttavaṇṇanā

25. Pañcame **anussatiṭṭhānānīti** anussatikāraṇāni. **Itipi so bhagavāti-ādīni** visuddhimagge (visuddhi. 1.123 ādayo) vitthāritāneva. **Idampi kho, bhikkhave, ārammaṇaṃ karitvāti** idaṃ buddhānussatikammaṭṭhānaṃ ārammaṇaṃ karitvā. **Visu-**

**jjhantīti** paramavisuddhiṃ nibbānaṃ pāpuṇanti. Sesam sabbattha uttānatthameva. Imasmim̐ pana sutte cha anussatiṭṭhānāni missakāni kathitānīti veditabbāni.

## 6. Mahākaccānasuttavaṇṇanā

**26.** Chaṭṭhe **sambādheti** pañcakāmaguṇasambādhe. **Okāsādhigamoti** ettha okāsā vuccanti cha anussatiṭṭhānāni, tesam̐ adhigamo. **Visuddhiyā** Ti visujjhana-tthāya. **Sokaparidevānaṃ samatikkamāyāti** sokānañca paridevānañca samatikka-matthāya. **Atthaṅgamāyāti** atthaṃ gamanatthāya. **Ñāyassa adhigamāyāti** sahavi-passanakassa maggassa adhigamanatthāya. **Nibbānassa sacchikiriyaṃyāti** apaccayaparinibbānassa paccakkhikiriya-tthāya.

**Sabbasoti** sabbākārena. **Ākāsasamenāti** alagganaṭṭhena ceva apalibuddha-ṭṭhena ca ākāsasadisena. **Vipulenāti** na parittakena. **Mahaggatenāti** mahanta-bhāvaṃ gatena, mahantehi vā ariyasāvakehi gatena, paṭipannenāti attho. **Appamā-ṇenāti** pharaṇa-appamāṇatāya appamāṇena. **Averenāti** akusalaverapuggalavera-rahitena. **Abyāpajjenāti** kodhadukkhavajjitena. Sabbametam̐ buddhānussaticitta-meva sandhāya vuttaṃ. Paratopi eseva nayo. **Visuddhidhammāti** visujjhanasa-bhāvā. Imasmimpi sutte cha anussatiṭṭhānāni missakāneva kathitānīti.

## 7. Paṭhamasamayasuttavaṇṇanā

**27.** Sattame (3.0102) **manobhāvanīyassāti** ettha manaṃ bhāveti vaḍḍhetīti manobhāvanīyo. **Dassanāyāti** dassanatthaṃ. **Nissaraṇanti** niggamanaṃ vūpasamaṃ. **Dhammaṃ desetīti** kāmarāgappajahanatthāya asubhakammaṭṭhānaṃ katheti. Dutiyavārādīsu byāpādappahānāya mettākammaṭṭhānaṃ, thinamiddha-ppahānāya thinamiddhavinodanakammaṭṭhānaṃ, ālokasaññaṃ vā vīriyārambha-vatthu-ādīnaṃ vā aññataraṃ, uddhaccakukkucappahānāya samathakamma-ṭṭhānaṃ, vicikicchāpahānāya tiṇṇaṃ ratanānaṃ guṇakathaṃ kathento dhammaṃ desetīti veditabbo. **Āgammāti** ārabha. **Manasikarototi** ārammaṇavasena citte karontassa. **Anantarā āsavānaṃ khayō hotīti** anantarāyena āsavānaṃ khayō hoti.

## 8. Dutiyasamayasuttavaṇṇanā

**28.** Aṭṭhame maṇḍalamāḷeti bhojanasālāya. Cārittakilamathoti piṇḍapātacariyāya uppannakilamatho. Bhattakilamathoti bhattadaratho. Vihārapacchāyāyanti vihārapaccante chāyāya. Yadevassa divā samādhinimittam manasikataṃ hotīti yaṃ eva tassa tato purimadivasabhāge samathanimittam citte kataṃ hoti. Tadevassa tasmim samaye samudācaratīti taṃyeva etassa tasmim samaye divāvihāre nisinnassa manodvāre sañcarati. Ojaṭṭhāyīti ojāya ṭhito patitṭhito. Phāsukassa hotīti phāsukaṃ assa hoti. Sammukhāti kathentassa sammukhaṭṭhāne. Sutanti sotena sutam. Paṭiggahitanti cittena paṭiggahitam.

## 9. Udāyīsuttavaṇṇanā

**29.** Navame udāyinti lāḷudāyittheram. Suṇomaham, āvusoti, āvuso, nāham badhiro, suṇāmi bhagavato vacanam, pañham pana upaparikkhāmīti. Adhicittanti samādhivipassanācittam. Idam, bhante, anussatiṭṭhānanti idam jhānattayasaṅkhātam anussatikāraṇam. Diṭṭhadhammasukhavihārāya saṃvattatīti imasmim yeva attabhāve sukhavihāratthāya pavattati. Ālokasaññanti ālokanimutte uppanna-saññam. Divā saññam adhiṭṭhātīti divāti saññam ṭhapeti (3.0103). Yathā divā tathā rattinti yathānena divā ālokasaññā manasikatā, rattimpi tatheva taṃ manasi karoti. Yathā rattim tathā divāti yathā vānena rattim ālokasaññā manasikatā, divāpi taṃ tatheva manasi karoti. Vivaṭenāti pākaṭena. Apariyonaddhenāti nīvaraṇehi anonaddhena. Sappabhāsam cittam bhāvetīti dibbacakkhuñṇāṇatthāya saho-bhāsakam cittam brūheti vaḍḍheti. Yaṃ pana “ālokasaññam manasi karoti”ti vuttam, taṃ thinamiddhavinodanālokasaññam sandhāya vuttam, na dibbacakkhuñṇāṇālokanti veditabbam. NāṇadassanappaṭilābhāyāTi dibbacakkhusaṅkhātassa nāṇadassanassa paṭilābhāya.

Imameva kāyanti-ādīsu yaṃ vattabbam siyā, taṃ sabbam sabbākārena vitthārato visuddhimagge kāyagatāsaticammaṭṭhāne vuttam. Kāmarāgappahānāyāti pañcakāmaguṇikassa rāgassa pahānatthāya. Seyyathāpi passeyyāti yathā passeyya. Sarīranti matasarīram. Sivathikāya chaḍḍitanti susāne apavidham. Ekāham matassa assāti ekāhamatam. Dvīham matassa assāti dvīhamatam. Tīham matassa assāti tīhamatam. Bhastā viya vāyunā uddham jīvitapariyādānā yathānukkamaṃ samuggatena sūnabhāvena dhumātattā uddhumātam, uddhumātameva uddhumātakam. Paṭikūlattā vā kucchitam uddhumātanti uddhumātakam. Vinīlam vuccati viparibhinnavaṇṇam, vinīlameva vinīlakam. Paṭikūlattā vā kucchitam vinīlanti vinīlakam. Maṃsussadaṭṭhānesu rattavaṇṇassa pubbasannicayaṭṭhānesu setavaṇṇassa yebhuyyena ca nīlavaṇṇassa nīlaṭṭhāne nīlasāṭakapārutasseva chavasārīrasetaṃ adhivacanam. Paribhinnaṭṭhānehi navahi vā vaṇamukhehi vissandamānam pubbam vipubbam, vipubbameva vipubbakam. Paṭikūlattā vā kucchitam vipubbanti vipubbakam. Vipubbakam jātam tathābhāvam gatanti vipubbakajātam.

So imameva kāyanti so bhikkhu imaṃ attano kāyam tena kāyena saddhim nāṇena upasaṃharati upaneti. Katham? Ayampi kho kāyo evaṃdhammo evaṃ-



**bhāvī evaṃ-anatītoti.** Idaṃ vuttaṃ hoti- āyu usmā viññāṇanti imesaṃ tiṇṇaṃ dhammānaṃ atthitāya ayaṃ kāyo ṭhānagamanādikhmo hoti, imesaṃ pana vigamā ayampi evaṃdhammo evaṃpūtikasabhāvoyevāti. **Evaṃbhāvīti** evamevaṃ uddhumātādibhedo bhavissati. **Evaṃ anatītoti** evaṃ uddhumātādibhāvaṃ anati-kkanto.

**Khajjamānanti** (3.0104) udarādīsu nisīditvā udaramaṃsa-oṭṭhamāṃsa-akkhika-maṃsādīni luñcitvā luñcitvā khādiyamānaṃ. **Samaṃsalohitanti** sesāvasesamaṃsalohitayuttaṃ. **Nimmaṃsalohitamakkhitanti** maṃse khīṇepi lohitaṃ na sussati, taṃ sandhāya vuttaṃ- “nimmaṃsalohitamakkhitan”ti. **Aññenāti** aññena disābhāgena. **Hatthaṭṭhikanti** catusaṭṭhibhedampi hatthaṭṭhikaṃ pāṭiyekkaṃ pāṭiyekkaṃ vippakiṇṇaṃ. **Pādatṭhikā**dīsupi eseva nayo. **Terovassikānīti** atikkantasamvaccharāni. **Pūtīnīti** abbhokāse ṭhitāni vātātapavuṭṭhisamphassena terovassikāneva pūtīni honti, antobhūmigatāni pana cirataraṃ tiṭṭhanti. **Cuṇṇakajātānīti** cuṇṇavi-cuṇṇaṃ hutvā vippakiṇṇāni. Sabbattha **so imamevāti** vuttanayena khajjamānā-dīnaṃ vasena yojanā kātabbā. **Asmimānasamugghātāyāti** asmīti pavattassa nava-vidhassa mānassa samugghātathāya. **Anekadhātupaṭivedhāyāti** anekadhātūnaṃ paṭivijjanathāya. **Satova abhikkamatīti** gacchanto satipaññāhi samannāgatova gacchati. **Satova paṭikkamatīti** paṭinivattantopi satipaññāhi samannāgatova niva-ttati. Sesapadesupi eseva nayo. **Satisampajaññāyāti** satiyā ca ñāṇassa ca atthāya. Iti imasmimṃ sutte satiññāṇāni missakāni kathitānīti.

## 10. Anuttariyasuttavaṇṇanā

**30.** Dasame **uccāvacanti** yaṃ kiñci mahantakhuddakaṃ, uccanīcaṃ vā. **Hīnanti** nihīnaṃ. **Gammanti** gāmaṃvāsikānaṃ dassanaṃ. **Pothujjanikanti** puthujja-nānaṃ santakaṃ. **Anariyanti** na ariyaṃ na uttamaṃ na parisuddhaṃ. **Anatthasaṃhitanti** na atthasannissitaṃ. **Na nibbidāyāti** na vaṭṭe nibbindanathāya. **Na virāgāyāti** na rāgādīnaṃ virajjanathāya. **Na nirodhāyāti** na rāgādīnaṃ appavattinirodhāya. **Na upasamāyāti** na rāgādīnaṃ vūpasamanathāya. **Na abhiññāyāti** na abhijānanathāya. **Na sambodhāyāti** na sambodhisasāṅkhātassa catumaggañā-ṇassa paṭivijjanathāya. **Na nibbānāyāti** na nibbānassa sacchikiriyāya.

**Niviṭṭhasaddhoti** patiṭṭhitasaddho. **Niviṭṭhapemoti** patiṭṭhitapemo. **Ekantagatoti** ekantaṃ gato, acalappattoti attho. **Abhippasannoti** ativiya pasanno. **Etadānuttariyanti** etaṃ anuttaraṃ. **Hatthismimpi sikkhatīti** hatthinimittaṃ (3.0105) sikkhitabbaṃ hatthisippaṃ sikkhati. Sesapadesupi eseva nayo. **Uccāvacanti** mahantakhu-ddakaṃ sippaṃ sikkhati.

**Upaṭṭhitā pāricariyeti** pāricariyāya paccupaṭṭhitā. **Bhāvayanti anussatinti** anuttaraṃ anussatiṃ bhāventi. **Vivekappaṭisaṃyuttanti** nibbānanissitaṃ katvā. **Khemanti** nirupaddavaṃ. **Amatagāminanti** nibbānagāmināṃ, ariyamaggaṃ bhāventīti attho. **Appamāde pamoditāti** satiyā avippavāsasasāṅkhāte appamāde āmoditā pamoditā. **Nipakāti** nepakkena samannāgatā. **Sīlasaṃvutāti** sīlena saṃvutā pihitā. **Te ve kālena paccētīti** te ve yuttappayuttakāle jānanti. **Yattha dukkhaṃ nirujjha-**

tīTi yasmim̐ ṭhāne sakalaṃ vaṭṭadukkhaṃ nirujjhati, taṃ amataṃ mahānibbānaṃ te bhikkhū jānantīti. Imasmim̐ sutte cha anuttariyāni missakāni kathitānīti.

Anuttariyavaggo tatiyo.

## 4. Devatāvaggo

### 1. Sekhasuttavaṇṇanā

**31.** Catutthassa paṭhame **sekhassā**ti sattavidhassa sekhasa. Puthujjane pana vattabbameva natthi. **Parihānāyā**ti uparūpariguṇaparihānāya.

### 2-3. Aparihānasuttadvayaṇṇanā

**32-33.** Dutiye **satthugāravatā**ti satthari garubhāvo. **Dhammagāravatā**ti nava-vidhe lokuttaradhamme garubhāvo. **Saṅghagāravatā**ti saṅghe garubhāvo. **Sikkhā-gāravatā**ti tīsu sikkhāsu garubhāvo. **Appamādagāravatā**ti appamāde garubhāvo. **Paṭisanthāragāravatā**ti dhammāmisavasena duvidhe paṭisanthāre garubhāvo. Satthā garu assāti **satthugaru**. Dhammo garu assāti **dhammagaru**. **Tibbagāravoti** bahalagāravo. Paṭisanthāre (3.0106) gāravo assāti **paṭisanthāragāravo**. Tatiye **sappatissoti** sajeṭṭhako sagāravo. Hirottappaṃ panettha missakaṃ kathitaṃ.

### 4. Mahāmoggallānasuttavaṇṇanā

**34.** Catutthe **tisso nāma bhikkhū**ti therasseva saddhivihāriko. **Mahiddhiko mahā-nubhāvoti** ijjanaṭṭhena mahatī iddhi assāti mahiddhiko. Anupharaṇaṭṭhena mahā ānubhāvo assāti mahānubhāvo. **Cirassaṃ kho, mārisa moggallāna, imaṃ pariyā-yamakāsī**ti evarūpaṃ loke pakatiyā piyasamudāhāravacanaṃ hoti. Lokiyā hi cirassaṃ āgatampi anāgatapubbampi manāpajātiyaṃ āgataṃ disvā “kuto bhavaṃ āgato, cirassaṃ bhavaṃ āgato, kathaṃ te idhāgamanamaggo ñāto, kiṃ maggamū-ḷhosī”ti-ādīni vadanti. Ayaṃ pana āgatapubbattāyeva evamāha. Thero hi kālena kālaṃ brahmalokaṃ gacchatīyeva. Tattha **pariyāyamakāsī**ti vāraṃ akāsi. **Yadidaṃ idhāgamanāyā**ti yo ayaṃ idhāgamanāya vāro, taṃ cirassaṃ akāsīti vuttaṃ hoti. **Ida-māsanam paññattanti** mahārahaṃ brahmapallaṅkaṃ paññāpetvā evamāha. **Ave-ccappasādenā**ti adhigatena acalena maggappasādena. Imasmim̐ sutte sotāpatti-maggañāṇaṃ kathitaṃ.

### 5. Vijjābhāgiyasuttavaṇṇanā

**35.** Pañcame **vijjābhāgiyā**ti vijjākoṭṭhāsikā. **Aniccasaññā**ti aniccānupassanā-

ñāṇe uppannasaññā. **Anicce dukkhasaññāti** dukkhānupassanāñāṇe uppannasaññā. **Dukkhe anattasaññāti** anattānupassanāñāṇe uppannasaññā. **Pahānasaññāti** pahānānupassanāñāṇe uppannasaññā. **Virāgasaññāti** virāgānupassanāñāṇe uppannasaññā. **Nirodhasaññāti** nirodhānupassanāñāṇe uppannasaññā.

## 6. Vivādamūlasuttavaṇṇanā

**36.** Chaṭṭhe (3.0107) **vivādamūlānīti** vivādassa mūlāni. **Kodhanoti** kujjhanalakkhaṇena kodhena samannāgato. **Upanāhīti** vera-appaṭinissaggalakkhaṇena upanāhena samannāgato. **Ahitāya dukkhāya devamanussānanti** dvinnaṃ bhikkhūnaṃ vivādo kathaṃ devamanussānaṃ ahitāya dukkhāya saṃvattati? Kosambakakkhandhake viya dvīsu bhikkhūsu vivādaṃ āpannesu tasmim vihare tesam antevāsikā vivadanti, tesam ovādaṃ gaṇhanto bhikkhunisaṅgho vivadati. Tato tesam upaṭṭhākā vivadanti, atha manussānaṃ ārakkhadevatā dve koṭṭhāsā honti. Tathā dhammavādīnaṃ ārakkhadevatā dhammavādīniyo honti, adhammavādīnaṃ adhammavādīniyo. Tato ārakkhadevatānaṃ mittā bhummadevatā bhijjanti. Evaṃ paramparāya yāva brahmalokā ṭhapetvā ariyasāvake sabbe devamanussā dve koṭṭhāsā honti. Dhammavādīhi pana adhammavādīnova bahutarā honti. Tato yaṃ bahukehi gahitaṃ, taṃ gacchanti. Dhammaṃ vissajjetvā bahutarāva adhammaṃ gaṇhanti. Te adhammaṃ purakkhatvā viharantā apāye nibbattanti. Evaṃ dvinnaṃ bhikkhūnaṃ vivādo devamanussānaṃ ahitāya dukkhāya hoti. **Ajjhattaṃ vāti** tumhākaṃ abbhantaraparisāya. **Bahiddhāti** paresaṃ parisāya.

**Makkhīti** paresaṃ guṇamakkhanalakkhaṇena makkhena samannāgato. **Paḷāsīti** yugaggāhalakkhaṇena paḷāsena samannāgato. **Issukīti** parassa sakkārādīni issāyanalakkhaṇāya issāya samannāgato. **Maccharīti** āvāsamacchariyādīhi samannāgato. **Saṭhoti** kerāṭiko. **Māyāvīti** katapaṭicchādako. **Pāpicchoti** asantasambhāvanicchako dussīlo. **Micchādiṭṭhīti** natthikavādī, ahetuvādī, akiriyavādī. **Sandiṭṭhiparāmāsīti** sayam diṭṭhameva parāmasati. **Ādhānaggāhīti** daḷhaggāhī. **Duppaṭinissaggīti** na sakkā hoti gahitaṃ vissajjāpetuṃ. Imasmim sutte vaṭṭameva kathitaṃ.

## 7. Dānasuttavaṇṇanā

**37.** Sattame **veḷukaṇḍakīti** veḷukaṇḍakanagaravāsini. **Chalaṅgasamannāga-**  
**tanti** chahi guṇaṅgehi samannāgataṃ. **Dakkhiṇaṃ paṭiṭṭhāpetīti** dānaṃ deti.  
**Pubbeva dānā sumanoti** dānaṃ dassāmīti māsaddhamāsato paṭṭhāya (3.0108)  
somanassappatto hoti. Ettha hi pubbecetanā dassāmīti cittuppādakālato paṭṭhāya  
“ito uṭṭhitena dānaṃ dassāmī”ti khettaggaṇaṃ ādiṃ katvā cintentassa labbhati.  
**Dadaṃ cittaṃ pasādetīti** evaṃ vuttā muñcacetanā pana dānakāleyeva labbhati.  
**Datvā attamano hotīti** ayaṃ pana aparacetanā aparāparaṃ anussarantassa  
labbhati. **Vītarāgāti** vigatarāgā khīṇāsavā. **Rāgavinayāya vā paṭipannāti** rāgavina-  
yapaṭipadaṃ paṭipannā. Ukkaṭṭhadesanā cesā, na kevalaṃ pana khīṇāsavānaṃ,  
anāgāmi-sakadāgāmi-sotāpannānampi antamaso tadahupabbajitassa bhaṇḍagā-  
hakaśamaṇerassāpi dinnā dakkhiṇā chaḷaṅgasamannāgatāva hoti. Sopi hi sotāpa-  
ttimaggaṭṭhameva pabbajito.

**Yaññassa sampadāti** dānassa paripuṇṇatā. **Saññatāti** silasaññamena saññatā.  
**Sayaṃ ācamayivānāti** attanāva hatthapāde dhovivā mukhaṃ vikkhāletvā. **Sakehi**  
**pāṇibhīti** attano hatthehi. Sayehītipi pāṭho. **Saddhoti** ratanattayaṅge saddahanto.  
**Muttana cetasāti** lābhamacchariyādīhi vimuttana cittaṃ. **Abyāpajjhaṃ sukhaṃ**  
**lokanti** niddukkhaṃ uḷārasukhasomanassaṃ devalokaṃ.

## 8. Attakārisuttavaṇṇanā

**38.** Aṭṭhame **addasaṃ vā assosiṃ vāti** akkhīni ummīletvā mā addasaṃ, asu-  
kasmīṃ nāma ṭhāne vasatīti mā assosiṃ, kathentassa vā vacanaṃ mā assosiṃ.  
**Kathañhi nāmāti** kena nāma kāraṇena. **Ārambhadhātūti** ārabhanavasena pavatta-  
vīriyaṃ. **Nikkamadhātūti** kosajjato nikkhamanasabhāvaṃ vīriyaṃ. **Parakkamadhā-**  
**tūti** parakkamasabhāvo. **Thāmadhātūti** thāmasabhāvo. **Ṭhitidhātūti** ṭhitisabhāvo.  
**Upakkamadhātūti** upakkamasabhāvo. Sabbaṃ cetaṃ tena tenākārena pava-  
ttassa vīriyasēva nāmaṃ.

## 9-10. Nidānasuttādivaṇṇanā

**39-40.** Navame **kammānanti** vaṭṭagāmikammānaṃ. **Samudayāyāti** piṇḍakaraṇa-  
tthāya. **Nidānanti** paccayo. **Lobhajeṇāti** lobhato jātena. **Na** (3.0109) **paññāyantīti**  
“evarūpena kammena nibbattā”ti na dissanti. Sukkapakkhe **kammānanti** vivaṭṭagā-  
mikammānaṃ. Iti imasmīṃ sutte vaṭṭavivaṭṭaṃ kathitaṃ. Dasame **niculavaneti**  
mahāmucalindavane. **Saddhammoti** sāsanasaddhammo.

## 11. Dārukkhandhasuttavaṇṇanā

**41.** Ekādasame **cetovasippattoti** cittavasibhāvaṃ patto. **Pathavīveva adhimucce-**

**yyāti** thaddhākāraṃ pathavīdhātūti sallakkheyya. **Yaṃ nissāyāti** yaṃ vijjamānaṃ thaddhākāraṃ pathavīdhātuṃ nissāya amuṃ dārukkhandhaṃ pathavīveva adhimucceyya, sā ettha pathavīdhātu atthīti. Iminā nayena sesapadānipi veditabbāni. Yatheva hi tasmim̐ thaddhākārā pathavīdhātu atthi, evaṃ yūsākārā āpodhātu, uṇhākārā tejodhātu, vitthambhanākārā vāyodhātu, rattavaṇṇamhi sāre padumapu-pphavaṇṇā subhadhātu, pūtibhūte cuṇṇe ceva pheggupapaṭikāsu ca amanuñña-vaṇṇā asubhadhātu, taṃ nissāya amuṃ dārukkhandhaṃ asubhantveva adhimucceyya sallakkheyyāti. Imasmim̐ sutte missakavīhāro nāma kathito.

## 12. Nāgitasuttavaṇṇanā

42. Dvādasame **gāmantavīhārīti** gāmantasenāsanavāsīṃ. **Samāhitaṃ nisi-**  
**nnanti** tasmim̐ gāmantasenāsane samādhim̐ appetvā nisinnaṃ. **Idānimanti** idāni  
imaṃ. **Samādhimhā cāvessatīti** samādhito uṭṭhāpessati. **Na attamano homīti** na  
sakamano homi. **Pacalāyamānanti** niddāyamānaṃ. **Ekattanti** ekasabhāvaṃ, eka-  
ggatābhūtaṃ araññasāññaṃyeva citte karissatīti attho. **Anurakkhissatīti** anugga-  
ṇhissati. **Avimuttaṃ vā cittaṃ vimocessatīti** aññasim̐ kāle avimuttaṃ cittaṃ  
idāni pañcahi vimuttīhi vimocayissati. **Riñcatīti** vajjeti vissajjeti. **Paṭipañāmetvāti**  
panuditvā vissajjetvā. **Uccārapassāvakkammāyāti** uccārapassāvakkaraṇatthāya.  
Iminā ettakena ṭhānena satthārā araññasenāsanassa vaṇṇo kathito. Suttassa  
pana paṭhamakoṭṭhāse yaṃ vattabbaṃ, taṃ heṭṭhā vuttamevāti.

Devatāvaggo catuttho.

## 5. Dhammikavaggo

### 1. Nāgasuttavaṇṇanā

43. Pañcamassa (3.0110) paṭhame **āyasmatā ānandena saddhīti** idaṃ “āyāmā-  
nandā”ti theram̐ āmantetvā gatattā vuttaṃ, satthā pana anūnehi pañcahi bhikkhu-  
satehi parivuto tattha agamāsīti veditabbo. **Tenupasaṅkamīti** teheva pañcahi  
bhikkhusatehi parivuto upasaṅkami. **Parisiñcitvāti** vohāravacanaṃmetam̐, nhāyi-  
tvāti attho. **Pubbāpayamānoti** rattadupaṭṭam̐ nivāsetvā uttarāsaṅgacīvaraṃ dvīhi  
hatthehi gahetvā pacchimalokadhātuṃ piṭṭhito katvā puratthimalokadhātuṃ abhi-  
mukho vodakabhāvena gattāni pubbasadisāni kurumāno aṭṭhāsīti attho. Bhikkhu-  
saṅghopi tena tena ṭhānena otarivā nhatvā paccuttarivā satthāraṃyeva parivā-  
retvā aṭṭhāsi. Iti tasmim̐ samaye ākāsaṭo patamānaṃ rattasuvaṇṇakuṇḍalaṃ viya  
sūriyo pacchimalokadhātuṃ paṭipajji, parisuddharajatamaṇḍalo viya pācīnaloka-  
dhātuto cando abbhuggaṅchi, majjhaṭṭhānepi pañcabhikkhusataparivāro sammā-  
sambuddho chabbaṇṇabuddharasmiyo vissajjetvā pubbakoṭṭhakanadīṭire lokaṃ

alaṅkurumāno aṭṭhāsi.

**Tena kho pana samayena ...pe... seto nāma nāgoti** setavaṇṇatāya evaṃ laddhanāmo hatthināgo. **Mahātūriyatāḷitavāditenāti** mahantena tūriyatāḷitavāditenā. Tattha paṭhamam saṅghaṭṭanam tāḷitam nāma hoti, tato param vāditaṃ. **Janoti** hatthidassanattam sannipatitamahājano. **Disvā evamāhāti** aṅgapaccaṅgāni ghaṃsitvā nhāpetvā uttāretvā bahitīre ṭhapetvā gattāni vodakāni katvā hatthālaṅkārena alaṅkataṃ taṃ mahānāgaṃ disvā idaṃ “abhirūpo vata, bho”ti pasamsāvacanamāha. **Kāyupapannoti** sarīrasampattiyā upapanno, paripuṇṇaṅgapaccaṅgoti attho. **Āyasmā udāyīti** paṭisambhidāppatto kāḷudāyitthero. **Etadavocāti** taṃ mahājanaṃ hatthissa vaṇṇam bhaṇantaṃ disvā “ayaṃ jano ahetukapaṭi-sandhiyaṃ nibbattahatthino vaṇṇam katheti, na buddhahatthissa. Ahaṃ dāni iminā hatthināgena upamaṃ katvā buddhanāgassa vaṇṇam (3.0111) kathessāmī”ti cintetvā etaṃ “hatthimeva nu kho, bhante”ti-ādivacanam avoca. Tattha **mahantanti** ārohasampannam. **Brahantanti** pariṇāhasampannam. **Evamāhāti** evaṃ vadati. Atha bhagavā yasmā ayaṃ nāgasaddo hatthimhiceva assagoṇa-uragarukkhamanussesu cāpi pavattati, tasmā **hatthimpi khoti**-ādimāha.

**Āgunti** pāpakaṃ lāmakaṃ akusaladhammaṃ. **Tamahaṃ nāgoti brūmīti** taṃ ahaṃ imehi tīhi dvārehi dasannaṃ akusalakammamathānaṃ dvādasannañca akusalacittānaṃ akaraṇato nāgoti vadāmi. Ayañhi na āguṃ karotīti iminā atthena nāgo. **Imāhi gāthāhi anumodāmi** Ti imāhi catusaṭṭhipadāhi soḷasahi gāthāhi anumodāmi abhinandāmi.

**Manussabhūtanti** devādibhāvaṃ anupagantvā manussameva bhūtaṃ. **Attadantanti** attanāyeva dantaṃ, na aññehi damathaṃ upanītaṃ. Bhagavā hi attanā uppāditeneva maggadamaṭṭhena cakkhutopi danto, sotatopi, ghānatopi, jivhātopi, kāyatopi, manatopīti imesu chasu ṭhānesu danto santo nibbuto parinibbuto. Tenāha- “attadantan”ti. **Samāhitanti** duvidhenāpi samādhinā samāhitaṃ. **Iriyamānanti** viharamānaṃ. **Brahmapatheti** seṭṭhapathe, amatapathe, nibbānapathe. **Cittassūpasame ratanti** paṭhamajjhānena pañca nīvaraṇāni vūpasametvā, dutiyajjhānena vitakkavicāre, tatiyajjhānena pītiṃ, catutthajjhānena sukhadukkhaṃ vūpasametvā tasmim cittaśūpasame rataṃ abhirataṃ.

**Namassantīti** kāyena namassanti, vācāya namassanti, manasā namassanti, dhammānudhammapaṭipattiyā namassanti, sakkaronti garuṃ karonti. **Sabbadhammānapāragunti** sabbesaṃ khandhāyatanadhātudhammānaṃ abhiññāpāragū, pariññāpāragū, pahānapāragū, bhāvanāpāragū, sacchikiriyāpāragū, samāpattipāragūti chabbidhena pāragamanena pāragataṃ pārapattaṃ matthakappattaṃ. **Devāpi taṃ namassantīti** dukkhappattā subrahmadevaputtādayo sukhappattā ca sabbeva dasasahassacakkavāḷavāsino devāpi tumhe namassanti. **Iti me arahato sutanti** iti mayā catūhi kāraṇehi arahāti laddhavohārānaṃ tumhākaṃyeva santike sutanti dīpeti.

**Sabbasaṃyojanātīti** (3.0112) sabbāni dasavidhasaṃyojanāni atikkantaṃ. **Vanā nibbanamāgatanti** kilesavanato nibbanaṃ kilesavanarahitaṃ nibbānaṃ āgataṃ sampattaṃ. **Kāmehi nekkhammaratanti** duvidhehi kāmehi nikkhantattā

pabbajjā aṭṭha samāpattiyo cattāro ca ariyamaggā kāmehi nekkhammaṃ nāma, tattha rataṃ abhirataṃ. **Muttaṃ selāva kañcananti** seladhātuto muttaṃ kañcana-sadisam.

**Sabbe accarucīti** sabbasatte atikkamitvā pavattaruci. Aṭṭhamakañhi atikkamitvā pavattarucitāya sotāpanno accaruci nāma, sotāpannaṃ atikkamitvā pavattarucitāya sakadāgāmī ...pe... khīṇāsavaṃ atikkamitvā pavattarucitāya paccekasambuddho, paccekasambuddhaṃ atikkamitvā pavattarucitāya sammāsambuddho accaruci nāma. **Himavāvaññe siluccayeti** yathā himavā pabbatarājā aññe pabbate atirocati, evaṃ atirocatīti attho. **Saccanāmoti** tacchanāmo bhūtanāmo āguṃ akaraṇeva nāgoti evaṃ avitathanāmo.

**Soraccanti** sucisīlaṃ. **Avihimsāti** karuṇā ca karuṇāpubbabhāgo ca. **Pādā nāgassa te duveti** te buddhanāgassa duve purimapādā.

**Tapoti** dhutasamādānaṃ. **Brahmacariyanti** ariyamaggasilāṃ. **Caraṇā nāgassa tyāpareti** te buddhanāgassa apare dve pacchimapādā. **Saddhāhatthoti** saddhāmayāya soṇḍāya samannāgato. **Upekkhāsetadantavāti** chaḷaṅgupekkhāmayehi setadantehi samannāgato.

**Sati gīvāti** yathā nāgassa aṅgapaccaṅgasmim sirājālānaṃ gīvā patiṭṭhā, evaṃ buddhanāgassa soraccādīnaṃ dhammānaṃ sati. Tena vuttaṃ- “sati gīvā” ti. **Siro paññāti** yathā hatthināgassa siro uttamaṅgo, evaṃ buddhanāgassa sabbaññutaññaṃ. Tena hi so sabbadhamme jānāti. Tena vuttaṃ- “siro paññā” ti. **Vīmaṃsā dhammacintanāti** yathā hatthināgassa aggasoṇḍo vīmaṃsā nāma hoti. So tāya thaddhamudukaṃ khāditabbākhaḍḍhabbañca vīmaṃsati, tato pahātappaṃ pajahati, ādātappaṃ ādiyati, evameva buddhanāgassa dhammakotṭhāsaparicchedakāññaṃsaṅkhātā dhammacintanā vīmaṃsā. Tena hi ñāṇena so bhabbābhabbe jānāti. Tena vuttaṃ- “vīmaṃsā dhammacintanā” ti (3.0113). **Dhammakucchisamātapoti** dhammo vuccati catutthajjhānasamādhi, kucchiyeva samātapo kucchisamātapo. Samātapo nāma samātapanaṭṭhānaṃ. Dhammo kucchisamātapo assāti dhammakucchisamātapo. Catutthajjhānasamādhisimim ṭhitassa hi te te iddhividhādidhammā ijjhanti, tasmā so kucchisamātapoti vutto. **Vivekoti** kāyacitta-upadhiviveko. Yathā nāgassa vāladhi makkhikā vāreti, evaṃ tathāgatassa viveko gahaṭṭha-pabbajite vāreti. Tasmā so **vāladhīti** vutto.

buddhanāgassa phalasangāhā, tattha rato, assāsapassāsēhi viya tāya vinā na **Jhāyīti** duvidhena jhānena jhāyī. **Assāsarati** nāgassa hi assāsapassāsā viya buddhanāgassa phalasangāhā, tattha rato, assāsapassāsēhi viya tāya vinā na vattatīti attho. **Sabbattha saṃvutoti** sabbadvāresu saṃvuto. **Anavajjānīti** sammā-ā-jīvena uppannabhojanāni. **Sāvajjānīti** pañcavidhamicchājīvavasena uppannabhojanāni.

**Aṇumthūlanti** khuddakañca mahantañca. **Sabbaṃ chetvāna bandhananti** sabbaṃ dasavidhampi saṃyojanaṃ chinditvāna. **Nupalippati lokenāti** lokena saddhiṃ taṇhāmānadiṭṭhilepehi na lippati. **Mahāginīti** mahā-aggi. **Viññūhi desitāti** idha paṭisambhidāppatto kāḷudāyittherova viññū paṇḍito, tena desitāti attho. **Viññāssanti mahānāgā, nāgaṃ nāgena desitanti** udāyittheranāgena desitaṃ buddhanāgaṃ itare khīṇāsavā nāgā vijānissanti.

**Sarīraṃ vijahaṃ nāgo, parinibbissatīti** bodhipallaṅke kilesaparinibbānena parinibbuto, yamakasālantare anupādisesāya nibbānadhātuyā parinibbāyissati. Evaṃ paṭisambhidāppatto udāyitthero soḷasahi gāthāhi catusaṭṭhiyā padehi dasabalassa vaṇṇaṃ kathento desanaṃ niṭṭhāpesi. Bhagavā anumodi. Desanāvasāne caturā-sītipāṇasahassāni amatapānaṃ pivimsūti.

## 2. Migasālāsuttavaṇṇanā

44. Dutiye **kathaṃ kathaṃ nāmāti** kena kena kāraṇena. **Aññeyyoti** ajānitabbo. **Yatra hi nāmā** Ti yasmiṃ nāma dhamme. **Samasamagatikāti** (3.0114) samabhāve-neva samagatikā. **Bhavissantīti** jātā. **Sakadāgāmipatto tusitaṃ kāyaṃ upapannoti** sakadāgāmipuggalo hutvā tusitabhavaneyeva nibbato. **Kathaṃ kathaṃ nāmāti** kena kena nu kho kāraṇena, kiṃ nu kho jānitvā desito, udāhu ajānitvāti. Thero kāraṇaṃ ajānanto **evaṃ kho panetaṃ bhagini bhagavatā byākatanti** āha.

**Ammakā ammakapaññāti** itthī hutvā itthisaññāya eva samannāgatā. **Ke ca purisapuggalaparopariyañāṇeti** ettha purisapuggalaparopariyañāṇaṃ vuccati purisapuggalānaṃ tikkhamuduvāsena indriyaparopariyañāṇaṃ. Tasmā kā ca bālā migasālā, ke ca purisapuggalānaṃ indriyaparopariyañāṇe appaṭihatavisayā sammāsa-mbuddhā, ubhayametaṃ dūre suvidūreti ayamettha saṅkhepo.

Idāni migasālāya attano dūrabhāvaṃ dassento **chayime, ānandāti**-ādimāha. **Sorato hotīti** pāpato suṭṭhu orato virato hoti. Suratotipi pāṭho. **Abhinandanti sabrahmacārī ekattavāsenāti** tena saddhiṃ ekatovāsenā sabrahmacārī abhinandanti tussanti. Ekattavāsenātipi pāṭho, satattavāsenāti attho. **Savenenapi akataṃ hotīti** sotabbayuttakaṃ asutaṃ hoti. **Bāhusaccenapi akataṃ hotīti** ettha bāhusaccaṃ vuccati vīriyaṃ, vīriyena kattabbayuttakaṃ akataṃ hotīti attho. **Diṭṭhiyāpi appaṭi-viddhaṃ hotīti** diṭṭhiyā paṭivijhitabbaṃ appaṭi-viddhaṃ hoti. **Sāmāyikampi vimuttiṃ na labhatīti** kālānukālaṃ dhammassavanaṃ nissāya pītipāmojjaṃ na labhati. **Hānagāmiyeva hotīti** parihānimeva gacchati.

**Pamāṇikāti** puggalesu pamāṇaggāhakā. **Paminantīti** pametaṃ tuletum āra-



bhanti. **Eko hīnoti** eko guṇehi hīno. **Eko paṇītoti** eko guṇehi paṇīto. **Taṃ hīti** taṃ pamāṇakaraṇaṃ.

**Abhikkantataroti** sundarataro. **Paṇītaroti** uttamataro. **Dhammasoto nibbahatīti** sūraṃ hutvā pavattamānavipassanāññaṃ nibbahati, ariyabhūmiṃ (3.0115) sampāpeti. **Tadantaraṃ ko jāneyyāti** taṃ antaraṃ taṃ kāraṇaṃ aññatra tathāgātena ko jāneyyāti attho.

**Kodhamānoti** kodho ca māno ca. **Lobhadhammāti** lobhoyeva. **Vacīsaṅkhārāti** ālāpasallāpavasena vacanāneva. **Yo vā panassa mādisoti** yo vā pana aññopi mayā sadiso sammāsambuddhoyeva assa, so puggalesu pamāṇaṃ gaṇheyyāti attho. **Khaññatī** Ti guṇakhaṇanaṃ pāpuṇāti. **Ime kho, ānanda, cha puggalā** Ti dve soratā, dve adhigatakodhamānalobhadhammā, dve adhigatakodhamānavacīsaṅkhārāti ime cha puggalā. **Gatinti** ñāṇagatiṃ. **Ekaṅgahīnāti** ekekena guṇaṅgena hīnā. Pūraṇo sīlena visesī ahosi, isidatto paññāya. Pūraṇassa sīlaṃ isidattassa paññāṭhāne ṭhitam, isidattassa paññā pūraṇassa sīlaṭṭhāne ṭhitāti.

### 3. Iṅasuttavaṇṇanā

45. Tatiye **dāliddiyanti** daliddabhāvo. **Kāmabhoginoti** kāme bhuñjanakasattassa. **Assakoti** attano santakena rahito. **Anāḥikoti** na aḍḍho. **Iṅaṃ ādiyatīti** jīvitum asa-kkonto iṅaṃ ādiyati. **Vaḍḍhiṃ paṭissuṇātīti** dātum asakkonto vaḍḍhiṃ dassāmīti paṭijānāti. **Anucarantipi nanti** parisamajjhagaṇamajjhādīsu ātapaṭhapanapaṃsu-okaṇādihi vippakāraṃ pāpento pacchato pacchato anubandhanti. **Saddhā natthī** Ti okappanakasaddhāmattakampi natthi. **Hirī natthī** Ti hirīyanākāramattakampi natthi. **Ottappaṃ natthī** Ti bhāyanākāramattakampi natthi. **Vīriyaṃ natthī** Ti kāyikavīriyamattakampi natthi. **Paññā natthī** Ti kammassakatapaññāmattakampi natthi. **Iṅādānasmim vadāmīti** iṅaggahaṇaṃ vadāmi. **Mā maṃ jaññūti** mā maṃ jānātu.

**Dāliddiyaṃ dukkhanti** dhanadaliddabhāvo dukkhaṃ. **Kāmalābhābhijappinanti** kāmalābhaṃ patthentānaṃ. **Pāpakammavinibbayoti** pāpakammavaḍḍhako. **Saṃsappatīti** paripphandati. **Jānanti** jānanto. **Yassa vippaṭisārajāti** ye assa (3.0116) vippaṭisārato jātā. **Yonimaññataranti** ekaṃ tiracchānayoṇiṃ. **Dadaṃ cittaṃ pasādayanti** cittaṃ pasādentō dadamāno.

**Kaṭaggāhoti** jayaggāho, anaparādhaggāho hoti. **Gharamesinoti** gharāvāsaṃ pariyesantassa vasamānassa vā. **Cāgo puññaṃ pavaḍḍhatīti** cāgoti saṅkhaṃ gataṃ puññaṃ vaḍḍhati. Cāgā puññanti vā pāṭho. **Paṭiṭṭhitāti** paṭiṭṭhitasaddhā nāma sotāpannassa saddhā. **Hirimanoti** hirisampayuttacitto. **Nirāmisam sukhanti** tīṇi jhānāni nissāya uppajjanakasukhaṃ. **Upekkhanti** catutthajjhānupekkhaṃ. **Āradhaviṇiyoti** paripuṇṇapaggahitavīriyo. **Jhānāni upasampajjāti** cattāri jhānāni patvā. **Ekodi nipako satoti** ekaggacitto kammassakataññaṇasatīhi ca samannāgato.

**Evam ñatvā yathābhūtanti** evaṃ ettakaṃ kāraṇaṃ yathāsabhāvaṃ jānitvā. **Sabbasaṃyojanakkhayeti** nibbāne. **Sabbasoti** sabbākārena. **Anupādāyāti** agga-hetvā. **Sammā cittaṃ vimuccatīti** idaṃ vuttaṃ hoti- sabbasaṃyojanakkhayasa-

ñkhāte nibbāne sabbaso anupādiyitvā sammā hetunā nayena maggacittam vimuccati. “Etaṃ ñatvā yathābhūtaṃ, sabbasaṃyojanakkhayan”tipi pāḷiyaṃ likhitaṃ, tassa etaṃ sabbasaṃyojanakkhayaasañkhātaṃ nibbānaṃ yathābhūtaṃ ñatvāti attho. Purimapacchimehi pana saddhiṃ na ghaṭiyati.

**Tassa sammā vimuttassā**Ti tassa sammā vimuttassa khīṇāsavassa. **Ñāṇaṃ hotīti** paccavekkhaṇañāṇaṃ hoti. **Tādinoti** taṃsaṅghitassa. **Akuppāti** akuppārammaṇattā kuppakāraṇānaṃ kilesānañca abhāvena akuppā. **Vimuttīti** maggavimuttiṃ phalavimuttiṃ. **Bhavaṃsaṃyojanakkhayeti** bhavaṃsaṃyojanakkhayaasañkhāte nibbāne bhavaṃsaṃyojanānañca khayante uppannā. **Etaṃ kho paramaṃ ñāṇanti** etaṃ maggaphalañāṇaṃ paramañāṇaṃ nāma. **Sukhamanuttaranti** etadeva maggaphalasukhaṃ anuttaraṃ sukhaṃ nāma. **Āṇaṇyamuttamanti** sabbesaṃ aṇaṇānaṃ khīṇāsavo uttama-aṇaṇo, tasmā arahattaphalaṃ āṇaṇyamuttamanti arahattaphalena desanāya kūṭaṃ gaṇhi. Imasmiñca sutte vaṭṭameva kathetvā gāthāsu vaṭṭavivaṭṭaṃ kathitanti.

#### 4. Mahācundasuttavaṇṇanā

46. Catutthe (3.0117) **cetīsūti** cetiraṭṭhe. **Sayaṃjātiyanti** evaṃnāmake nigame. **Mahācundoti** dhammasenāpatissa kaniṭṭhabhātiko. Dhamme yogo anuyogo etesanti **dhammayogā**. Dhammakathikānaṃ etaṃ nāmaṃ. Jhāyantīti **jhāyī**. **Apasādentīti** ghaṭṭenti hiṃsanti. **Jhāyantīti** cintenti. **Pajjhāyantīti**-ādīni upasaggavasena vaḍḍhitāni. **Kimime jhāyantīti** kiṃ nāma ime jhāyanti. **Kintime jhāyantīti** kimatthaṃ ime jhāyanti. **Kathaṃ ime jhāyantīti** kena kāraṇena ime jhāyanti. **Amataṃ dhātuṃ kāyena phusitvā viharantīti** maraṇavirahitaṃ nibbānadhātuṃ sandhāya kammaṭṭhānaṃ gahetvā viharantā anukkamena taṃ nāmakāyena phusitvā viharanti. **Gambhīraṃ atthapadanti** guḷhaṃ paṭicchannaṃ khandhadhātu-āyatanādi-atthaṃ. **Paññāya ativijja passantīti** saḥavipassanāya maggapaññāya paṭivijjhitvā passanti. Imasmiṃ panatthe sammasanapaṭivedhapaññāpi uggahaparipucchāpaññāpi vaṭṭatiyevāti.

#### 5-6. Sandiṭṭhikasuttadvayaṇṇanā

47-48. Pañcame **santaṃ vā ajjhantanti** niyakajjhatte vijjamānaṃ. **Lobhoti**-ādīhi tīṇi akusalamūlāni dassitāni. **Lobhadhammāti**-ādīhi taṃsampaṃyuttakā dhammā. Chaṭṭhe **kāyasandosanti** kāyadvārassa dussanākāraṃ. Sesadvayepi eseṃ nayo. Imesu dvīsu suttesu paccavekkhaṇāva kathitā.

#### 7. Khemasuttavaṇṇanā

49. Sattame **vusitavāti** vutthabrahmacariyavāso. **Katakaraṇiyoti** catūhi maggehi kattabbaṃ katvā ṭhito. **Ohitabhāroti** khandhabhāraṃ kilesabhāraṃ abhi-  
sañkhārabhārañca otāretvā ṭhito. **Anuppattasadatthoti** sadattho vuccati arahattaṃ,

taṃ pattoti attho. **Parikkhīṇabhavasamyojanoti** khīṇabhavabandhano. **Samma-  
daññā vimuttoti** sammā hetunā kāraṇena jānitvā vimutto. **Tassa na evaṃ hoti atthi  
me seyyoti vāti-ādīhi** seyyassa seyyohamasmīti mānādayo tayo mānā paṭikkhittā.  
Na hi khīṇāsavassa “atthi mayhaṃ seyyo, atthi sadiso, atthi hīno”ti māno hoti.  
**Natthi me seyyoti-ādīhipi** teyeva (3.0118) paṭikkhittā. Na hi khīṇāsavassa “aha-  
meva seyyo, ahaṃ sadiso, ahaṃ hīno, aññe seyyādayo natthī”ti evaṃ māno hoti.

**Acirapakkantesūti** arahattaṃ byākaritvā aciraṃyeva pakkantesu. **Aññaṃ byāka-  
rontīti** arahattaṃ kathenti. **Hasamānakā maññe aññaṃ byākarontīti** hasamānā  
viya kathenti. **Vighātaṃ āpajjantīti** dukkhaṃ āpajjanti.

**Na ussesu na omesu, samatte nopaniyareti** ettha **ussāti** ussitatā seyyapuggalā.  
**Omāti** hīnā. **Samattoti** sadiso. Iti imesu tīsupi seyyahīnasadisesu khīṇāsavā  
mānena na upaniyare, na upanenti, na upagacchantīti attho. **Khīṇā jātīti** khīṇā  
tesaṃ jāti. **Vusitaṃ brahmacariyanti** vutthaṃ maggabrahmacariyaṃ. **Caranti**  
**saṃyojanavippamuttāti** sabbasaṃyojanehi vimuttā hutvā caranti. Suttepi gāthā-  
yampi khīṇāsavo kathito.

## 8. Indriyasamvarasuttavaṇṇanā

**50.** Aṭṭhame **hatūpanisaṃ hotīti** hatūpanissayaṃ hoti. **Sīlavipannassā** Ti vipanna-  
sīlassa. **Yathābhūtaññānadassananti** taruṇavipassanāññāṇaṃ. **Nibbidāvirāgoti** ettha  
nibbidā balavavipassanā, virāgo ariyamaggo. **Vimuttiññānadassananti** ettha **vimu-  
ttīti** arahattaphalaṃ, **ññānadassananti** paccavekkhaṇaṇñāṇaṃ. **Upanissayasa-  
mpannaṃ hotīti** sampanna-upanissayaṃ hoti. Imasmim

sutte sīlānurakkhaṇa-indriyaṣaṃvaro kathito.

## 9. Ānandasuttavaṇṇanā

51. Navame **kittāvatā**ti kittakena. **Assutañcevā**ti aññasmiṃ kāle assutapubbaṃ. **Na sammosaṃ gacchantī**ti vināsaṃ na gacchanti. **Cetaso samphuṭṭhapubbā**ti cittaena phusitapubbā. **Samudācarantī**ti manodvāre caranti. **Aviññātañca vijānā**ti aññasmiṃ kāle aviññātakāraṇaṃ jānāti. **Pariyāpuṇā**ti vaḷaṅjeti katheti. **Desetī**ti pakāseti. **Paraṃ vācetī**ti paraṃ uggaṇhāpeti.

**Āgatāgamā**ti (3.0119) dīghādīsu yo koci āgamo āgato etesanti āgatāgamā. **Dhammadharā**ti suttantapiṭakadharā. **Vinayadharā**ti vinayapiṭakadharā. **Mātikādharā**ti dvepātimokkhadharā. **Paripucchātī**ti anusandhipubbāparaṃ pucchati. **Paripañhātī**ti idañcidañca pucchissāmīti paritulati paricchindati. **Idaṃ, bhante, kathanti,** bhante, idaṃ anusandhipubbāparaṃ kathaṃ hotīti pucchati. **Imassa kvatthoti** imassa bhāsitassa ko atthoti pucchati. **Avivaṇṇanti** avivaritaṃ. **Vivaraṇṇātī**ti pākaṭaṃ karonti. **Kaṅkhāṭṭhāniyesū**ti kaṅkhāya kāraṇabhūtesu. Tattha yasmiṃ dhamme kaṅkhā uppajjati, sveva kaṅkhāṭṭhāniyo nāmāti veditabbo.

## 10. Khattiyasuttavaṇṇanā

52. Dasame **bhogādhippāyā**ti bhogasaṃharaṇatthaṃ ṭhapitādhippāyā pavatta-ajjhāsayā. **Paññūpavicārā**ti pañnavanto bhaveyyāmāti evaṃ pañnatthāya pavattūpavicārā. Ayameva nesāṃ vicāro citte upavicarati. **Balādhiṭṭhānā**ti balakāyādhiṭṭhānā. Balakāyañhi laddhā te laddhapatiṭṭhā nāma honti. **Pathavibhinivesā**ti pathavisāmino bhavissāmāti evaṃ pathavi-atthāya katacittābhinivesā. **Issariyapariyosānā**ti rajjābhisekapariyosānā. Abhisekañhi patvā te pariyosānappattā nāma honti. Iminā nayena sabbattha attho veditabbo.

Sesapadesu panettha ayamadhippāyo- brāhmaṇā tāva mante labhitvā laddhapatiṭṭhā nāma honti, gahapatikā yaṃkiñci sippaṃ, itthī kuladāyajjasāmikaṃ puttaṃ, corā yaṃkiñci āvudhasatthaṃ, samaṇā sīlaparipuṇṇā laddhapatiṭṭhā nāma honti. Tasmā **mantādhiṭṭhānā**ti-ādīni vuttāni.

Brāhmaṇānañca “yaññaṃ yajissāmā”ti cittaṃ abhinivisati, brahmaloke patte pariyosānappattā nāma honti. Tasmā te **yaññābhinivesā brahmalokapariyosānā**ti vuttā. Kammantakaraṇatthāya mano etesaṃ abhinivisatīti **kammantābhinivesā**. Kamme niṭṭhite pariyosānappattā nāma hontīti **niṭṭhitakammantapariyosānā**.

**Purisādhippāyā**ti purisesu pavatta-ajjhāsayā. Alaṅkārathāya mano upavicarati etissāti **alaṅkārūpavicārā**. Asapattī hutvā ekikāva (3.0120) ghare vaseyyanti eva-massā cittaṃ abhinivisatīti **asapattībhinivesā**. Gharāvāsissariye laddhe pariyosānappattā nāma hontīti issariyapariyosānā.

Parabhaṇḍassa ādāne adhippāyo etesanti **ādānādhippāyā**. Gahane niliyana-ṭṭhāne etesaṃ mano upavicaratīti **gahanūpavicārā**. Andhakārathāya etesaṃ cittaṃ abhinivisatīti **andhakārābhinivesā**. Adassanappattā pariyosānappattā

hontīti **adassanapariyosānā**.

Adhivāsanakkhantiyañca sucibhāvasile ca adhippāyo etesanti **khantisoraccādhippāyā**. Akiñcanabhāve niggahaṇabhāve cittaṃ etesaṃ abhinivisatīti **ākiñcaññābhinivesā**. Nibbānappattā pariyosānappattā hontīti **nibbānapariyosānā**.

## 11. Appamādasuttavaṇṇanā

53. Ekādasame **samadhiggayhāti** suṭṭhu gaṇhitvā. **Jaṅgalānaṃ pāṇānanti** patha-vītalacārīnaṃ sapādakapāṇānaṃ. **Padajātānīti** padāni. **Samodhānaṃ gacchantīti** odhānaṃ upanikkhepaṃ gacchanti. **Aggamakkhāyatīti** seṭṭhaṃ akkhāyati. **Pabbajalāyakoti** pabbajatiṇacchedako. **Odhunātīti** heṭṭhā mukhaṃ dhunāti. **Nidhunātīti** ubhoḥi passehi dhunāti. **Nicchādetīti** bāhāya vā paharati, rukkhe vā paharati. **Ambapiṇḍiyāti** ambaphalapiṇḍiyā. **Vaṇṭūpanibandhanānīti** vaṇṭe upanibandhanāni, vaṇṭe vā patiṭṭhitāni. **Tadanvayāni bhavantīti** vaṇṭānuvattakāni bhavanti, ambapiṇḍidaṇḍakānuvattakāni bhavantītipi attho. **Khuddarājānoti** khuddakarājāno, pakatirājāno vā.

## 12. Dhammikasuttavaṇṇanā

54. Dvādasame **sabbasoti** sabbesu. **Sattasu vihāresūti** sattasu pariveṇesu. **Paribhāsatīti** paribhavati bhayaṃ upadaṃseti. **Vihimsatīti** viheṭṭheti. **Vitumatīti** vijjhati. **Roseti vācāyāti** vācāya ghaṭṭeti. **Pakkamantīti** disā pakkamanti. **Na saṅṭhahantīti** nappatiṭṭhahanti. **Riñcantīti** (3.0121) chaḍḍenti vissajjenti. **Pabbājeyyāmāti** nīhareyyāma. **Handāti** vavassaggatthe nipāto. **Alanti** yuttametaṃ, yaṃ taṃ pabbājeyyunti attho. **Kim te imināti** kim tava iminā jātibhūmiyaṃ vāsena. **Tīradassim sakuṇanti** disākākaṃ. **Muñcantīti** disādassanattaṃ vissajjenti. **Sāmantāti** avidūre. **Sāmantātipi** pāṭho, samantatoti attho. **Abhinivesoti** pattharivā ṭhitasākhānaṃ niveso. **Mūlasantānakānanti** mūlānaṃ niveso.

**Āḷhakathālikāti** taṇḍulāḷhakassa bhattapacanaṭhālikā. **Khuddaṃ madhanti** khuddamakkhikāhi kataṃ daṇḍakamadhuṃ. **Anelakanti** niddosaṃ. **Na ca sudaṃ aññamaññassa phalāni hiṃsantīti** aññamaññassa koṭṭhāse phalāni na hiṃsanti. Attano koṭṭhāsehi mūlaṃ vā tacamaṃ vā pattamaṃ vā chindanto nāma natthi, attano attano sākhāya heṭṭhā patitāneva paribhuñjanti. Aññassa koṭṭhāsato aññasa koṭṭhāsaṃ parivattitvā gatampi “na amhākaṃ sākhāya phalaṃ”ti ñatvā no khādanti. **Yāvadattaṃ bhakkhitvāti** kaṇṭhappamāṇena khāditvā. **Sākhamaṃ bhañjītvāti** Ti chattappamāṇamattaṃ chinditvā chāyaṃ katvā pakkāmi. **Yatra hi nāmāti** yo hi nāma. **Pakkamissatīti** pakkanto. **Nādāsīti** devatāya ānubhāvena phalameva na gaṇhi. Evañhi sā adhiṭṭhāsi.

**Tenupasaṅkamīti** janapadavāsīhi gantvā, “mahārāja, rukkho phalaṃ na gaṇhi, amhākaṃ nu kho doso tumhākaṃ”ti vutte “neva mayhaṃ doso atthi, na jānapadānaṃ, amhākaṃ vijite adhammo nāma na vattati, kena nu kho kāraṇena rukkho na phalito, sakkamaṃ upasaṅkamitvā pucchissāmī”ti cintetvā yena sakko devāna-

mindo tenupasaṅkama. **Pavattesi** Ti parivattesi. **Ummūlamakāsī** ti uddhammūlaṃ akāsi. **Api nu tvanti** api nu tava. **Aṭṭhitāyevā** ti aṭṭhitāya eva. **Sacchavīnī** ti samāna-cchavīni pakatiṭṭhāne ṭhitāni. **Na paccakkosati** ti nappaṭikkosati. **Rosantanti** ghaṭṭentaṃ. **Bhaṇḍantanti** paharantaṃ.

**Sunettoti** nettā vuccanti akkhīni, tesam sundaratāya sunetto. **Titthakaroti** suga-ti-ogāhanatitthassa kārako. **Vītarāgoti** vikkhambhanavasena (3.0122) vigatarāgo. **Pasavatī** ti paṭilabhati. **Diṭṭhisampannanti** dassanasampannaṃ, sotāpannanti attho. **Khantinti** attano guṇakhaṇanaṃ. **Yathāmaṃ sabrahmacārīsū** Ti yathā imaṃ sabrahmacārīsu akkosanaparibhāsanaṃ, aññaṃ evarūpaṃ guṇakhantiṃ na vadāmiti attho. **Na no samasabrahmacārīsū** ti ettha samajano nāma sakajano vuccati. Tasmā na no sakesu samānabrahmacārīsu cittāni paduṭṭhāni bhavissantīti aya-mettha attho.

**Jotipālo ca govindoti** nāmena jotipālo ṭhānena mahāgovindo. **Sattapurohitoti** reṇu-ādīnaṃ sattannaṃ rājūnaṃ purohito. **Ahiṃsakā atītaṃseti** ete cha satthāro atītaṃse ahiṃsakā ahesuṃ. **Nirāmagandhāti** kodhāmagandhena nirāmagandhā. **Karuṇevimuttāti** karuṇajjhāne adhimuttā, karuṇāya ca karuṇāpubbabhāge ca ṭhitā. **Yeteti** ete, ayameva vā pāṭho. **Na sādhurūpaṃ āsīdeti** sādhusabhāvaṃ na ghaṭṭeyya. **Diṭṭhiṭṭhānappahāyinenti** dvāsatṭhidiṭṭhigatappahāyinaṃ. **Sattamoti** ara-hattato paṭṭhāya sattamo. **Avītarāgoti** avigatarāgo. Etena anāgāmibhāvaṃ paṭi-kkhipati. **Pañcindriyā mudūti** pañca vipassanindriyāni mudūni. Tassa hi tāni saka-dāgāmiṃ upādāya mudūni nāma honti. **Vipassanāti** saṅkhārapariggahaññaṃ. **Pubbeva upahaññatīti** paṭhamataraññeva upahaññati. **Akkhatoti** guṇakhaṇanena akkhato anupahato hutvā. Sesam sabbattha uttānamevāti.

Dhammikavaggo pañcama.

Paṭhamapaṇṇāsakaṃ niṭṭhitaṃ.

## 2. Dutiyapaṇṇāsakaṃ

### 6. Mahāvaggo

#### 1. Soṇasuttavaṇṇanā

**55.** Chaṭṭhassa (3.0123) paṭhame **soṇoti** sukhumālasoṇatthero. **Sītavaneti** evaṃ-nāmake susāne. Tasmīṃ kira paṭipāṭiyā pañca caṅkamanapaṇṇasālāsātāni māpi-tāni, tesu thero attano sappāyacaṅkamaṃ gahetvā samaṇadhammaṃ karoti. Tassa āradhaviṛiyassa hutvā caṅkamato pādatalāni bhijjīmsu, jāṇūhi caṅkamato

jāṇukānipi hatthatalānipi bhijjimsu, chiddāni ahesuṃ. Evaṃ āradhāvīriyo viharanto obhāsanimittamattakampi dassetuṃ nāsakki. Tassa vīriyena kilamitakāyassa koṭiyam pāsāṇaphalake nisinnassa yo vitakko udapādi, taṃ dassetuṃ **athakho āyasmato**-ādi vuttaṃ. Tattha **āradhāvīriyā**ti paripuṇṇapaggahitavīriyā. **Na anupādāya āsavehi cittaṃ vimuccatī**ti sace hi ahaṃ ugghaṭitaññū vā assaṃ vipañcitaññū vā neyyo vā, nūna me cittaṃ vimucceyya. Addhā panasmi padaparamo, yena me cittaṃ na vimuccatīti sannitṭhānaṃ katvā **saṃvijjanti kho panā**ti-ādīni cintesi. Tattha **bhogā**ti upayogathe paccattaṃ.

**Pāturahosī**ti therassa cittaṅcāraṃ ñatvā “ayaṃ soṇo aṃjā sītavane padhānabhūmiyaṃ nisinno imaṃ vitakkaṃ vitakketi, gantvāssa vitakkaṃ sahotthaṃ gaṇhitvā vīṇopamaṃ kammaṭṭhānaṃ kathessāmī”ti pamukhe pākaṭo ahoṣi. **Paññatte āsane**ti padhānikabhikkhū attano vasanaṭṭhāne ovadituṃ āgatassa buddhassa bhagavato nisīdanatthaṃ yathālābhena āsanaṃ paññāpetvāva padhānaṃ karonti, aññaṃ alabhamānā purāṇapaṇṇānipi santharivā upari saṅghāṭiṃ paññapenti. Theropi āsanaṃ paññāpetvā padhānaṃ akāsi. Taṃ sandhāya vuttaṃ- “paññatte āsane”ti.

**Taṃ kiṃ maññasī**ti satthā “imassa bhikkhuno avasesakammaṭṭhānehi attho natthi, ayaṃ gandhabbasippe cheko ciṇṇavasī, attano visaye kathiyamānaṃ (3.0124 khippameva sallakkhessati”ti vīṇopamaṃ kathetuṃ “taṃ kiṃ maññasī”ti-ādimāha. **Vīṇāya tantissare kusalatā** nāma vīṇāya vādanakusalatā, so ca tattha kusalo. Mātāpitaro hissa “amhākaṃ putto aññaṃ sippaṃ sikkhanto kāyena kilamissati, idaṃ pana sayane nisinneneva sakkā uggaṇhitun”ti gandhabbasippameva uggaṇhāpesuṃ. Tassa-

“Satta sarā tayo gāmā, mucchanā ekavīsati;

ṭhānā ekūnapaññāsa, iccete saramaṇḍalā”ti.-

Ādikaṃ gandhabbasippaṃ sabbameva paguṇaṃ ahosi. **Accāyatāti** ati-āyatā kharamucchanā. **Saravatīti** sarasampannā. **Kammaññāti** kammakkhamā kammayoggā. **Atisithilāti** mandamucchanā. **Same guṇe patitṭhitāti** majjhime sare ṭhapetvā mucchitā.

**Accāraddhanti** atigāḷhaṃ. **Uddhaccāya saṃvattatīti** uddhatabhāvāya saṃvattati. **Atilīnanti** atisithilaṃ. **Kosajjāyāti** kusītabhāvathāya. **Vīriyasamathaṃ adhiṭṭhahāti** vīriyasampayuttaṃ samathaṃ adhiṭṭhaha, vīriyaṃ samathena yojeḥīti attho. **Indriyānañca samataṃ paṭivijjhāti** saddhādīnaṃ indriyānaṃ samataṃ samabhāvaṃ adhiṭṭhāhi. Tattha saddhaṃ paññāya, paññañca saddhāya, vīriyaṃ samādhinā, samādhinā vīriyena yojayatā indriyānaṃ samatā adhiṭṭhitā nāma hoti. Sati pana sabbatthikā, sā sadā balavatīyeva vaṭṭati. Tañca pana tesāṃ yojanāvidhānaṃ visuddhimagge (visuddhi. 1.60-62) pakāsītameva. **Tattha ca nimittaṃ gaṇhāhīti** tasmiñca samabhāve sati yena ādāse mukhabimbeneva nimittena uppajjitabbaṃ, taṃ samathanimittaṃ vipassanānimittaṃ magganimittaṃ phalanimittañca gaṇhāhi nibbatteḥīti evamassa satthā arahatte pakkhipitvā kammaṭṭhānaṃ kathesi.

**Tattha ca nimittaṃ aggaḥesīti** samathanimittañca vipassanānimittañca aggaḥesi. **Cha ṭhānānīti** cha kāraṇāni. **Adhimutto hotīti** paṭivijjhītvā paccakkhaṃ katvā ṭhito hoti. **Nekkhammādhimuttoti**-ādi sabbāṃ arahattavaseneva vuttaṃ. Arahattañhi sabbakilesehi nikkhantattā **nekkhammaṃ**, teheva pavivittattā **paviveko**, byāpajjhābhāvato **abyāpajjhaṃ**, taṇhākkhayante uppannattā (3.0125) **taṇhākkhayo**, upādānakkhayante uppannattā **upādānakkhayo**, sammohābhāvato **asammohoti** vuccati.

**Kevalaṃ saddhāmattakanti** paṭivedharahitaṃ kevalaṃ paṭivedhapaññāya asammisakaṃ saddhāmattakaṃ. **Paṭicayanti** punappunaṃ karaṇena vaḍḍhiṃ. **Vītarāgattāti** maggapaṭivedhena rāgassa vigatattāyeva nekkhammasaṅkhātāṃ arahattaṃ paṭivijjhītvā sacchikatvā ṭhito hoti, phalasaṃpattivihārena viharati, tanninamānasoyeva ca hotīti attho. Sesapadesupi eseva nayo.

**Lābhasakkārasilokanti** catupaccayaalābhañca tesaññeva sukatabhāvañca vaṇṇabhaṇaṇaṃ. **Nikāmayamānoti** icchamāno patthayamāno. **Pavivekādhimuttoti** paviveke adhimutto arahanti evaṃ arahattaṃ byākarotīti attho.

**Sīlabbataparāmāsanti** sīlañca vatañca parāmasitvā gahitaṃ gahaṇamattaṃ. **Sārato paccāgacchantoti** sārabhāvena jānanto. **Abyāpajjhādhimuttoti** abyāpajjhaṃ arahattaṃ byākaroti. Imināva nayena sabbatṭhānesu attho daṭṭhabbo. Apicettha “nekkhammādhimuttoti imasmiṃyeva arahattaṃ kathitaṃ, sesesu pañcasu nibbāna”ti eke vadanti. Apare “asammohādhimuttoti ettheva nibbānaṃ kathitaṃ, sesesu arahattaṃ”ti vadanti. Ayaṃ panettha sāro- sabbesveva tesu arahattampi nibbānampi kathitamevāti.

**Bhusāti** balavanto dibbarūpasadisā. **Nevassa cittaṃ pariyādiyantīti** etassa khīṇāsavassa cittaṃ gahetvā ṭhātuṃ na sakkonti. Kilesā hi uppajjamānā cittaṃ gaṇhanti nāma. **Amissikatanti** kilesā hi ārammaṇena saddhiṃ cittaṃ missaṃ



karonti, tesaṃ abhāvā amissīkataṃ. **Ṭhitanti** paṭiṭṭhitaṃ. **Āneñjappattanti** acala-ppattaṃ. **Vayañcassānupassatīti** tassa cesa cittassa uppādampi vayampi passati. **Bhusā vātavuṭṭhīti** balavā vātakkhandho. **Neva sampakampeyyāti** ekabhāgena cāletuṃ na sakkuṇeyya. **Na sampakampeyyāti** thūṇaṃ viya sabbabhāgato kompetuṃ na sakkuṇeyya. **Na sampavedheyyāti** vedhetvā pavedhetvā pātetuṃ na sakkuṇeyya.

**Nekkhammaṃ** (3.0126) **adhimuttassāti** arahattaṃ paṭivijjhivā ṭhitassa khīṇāsavassa. Sesapadesupi arahattameva kathitaṃ. **Upādānakkhayassa cāti** upayogathe sāmivacanaṃ. **Asammohañca cetasoti** cittassa ca asammohaṃ adhimuttassa. **Disvā āyatanuppādanti** āyatanānaṃ uppādañca vayañca disvā. **Sammā cittaṃ vimuccatīti** sammā hetunā nayena imāya vipassanāpaṭipattiyā phalasaṃpattivasena cittaṃ vimuccati, nibbānārammaṇe adhimuccati. Atha vā iminā khīṇāsavassa paṭipadā kathitā. Tassa hi āyatanuppādaṃ disvā imāya vipassanāya adhigatassa ariyamaggassānubhāvena sabbakilesehi sammā cittaṃ vimuccati. Evaṃ tassa **sammā vimuttassa ...pe ... na vijjati**. Tattha **santacittassāti** nibbutacittassa. Sesamettha uttānatthamevāti.

## 2. Phaggunasuttavaṇṇanā

**56.** Dutiye **samadhosīti** uṭṭhānākāraṃ dassesi. **Paṭikkamantīti** parihāyanti. **No abhikkamantīti** na vaḍḍhanti. **Sīsaveṭhanaṃ dadeyyāti** sīsaṃ veṭhetvā daṇḍakena samparivattakaṃ bandheyya. **Indriyāni vipasīdiṃsūti** tasmim̐ maraṇasamaye cha indriyāni vipasannāni ahesuṃ. **Atthupaparikkhāyāti** atthānatthaṃ kāraṇākāraṇaṃ upaparikkhane. **Anuttare upadhisāṅkhayeti** nibbāne. **Avimuttaṃ hotīti** arahattaphalena adhimuttaṃ hoti.

## 3. Chaḷabhijātisuttavaṇṇanā

**57.** Tatiye **chaḷabhijātiyoti** cha jātiyo. **Tatridanti** tatrāyaṃ. **Luddāti** dāruṇā. **Bhikkhū kaṇṭakavuttikāti** samaṇā nāmete. **Ekasātakāti** ekeneva pilotikakhaṇḍena purato paṭicchādanakā. **Akāmakassa bilaṃ olaggeyyunti** satthe gacchamāne goṇamhi mate gomaṃsamūlaṃ uppādanatthāya vibhajivā khādamānā ekassa gomaṃsaṃ anicchantasseva koṭṭhāsaṃ katvā “ayañca te khāditabbo, mūlañca dātabban”ti taṃ koṭṭhāsasaṅkhātāṃ bilaṃ olaggeyyuṃ, balakkārena hatthe ṭhapeyyunti attho. **Akhettaññunāti** abhijātipaññattiyā khettaṃ ajānantena. **Taṃ suṇāhīti** taṃ mama paññattim̐ suṇāhi. **Kaṇhābhijātikoti** kāḷakajātiko. **Kaṇhaṃ dhammaṃ abhijāyatīti** kaṇhasabhāvo hutvā jāyati nibbattati, kaṇhābhijātiyaṃ vā jāyati. **Nibbānaṃ** (3.0127) **abhijāyatīti** nibbānaṃ pāpuṇāti, ariyabhūmisāṅkhātāya vā nibbānajātiyā jāyati.

## 4. Āsavasuttavaṇṇanā

**58.** Catutthe **saṃvarā pahātabbā**ti saṃvarena pahātabbā. Seseupi eseva nayo. **Idhā**ti imasmim sāsane. **Paṭisaṅkhā**ti paṭisañjānitvā, paccavekkhitvāti attho. **Yonisoti** upāyena pathena. Ettha ca asaṃvare ādinavapaṭisaṅkhā yoniso paṭisaṅkhāti veditabbā. Sā cāyaṃ “varam, bhikkhave, tattāya ayosalākāya ādittāya sampajjalitāya sajotibhūtāya cakkhundriyaṃ sampalimatṭham, na tveva cakkhuvīñṇeyyesu rūpesu anubyañjanaso nimittaggāho”ti-ādinā ādittapariyāyena (saṃ. ni. 4.235) veditabbā. **Cakkhundriyasaṃvarasaṃvuto viharatī**ti ettha cakkhumeva indriyaṃ cakkhundriyaṃ, saṃvaraṇato saṃvaro, pidahanato thakanatoti vuttaṃ hoti. Satiyā etaṃ adhivacanaṃ. Cakkhundriye saṃvaro **cakkhundriyasaṃvaro**. Javane uppajjamānopi hesa tasmim dvāre kilesānaṃ uppattivāraṇato cakkhundriyasaṃvaroti vuccati. **Samvutoti** tena saṃvarena upeto. Tathā hi “pātimokkhasaṃvarasaṃvuto”-ti imassa vibhaṅge “iminā pātimokkhasaṃvarena upeto hoti ...pe... samannāgato”-ti vuttaṃ. Atha vā saṃvarīti saṃvuto, thakesi pidahīti vuttaṃ hoti. Cakkhundriyasaṃvarasaṃvutoti cakkhundriyasaṃvarasaṅkhātaṃ satikavāṭaṃ cakkhudvāre gharadvāre kavāṭaṃ viya saṃvari thakesi pidahīti vuttaṃ hoti. Ayamevettha attho sundarataro. Tathā hi “cakkhundriyasaṃvaram asaṃvutassa viharato, saṃvutassa viharato”ti etesu padesu ayamevattho dissatīti.

**Yaṃ hissāti**-ādimhi yaṃ cakkhundriyasaṃvaram assa bhikkhuno asaṃvutassa athaketvā apidahitvā viharantassāti attho. Yekārassa vā esa yanti ādeso, ye assāti attho. **Āsavā vighātapariḷāhā**ti cattāro āsavā ca añṇe ca vighātakarā kilesa-pariḷāhā vipākapariḷāhā vā. Cakkhudvārasmiñhi iṭṭhārammaṇaṃ āpāthagataṃ kāmāssādavasena assādayato abhinandato kāmāsavo uppajjati, “īdisaṃ añṇasmimpi sugatibhave labhissāmi”ti bhavapatthanāya assādayato bhavāsavo (3.0128) uppajjati, sattoti vā sattassāti vā gaṇhato diṭṭhāsavo uppajjati, sabbeheva saha-jātaṃ añṇāṇaṃ avijjāsavoti cattāro āsavā uppajjanti. Etehi sampayuttā apare kilesā vighātapariḷāhā āyatim vā tesam vipākā tehipi asaṃvutasseva viharato uppajjeyyunti vuccanti. **Evaṃsa teti** evaṃ assa te, etenupāyena na honti, no añṇathāti vuttaṃ hoti. **Paṭisaṅkhā yoniso sotindriyasaṃvarasaṃvutoti**-ādīsipi eseva nayo. **Ime vuccanti āsavā saṃvarā pahātabbā**ti imesu chasu dvāresu cattāro cattāro katvā catuvīsati āsavā saṃvarena pahātabbāti vuccanti.

**Paṭisaṅkhā yoniso cīvaranti**-ādīsu yaṃ vattabbaṃ, taṃ sabbaṃ visuddhimagge (visuddhi. 1.18) sīlakathāya vuttameva. **Yaṃ hissāti** yañhi cīvaram piṇḍapātādīsu vā añṇataram assa. **Appaṭisevatoti** evaṃ yoniso appaṭisevantassa. Imasmim vāre aladdhaṃ cīvarādim paṭthayato laddhaṃ vā assādayato kāmāsavassa uppatti veditabbā, īdisaṃ añṇasmimpi sugatibhave labhissāmīti bhavapatthanāya assādayato bhavāsavassa, ahaṃ labhāmi na labhāmīti vā mayhaṃ vā idanti attasañṇaṃ adhiṭṭhahato diṭṭhāsavassa, sabbeheva pana saha-jāto avijjāsavoti evaṃ catunnaṃ āsavānaṃ uppatti vighātapariḷāhāva navavedanuppādanatopi veditabbā. **Ime vuccanti, bhikkhave, āsavā paṭisevanā pahātabbā**ti ime ekamekasmim paccaye cattāro cattāro katvā soḷasa āsavā iminā ñāṇasaṃvarasaṅkhātena paccavekkha-ṇapaṭisevanena pahātabbāti vuccanti.

**Paṭisaṅkhā yoniso khamo hoti sītassāti** upāyena pathena paccavekkhitvā

khantā hoti sītassa, sītaṃ khamati sahati, na avīrapuriso viya appamattakenapi sītena calati kampati kammaṭṭhānaṃ vijahati. **Uṇhā**dīsupi eseva nayo. Ettha ca vacanameva **vacanapathoti** veditabbo. **Dukkhānanti**-ādīsu dukkhamanaṭṭhena dukkhā, bahalaṭṭhena tībā, pharusatṭhena kharā, tikhiṇaṭṭhena kaṭukā, assādavirahato asātā, maṇaṃ avaḍḍhanato amanāpā, pāṇaharaṇasamatthatāya pāṇaharāti veditabbā. **Yaṃ** **hissāti** sītādīsu yaṃkiñci ekadhammampi assa. **Anadhivāsato**ti anadhivāsentassa akkhamantassa (3.0129). Āsavuppatti panettha evaṃ veditabbā- sītena phuṭṭhassa uṇhaṃ patthayato kāmāsavo uppajjati, evaṃ sabbattha. “Natthi sugatibhave sītaṃ vā uṇhaṃ vā”ti bhavaṃ patthentassa bhavāsavo, mayhaṃ sītaṃ uṇhanti gāho diṭṭhāsavo, sabbeheva sampayutto avijjāsavoti. **Ime vuccantīti** ime sītādīsu ekamekassa vasena cattāro cattāro katvā aneke āsavā imāya khantisamaṃvarasaṅkhātāya adhivāsanāya pahātabbāti vuccantīti attho.

**Paṭisaṅkhā yoniso caṇḍaṃ hatthiṃ parivajjetīti** ahaṃ samaṇoti na caṇḍassa hatthissa āsanne ṭhātabbaṃ. Tatonidānañhi maraṇampi maraṇamattampi dukkhaṃ bhavyeyyāti evaṃ upāyena pathena paccavekkhitvā caṇḍaṃ hatthiṃ parivajjeti paṭikkamati. Esa nayo sabbattha. **Caṇḍanti** duṭṭhaṃ vāḷaṃ. **Khāṇunti** khadirakhāṇukādiṃ. **Kaṇṭakaṭṭhānanti** yattha kaṇṭakā vijjhanti, taṃ okāsaṃ. **Sobbhanti** sabbato chinnataṭaṃ. **Papātanti** ekato chinnataṭaṃ. **Candanikanti** ucchiṭṭhodakagabbhamalādīnaṃ chaḍḍanaṭṭhānaṃ. **Oḷigallanti** tesamaṃyeva kaddamādīnaṃ sandanokāsaṃ. Taṃ jaṇṇumattampi asucibharitaṃ hoti. Dvepi cetāni ṭhānāni amanussussadaṭṭhānāni honti, tasmā vajjetabbāni. **Anāsaneti** ettha ayuttaṃ āsanaṃ anāsaṃ, taṃ atthato aniyatavatthubhūtaṃ rahopaṭicchannāsanaṃ veditabbāṃ. **Agocareti** etthapi ayutto gocaro agocaro. So vesiyādibhedato pañcavidho. **Pāpake mitteti** lāmake dussīle mittapatirūpake amitte. **Pāpakesūti** lāmakesu. **Okappeyyunti** saddaheyyuṃ adhimucceyyuṃ “addhā ayamāyasmā

akāsi vā karissati vā”ti. **Yaṃ hissāti** hatthi-ādīsu yaṃkiñci ekampi assa. Āsavuppatti panettha evaṃ veditabbā- hatthi-ādinidānena dukkhena phutṭhassa sukhaṃ patthayato kāmāsavo uppajjati, “natthi sugatibhave īdisaṃ dukkhan”ti bhavaṃ patthentassa bhavāsavo, maṃ hatthi maddati maṃ assoti gāho diṭṭhāsavo, sabbeheva sampayutto avijjāsavoti. **Ime vuccantīti** ime hatthi-ādīsu ekekassa vasena cattāro cattāro katvā aneke āsavā iminā sīlasaṃvarasaṅkhātena parivajjanena pahātabbāti vuccanti.

**Paṭisaṅkhā yoniso uppannaṃ kāmavitakkaṃ nādhivāsetīti** “itipāyaṃ vitakko akusalo, itipi sāvajjo, itipi dukkhavipāko, so ca kho (3.0130) attabyābādhāya saṃvattati”ti-ādinā (ma. ni. 1.207-208) nayena yoniso kāmavitakke ādinavaṃ paccavekkhitvā tasmim̐ tasmim̐ ārammaṇe uppannaṃ kāmavitakkaṃ nādhivāseti, cittaṃ āropetvā na vāseti, abbhantare vā na vāsetīti attho. Anadhivāseto kiṃ karotīti? **Pajahati**. Kiṃ kacavaraṃ viya piṭakenāti? Na hi, api ca kho naṃ **vinodeti** tudati vijjhati nīharati. Kiṃ balibaddaṃ viya patodenāti? Na hi, atha kho naṃ **byantīkaroti** vigatantaṃ karoti, yathāssa antopi nāvasissati antamaso bhaṅgamattampi, tathā naṃ karoti. Kathaṃ pana naṃ tathā karotīti? **Anabhāvaṃ gameti** anu anu abhāvaṃ gameti, vikkhambhanappahānena yathā suvikkhambhito hoti, tathā karoti. Sesavitakkadvayepi eseva nayo. **Uppannuppanneti** uppanne uppanne, uppannamatteyevāti vuttaṃ hoti. Sakiṃ vā uppanne vinodetvā dutiye vāre ajjhuppekkhitā na hoti, satakkhattumpi uppanne uppanne vinodetiyeva. **Pāpake akusale dhammeti** teyeva kāmavitakkādayo, sabbepi vā nava mahāvitakke. Tattha tayo vuttā, avasesā “ñātivitakko, janapadavitakko, amarāvitakko, parānuddayatāpaṭi-saṃyutto vitakko, lābhasakkārasilokappaṭisaṃyutto vitakko, anavaññattippaṭisaṃyutto vitakko”ti (mahāni. 207) ime cha. **Yaṃ hissāti** etesu vitakkesu yaṃkiñci assa. Kāmavitakko panettha kāmāsavo eva, tabbiseso bhavāsavo, taṃsompayutto diṭṭhāsavo, sabbavitakkesu avijjā avijjāsavoti evaṃ āsavuppatti veditabbā. **Ime vuccantīti** ime kāmavitakkādivasena vuttappakārā āsavā iminā tasmim̐ tasmim̐ vitakke ādinavapaccavekkhaṇasahitena vīriyaṃvarasaṅkhātena vinodanena pahātabbāti vuccanti.

**Paṭisaṅkhā yoniso satisambojjhaṅgaṃ bhāvetīti** abhāvanāya ādinavaṃ bhāvanāya ca ānisaṃsaṃ upāyena pathena paccavekkhitvā satisambojjhaṅgaṃ bhāveti. Eseva nayo sabbattha. Bojjhaṅgānaṃ bhāvanā heṭṭhā vitthāritāva. **Yaṃ hissāti** etesu bojjhaṅgesu yaṃkiñci assa. Āsavuppattiyaṃ panettha imesaṃ ariyamaggasampayuttānaṃ bojjhaṅgānaṃ abhāvitattā ye uppajjeyyumaṃ kāmāsavādayo āsavā, bhāvayato evaṃsa te (3.0131) na hontīti ayaṃ nayo veditabbo. **Ime vuccantīti** ime kāmāsavādayo āsavā imāya lokuttarāya bojjhaṅgabhāvanāya pahātabbāti vuccanti. Imehi chahākārehi pahīnāsavaṃ bhikkhumaṃ thomento **yato kho, bhikkhaveli**-ādimāha. Tattha **yatoti** sāmivacane to-kāro, yassāti vuttaṃ hoti. Porāṇā pana yamhi kāleti vaṇṇayanti. **Ye āsavā saṃvarā pahātabbā, te saṃvarā pahīnā hontīti** ye āsavā saṃvarena pahātabbā, te saṃvareneva pahīnā honti, na appahīnesuyeva pahīnasaññi hotīti.

## 5. Dārukammikasuttavaṇṇanā

59. Pañcame **dārukammikoti** dāruvikkayena pavattitājīvo eko upāsako. **Kāsikacandananti** saṅhacandanam. **Aṅgenāti** aguṅaṅgena, sukkapakke guṅaṅgena. **Nemantanikoti** nimantanam gaṅhanako. **Saṅhe dānam dassāmīti** bhikkhusaṅghassa dassāmi. So evam vatvā sathhāram abhivādetvā pakkāmi. Athassa aparabhāge pañcasatā kulūpakā bhikkhū gihibhāvam pāpuṇṇisu. So “kulūpakabhikkhū te vibbhantā”ti vutte “kiṃ ettha mayhan”ti vatvā cittuppādavemattamattampi na akāsi. Idam sandhāya sathhā **saṅhe te dānam dadato cittaṃ pasīdissatīti** āha.

## 6. Hatthisāriputtasuttavaṇṇanā

60. Chaṭṭhe **abhidhammakathanti** abhidhammamissakam katham. **Katham opāte-**  
**tīti** tesam katham vicchinditvā attano katham katheti. **Therānam bhikkhūnanti**  
karaṇatthe sāmivacanam, therehi bhikkhūhi saddhinti attho. Yā ca therānam abhi-  
dhammakathā, tam ayampi kathetum sakkotīti attho. **Cetopariyāyanti** cittavāram.  
**Idhāti** imasmiṃ loke. **Soratasoratoti** sūrato viya sūrato, soraccasamannāgato  
viyāti attho. **Nivātanivātoti** nivāto viya nivāto, nivātavutti viyāti attho. **Upasantupasa-**  
**ntoti** upasanto viya upasanto (3.0132). **Vapakassateva sathhārāti** sathhu santikā  
apagacchati. **Saṃsaṭṭhassāti** pañcahi saṃsaggehi saṃsaṭṭhassa. **Vissaṭṭhassāti**  
vissajjitassa. **Pākatassāti** pākatindriyassa.

**Kiṭṭhādoti** kiṭṭhakhādako. **Antaradhāpeyyāti** nāseyya. **Gopasūti** gāvo ca ajikā ca.  
**Sippisambukanti** sippiyo ca sambukā ca. **Sakkharakaṭhalanti** sakkharā ca kaṭha-  
lāni ca. **Ābhidosikanti** abhiññātosam kudrūsakabhojanam. **Nacchādeyyāti** na  
rucceyya. Tattha yadetam **purisam bhuttāvinti** upayogavacanam, tam sāmī-atthe  
daṭṭhabbam. **Amum hāvuso, purisanti, āvuso, amum purisam.**

**Sabbanimittānanti** sabbesam niccanimittādīnam nimittānam. **Animittam cetosa-**  
**mādhinti** balavavipassanāsamādhim. **Cīrikasaddoti** jhallikasaddo. **Sarissati nekkha-**  
**mmassāti** pabbajjāya guṇam sarissati. **Arahatam ahosīti** bhagavato sāvakānam  
arahantānam antare eko arahā ahosi. Ayañhi thero satta vāre gihī hutvā satta  
vāre pabbaji. Kiṃ kāraṇā? Kassapasammāsambuddhakāle kiresa ekassa  
bhikkhuno gihibhāve vaṇṇam kathesi. So teneva kammena arahattassa upani-  
ssaye vijjamāneyeva satta vāre gihibhāve ca pabbajjāya ca sañcaranto sattame  
vāre pabbajitvā arahattam pāpuṇṇīti.

## 7. Majjhesuttavaṇṇanā

61. Sattame **pārāyane metteyyapañheti** pārāyanasamāgamamhi metteyyamāṇa-  
vassa pañhe. **Ubhonte veditvānāti** dve ante dve koṭṭhāse jānitvā. **Majjhe mantā na**  
**lippiatīti** mantā vuccati paññā, tāya ubho ante veditvā majjhe na lippati, vemajjhe-  
ṭṭhāne na lippati. **Sibbanimaccagāti** sibbanisaṅkhātam taṅham atīto. **Phassoti**  
phassavasena nibbattatā ayam attabhāvo. **Eko antoti** ayameko koṭṭhāso. **Phassa-**

**samudayoti** phasso samudayo assāti phassasamudayo, imasmim̐ attabhāve katakammaphassapaccayā nibbatto anāgatattabhāvo. **Dutiyo antoti** dutiyo koṭṭhāso. **Phassanirodhoti** nibbānaṃ. **Majjheti** sibbinitaṇhaṃ chetvā dvidhākaraṇaṭṭhena nibbānaṃ majjhe nāma hoti. **Taṇhā hi** (3.0133) **Nama sibatīti** taṇhā naṃ attabhāvadavayasaṅkhātaṃ phassaṅca phassasamudayaṅca sibatīti ghaṭṭeti. Kiṃ kāraṇā? Tassa tasseva bhavassa abhinibbattiyā. Yadi hi taṇhā na sibbeyya, tassa tassa bhavassa nibbatti na bhaveyya. Imasmim̐ ṭhāne koṭimajjhikūpamaṃ gaṇhanti. Dvinnañhi kaṇḍānaṃ ekato katvā majjhe suttena saṃsibbitānaṃ koṭi majjhanti vuccati. Sutte chinne ubho kaṇḍāni ubhato patanti. Evamettha kaṇḍadvayaṃ viya vuttappakārā dve antā, sibbitvā ṭhitasuttaṃ viya taṇhā, sutte chinne kaṇḍadvayassa ubhatopātanaṃ viya taṇhāya niruddhāya antadvayaṃ niruddhameva hoti. **Ettāvatāti** ettakena iminā ubho ante veditvā taṇhāya majjhe anupalittabhāvena abhiññeyyaṃ catusaccadhammaṃ abhijānāti nāma, tīraṇapariññāya ca pahānapariññāya ca parijānitabbaṃ lokiyasaccadvayaṃ parijānāti nāma. **Diṭṭheva dhammeti** imasmim̐yeva attabhāve. **Dukkhassantakaro hotīti** vaṭṭadukkhassa koṭikaro paricchedaparivaṭṭumakaro hoti nāma.

Dutiyavāre tiṇṇaṃ kaṇḍānaṃ vasena upamā veditabbā. Tiṇṇañhi kaṇḍānaṃ suttena saṃsibbitānaṃ sutte chinne tīṇi kaṇḍāni tīsu ṭhānesu patanti, evamettha kaṇḍattayaṃ viya atītānāgatapaccuppannā khandhā, suttaṃ viya taṇhā. Sā hi atītāṃ paccuppannena, paccuppannaṅca anāgatena saddhim̐ saṃsibbati. Sutte chinne kaṇḍattayassa tīsu ṭhānesu patanaṃ viya taṇhāya niruddhāya atītānāgata-paccuppannā khandhā niruddhāva honti.

Tatiyavāre **adukkhamasukhā majjheti** dvinnaṃ vedanānaṃ antaraṭṭhakabhāvena majjhe. Sukhañhi dukkhassa, dukkhaṃ vā sukkhassa antaraṃ nāma natthi. **Taṇhā sibbinīti** vedanāsu nandirāgo vedanānaṃ upacchedaṃ nivāretīti tā sibatīti nāma.

Catutthavāre **viññāṇaṃ majjhe** Ti paṭisandhiviññāṇampi sesaviññāṇampi nāmarūpapaccayasamudāgatattā nāmarūpānaṃ majjhe nāma.

Pañcamavāre **viññāṇaṃ majjhe** Ti kammaviññāṇaṃ majjhe, ajjhantikāyatanesu vā manāyatanaṃ kammaṃ gahitattā idha yaṃkiñci viññāṇaṃ majjhe nāma, manodvāre vā āvajjanassa ajjhantikāyatanaṃ nissitattā javanaviññāṇaṃ majjhe nāma.

Chaṭṭhavāre (3.0134) **sakkāyoti** tebhūmakavaṭṭaṃ. **Sakkāyasamudayoti** samudayasaccaṃ. **Sakkāyanirodhoti** nirodhasaccaṃ. **Pariyāyenāti** tena tena kāraṇeneva. Sesāṃ sabbattha vuttanayeneva veditabbaṃ.

## 8. Purisindriyāñāṣasuttavaṇṇanā

**62.** Atṭhame **aññataro** Ti devadattapakkhiko eko. **Samannāharitvāti** āvajjitvā. Idaṃ so “kiṃ nu kho bhagavatā jānitvā kathitaṃ, udāhu ajānitvā, ekaṃsikaṃ vā kathitaṃ udāhu vibhajjakathitaṃ” ti adhippāyena pucchati. **Āpāyikoti** apāye nibbatanako. **Nerayikoti** nirayagāmī. **Kappatṭhoti** kappatṭhiyakammaṃ katattā kappam̐

ṭhassati. **Atekkicchoti** na sakkā tikicchitum. **Dvejjhanti** dvidhābhāvaṃ. **Vālaggakoṭini-**  
**ttudanamattanti** vālassa aggakoṭiyā dassetabbamattakaṃ, vālaggakoṭinipātama-  
ttakaṃ vā. **Purisindriyañāṇānīti** purisapuggalānaṃ indriyaparopariyattañāṇāni,  
indriyānaṃ tikkhamudubhāvajānanañāṇānīti attho.

**Vijjamānā kusalāpi dhammā akusalāpi dhammāti** ettakā kusalā dhammā  
vijjanti, ettakā akusalā dhammāti jānāmi. **Antarahitāti** adassanaṃ gatā. **Sammukhī-**  
**bhūtāti** samudācāravasena pākaṭā jātā. **Kusalamūlanti** kusalajjhāsayo. **Kusalā**  
**kusalanti** tamhā kusalajjhāsayā aññampi kusalaṃ nibbattissati. **Sāradānīti** sārā-  
dāni gahitasārāni, saradamāse vā nibbattāni. **Sukhasayitānīti** sukhasannicitāni.  
**Sukhette** Ti maṇḍakhette. **Nikkhittānīti** vuttāni. **Sappaṭibhāgāti** sarikkhakā. **Abhido**  
**addharattanti** abhi-addharattaṃ addharatte abhimukhībhūte. **Bhatakālasamayeti**  
rājakulānaṃ bhatakālasaṅkhāte samaye. **Parihānadhammoti** ko evaṃ bhagavatā  
ñātoti? Ajātasatturājā. So hi pāpamittaṃ nissāya maggaphalehi parihīno. Aparepi  
suppabuddhasunakkhattādayo bhagavatā ñātāva. **Aparihānadhammoti** evaṃ  
bhagavatā ko ñāto? Susīmo paribbājako aññe ca evarūpā. **Parinibbāyissatīti** evaṃ  
ko ñāto bhagavatāti? Santatimahāmatto aññe ca evarūpā.

## 9. Nibbedhikasuttavaṇṇanā

**63.** Navame (3.0135) anibbiddhapubbe appadālitapubbe lobhakkhandhādayo  
nibbijjhati padāletīti **nibbedhikapariyāyo**, nibbijjhanakāraṇanti attho. **Nidānasambha-**  
**voti** kāme nideti uppādanasamatthatāya niyyādetīti nidānaṃ. Sambhavati tatoti  
sambhavo, nidānameva sambhavo **nidānasambhavo**. **Vemattatāti** nānākaraṇaṃ.  
**Kāmaguṇāti** kāmayitabbaṭṭhena kāmā, bandhanaṭṭhena guṇā

“antagūṇan”ti-ādīsu viya. **Cakkhuviññeyyā**ti cakkhuviññāṇena passitabbā. **Iṭṭhā**ti pariyiṭṭhā vā hontu mā vā, iṭṭhārammaṇabhūtāti attho. **Kantā**ti kamanīyā. **Manāpā**ti manavaḍḍhanakā. **Piyarūpā**ti piyajātikā. **Kāmūpasañhitā**ti ārammaṇaṃ katvā uppajjamānena kāmena upasañhitā. **Rajanīyā**ti rāgupattikāraṇabhūtā. **Nete kāmā**ti na ete kamaṇṭṭhena kāmā nāma honti. **Saṅkapparāgo**ti saṅkappavasena uppannarāgo. **Kāmoti** ayaṃ kāmappahānāya paṭipannehi pahātabbo. Kamanaṭṭhena kāmā nāma. **Citrānī**ti citravicitrārammaṇāni.

**Phassoti** sahaḍḍaphasso. **Kāmamayamānoti** kāmam kāmamayamāno. **Tajjam tajjanti** tajjātikam tajjātikam. **Puññabhāgiyanti** dibbe kāme patthetvā sucaritapāripūriyā devaloke nibbattassa attabhāvo puññabhāgiyo nāma, duccharitapāripūriyā apāye nibbattassa attabhāvo apuññabhāgiyo nāma. **Ayam vuccati, bhikkhave, kāmānaṃ vipākoti** ayam duvidhopi kāmapatthanaṃ nissāya uppannattā kāmānaṃ vipākoti vuccati. **So imaṃ nibbedhikanti** so bhikkhu imaṃ chattiṃsaṭṭhānesu nibbijjhanakam seṭṭhacariyam jānāti. **Kāmanirodhanti** kāmānaṃ nirodhane evaṃ laddhanāmaṃ. Imasmiñhi ṭhāne brahmacariyasaṅkhāto maggo vā kāmānirodhoti vutto.

**Sāmisā**ti kilesāmisasampayuttā. Iminā nayena sabbaṭṭhānesu attho veditabbo. Apicettha **vohāravepakkanti** vohāravipākam. Kathāsaṅkhāto hi vohāro saññāya vipāko nāma. **Yathā yathā nanti** ettha **naṃ**-iti nipātamattameva. Iti yasmā yathā yathā sañjānāti, tathā (3.0136) tathā evaṃsaññī ahoṣinti katheti, tasmā vohāravepakkāti attho.

**Avijjā**ti aṭṭhasu ṭhānesu aññāṇabhūtā bahala-avijjā. Nirayam gamentīti **nirayagamaniyā**, niraye nibbattipaccayāti attho. Sesesupi eseva nayo. **Cetanāhanti** cetanaṃ ahaṃ. Idha sabbasaṅgāhikā saṃvidahanacetanā gahitā. **Cetayitvā**ti dvārappavattacetanā. **Manasā**ti cetanāsampayuttacittena. **Nirayavedaniyanti** niraye vipākadāyakaṃ. Sesesupi eseva nayo. **Adhimattanti** balavadukkham. **Dandhavirāgī**ti garukaṃ na khippam saṅkamaṃ vigacchanakadukkham. **Urattāḷiṃ kandatī**ti uram tāḷetvā rodati. **Pariyeṭṭhinti** pariyesanaṃ. **Ekapadam dvipadanti** ekapadamantaṃ vā dvipadamantaṃ vā, ko mantaṃ jānātīti attho. **Sammohavepakkanti** sammohavipākam. Dukkhasa hi sammoho nissandavipāko nāma. Duttiyapadehi eseva nayo. Pariyesanāpi hi tassa nissandavipākoti. Imasmiṃ sutte vaṭṭa-vivaṭṭam kathitaṃ.

## 10. Sihanādasuttavaṇṇanā

**64.** Dasame **āsabham ṭhānanti** seṭṭham niccalaṭṭhānaṃ. **Sihanādanti** abhītanādam pamukhanādam. **Brahmacakkanti** seṭṭhaññācakkam paṭivedhaññāñceva desanāññāñca. **Ṭhānañca ṭhānatoti** kāraṇaṃ kāraṇato. **Yampī**ti yena ñāṇena. **Idampi tathāgatassā**ti idampi ṭhānāṭṭhānaññam tathāgatassa tathāgatabalam nāma hoti. Evaṃ sabbapadesu attho veditabbo. **Kammasamādānānanti** samādiyitvā katānaṃ kusalākusalakammānaṃ, kammameva vā kammasamādānaṃ. **Ṭhānaso hetusoti** paccayato ceva hetuto ca. Tattha gati-upadhikālapayogā vipākassa ṭhānaṃ, kammaṃ hetu. **Jhānavimokkhasamādhisamāpattīnanti**



catunnaṃ jhānānaṃ aṭṭhannaṃ vimokkhānaṃ tiṇṇaṃ samādhinaṃ navannaṃ anupubbasaṃpattinañca. **Samkilesanti** hānabhāgiyaṃ dhammaṃ. **Vodānanti** visesabhāgiyaṃ dhammaṃ. **Vuṭṭhānanti** “vodānampi vuṭṭhānaṃ, tamhā tamhā samādhimhā vuṭṭhānampi vuṭṭhānan”ti (vibha. 828) evaṃ vuttaṃ paguṇajjhānañceva bhavaṅganaphalasaṃpattiyo ca. Heṭṭhimaṃ heṭṭhimañhi paguṇajjhānaṃ uparimassa uparimassa padaṭṭhānaṃ hoti, tasmā “vodānampi vuṭṭhānan”ti vuttaṃ. Bhavaṅgena pana (3.0137) sabbajjhānehi vuṭṭhānaṃ hoti, phalasaṃpattiyā nirodhasaṃpattito vuṭṭhānaṃ hoti. Taṃ sandhāya “tamhā tamhā samādhimhā vuṭṭhānampi vuṭṭhānan”ti vuttaṃ. **Anekavihitanti**-ādīni visuddhimagge (visuddhi. 2.402) vaṇṇitāni. Āsavakkhayañāṇaṃ heṭṭhā vuttatthameva. Purimassāpi ñāṇattayassa vitthārakathaṃ icchantena majjhimaṭṭhakathāya mahāsīhanādavaṇṇanā (ma. ni. aṭṭha. 1.146 ādayo) oloketabbā. **Samāhitassāti** ekaggacittassa. **Samādhi maggoti** samādhi etesaṃ ñāṇānaṃ adhigamāya upāyo. **Asamādhi**Ti anekaggabhāvo. **Kummaggoti** micchāmaggo. Imasmiṃ sutte tathāgatassa ñāṇabalaṃ kathitanti.

Mahāvaggo chaṭṭho.

## 7. Devatāvaggo

### 1-3. Anāgāmi phalasaṃpattivaṇṇanā

**65-67.** Sattamaṃsa paṭhame **assaddhiyanti** assaddhabhāvaṃ. **Duppaññatanti** nippaññabhāvaṃ. Dutiye **pamādanti** sativippavāsaṃ. Tatiye **ābhisamācārikanti** uttamasamācārabhūtaṃ vattavasena paṇṇattisīlaṃ. **Sekhadhammanti** sekhapañṇattisīlaṃ. **Silānīti** cattāri mahāsīlāni.

### 4. Saṅgaṇikārāmasuttavaṇṇanā

**68.** Catutthe **saṅgaṇikārāmoti** gaṇasaṅgaṇikārāmo. Suttantikagaṇādīsu pana gaṇesu attano vā parisāsaṅkhāte gaṇe ramatīti **gaṇārāmo**. **Paviveketi** kāyaviveke. **Cittassa nimittanti** samādhivipassanācittassa nimittaṃ samādhivipassanākāraṃ. **Sammādiṭṭhanti** vipassanāsammādiṭṭhiṃ. **Samādhinti** maggasamādhīñceva phalasaṃpattiñca. **Samyojanānīti** dasa samyojanāni. **Nibbānanti** apaccayaparini-bbānaṃ.

### 5. Devatāsuttavaṇṇanā

**69.** Pañcame **sovacassatāti** subbacabhāvo. **Kalyāṇamittatāti** sucimittatā. **Satthugāravoti** satthari gāravayutto. Esa nayo sabbattha.

## 6. Samādhisuttavaṇṇanā

70. Chaṭṭhe (3.0138) na santenāti paccanīkakilesehi avūpasantena. Na paṇītenāti na atappakena. Na paṭippassaddhiladdhenāti kilesappaṭippassaddhiyā aladdhena appattena. Na ekodibhāvādhigatenāti na ekaggabhāvaṃ upagatena.

## 7. Sakkhibhabbasuttavaṇṇanā

71. Sattame tatra tatrāti tasmim̐ tasmim̐ visese. Sakkhibhabbatanti paccakkhabhāvaṃ. Āyataneti kāraṇe. Hānabhāgiyādayo visuddhimagge (visuddhi. 1.39) saṃvaṇṇitā. Asakkaccakārīti na sukatakārī, na ādarakārī. Asappāyakārīti na sappāyakārī, na upakārabhūtaḍḍhammakārī.

## 8. Balasuttavaṇṇanā

72. Aṭṭhame balatanti balabhāvaṃ thāmabhāvaṃ. Asātaccakārīti na satatakārī. Sesam̐ heṭṭhā vuttanayameva.

## 9-10. Tajjhānasuttadvayaṇṇanā

73-74. Navame na yathābhūtaṃ sammappaññāya sudiṭṭho hotīti vatthukāmakilesakāmesu ādīnavo na yathāsabhāvato jhānapaññāya sudiṭṭho hoti. Dasamaṃ uttānatthamevāti.

Devatāvaggo sattamo.

## 8. Arahattavaggo

### 1. Dukkhasuttavaṇṇanā

75. Aṭṭhamassa paṭhame savighātanti sa-upaghātaṃ sopaddavaṃ. Sapariḷāhanti kāyikacetāsikena pariḷāhena sapariḷāhaṃ. Pāṭikañkhāti icchitabbā avassaṃbhāvinī.

### 2. Arahattasuttavaṇṇanā

76. Dutiye (3.0139) mānanti jāti-ādīhi maññanaṃ. Omānanti hīnohamasmīti mānaṃ. Atimānanti atikkamitvā pavattaṃ accuṇṇatimānaṃ. Adhimānanti adhigatamānaṃ. Thambhanti kodhamānehi thaddhabhāvaṃ. Atinipātanti hīnassa hīnohamasmīti mānaṃ.

### 3. Uttarimanussadhammasuttavaṇṇanā

77. Tatiye **uttarimanussadhammā**ti manussadhammato uttari. **Alamariyañāṇada-**  
**ssanavisesanti** ariyabhāvaṃ kātuṃ samatthaṃ ñāṇadassanavisesaṃ, cattāro  
magge cattāri ca phalānīti attho. **Kuhananti** tividhaṃ kuhanavatthūṃ. **Lapananti**  
lābhatthikatāya ukkhipitvā avakkhipitvā vā lapaṇaṃ.

### 4. Sukhasomanassasuttavaṇṇanā

78. Catutthe **yoni cassa āradhā hotīti** kāraṇaṅcassa paripuṇṇaṃ paggahitaṃ  
hoti. **Dhammārāmo**Ti dhamme ratiṃ vindati. Bhāvanāya ramati, bhāvento vā rama-  
tīti **bhāvanārāmo**. Pahāne ramati, pajahanto vā ramatīti **pahānārāmo**. Tividhe  
paviveke ramatīti **pavivekārāmo**. Abyāpajjhe niddukkhabhāve ramatīti **abyāpajjhā-**  
**rāmo**. Nippapañcasaṅkhāte nibbāne ramatīti **nippapañcārāmo**.

### 5. Adhigamasuttavaṇṇanā

79. Pañcame **na āyakusaloti** na āgamanakusalo. **Na apāyakusaloti** na apagama-  
nakusalo. **Chandanti** kattukamyatāchandaṃ. **Na ārakkhatīti** na rakkhati.

### 6. Mahantattasuttavaṇṇanā

80. Chaṭṭhe **ālokabahuloti** ñāṇālokabahulo. **Yogabahuloti** yoge bahulaṃ karoti.  
**Vedabahuloti** pītipāmojjabahulo. **Asantutṭhibahuloti** kusaladhammesu asantutṭho.  
**Anikkhittadhuroti** aṭṭhapitadhuro paggahitavīriyo. **Uttari ca patāretīti** sampati ca  
uttariṅca vīriyaṃ karoteva. Sattamaṃ uttānameva.

### 8-10. Dutiyanirayasuttādivaṇṇanā

82-84. Aṭṭhame (3.0140) **pagabbhoti** kāyapāgabbhiyādīhi samannāgato.  
Navamaṃ uttānatthameva. Dasame **vighātavāti** mahicchataṃ nissāya uppanna  
lobhadukkheṇa dukkhito. Sesamaṃ sabbattha uttānamevāti.

Arahattavaggo aṭṭhamo.

### 9. Sītivaggo

#### 1. Sītibhāvasuttavaṇṇanā

85. Navamassa paṭhame **sītibhāvanti** sītalabhāvaṃ. **Yasmiṃ samaye cittaṃ niggaṇhitabbanti**-ādīsu uddhaccasamaye cittaṃ samādhinā niggahetabbaṃ nāma, kosajjānupatitakāle vīriyena paggaḥetabbaṃ nāma, nirassādagatakāle samādhinā sampahaṃsitabbaṃ nāma, samappavattakāle bojjaṅgupekkhāya ajjhupekkhitabbaṃ nāma.

## 2. Āvaraṇasuttavaṇṇanā

86. Dutiye **kammāvaraṇatāyā**ti pañcānantariyakammehi. **Kilesāvaraṇatāyā**ti niyatamicchādiṭṭhiyā. **Vipākāvaraṇatāyā**ti akusalavipākapaṭisandhiyā vā kusalavipākehi ahetukapaṭisandhiyā vāti.

### 4-5. Sussūsatisuttādivaṇṇanā

88-89. Catutthe **anattanti** avaḍḍhiṃ. **Atthaṃ riñcatī**ti vaḍḍhi-atthaṃ chaḍḍeti. **Ananulomikāyā**ti sāsanaassa ananulomikāya. Pañcame **diṭṭhisampadanti** sotāpattimaggam.

### 8-11. Abhabbatthānasuttacattukkaṇṇanā

92-95. Atthame **anāgamanīyaṃ vatthunti** anupagantabbaṃ kāraṇam, pañcannaṃ verānaṃ dvāsaṭṭhiyā ca diṭṭhigatānametaṃ adhivacanaṃ. **Atthamaṃ bhavanti** kāmāvacaṇe atthamaṃ paṭisandhiṃ. Navame **kotūhalamaṅgalenā**ti diṭṭhasutamutamaṅgalena (3.0141). Dasame **sayamkatanti**-ādīni attadiṭṭhivasena vuttāni. **Adhiccasaṃmuppananti** ahetunibbattaṃ. Sesam sabbattha uttānamevāti.

Sītivaggo navamo.

## 10. Ānisaṃsavaggo

### 1-2. Pātubhāvasuttādivaṇṇanā

96-97. Dasamassa paṭhame **ariyāyataneti** majjhimadese. **Indriyānanti** manacchaṭṭhānaṃ. Dutiye **saddhammaniyatoti** sāsanasaddhamme niyato. **Asādhāraṇenā**ti puthujjanehi asādhāraṇena.

### 7. Anavatthitasuttavaṇṇanā

102. Sattame **anodhiṃ karitvā**ti “ettakāva saṅkhārā aniccā, na ito pare”ti evaṃ sīmaṃ mariyādaṃ akatvā. **Anavatthitā**ti avatthitāya rahitā, bhijjamānāva hutvā upaṭṭhahissantīti attho. **Sabbaloketi** sakale tedhātuke. **Sāmaññenā**ti samaṇabhāvena, ariyamaggenāti attho.

### 8. Ukkhittāsikasuttavaṇṇanā

103. Aṭṭhame **mettāvatāyā**ti mettāyuttāya pāricariyāya. Satta hi sekhā tathā-gataṃ mettāvatāya paricaranti, khīṇāsavo pariciṇṇasatthuko.

## 9. Atammayasuttavaṇṇanā

104. Navame **atammayoti** tammayā vuccanti taṇhādiṭṭhiyo, tāhi rahito. **Ahaṃkā-****rā**ti ahaṃkāradiṭṭhi. **Mamaṃkā**rāti mamaṃkārataṇhā. Sesam sabbattha uttānamevāti.

Ānisaṃsavaggo dasamo.

Dutiyapaṇṇāsakaṃ niṭṭhitaṃ.

## 11. Tikavaggo

### 1. Rāgasuttavaṇṇanā

107. Ekādasamassa (3.0142) paṭhame **asubhā**ti asubhakammaṭṭhānaṃ. **Mettā**ti mettākammaṭṭhānaṃ. **Paññā**ti sahavipassanā maggapaññā.

### 6. Assādasuttavaṇṇanā

112. Chaṭṭhe **assādadiṭṭhī**ti sassatadiṭṭhi. **Attānudiṭṭhī**ti attānaṃ anugatā vīsativa-tthukā sakkāyadiṭṭhi. **Micchādiṭṭhī**ti dvāsaṭṭhividhāpi diṭṭhi. **Sammādiṭṭhī**ti maggasammādiṭṭhi, natthi dinnanti-ādikā vā micchādiṭṭhi, kammassakataññaṃ sammādiṭṭhi.

### 7. Aratisuttavaṇṇanā

113. Sattame **adhammacariyā**ti dasa akusalakammaṭṭhā.

### 10. Uddhaccasuttavaṇṇanā

116. Dasame **asaṃvaroti** anadhivāsakabhāvo. Sesam sabbattha uttānamevāti.

Tikavaggo ekādasamo.

### 12. Sāmaññavaggavaṇṇanā

**119-121.** Ito paresu **tapussoti** dvevācikipāsako. **Tathāgate niṭṭhaṅgatoti** buddha-guṇesu patiṭṭhitacitto pahīnakaṅkho. Amataṃ addasāti **amataddaso**. **Ariyenāti** niddosena lokuttarasīlena. **Ñānenāti** paccavekkhaṇañāṇena. **Vimuttiyāti** sekha-phalavimuttiyā (3.0143). **Tavakaṇṇiko** Ti evaṃnāmako gahapati. Tapakaṇṇikotipi pāḷi.

## 24. Rāgapeyyālavaṇṇanā

**140. Rāgassāti** pañcakāmaguṇikarāgassa. Sesamaṃ sabbattha uttānatthamevāti.

Manorathapūraṇiyā aṅguttaranikāya-aṭṭhakathāya

Chakkanipātassa saṃvaṇṇanā niṭṭhitā.

Namo tassa bhagavato arahato sammāsambuddhassa

## Aṅguttaranikāye

### Sattakanipāta-aṭṭhakathā

#### Paṇṇāsakaṃ

#### 1. Dhanavaggo

#### 1-5. Paṭhamapiyasuttādivaṇṇanā

**1-5.** Sattakanipātassa (3.0145) paṭhame **anavaññattikāmo** Ti abhiññātabhāva-kāmo. Tatiye **yoniso vicine dhammanti** upāyena catusaccadhammaṃ vicināti. **Paññāyatthaṃ vipassatī** sahavipassanāya maggapaññāya saccadhammaṃ vipassati. **Pajjotassevāti** dīpasseva. **Vimokkho hoti cetasoti** tassa imehi balehi samannāgatassa khīṇāsavassa dīpanibbānaṃ viya carimakacittassa vatthārammaṇehi vimokkho hoti, gataṭṭhānaṃ na paññāyati. Catutthe **saddho hotī** ti-ādīni pañcakani-pāte vaṇṇitāneva. Pañcame **dhanānī** ti adāliddiyakaraṇaṭṭhena dhanāni.

## 7. Uggasuttavaṇṇanā

7. Sattame **uggo rājamahāmatto**ti pasenadikosalassa mahā-amacco. **Upasaṅka-**  
**mīti** bhuttapātarāso upasaṅkami. **Aḍḍho**ti nidhānagatena dhanena aḍḍho. **Migāro**  
**rohaṇeyyoti** rohaṇasetṭhino nattāraṃ migāraseṭṭhiṃ sandhāyevamāha. **Mahaddha-**  
**noti** vaḷañjanadhanena mahaddhano. **Mahābhogoti** upabhogaparibhogabha-  
ṇḍassa mahantatāya mahābhogo. **Hiraññassā**ti suvaṇṇasseva. Suvaṇṇāmeva  
hissa koṭisaṅkhyam ahoṣi. **Rūpiyassā**ti sesassa taṭṭakasāraka-attharaṇapāvuraṇā-  
dino paribhogaparikkhārassa pamāṇasaṅkhāne vādoyeva natthi.

## 8. Saṃyojanasuttavaṇṇanā

8. Aṭṭhame (3.0146) **anunayasamyojananti** kāmarāgasamyojanaṃ. Sabbāneva  
cetāni bandhanaṭṭhena saṃyojanānīti veditabbāni. Imasmim sutte vaṭṭameva  
kathitaṃ. Sesam sabbattha uttānatthamevāti.

Dhanavaggo paṭhamo.

## 2. Anusayavaggo

## 3. Kulasuttavaṇṇanā

13. Dutiyaṃ tatiye **nālanti** na yuttaṃ nānucchavikaṃ. **Na manāpenāti** na  
manamhi appanakena ākārena nisinnāsanato paccuṭṭhenti, anādarameva  
dassenti. **Santamassa pariguhantī**ti vijjāmānampi deyyadhammaṃ etassa nigu-  
hanti paṭicchādenti. **Asakkaccaṃ denti no sakkaccanti** lūkhaṃ vā hotu paṇītaṃ vā,  
asahatthā acittikārena denti, no cittikārena.

## 4. Puggalasuttavaṇṇanā

14. Catutthe **ubhatobhāgavimutto**ti dvīhi bhāgehi vimutto, arūpasamāpattiyā  
rūpakāyato vimutto, maggena nāmakāyato. So catunnaṃ arūpasamāpattinaṃ eke-  
kato vuṭṭhāya saṅkhāre sammāsivā arahattaṃ pattānaṃ catunnaṃ, nirodhā  
vuṭṭhāya arahattaṃ patta-anāgāmino ca vasena pañcavidho hoti. Pāḷi panettha  
“katamo ca puggalo ubhatobhāgavimutto? Idhekacco puggalo aṭṭha vimokkhe  
kāyena phusivā viharati, paññāya cassa disvā āsavā parikkhīṇā hontī”ti (pu. pa.  
208) evaṃ aṭṭhavimokkhalābhino vasena āgatā.

Paññāya vimuttoti **paññāvimutto**. So sukkhavipassako, catūhi jhānehi vuṭṭhāya  
arahattaṃ pattā cattāro cāti imesaṃ vasena pañcavidho hoti. Pāḷi panettha aṭṭha-  
vimokkhapaṭikkhepavaseneva āgatā. Yathāha- “na heva kho aṭṭha vimokkhe



kāyena phusitvā viharati, paññāya (3.0147) cassa disvā āsavā parikkhīṇā honti. Ayaṃ vuccati puggalo paññāvimutto”ti.

Phuṭṭhantaṃ sacchikatoti **kāyasakkhī**. So jhānaphassaṃ paṭhamaṃ phusati, pacchā nirodhaṃ nibbānaṃ sacchikaroti. So sotāpattiphalatṭhaṃ ādiṃ katvā yāva arahattamaggaṭṭhā chabbidho hoti. Tenāha- “idhekacco puggalo aṭṭha vimokkhe kāyena phusitvā viharati, paññāya cassa disvā ekacce āsavā parikkhīṇā honti. Ayaṃ vuccati puggalo kāyasakkhī”ti (pu. pa. 208).

Diṭṭhantaṃ pattoti **diṭṭhippatto**. Tatridaṃ saṅkhepalakkhaṇaṃ- dukkhā saṅkhārā, sukho nirodhoti ñātaṃ hoti diṭṭhaṃ viditaṃ sacchikataṃ phusitaṃ paññāyāti diṭṭhippatto. Vitthārato pana sopi kāyasakkhī viya chabbidho hoti. Tenevāha- “idhekacco puggalo ‘idaṃ dukkhan’ti yathābhūtaṃ pajānāti ...pe... ‘ayaṃ dukkhanirodhagāminī paṭipadā’ti yathābhūtaṃ pajānāti, tathāgatappaveditā cassa dhammā paññāya vodiṭṭhā honti vocaritā paññāya ...pe... ayaṃ vuccati puggalo diṭṭhippatto”ti.

Saddhāya vimuttoti **saddhāvimutto**. Sopi vuttanayeneva chabbidho hoti. Tenāha- “idhekacco puggalo

‘idaṃ dukkhan’ti yathābhūtaṃ pajānāti ...pe... ‘ayaṃ dukkhanirodhagāminī paṭipadā’ti yathābhūtaṃ pajānāti, tathāgatappaveditā cassa dhammā paññāya vodiṭṭhā honti vocaritā paññāya ...pe... no ca kho yathādiṭṭhippattassa. Ayaṃ vuccati puggalo saddhāvimutto”ti. Etassa hi saddhāvimuttassa pubbabhāgamagga-kkhaṇe saddahantassa viya okappentassa viya adhimuccantassa viya ca kilesa-kkhayo hoti, diṭṭhippattassa pubbabhāgamaggakkhaṇe kilesacchedakaññaṃ adandhaṃ tikhiṇaṃ sūraṃ hutvā vahati. Tasmā yathā nāma nātītikhiṇena asinā kadaliṃ chindantassa chinnaṭṭhānaṃ maṭṭhaṃ na hoti, asi sīghaṃ na vahati, saddo suyyati, balavatāro vāyāmo kātābbo hoti, evarūpā saddhāvimuttassa pubbabhāgamaggabhāvanā. Yathā pana sunisitena asinā kadaliṃ chindantassa chinnaṭṭhānaṃ maṭṭhaṃ hoti, asi sīghaṃ vahati, saddo na suyyati, balavavāyāmakiccaṃ (3.0148) na hoti, evarūpā paññāvimuttassa pubbabhāgamaggabhāvanā veditabbā.

Dhammaṃ anussaratīti **dhammānusārī**. Dhammoti paññā, paññāpubbaṅgamaṃ maggaṃ bhāvetīti attho. **Saddhānusārī**hipi eseva nayo. Ubhohete sotāpattimaggaṭṭhāyeva. Vuttampi cetāṃ- “yassa puggalassa sotāpattiphālasacchikiriyāya paṭipannassa paññindriyaṃ adhimattaṃ hoti, paññāvāhiṃ paññāpubbaṅgamaṃ ariyamaggaṃ bhāveti. Ayaṃ vuccati puggalo dhammānusārī. Yassa puggalassa sotāpattiphālasacchikiriyāya paṭipannassa saddhindriyaṃ adhimattaṃ hoti, saddhāvāhiṃ saddhāpubbaṅgamaṃ ariyamaggaṃ bhāveti. Ayaṃ vuccati puggalo saddhānusārī”ti (pu. pa. 208). Ayamettha saṅkhepo, vitthārato panesā ubhatobhāgavimuttādīkathā visuddhimagge (visuddhi. 2.771, 889) paññābhāvanā-dhikāre vuttā. Tasmā tattha vuttanayeneva veditabbāti.

## 5. Udakūpamāsuttavaṇṇanā

**15.** Pañcame **udakūpamā**ti nimujjanādi-ākāraṃ gahetvā udakena upamitā. **Sakiṃ nimuggoti** ekavārameva nimuggo. **Ekantakāḷakehī**ti niyatamicchādiṭṭhiṃ sandhāya vuttaṃ. **Ummujjatī**ti utṭhahati. **Sādhū**ti sobhanā bhaddakā. **Hāyatiyevā**ti caṅkavāre āsitta-udakaṃ viya parihāyateva. **Ummujjitvā vipassati viloketī**ti utṭahitvā gantabbadisāṃ vipassati viloketi. **Pataratī**ti gantabbadisābhimukho tarati nāma. **Paṭigādhappatto hotī**ti utṭhāya viloketvā patarivā ekasmiṃ ṭhāne patiṭṭhāpatto nāma hoti, tiṭṭhati na punāgacchati. **Tiṇṇo pāraṅgato thale tiṭṭhatī**ti sabbakilesogaṃ taritvā paratīraṃ gantvā nibbānathale patiṭṭhito nāma hoti. Imasmiṃ sutte vaṭṭavivaṭṭaṃ kathitaṃ.

## 6. Aniccānupassīsuttavaṇṇanā

**16.** Chaṭṭhe aniccāti evaṃ paññāya pharanto anupassatīti **aniccānupassī**. Aniccāti evaṃ saññā assāti **aniccasaññī**. Aniccāti evaṃ ñāṇena paṭisaṃveditā assāti **aniccapaṭisaṃvedī**. **Satatanti** sabbakālaṃ. **Samitanti** yathā (3.0149) purimacittena pacchimacittaṃ samitaṃ samupagataṃ ghaṭṭitaṃ hoti, evaṃ. **Abbokiṇṇanti** nira-

ntaraṃ añña cetasā asaṃmissaṃ. **Cetasā adhimuccamānoti** cittaena sannitthāpayamāno. **Paññāya pariyogāhamāno** Ti vipassanāññaena anupavisamāno.

**Apubbaṃ acarimanti** apure apacchā ekakkhaṇeyeva. Idha samasīsī kathito. So catubbidho hoti rogasamasīsī, vedanāsamasīsī, iriyāpathasamasīsī, jīvitasamasīsī. Tattha yassa aññatarena rogena phuṭṭhassa sato rogavūpasamo ca āsavakkhayo ca ekappahāreneva hoti, ayaṃ **rogasamasīsī** nāma. Yassa pana aññataraṃ vedanaṃ vedayato vedanāvūpasamo ca āsavakkhayo ca ekappahāreneva hoti, ayaṃ **vedanāsamasīsī** nāma. Yassa pana ṭhānādīsu iriyāpathesu aññatarasamaṅgino vipassantassa iriyāpathassa pariyosānañca āsavakkhayo ca ekappahāreneva hoti, ayaṃ **iriyāpathasamasīsī** nāma. Yassa pana upakkamato vā sarasato vā jīvitapariyādānañca āsavakkhayo ca ekappahāreneva hoti, ayaṃ **jīvitasamasīsī** nāma. Ayamidha adhippeto. Tattha kiñcāpi āsavapariyādānaṃ maggacittena, jīvitapariyādānaṃ cuticittena hotīti ubhinnaṃ ekakkhaṇe sambhavo nāma natthi. Yasmā panassa āsavesu khīṇamattesu paccavekkhaṇavārānantarameva jīvitapariyādānaṃ gacchati, antaraṃ na paññāyati, tasmā evaṃ vuttaṃ.

**Antarāparinibbāyīti** yo pañcasu suddhāvāsesu yattha katthaci uppanno nibbatta-kkhaṇe vā thokaṃ atikkamitvā vā vemajjhe ṭhatvā vā arahattaṃ pāpuṇāti, tassetam nāmaṃ. **Upahaccaparinibbāyīti** yo tattheva āyuvemajjhaṃ atikkamitvā arahattaṃ pāpuṇāti. **Asaṅkhāraparinibbāyīti** yo tesameva puggalānaṃ asaṅkhāreneva appayogena kilese khepeti. **Sasaṅkhāraparinibbāyīti** yo sasaṅkhārena sappayogena kilese khepeti. **Uddhamso akaniṭṭhagāmīti** yo heṭṭhā catūsu suddhāvāsesu yattha katthaci nibbattitvā tato cuto anupubbena akaniṭṭhe upajjitvā arahattaṃ pāpuṇāti.

## 7-9. Dukkhānupassīsuttādivaṇṇā

**17-19.** Sattame (3.0150) **dukkhānupassīti** piḷanākāraṃ dukkhato anupassanto. Aṭṭhame **anattānupassīti** avasavattanākāraṃ anattāti anupassanto. Navame **sukhānupassīti** sukhamti evaṃ ññaena anupassanto.

## 10. Niddasavatthusuttavaṇṇā

**20.** Dasame **niddasavatthūnīti** niddasādivatthūni, “niddaso bhikkhu, nibbīso, nittiṃso, niccattālīso, nippaññāso”ti evaṃ vacanakāraṇāni. Ayaṃ kira pañho titthiyasamaye uppanno. Titthiyā hi dasavassakāle mataṃ nigaṇṭhaṃ niddasoti vadanti. So kira puna dasavasso na hoti. Na kevalaṅca dasavasso, navavassopi ekavassopi na hoti. Eteneva nayena vīsativassādikālepi mataṃ nigaṇṭhaṃ “nibbīso nittiṃso niccattālīso nippaññāso”ti vadanti. Āyasmā ānando gāme vicaranto taṃ kathaṃ sutvā vihāraṃ gantvā bhagavato ārocesi. Bhagavā āha- “na idaṃ, ānanda, titthiyānaṃ adhivacanaṃ, mama sāsane khīṇāsavassetam adhivacanaṃ. Khīṇāsavo hi dasavassakāle parinibbuto puna dasavasso na hoti. Na kevalaṅca dasavassova, navavassopi ...pe... ekavassopi. Na kevalaṅca ekava-

ssova, ekādasamāsikopi ...pe... ekamāsikopi ekamuhuttikopi na hotiyeva”. Kasmā? Puna paṭisandhiyā abhāvā. Nibbīsādīsupi eseva nayo. Iti bhagavā “mama sāsane khīṇāsavassetam adhivacanan”ti vatvā yehi kāraṇehi niddaso hoti, tāni dassetuṃ imaṃ desanaṃ ārabhi.

Tattha **idhāti** imasmim sāsane. **Sikkhāsamādāne tibbacchando hotīti** sikkhāttayapūraṇe balavacchando hoti. **Āyatiñca sikkhāsamādāne avigatapemoti** anāgate punadivasādīsupi sikkhāpūraṇe avigatapemeneva samannāgato hoti. **Dhammanisantiyāti** dhammanisāmanāya. Vipassanāyetaṃ adhivacanaṃ. **icchāvinayeti** taṇhāvinaye. **Paṭisallāneti** ekibhāve. **Vīriyārambheti** kāyikacetāsikassa vīriyassa (3.0 pūraṇe. **Satinepakketi** satiyañceva nipakabhāve. **Diṭṭhipaṭivedheti** maggadassane. Sesam sabbattha uttānamevāti.

Anusayavaggo dutiyo.

### 3. Vajjisattakavaggo

#### 1. Sārandadasuttavaṇṇanā

**21.** Tatiyassa paṭhame **sārandade cetiyeti** evaṃnāmake vihāre. Anuppanne kira tathāgate tattha sārandadassa yakkhassa nivāsanaṭṭhānaṃ cetiyaṃ ahosi, athettha bhagavato vihāraṃ kāresuṃ. So sārandadacetiyaṃtveva saṅkhaṃ gato. **Yāvakiṇācāti** yattakaṃ kālaṃ. **Abhiṇhaṃ sannipātā** Ti divasassa tikkhattuṃ sannipatantāpi antarantarā sannipatantāpi abhiṇhaṃ sannipātāva. **Sannipātabahulāti** “hiyyopi purimadivasampi sannipatamha, puna ajja kimatthaṃ sannipatāmā”ti vosānāmanāpajjanena sannipātabahulā. **Vuddhiyeva licchavī vajjīnaṃ pāṭikaṅkhā no parihānīti** abhiṇhaṃ asannipatantā hi disāsu āgataṃ sāsanaṃ na suṇanti, tato “asukagāmasimā vā nigamasimā vā ākulā, asukaṭṭhāne corā pariyuṭṭhitā”ti na jānanti. Corāpi “pamattā rājāno”ti ñatvā gāmanigamādīni paharantā janapadaṃ nāsenti. Evaṃ rājūnaṃ parihāni hoti. Abhiṇhaṃ sannipatantā pana taṃ pavattiṃ suṇanti, tato balaṃ pesetvā amittamaddanaṃ karonti. Corāpi “appamattā rājāno, na sakkā amhehi vaggabandhanena vicaritun”ti bhijjivā palāyanti. Evaṃ rājūnaṃ vuddhi hoti. Tena vuttaṃ- “vuddhiyeva licchavī vajjīnaṃ pāṭikaṅkhā no parihāni”ti.

**Samaggāti**-ādīsu sannipātabheriyā niggatāya “ajja me kiccaṃ atthi maṅgalaṃ atthi”ti vikkhepaṃ karontā na samaggā sannipatanti nāma. Bherisaddaṃ pana sutvāva bhuñjamānāpi alaṅkurumānāpi vatthāni nivāsayaṃmānāpi addhabhuttā addhālaṅkatā vatthaṃ nivāsentaṃva sannipatantā **samaggā sannipatanti** nāma. Sannipatitā pana cintetvā mantetvā kattabbaṃ katvā ekatova avuṭṭhahantā na samaggā vuṭṭhahanti nāma. Evaṃ vuṭṭhitesu hi ye paṭhamaṃ gacchanti, tesam evaṃ hoti (3.0152)- “amhehi bāhirakathāva sutā, idāni vinicchayakathā bhavissatī”ti. Ekato vuṭṭhahantā pana **samaggā vuṭṭhahanti** nāma. Apica “asukāṭṭhāne

gāmasīmā vā nigamasīmā vā ākulā, corā vā pariyuṭṭhitā”ti sutvā “ko gantvā amitta-  
maddanaṃ karissati”ti vutte “ahaṃ paṭhamaṃ ahaṃ paṭhamaṃ”ti vatvā gaccha-  
ntāpi samaggā vuṭṭhahanti nāma. Ekassa pana kammante osīdamāne sesā putta-  
bhātaro pesetvā tassa kammantaṃ upatthambhayamānāpi āgantukarājānaṃ  
“asukassa gehaṃ gacchatu, asukassa gehaṃ gacchatū”ti avatvā sabbe ekato  
saṅgaṇhantāpi ekassa maṅgale vā roge vā aññasmim vā pana tādise sukha-  
dukkhe uppanne sabbe tattha sahāyabhāvaṃ gacchantāpi **samaggā vajjikaraṇi-**  
**yāni karonti** nāma.

**Appaññattanti**-ādīsu pubbe akataṃ suṅkaṃ vā baliṃ vā daṇḍaṃ vā āharāpentā  
**appaññattaṃ paññāpentī** nāma. Porāṇapaveṇiyā āgatameva pana anāharāpentā  
**paññattaṃ samucchindanti** nāma. Coroti gahetvā dassite avicinitvā chejjabhejjaṃ  
anusāsantā porāṇaṃ vajjidhammaṃ samādāya na vattanti nāma. Tesāṃ apa-  
ññattaṃ paññāpentānaṃ abhinavasūṅkāpīṭṭhā manussā “ati-upaddutamha, ke  
imesāṃ vijite vasissanti”ti paccantaṃ pavisitvā corā vā corasahāyā vā hutvā jana-  
padaṃ hananti. Paññattaṃ samucchindantānaṃ paveṇi-āgatāni suṅkādiṇi ga-  
ṇhantānaṃ koso parihāyati, tato hatthi-assabalakāya-orodhādayo yathāni-  
baddhaṃ vaṭṭaṃ alabhamānā thāmabalena parihāyanti. Te neva yuddhakkhamā  
honti na pāricariyakkhamā. Porāṇaṃ vajjidhammaṃ samādāya avattantānaṃ  
vijite manussā “amhākaṃ puttaṃ pitaraṃ bhātaraṃ acoraṃyeva coroti katvā  
chindimsu bhindimsū”ti kujjhitvā paccantaṃ pavisitvā corā vā corasahāyā vā  
hutvā janapadaṃ hananti. Evaṃ rājūnaṃ parihāni hoti. Apaññattaṃ na paññāpe-  
ntānaṃ pana “paveṇi-āgataṃyeva rājāno karonti”ti manussā haṭṭhatuṭṭhā kasivā-  
ṇijjādike kammante sampādentī. Paññattaṃ asamucchindantānaṃ paveṇi-āga-  
tāni suṅkādiṇi gaṇhantānaṃ koso vaḍḍhati, tato hatthi-assabalakāya-orodhādayo  
yathānibaddhaṃ vaṭṭaṃ labhamānā thāmabalasampannā yuddhakkhamā ceva  
pāricariyakkhamā ca honti. Porāṇe vajjidhamme (3.0153) samādāya vattantānaṃ  
manussā na ujjhāyanti. “Rājāno porāṇapaveṇiyā karonti, aṭṭakulikasenāpati-uparā-  
jūhi parikkhitaṃ sayampi parikkhipitvā paveṇipotthakaṃ vācāpetvā anucchavika-  
meva daṇḍaṃ pavattayanti, etesaṃ doso natthi, amhākaṃyeva doso”ti appamattā  
kammante karonti. Evaṃ rājūnaṃ vuddhi hoti.

**Sakkarissantīti** yaṃkiñci tesāṃ sakkāraṃ karontā sundarameva karissanti.  
**Garuṃ karissantīti** garubhāvaṃ paccupaṭṭhapetvā karissanti. **Mānessantīti**  
manena piyāyissanti. **Pūjessantīti** paccayapūjāya pūjessanti. **Sotabbaṃ maññissa-**  
**ntīti** divasassa dve tayo vāre upaṭṭhānaṃ gantvā tesāṃ kathaṃ sotabbaṃ saddhā-  
tabbaṃ maññissanti. Tattha ye evaṃ mahallakānaṃ rājūnaṃ sakkārādīni na  
karonti, ovādatthāya vā nesaṃ upaṭṭhānaṃ na gacchanti,

te tehi vissatṭhā anovadiyamānā kīḷāpasutā rajjato parihāyanti. Ye pana tathā paṭi-pajjanti, tesam mahallakarājāno “idaṃ kātappaṃ idaṃ na kātappaṃ”ti porāṇapa-veṇiṃ ācikkhanti. Saṅgāmaṃ patvāpi “evaṃ pavisitappaṃ, evaṃ nikkhamitappaṃ”-ti upāyaṃ dassenti. Te tehi ovadiyamānā yathā-ovādaṃ paṭipajjamānā sakkonti rajjapaveṇiṃ sandhāretuṃ. Tena vuttaṃ- “vuddhiyeva licchavī vajjīnaṃ pāṭika-ṅkhā”ti.

**Kulitthiyoti** kulagharāṇiyo. **Kulakumāriyoti** anividdhā tāsam dhītaro. **Okassāti** vā **pasayhāti** vā pasayhākārassevetam nāmaṃ. Okassātipi paṭhanti. Tattha **okassāti** avakāsivā ākaḍḍhitvā. **Pasayhāti** abhibhavitvā ajjhottharivāti ayaṃ vacanatto. Evañhi karontānaṃ vijite manussā “amhākaṃ gehe puttabhātropi, kheḷasiṅghā-nikādīni mukhena apanetvā saṃvaḍḍhitā dhītropi ime balakkārena gahetvā attano ghare vāsentī”ti kupitā paccantaṃ pavisitvā corā vā corasahāyā vā hutvā janapadaṃ hananti. Evaṃ akarontānaṃ pana vijite manussā apposukkā sakāni kammāni karontā rājakosaṃ vaḍḍhenti. Evamettha vuddhihāṇiyo veditabbā.

**Vajjīnaṃ** (3.0154) **vajjicetiyanīti** vajjirājūnaṃ vajjiraṭṭhe cittikataṭṭhena cetiyānīti laddhanāmāni yakkhaṭṭhānāni. **Abbhantarānīti** antonagare ṭhitāni. **Bāhirānīti** bahi-nagare ṭhitāni. **Dinnapubbaṃ katapubbanti** pubbe dinnañca katañca. **No parihāpe-ssantīti** ahāpetvā yathāpavattameva karissanti. Dhammikaṃ baliṃ parihāpentā-nañhi devatā ārakkhaṃ susaṃvihitaṃ na karonti, anuppannaṃ dukkhaṃ uppā-detuṃ asakkontiyopi uppannaṃ kāsasīsarogādiṃ vaḍḍhenti, saṅgāme patte sahāyā na honti. Aparihāpentānaṃ pana ārakkhaṃ susaṃvihitaṃ karonti, anu-ppannaṃ sukhaṃ uppādetuṃ asakkontiyopi uppannaṃ kāsasīsarogādiṃ haranti, saṅgāmasīse sahāyā hontīti. Evamettha vuddhihāṇiyo veditabbā.

**Dhammikā rakkhāvaraṇaguttīti** ettha rakkhā eva yathā anicchitaṃ nāgacchati, evaṃ āvaraṇato āvaraṇaṃ. Yathā icchitaṃ na nassati, evaṃ gopāyanato gutti. Tattha balakāyena parivāretvā rakkhanaṃ pabbajitānaṃ dhammikā rakkhāvaraṇa-gutti nāma na hoti. Yathā pana vihārassa upavane rukkhe na chindanti, vājikā vājaṃ na karonti, pokkharaṇīsu macche na gaṇhanti, evaṃ karaṇaṃ dhammikā rakkhāvaraṇagutti nāma. **Kintīti** kena nu kho kāraṇena.

Tattha ye anāgatānaṃ arahantānaṃ āgamaṃ na icchanti, te assaddhā honti appasannā. Pabbajite sampatte paccuggamaṃ na karonti, gantvā na passantī, paṭisanthāraṃ na karonti, pañhaṃ na pucchanti, dhammaṃ na suṇanti, dānaṃ na denti, anumodanaṃ na suṇanti, nivāsanaṭṭhānaṃ na saṃvidahanti. Atha nesaṃ avaṇṇo uggacchati “asuko nāma rājā assaddho appasanno, pabbajite sampatte paccuggamaṃ na karoti ...pe... nivāsanaṭṭhānaṃ na saṃvidahati”ti. Taṃ sutvā pabbajitā tassa nagaradvārena gacchantāpi nagaraṃ na pavisanti. Evaṃ anāga-tānaṃ arahantānaṃ anāgamaṃ nameva hoti. Āgatānaṃ pana phāsuvihāre asati yepi ajānitvā āgatā, te “vasissāmāti tāva cintetvā āgatamhā, imesaṃ pana rājūnaṃ iminā nīhārena ke vasissantī”ti nikkhamitvā gacchantī. Evaṃ anāgatesu anāga-cchantesu āgatesu dukkhaṃ viharantesu so doso pabbajitānaṃ anāvāso hoti. Tato devatārakkhā na hoti, devatārakkhāya asati amanussā okāsaṃ (3.0155) labhanti, amanussā ussannā anuppannaṃ byādhiṃ uppādentī. Silavantānaṃ

dassanapañhapucchanādivatthukassa puññassa anāgamo hoti. Vipariyāyena yathāvuttakaṇhapakkhaviparītassa sukkapakkhassa sambhavo hotīti evamettha vuddhihāniyo veditabbā.

## 2. Vassakārasuttavaṇṇanā

**22.** Dutiye **abhiyātukāmoti** abhibhavanatthāya yātukāmo. **Vajjīti** vajjirājāno. **Evaṃmahiddhiketi** evaṃ mahatiyā rājiddhiyā samannāgate. Etena nesaṃ samagga-bhāvaṃ katheti. **Evaṃmahānubhāveti** evaṃ mahantena rājānubhāvena samannāgate. Etena nesaṃ hatthisippādīsu katasikkhataṃ katheti, yaṃ sandhāya vuttaṃ-“sikkhitā vatime licchavikumārakā, susikkhitā vatime licchavikumārakā, yatra hi nāma sukhumena tālacchiggaḷena asanaṃ atipātayissanti poṅkhānupoṅkhaṃ avirādhitā”ti (saṃ. ni. 5.1115). **Ucchecchāmīti** ucchindissāmi. **Vināsessāmīti** adassanaṃ nayissāmi. **Anayabyasananti** avaḍḍhiñceva, ñātibyasanañca. **Āpādessāmīti** pāpayissāmi.

Iti kira so ṭhānanisajjādīsu imaṃ yuddhakathameva katheti, “gamanasajjā hothā”-ti ca balakāyaṃ āṇāpeti. Kasmā? Gaṅgāya kira ekaṃ paṭṭanagāmaṃ nissāya addhayaṃ ajātasattuno vijitaṃ, addhayaṃ licchavīnaṃ. Tatra pabbatapādato mahagghabhaṇḍaṃ otarati. Taṃ sutvā “ajja yāmi, sve yāmi”ti ajātasattuno saṃvidahantasseva licchavino samaggā sammadamānā puretaraṃ āgantvā sabbaṃ gaṇhanti. Ajātasattu pacchā āgantvā taṃ pavattiṃ ñatvā kujjhitvā gacchati. Te punasaṃvaccharepi tatheva karonti. Atha so balavāghātajāto, tadā evamakāsi.

Tato cintesi- “gaṇena saddhiṃ yuddhaṃ nāma bhāriyaṃ, ekopi moghappahāro nāma natthi. Ekena kho pana paṇḍitena saddhiṃ mantetvā karonto niraparādho hoti, paṇḍito ca satthārā sadiso natthi, satthā ca avidūre dhuravihāre vasati, handāhaṃ pesetvā pucchāmi. Sace me gatena (3.0156) koci attho bhavissati, satthā tuṅhī bhavissati. Anathe pana sati ‘kiṃ rañño tattha gatenā’ti vakkhati”ti. So vassakāraṃ brāhmaṇaṃ pesesi. Brāhmaṇo gantvā bhagavato tamatthaṃ ārocesi. Tena vuttaṃ- **atha kho rājā ...pe... āpādessāmi vajjīti.**

**Bhagavantaṃ bijayamānoti** thero vattasīse ṭhatvā bhagavantaṃ bijati, bhagavato pana sītaṃ vā uṇhaṃ vā natthi. Bhagavā brāhmaṇassa vacanaṃ sutvā tena saddhiṃ amantetvā therena saddhiṃ mantetukāmo **kinti te, ānanda, sutanti-ādi-māha.** Taṃ vuttatthameva.

**Ekamidāhanti** idaṃ bhagavā pubbe vajjīnaṃ imassa vajjisattakassa desitabhā-vappakāsanatthaṃ āha. **Akaraṇiyāti** akattabbā, aggahetabbāti attho. **Yadidanti** nipātamattaṃ. **Yuddhassāti** karaṇatthe sāmivacanaṃ, abhimukhaṃ yuddhena gahetuṃ na sakkāti attho. **Aññatra upalāpanāyāti** ṭhapetvā upalāpanaṃ. Upalāpanā nāma “alaṃ vivādena, idāni samaggā homā”ti hatthi-assarathahiraññasuvaṇṇādīni pesetvā saṅgahakaraṇaṃ, evañhi saṅgahaṃ katvā kevalaṃ vissāsenā sakkā gaṇhitunti attho. **Aññatra mithubhedāti** ṭhapetvā mithubhedāṃ. Iminā “añña-maññabhedaṃ katvāpi sakkā ete gahetun”ti dasseti. Idaṃ brāhmaṇo bhagavato

kathāya nayaṃ labhitvā āha. Kiṃ pana bhagavā brāhmaṇassa imāya kathāya nayalābhaṃ jānātīti? Āma jānāti. Jānanto kasmā kathesi? Anukampāya. Evaṃ kirassa ahosi- “mayā akathitepi katipāhena gantvā sabbe gaṇhissati, kathite pana samagge bhindanto tīhi saṃvaccharehi gaṇhissati. Ettakampi jīvitameva varaṃ. Ettakañhi jīvantā attano paṭiṭṭhābhūtaṃ puññaṃ karissantī”ti. **Abhinanditvā**ti cittaena nanditvā. **Anumoditvā**ti “yāva subhāsitamidaṃ bhotā gotamenā”ti vācāya anumoditvā. **Pakkāmī**ti rañño santikaṃ gato. Rājāpi tameva pesetvā sabbe bhinditvā gantvā anayabyasanaṃ pāpesi.

### 3. Paṭhamasattakasuttavaṇṇanā

**23.** Tatiye **abhiṇhaṃ sannipātā**ti idaṃ vajjisattake vuttasadisameva. Idhāpi ca abhiṇhaṃ asannipatantā disāsu āgatasāsanāṃ na suṇanti, tato (3.0157) “asukavihārasīmā ākulā, uposathappavāraṇā ṭhitā, asukasmiṃ ṭhāne bhikkhū vejjakammadūtakammādīni karonti, viññattibahulā phalapupphadānādīhi jīvikaṃ kappenti”ti-ādīni na jānanti. Pāpabhikkhūpi “pamatto saṅgho”ti ñatvā rāsibhūtā sāsanaṃ osakkāpenti. Abhiṇhaṃ sannipatantā pana taṃ pavattiṃ suṇanti, tato bhikkhusaṅghaṃ pesetvā sīmaṃ ujum kārenti, uposathappavāraṇāyo pavattāpenti, micchājīvaṇaṃ ussannaṭṭhāne ariyavaṃsike pesetvā ariyavaṃsaṃ kathāpenti, pāpabhikkhūnaṃ vinayadharehi niggahaṃ kārapenti. Pāpabhikkhūpi “appamatto saṅgho, na sakkā amhehi vaggabandhanena vicaritun”ti bhijjitvā palāyanti. Evamettha vuddhahāniyo veditabbā.

**Samaggā**ti-ādīsu cetiyapaṭijagganattaṃ vā bodhighara-uposathāgāraccchādanattaṃ vā katikavattaṃ vā ṭhapetukāmatāya “saṅgho sannipatatū”ti bheriyā vā ghaṇṭhiyā vā ākoṭitamattāya “mayhaṃ cīvarakammaṃ atthi, mayhaṃ patto pacitabbo, mayhaṃ navakammaṃ atthī”ti vikkhepaṃ karontā na samaggā sannipatanti nāma. Sabbaṃ pana taṃ kammaṃ ṭhapetvā “ahaṃ purimataraṃ, ahaṃ purimataran”ti ekappahāreneva sannipatantā samaggā sannipatanti nāma. Sannipatitā pana cintetvā mantetvā kattabbaṃ katvā ekatova avuṭṭhahantā na samaggā vuṭṭhahanti nāma. Evaṃ vuṭṭhitesu hi ye paṭhamaṃ gacchanti, tesam evaṃ hoti “amhehi bāhirakathāva sutā, idāni vinicchayakathā bhavissati”ti. Ekappahāreneva vuṭṭhahantā samaggā vuṭṭhahanti nāma. Apica “asukaṭṭhāne vihārasīmā ākulā, uposathappavāraṇā ṭhitā, asukaṭṭhāne vejjakammādikārakā pāpabhikkhū ussanna”ti sutvā “ko gantvā tesam niggahaṃ karissati”ti vutte “ahaṃ paṭhamaṃ, ahaṃ paṭhaman”ti vatvā gacchantāpi samaggā vuṭṭhahanti nāma.

Āgantukaṃ pana disvā “imaṃ pariveṇaṃ yāhi, etaṃ pariveṇaṃ yāhi, ayaṃ ko”ti avatvā sabbe vattaṃ karontāpi, jiṇṇapattacīvarakaṃ disvā tassa bhikkhācāravattena pattacīvaraṃ pariyesantāpi, gilānassa gilānabhesajjaṃ pariyesamānāpi, gilānameva anāthaṃ “asukapariveṇaṃ yāhi”ti avatvā attano attano pariveṇe paṭijaggantāpi, eko oliyamānako (3.0158) gantho hoti, paññavantaṃ bhikkhuṃ saṅgaṇhitvā tena taṃ ganthaṃ ukkhipāpentāpi samaggā saṅghakaraṇiyāni karonti nāma.



**Appaññattanti-ādīsu** navaṃ adhammikaṃ katikavattaṃ vā sikkhāpadaṃ vā gaṇhantā appaññattaṃ paññāpentī nāma purāṇasanthatavattusmiṃ sāvattiyaṃ bhikkhū viya. Uddhammaṃ ubbinayaṃ sāsanaṃ dīpentā paññattaṃ samucchindanti nāma, vassasataparibbute bhagavati vesālikā vajjiputtakā viya. Khuddānukhuddakā pana āpattiyo sañcicca vītikkamantā yathāpaññattesu sikkhāpadesu samādāya na vattanti nāma assajipunabbasukā viya. Tathā akarontā pana appaññattaṃ na paññāpentī, paññattaṃ na samucchindanti, yathāpaññattesu sikkhāpadesu samādāya vattanti nāma āyasmā upaseno viya, āyasmā yaso kākaṇḍaka-putto viya, āyasmā mahākassapo viya ca. **Vuddhiyevā**ti silādiguṇehi vuddhiyeva, no parihāni.

**Therā**ti thirabhāvappattā therakārakehi guṇehi samannāgatā. Bahū rattiyo jānantīti **rattaññū**. Ciraṃ pabbajitānaṃ etesanti **cirapabbajitā**. Saṅghassa pitiṭṭhāne ṭhitāti **saṅghapitaro**. Pitiṭṭhāne ṭhitattā saṅghaṃ pariṇenti, pubbaṅgamā hutvā tīsu sikkhāsu pavattentīti **saṅghapariṇāyakā**.

Ye tesam sakkārādīni na karonti, ovādatthāya dve tayo vāre upaṭṭhānaṃ na gacchanti, tepi tesam ovādaṃ na denti, paveṇikathaṃ na kathenti, sārabhūtaṃ dhammapariyāyaṃ na sikkhāpentī. Te tehi vissaṭṭhā silādīhi dhammakhandhehi sattahi ca ariyadhanehīti evamādīhi guṇehi parihāyanti. Ye pana tesam sakkārādīni karonti, upaṭṭhānaṃ gacchanti, tesam te “evaṃ te abhikkamitabban”ti-ādikaṃ ovādaṃ denti, paveṇikathaṃ kathenti, sārabhūtaṃ dhammapariyāyaṃ sikkhāpentī, terasahi dhutaṅgehi dasahi kathāvatthūhi anusāsanti. Te tesam ovāde ṭhatvā silādīhi guṇehi vaḍḍhamānā sāmāññattaṃ anupāpuṇanti. Evamettha hānivuddhiyo daṭṭhabbā.

Punabbhavo silamassāti ponobbhavikā, punabbhavadāyikāti attho, tassā **ponobbhavikāya**. **Na vasaṃ gacchissantī**ti ettha ye catunnaṃ paccayānaṃ kāraṇā upaṭṭhākānaṃ padānupadikā hutvā gāmato gāmaṃ vicaranti, te tassā (3.0159) vasaṃ gacchanti nāma. Itare na gacchanti. Tattha hānivuddhiyo pākaṭāyeva.

**Āraññakesū**ti pañcadhanusatikapacchimesu. **Sāpekkhā**ti sālāyā. Gāmantasenāsanesu hi jhānaṃ appetvāpi tato vuṭṭhitamattova itthipurisadārakadārikādisaddaṃ suṇāti, yenassa

adhigatavisesopi hāyatiyeva. Araññasenāsane niddāyitvāpi pabuddhamatto sīha-byagghamorādīnaṃ saddaṃ suṇāti, yena araññe pītiṃ paṭilabhitvā tameva sammasanto aggaphale paṭiṭṭhāti. Iti bhagavā gāmantasenāsane jhānaṃ appetvā nisinnabhikkhuto araññe niddāyamānameva pasamsati. Tasmā tameva atthavasamaṃ paṭicca “āraññakesu senāsanesu sāpekkhā bhavissantī”ti āha.

**Paccattaññeva satim upaṭṭhāpessantī**ti attanāva attano abbhantare satim upaṭṭhāpessanti. **Pesalā**ti piyasīlā. Idhāpi sabrahmacārīnaṃ āgamaṇaṃ anicchantānevāsikā assaddhā honti appasannā, vihāraṃ sampattabhikkhūnaṃ paccuggamaṇa-pattacīvarapaṭiggahaṇa-āsanapaññāpanatālavaṇṭaggahaṇādīni na karonti. Atha nesaṃ avaṇṇo uggacchati “asukavihāravāsino bhikkhū assaddhā appasannā vihāraṃ pavitṭhānaṃ vattappaṭivattampi na karontī”ti. Taṃ sutvā pabbajitā vihāradvārena gacchantāpi vihāraṃ na pavisanti. Evaṃ anāgatānaṃ anāgamameva hoti. Āgatānaṃ pana phāsuvihāre asati yepi ajānitvā āgatā, te “vasissāmāti tāvacintetvā āgatamhā, imesaṃ pana nevāsikānaṃ iminā nīhārena ko vasissati”ti nikkhamitvā gacchanti. Evaṃ so vihāro aññesaṃ bhikkhūnaṃ anāvāsova hoti. Tato nevāsikā silavantānaṃ dassanaṃ alabhantā kaṅkhāvinodakaṃ vā ācārasikkhāpakaṃ vā madhuradhammasavanaṃ vā na labhanti. Tesāṃ neva aggahitadhammaggaṇaṃ na gahitasajjhāyakaraṇaṃ hoti. Iti nesaṃ hāniyeva hoti, na vuddhi.

Ye pana sabrahmacārīnaṃ āgamaṇaṃ icchanti, te saddhā honti pasannā, āgatānaṃ sabrahmacārīnaṃ paccuggamaṇādīni katvā senāsanaṃ paññāpetvā denti (3.0160), te gahetvā bhikkhācāraṃ pavisanti, kaṅkhaṃ vinodenti, madhuradhammassavanaṃ labhanti. Atha nesaṃ kittisaddo uggacchati “asukavihāre bhikkhū evaṃ saddhā pasannā vattasampannā saṅgāhakā”ti. Taṃ sutvā bhikkhū dūra-topi āgacchanti. Tesāṃ nevāsikā vattaṃ karonti, samīpaṃ gantvā vuḍḍhataraṃ āgantukaṃ vanditvā nisīdanti, navakatarassa santike āsanaṃ gahetvā nisīditvā “imasmim vihāre vasissatha, gamissathā”ti pucchanti. “Gamissāmā”ti vutte “sappāyaṃ senāsanaṃ, sulabhā bhikkhā”ti-ādīni vatvā gantuṃ na denti. Vinayadharo ce hoti, tassa santike vinayaṃ sajjhāyanti. Suttantādidharo ce, tassa santike taṃ taṃ dhammaṃ sajjhāyanti. Te āgantukatherānaṃ ovāde ṭhatvā saha paṭisambhidāhi arahattaṃ pāpuṇanti. Āgantukā “ekaṃ dve divasāni vasissāmāti āgatamhā, imesaṃ pana sukhasaṃvāsātāya dasa dvādasa vassāni vasimhā”ti vattāro honti. Evamettha hānivuddhiyo veditabbā.

#### 4. Dutiyasattakasuttavaṇṇanā

**24.** Catutthe **na kammārāmāti** ye divasaṃ cīvarakamma-kāyabandhanaparissāvana-dhammakaraṇa-sammajjani-pādaḥkaṭhalikādīneva karonti, te sandhāyesa paṭikkhepo. Yo pana tesāṃ karaṇavelāya evaṃ etāni karoti, uddesavelāya uddesaṃ gaṇhāti, sajjhāyavelāya sajjhāyati, cetiyaṅgaṇavattavelāya cetiyaṅgaṇavattaṃ karoti, manasikāavelāya manasikāraṃ karoti, na so kammārāmo nāma.

Yo itthivaṇṇapurisavaṇṇādivasena ālāpasallāpaṃ karontoyeva rattindivaṃ vīti-

nāmeti, evarūpe bhasse pariyantakārī na hoti, ayaṃ **bhassārāmo** nāma. Yo pana rattindivaṃ dhammaṃ katheti, pañhaṃ vissajjeti, ayaṃ appabhassova bhasse pariyantakāriyeva. Kasmā? “Sannipatitānaṃ vo, bhikkhave, dvayaṃ karaṇiyaṃ dhammī vā kathā ariyo vā tuṇhībhāvo”ti (ma. ni. 1.273) vuttattā.

Yo ṭhitopi gacchantopi nisinnopi thinamiddhābhibhūto niddāyatiyeva, ayaṃ **niddārāmo** nāma. Yassa pana karajakāyagelaññaena cittaṃ bhavaṅgaṃ (3.0161) ota-rati, nāyaṃ niddārāmo. Tenevāha- “abhijānāmahaṃ, aggivessana, gimhānaṃ pacchime māse pacchābhattaṃ piṇḍapātaṃ piṇḍapātaṃ catugguṇaṃ saṅghāṭiṃ paññapetvā dakkhiṇena passena sato sampajāno niddaṃ okkamitā”ti (ma. ni. 1.387).

Yo “ekassa dutiyo, dvinnaṃ tatiyo, tiṇṇaṃ catuttho”ti evaṃ saṃsaṭṭhova viha-rati, ekako assādaṃ na labhati, ayaṃ **saṅgaṇikārāmo**. Yo pana catūsu iriyāpa-thesu ekakova assādaṃ labhati, nāyaṃ saṅgaṇikārāmo.

Asantasambhāvanicchāya samannāgatā dussilā **pāpicchā** nāma. Yesaṃ pāpakā mittā catūsu iriyāpathesu saha ayanato pāpasahāyā, ye ca tanninnatappa-ṇatappabbhāratāya pāpesu sampavaṅkā, te **pāpamittā pāpasahāyā pāpasam-pa-vaṅkā** nāma.

**Oramattakenā**ti avaramattakena appamattakena. **Antarā**ti arahattaṃ appatvāva etthantare. **Vosānanti** pariniṭṭhitabhāvaṃ “alamettāvata”ti osakkaṃ. Idaṃ vuttaṃ hoti- yāva sīlapārisuddhijjhānavipassanā sotāpannabhāvādīnaṃ aññatara-mattakena vosānaṃ nāpajjissanti, tāva vuddhiyeva bhikkhūnaṃ pāṭikaṅkhā, no parihānīti.

## 7. Saññāsuttavaṇṇanā

27. Sattame **aniccasaññā**dayo aniccānupassanādīhi sahaगतasaññā.

## 8. Paṭhamaparihānisuttavaṇṇanā

28. Aṭṭhame uppannānaṃ saṅghakiccānaṃ nittharaṇena bhāraṃ vahantīti **bhāra-vāhino**. **Te tena paññāyissanti**ti te therā tena attano therabhāvānurūpena kiccena paññāyissanti. **Tesu yogam āpajjati**ti payogaṃ āpajjati, sayam tāni kiccāni kātuṃ ārabhatīti.

## 9. Dutiyaparihānisuttavaṇṇanā

29. Navame (3.0162) **bhikkhudassanaṃ hāpetī**ti bhikkhusaṅghassa dassana-tthāya gamanaṃ hāpeti. **Adhisīle**ti pañcasīladadasīlasaṅkhāte uttamasīle. **Ito bahi-ddhāti** imamhā sāsanaṃ bahiddhā. **Dakkhiṇeyyaṃ gavesatī**ti deyyadhammapaṭiggā-hake pariyesati. **Tattha ca pubbakāraṃ karotī**ti tesam bāhirānaṃ titthiyānaṃ datvā pacchā bhikkhūnaṃ deti. Sesam sabbattha uttānamevāti.

Vajjisattakavaggo tatiyo.

#### 4. Devatāvaggo

##### 5. Paṭhamamittasuttavaṇṇanā

**36.** Catutthassa pañcame **duddadanti** duppariccajaṃ mahārahaṃ bhaṇḍakaṃ. **Dukkaraṃ karotīti** kātuṃ asukaraṃ kammaṃ karoti. **Dukkhamāṃ khamatīti** sahāyassa atthāya duradhivāsaṃ adhivāseti. **Guyhamassa āvikarotīti** attano guyhaṃ tassa āvikaroti. **Guyhamassa pariguhatīti** tassa guyhaṃ aññesaṃ nācikkhati. **Khīṇena nātimaññatīti** tassa bhoge khīṇe tena khayena taṃ nātimaññati, tasmim̐ omānaṃ attani ca atimānaṃ na karoti.

##### 6. Dutiyamittasuttavaṇṇanā

**37.** Chaṭṭhe **vattā**ti vacanakusalo. **Vacanakhamoti** vacanaṃ khamati, dinnaṃ ovādaṃ karoti. **Gambhīranti** guyhaṃ rahassaṃ jhānanissitaṃ vipassanāmagga-phalanibbānanissitaṃ.

##### 7. Paṭhamapaṭṭisambhidāsuttavaṇṇanā

**38.** Sattame **idaṃ me cetaso līnattanti** uppanne cetaso līnatte “idaṃ me cetaso līnattan”ti yathāsabhāvato jānāti. **Ajjhattaṃ saṃkhittaṃ** nāma thinamiddhānugataṃ. **Bahiddhā vikkhittaṃ** nāma pañcasu kāmaguṇesu (3.0163) vikkhittaṃ. **Vedanā**ti-ādīni papañcamūlavasena gahitāni. Vedanā hi taṇhāya mūlaṃ sukhavasena taṇhuppattito, saññā diṭṭhiyā mūlaṃ avibhūtārammaṇe diṭṭhi-uppattito, vitakko mānassa mūlaṃ vitakkavasena asmīti mānuppattito. **Sappāyāsappāyesūti** upakārānupakāresu. **Nimittanti** kāraṇaṃ. Sesāṃ sabbattha uttānatthamevāti.

Devatāvaggo catuttho.

#### 5. Mahāyaññavaggo

##### 1-2. Sattaviññāṇaṭṭhitisuttādivaṇṇanā

**44-45.** Pañcamassa paṭhame **viññāṇaṭṭhityoti** paṭisandhiviññāṇassa ṭhānāni. **Seyyathāpīti** nidassanatthe nipāto, yathā manussāti attho. Aparimāṇesu hi cakkavālesu aparimāṇānaṃ manussānaṃ vaṇṇasaṇṭhānādivasena dvepi ekasadisā

natthi. Yepi hi katthaci yamakabhātarō vaṇṇena vā saṇṭhānena vā sadisā honti, tesampi ālokitavilokitakathitahasitagamanatṭhānādīhi viseso hotiyeva. Tasmā **nānattakāyā**ti vuttā. Paṭisandhisaññā pana nesam tihetukāpi dvihetukāpi ahētukāpi hoti. Tasmā **nānattasaññinoti** vuttā. **Ekacce ca devāti** cha kāmāvacaradevā. Tesu hi kesañci kāyo nīlo hoti, kesañci pītakādivaṇṇo. Saññā pana tesam dvihetukāpi tihetukāpi hoti, ahētukā natthi. **Ekacce Ca vinipātikāti** catu-apāyavinimuttā uttarāmātā yakkhinī, piyaṅkaramātā, phussamittā, dhammaguttāti evamādikā aññe ca vemānikā petā. Etesañhi pīta-odātakāḷamaṅguracchavisāmavaṇṇādivasena ceva kisa thūlarassadīghavasena ca kāyo nānā hoti, manussānaṃ viya dvihetukatihetuka-ahētukavasena saññāpi. Te pana devā viya na mahesakkhā, kapaṇamanussā viya appesakkhā dullabhaghāsacchādanā dukkhapīḷitā viharanti. Ekacce kāḷapakkhe dukkhitā juṇhapakkhe sukkhitā honti. Tasmā sukhasamussayato vinipattitā **vinipātikāti** vuttā. Ye panettha tihetukā, tesam dhammābhisamayopi hoti piyaṅkaramātādīnaṃ viya.

**Brahmakāyikāti** (3.0164) brahmapārisajjabrahmapurohitamahābrahmāno. **Paṭhamābhinibbattāti** te sabbepi paṭhamajjhānena abhinibbattā. Brahmapārisajjā pana parittena abhinibbattā, tesam kappassa tatiyo bhāgo āyuppamāṇaṃ. Brahmapurohitā majjhimena, tesam upaḍḍhakappo āyuppamāṇaṃ, kāyo ca tesam vipphārikatāro hoti. Mahābrahmāno paṇītena, tesam kappo āyuppamāṇaṃ, kāyo ca pana tesam ativipphārikova hoti. Iti te kāyassa nānattā paṭhamajjhānavasena saññāya ekattā **nānattakāyā ekattasaññinoti** veditabbā.

Yathā ca te, evaṃ catūsu apāyesu sattā. Nirayesu hi kesañci gāvutaṃ, kesañci aḍḍhayaṇaṃ, kesañci yojanaṃ attabhāvo hoti, devadattassa pana yojanasatiko jāto. Tiracchānesupi keci khuddakā, keci mahantā. Pettivisayesu keci saṭṭhihatthā, keci asītihatthā honti, keci suvaṇṇā, keci dubbaṇṇā. Tathā kālakañcikā asurā. Apicettha dīghapiṭṭhikapetā nāma saṭṭhiyojanikāpi honti. Saññā pana sabbesampi akusalavipākāhetukāva hoti. Iti āpāyikāpi **nānattakāyā ekattasaññinotveva** saṅkhyāṃ gacchanti.

**Ābhassarāti** daṇḍa-ukkāya acci viya etesaṃ sarīrato ābhā chijjivā chijjivā patantī viya sarati vissaratīti ābhassarā. Tesu pañcakanaye dutiyatatiyajjhānavayaṃ parittaṃ bhāvetvā upapannā parittābhā nāma honti, tesam dve kappā āyuppamāṇaṃ. Majjhimaṃ bhāvetvā upapannā appamāṇābhā nāma honti, tesam cattāro kappā āyuppamāṇaṃ. Paṇītaṃ bhāvetvā upapannā ābhassarā nāma honti, tesam aṭṭha kappā āyuppamāṇaṃ. Idha pana ukkaṭṭhaparicchedavasena sabbeva te gahitā. Sabbesañhi tesam kāyo ekavipphārova hoti, saññā pana avitakkavicāramattā vā avitakka-avicārā vāti nānā.

**Subhakiṇhāti** subhena vokiṇṇā vikiṇṇā, subhena sarīrappabhāvaṇṇena eka-gghanāti attho. Etesañhi na ābhassarānaṃ

viya chijjivā chijjivā pabhā gacchati. Pañcakanaye pana parittamajjhimaṇi-  
tassa catutthajjhānassa vasena soḷasabāttimsacatussatthikappāyukā paritta-appa-  
māṇasubhakiṇhā nāma hutvā nibbattanti. Iti sabbepi te **ekattakāyā** ceva catuttha-  
jjhānasaññāya (3.0165) **ekattasaññino** cāti veditabbā. **Vehapphalā**pi catutthavi-  
ññāṇaṭṭhitimeva bhajanti. **Asaññasattā** viññāṇābhāvā ettha saṅgahaṃ na  
gacchanti, sattāvāsesu gacchanti.

**Suddhāvāsā** vivaṭṭapakkhe ṭhitā na sabbakālikā, kappasatasahassampi asa-  
ṅkheyyampi buddhasuññe loke na uppajjanti. Soḷasakappasahassa-abbhantare  
buddhesu uppannesuyeva uppajjanti. Dhammacakkappavattissa bhagavato  
khandhāvāraṭṭhānasadisā honti. Tasmā neva viññāṇaṭṭhitim na sattāvāsaṃ  
bhajanti. Mahāsīvatthero pana “na kho pana so, sārīputta, āvāso sulabharūpo, yo  
mayā anāvutthapubbo iminā dīghena addhunā aññatra suddhāvāsehi devehi”ti  
(ma. ni. 1.160) iminā suttena suddhāvāsāpi catutthaviññāṇaṭṭhitim catutthasattāvā-  
sañca bhajantīti vadati, taṃ appatibāhiyattā suttassa anuññātaṃ.

Nevasaññānāsaññāyatanaṃ yatheva saññāya, evaṃ viññāṇassāpi sukhumattā  
neva viññāṇaṃ nāvīññāṇaṃ. Tasmā viññāṇaṭṭhitisu na vuttaṃ. Dutiye **samādhipa-  
rikkhārā**Ti maggasamādhissa sambhārā.

### 3. Paṭhama-aggisuttavaṇṇanā

**46.** Tatiye sabbepi rāgādayo anuḍahanaṭṭhena **aggī**. **Āhuneyyaggī**ti-ādīsu  
panettha āhunaṃ vuccati sakkāro, āhunaṃ arahantīti āhuneyyā. Mātāpitaro hi  
puttānaṃ bahupakārattā āhunaṃ arahanti, tesu vippaṭipajjamānā puttā nirayādīsu  
nibbattanti. Tasmā kiñcāpi mātāpitaro na anuḍahanti, anuḍahanaṃ pana  
paccayā honti. Iti anuḍahanaṭṭheneva āhuneyyaggīti vuccanti. **Gahapatī**ti pana  
gehasāmiko vuccati, so mātugāmassa sayanavathālaṅkāradī-anuppadānena  
bahupakāro. Taṃ aticaranto mātugāmo nirayādīsu nibbattati. Tasmā sopi purima-  
nayeneva anuḍahanaṭṭhena **gahapataggī**ti vutto. **Dakkhiṇeyyaggī**ti ettha pana  
dakkhiṇāti cattāro paccayā, bhikkhusaṅgho dakkhiṇeyyo. So hi gihīnaṃ tisu sara-  
ṇesu pañcasu silesu dasasu silesu mātāpitupaṭṭhāne dhammikasamaṇabrāhma-  
ṇupaṭṭhāneti evamādīsu kalyāṇadhammesu niyojanena bahupakāro. Tasmim  
micchāpaṭipannā gihī (3.0166) bhikkhusaṅghaṃ akkositvā paribhāsitvā nirayādīsu  
nibbattanti. Tasmā sopi purimanayeneva anuḍahanaṭṭhena dakkhiṇeyyaggīti vutto.  
Kaṭṭhato nibbatta pākatikova aggi **kaṭṭhaggi** nāma.

### 4. Dutiya-aggisuttavaṇṇanā

**47.** Catutthe **uggatasarīrassā**ti so kira brāhmaṇamahāsālo atabhāvenapi bhoge-  
hipi uggato sārappatto ahosi, tasmā uggatasarīrotveva paññāyittha. **Upakkhaṭoti**  
paccupaṭṭhito. **Thūṇūpanītā**ni yūpasaṅkhātaṃ thūṇaṃ upanītāni. **Yaññatthāyā**ti  
vadhivā yajanatthāya. **Upasaṅkamī**ti so kira sabbam taṃ yaññasambhāraṃ  
sajjetvā cintesi- “samaṇo kira gotamo mahāpañño, kiṃ nu kho me yaññassa

vaṇṇaṃ kathessati udāhu avaṇṇaṃ, pucchitvā jānissāmi”ti iminā kāraṇena yena bhagavā tenupasaṅkami. **Aggissa ādānanti** yaññayajanatthāya navassa maṅgala-ggino ādiyaṇaṃ. **Sabbena sabbanti** sabbena sutena sabbaṃ sutam sameti saṃsandaṇḍati, ekasadisam hotīti dasseti. **Satthānīti** vihiṃsanaṭṭhena satthāni viyāti satthāni. **Sayaṃ paṭhamaṃ samārambhatīti** attanāva paṭhamataram ārabhati. **Hantunti** hanitum.

**Pahātabbāti** pariharitabbā. **Atohayanti** ato hi mātāpitito ayaṃ. **Āhutoti** āgato. **Sambhūtoti** uppanno. **Ayaṃ vuccati, brāhmaṇa, gahapataggīti** ayaṃ puttadārādi-gaṇo yasmā, gahapati, viya gehasāmiko viya hutvā aggati vicarati, tasmā gahapa-taggiṇi vuccati. **Attānanti** cittaṃ. **Damentīti** indriyadamanena damenti. **Samentīti** rāgādisamanena samenti. Tesaññeva parinibbāpanena **parinibbāpenti**. **Nikkhipita-bboti** yathā na vinassati, evaṃ ṭhapetabbo. **Upavāyatanti** upavāyatu. Evañca pana vatvā brāhmaṇo sabbesampi tesam pāṇānaṃ jīvitam datvā yaññasālam viddham-setvā satthu sāsane opānabhūto ahoṣīti.

## 5-6. Saññāsuttadvayaṇṇanā

**48-49.** Pañcame (3.0167) **amatogadhāti** nibbānapatiṭṭhā. **Amatapariyosānāti** nibbānāvasānā. Chaṭṭhe **methunadhammasamāpattiyā** Ti methunadhammena samaṅgibhāvato. **Nhārudaddulanti** nhārukhaṇḍam nhāruvilekhanam vā. **Anusanda-tīti** pavattati. **Natthi me pubbenāparaṃ visesoti** natthi mayham pubbena abhāvita-kālena saddhiṃ aparaṃ bhāvitakāle viseso. **Lokacitresūti** tidhātukalokasannivāsa-saṅkhātesu lokacitresu. **Ālasye** Ti ālasiyabhāve. **Vissatṭhiyeti** vissatṭhabhāve. **Ana-nuyogeti** yogassa ananuyuñjane. **Ahaṅkāramamaṅkāramānāpagatanti** ahaṅkāra-ditṭhito ca mamaṅkāraṇhāto ca navavidhamānato ca apagataṃ. **Vidhāsamatikka-ntanti** tisso vidhā atikkantaṃ. **Santanti** tappaccanīkakilesehi santaṃ. **Suvimuttanti** pañcavi vimuttīhi suṭṭhu vimuttaṃ.

## 7. Methunasuttavaṇṇanā

**50.** Sattame **upasaṅkamīti** bhuttaṇḍapātarāso dāsakammakaraparivuto upasa-ṅkami. **Bhavampinoti** bhavampi nu. **Brahmacārī paṭijānātīti** “ahaṃ brahmacārī”ti evaṃ brahmacariyavāsaṃ paṭijānātīti pucchati. Evaṃ kirassa ahoṣi- “brāhmaṇa-samaye vedaṃ uggaṇhantā aṭṭhacattālīsa vassāni brahmacariyaṃ caranti. Samaṇo pana gotamo agāraṃ ajjhāvasanto tīsu pāsādesu tividhanāṭakaratiyā abhirami, idāni kiṃ nu kho vakkhati”ti imamattham sandhāyevaṃ pucchati. Tato bhagavā mantena kaṇhasappaṃ gaṇhanto viya amittaṃ gīvāya pādena akka-manto viya attano saṃkilesakāle chabbassāni padhānacariyāya rajjasukham vā pāsādesu nāṭakasampattiṃ vā ārabha vitakkamattassāpi anuppannabhāvaṃ sandhāya sīhanādaṃ nadanto **yañhi taṃ brāhmaṇāti**-ādimāha. Tattha **dvayaṃdva-yasamāpattinti** dvīhi dvīhi samāpajjitabbabhāvaṃ. **Dukkhasmāti** sakalavaṭṭadu-kkhato. **Sañjagghatīti** hasitakatham katheti. **Samkīlatīti** keḷiṃ karoti. **Samkelāya-**

tīTi mahāhasitaṃ hasati. **Cakkhunā cakkhanti** attano cakkhunā tassā cakkhuṃ paṭivijjhitaṃ upanijjhāyati. **Tirokuṭṭaṃ vā tiropākāraṃ vāti** parakuṭṭe vā parapākāre (3.0168) vā. **Devoti** eko devarājā. **Devaññataroti** aññataro devaputto. **Anuttaraṃ sammāsambodhanti** arahattañceva sabbaññutaññāṇaṃca.

## 8. Saṃyogasuttavaṇṇanā

51. Aṭṭhame **saṃyogavisam̐yoganti** saṃyogavisam̐yogasādhakaṃ. **Dhammapariyāyanti** dhammakāraṇaṃ. **Ajjhattaṃ itthindriyanti** niyakajjhatte itthibhāvaṃ. **Itthikuttanti** itthikiriyaṃ. **Itthākappanti** nivāsanapārupanādi-itthi-ākappaṃ. **Itthividhanti** itthiyā mānavidhaṃ. **Itthichandanti** itthiyā ajjhāsayacchandaṃ. **Itthissaranti** itthisaddaṃ. **Itthālaṅkāraṇanti** itthiyā pasādhanabhaṇḍaṃ. **Purisindriyādisupi** eseva nayo. **Bahiddhā saṃyoganti** purisena saddhiṃ samāgamaṃ. **Ativattatīti** anabhiraṭṭatīti evaṃ vuttāya balavavipassanāya ariyamaggaṃ patvā ativattati. Imasmiṃ sutte vaṭṭavivaṭṭaṃ kathitaṃ.

## 9. Dānamahapphalasuttavaṇṇanā

52. Navame **sāpekhoti** sataṇho. **Paṭibaddhacittoti** vipāke baddhacitto. **Sannidhipekho** Ti nidhānapekho hutvā. **Peccāti** paralokaṃ gantvā. **Taṃ kammaṃ khepe**tvāti taṃ kammavipākaṃ khepetvā. **Iddhinti** vipākiddhiṃ. **Yasanti** parivārasampadaṃ. **Ādhipaccanti** jeṭṭhabhāvakaṇḍaṃ. **Āgantā itthattanti** itthabhāvaṃ ime pañcakkhandhe puna āgantā, na tatrūpapattiko na uparūpapattiko, heṭṭhāgāmīyeva hotīti attho. **Sāhu dānanti** dānaṃ nāmetaṃ sādhu bhaddakaṃ sundaraṃ. **Tāni mahāyaññānīti** tāni sappinavanīdadadhimadhuphāṇitādīhi niṭṭhānaṃ gatāni mahādānāni. **Cittālaṅkāracittaparikkhāraṇanti** samathavipassanācittassa alaṅkārabhūtañceva parivārabhūtaṃca. **Brahmakāyikānaṃ devānaṃ saḥabyatanti** na sakkā tattha dānena upapajjituṃ. Yasmā pana taṃ samathavipassanācittassa alaṅkārabhūtaṃ, tasmā tena dānālaṅkatena cittena jhānañceva ariyamaggañca nibbattetvā jhānena tattha upapajjati. **Anāgāmī hotīti** jhānānāgāmī nāma hoti. **Anāgantā itthattanti** puna itthabhāvaṃ na āgantā, uparūpapattiko vā tatrūpapattiko vā hutvā tattheva parinibbāyati. Iti imesu dānesu paṭhamaṃ taṇhuttariyadānaṃ, dutiyaṃ cittikāradānaṃ, tatiyaṃ hirottappadānaṃ, catutthaṃ niravasesadānaṃ (3.0169) pañcamaṃ dakkhiṇeyyadānaṃ, chaṭṭhaṃ somanassupavicāradānaṃ, sattamaṃ alaṅkāraparivāradānaṃ nāmāti.

## 10. Nandamātāsuttavaṇṇanā

53. Dasamaṃ atthuppattivāsena desitaṃ. Sathā kira vutthavasso pavāretvā dve aggasāvake ohāya “dakkhiṇāgiriṃ cārikaṃ gamissāmī”ti nikkhami, rājā pase-nadi kosalo, anāthapiṇḍiko gahapati, visākhā mahā-upāsikā, aññe ca bahujanā dasabalaṃ nivattetuṃ nāsakkhimsu. Anāthapiṇḍiko gahapati “sathāraṃ niva-



ttetuṃ nāsakkhin”ti raho cintayamāno nisīdi. Atha naṃ puṇṇā nāma dāsī disvā “kiṃ nu kho te, sāmi, na pubbe viya indriyāni vip̐pasannāni”ti pucchi. Āma, puṇṇe, satthā cārikaṃ pakkanto, tamahaṃ nivattetuṃ nāsakkhiṃ. Na kho pana sakkā jānituṃ puna sīghaṃ āgaccheyya vā na vā, tenāhaṃ cintayamāno nisinnoti. Sacāhaṃ dasabalaṃ nivatteyyaṃ, kiṃ me kareyyāsīti? Bhujissaṃ taṃ karissāmi. Sā gantvā satthāraṃ vanditvā “nivattatha, bhante”ti āha. Mama nivattanapa-cayā tvaṃ kiṃ karissasīti? Tumhe, bhante, mama parādhīnabhāvaṃ jānātha, aññaṃ kiñci kātuṃ na sakkomi, saraṇesu pana patiṭṭhāya pañca silāni rakkhissāmi. Sādhu sādhu puṇṇeti, satthā dhammagāravena ekapadasmiññeva nivatti. Vuttañhetuṃ- “dhammagaru, bhikkhave, tathāgato dhammagāravo”ti (a. ni. 5.99).

Satthā nivattitvā jetavanamahāvihāraṃ pāvisi. Mahājano puṇṇāya sādhu-kārasa-hassāni adāsi. Satthā tasmīṃ samāgame dhammaṃ desesi, caturāsītipāṇasa-hassāni amatapānaṃ pivīsu. Puṇṇāpi seṭṭhinā anuññātā bhikkhuni-upassayaṃ gantvā pabbaji. Sammāsambuddho sārīputtamoggallāne āmantetvā “ahaṃ yaṃ disaṃ cārikāya nikkhanto, tattha na gacchāmi. Tumhe tumhākaṃ parisāya saddhiṃ taṃ disaṃ cārikaṃ gacchathā”ti vatvā uyyojesi. Imissaṃ atthupattiyaṃ **ekaṃ samayaṃ āyasmā sārīputto** Ti-ādi vuttaṃ.

Tattha **veḷukaṇḍakīti** veḷukaṇṭakanagaravāsini. Tassa kira nagarassa pākāragu-ttatthāya pākārapariyantena veḷū ropitā, tenassa veḷukaṇṭakanteva (3.0170) nāmaṃ jātaṃ. **Pārāyananti** nibbānasaṅkhātāpāraṃ ayanato pārāyananti laddha-vohāraṃ dhammaṃ. **Sarena bhāsatīti** sattabhūmikassa pāsādassa uparimatale susaṃvihitārakkhaṭṭhāne nisinnā samāpattibalena rattibhāgaṃ vītināmetvā samā-pattito vuṭṭhāya “imaṃ rattāvasesaṃ katarāya ratiyā vītināmessāmi”ti cintetvā “dhammaratiyā”ti katasanniṭṭhānā tiṇi phalāni pattā ariyasāvikā aḍḍhateyyagāthā-sataparimāṇaṃ pārāyanasuttaṃ madhurena sarabhaññaena bhāsatī. **Assosi khoti** ākāsaṭṭhakavimānāni pariharitvā tassa pāsādassa uparibhāgaṃ gatena maggena naravāhanayānaṃ āruya gacchamāno assosi. **Kathāpariyosānaṃ āgamayamāno atṭhāsīti** “kiṃ saddo esa bhaṇe”ti pucchitvā “nandamātāya upāsikāya sarabhañña-saddo”ti vutte otaritvā “idamavocā”ti idaṃ desanāpariyosānaṃ olokento avidūra-ṭṭhāne ākāse atṭhāsī.

pāsāṇakacetiye nisīditvā soḷasannaṃ pārāyanikabrāhmaṇānaṃ sammāsambu-  
**Sādhu bhagini, sādhu bhaginī**ti “suggahitā te bhagini dhammadesanā sukathitā,  
pāsāṇakacetiye nisīditvā soḷasannaṃ pārāyanikabrāhmaṇānaṃ sammāsambu-  
ddhena kathitadivase ca ajja ca na kiñci antaraṃ passāmi, majjhe bhinnasu-  
vaṇṇaṃ viya te satthu kathitena saddhiṃ sadisameva kathitaṃ”ti vatvā sādhu-  
kāraṃ dadanto evamāha. **Ko paneso bhadrāmukhā**ti imasmim̐ susaṃvihitārakkha-  
ṭṭhāne evaṃ mahantena saddena ko nāmesa, bhadrāmukha, laddhamukha, kiṃ  
nāgo supaṇṇo devo māro brahmāti suvaṇṇapaṭṭavaṇṇaṃ vātapānaṃ vivarivā  
vigatasārajjā tīṇi phalāni pattā ariyasāvikaṃ vessavaṇena saddhiṃ kathayamānā  
evamāha. **Ahaṃ te bhagini bhātā**ti sayaṃ sotāpannattā anāgāmi-ariyasāvikaṃ  
jeṭṭhikaṃ maññaṃāno “bhaginī”ti vatvā puna taṃ paṭhamavaye ṭhitattā attano  
kaniṭṭhaṃ, attānaṃ pana navutivassasatasahassāyukattā mahallakatarāṃ mañña-  
māno “bhātā”ti āha. **Sādhu bhadrāmukhā**ti, bhadrāmukha, sādhu sundaraṃ,  
svāgamaṃ te āgamaṃ, āgantaṃ yuttaṭṭhānamevasi āgatoti attho. **Idaṃ te  
hotu ātithēyyanti** idameva dhammabhaṇanaṃ tava atithipaṇṇākāro hotu, na hi te  
aṅgaṃ ito uttaritaraṃ dātabbaṃ passāmīti adhippāyo (3.0171). **Evañceva me  
bhavissati ātithēyyanti** evaṃ attano pattidānaṃ yācitvā “ayaṃ te dhammakathika-  
sakkāro”ti aḍḍhateḷasāni koṭṭhasatāni rattasālīnaṃ pūretvā “yāvāyaṃ upāsikā  
carati, tāva mā khayaṃ gamiṃsū”ti adhiṭṭhahitvā pakkāmi. Yāva upāsikā aṭṭhāsi,  
tāva koṭṭhānaṃ heṭṭhimatalaṃ nāma daṭṭhuṃ nāsakkhiṃsu. Tato paṭṭhāya “nanda-  
mātāya koṭṭhāgāraṃ viyā”ti vohāro udapādi.

**Akatapātarāso**ti abhuttapātarāso. **Puññaṃ**ti pubbacetanā ca muñcanacetanā ca.  
**Puññaṃmahī**ti aparacetanā. **Sukhāya hotū**ti sukhatthāya hitatthāya hotu. Evaṃ  
attano dāne vessavaṇassa pattiṃ adāsi.

**Pakaraṇeti** kāraṇe. **Okkassa pasayhā**ti ākaḍḍhitvā abhibhavitvā. **Yakkhayo-  
ninti** bhummadevatābhāvaṃ. **Teneva purimena attabhāvena uddassetī**ti purimasa-  
rīrasadisameva sarīraṃ māpetvā alaṅkatapaṭiyatto sirigabbhasayanatale attānaṃ  
dasseti. **Upāsikā paṭidesitā**ti upāsikā ahanti evaṃ upāsikābhāvaṃ desesiṃ. **Yāva-  
deti** yāvadeva. Sesāṃ sabbattha uttānamevāti.

Mahāyaññavaggo pañcamaṃ.

Paṇṇāsakaṃ niṭṭhitaṃ.

## 6. Abyākatavaggo

### 1. Abyākatasuttavaṇṇanā

54. Chaṭṭhavaggassa (3.0172) paṭhame **abyākatavatthūsūti** ekaṃsādivasena akathitavatthūsu. **Tathāgatoti** satto. **Diṭṭhigatametanti** micchādiṭṭhimattakameṭaṃ, na tāya diṭṭhiyā gahitasatto nāma atthi. **Paṭipadanti** ariyamaggaṃ. **Na chambhatīti** diṭṭhivasena na kampati. Sesapadesupi eseṅva nayo. **Taṇhāgatanti** diṭṭhitaṇhā. **Saññāgatā**dīsupi eseṅva nayo. Diṭṭhisaññā eṅva hettha saññāgataṃ, diṭṭhinissitamānoyeṅva diṭṭhimaññitameṅva vā maññitaṃ, diṭṭhipapañcova papañcitaṃ, diṭṭhupādānameṅva upādānaṃ, diṭṭhiyā virūpaṃ paṭisaraṇabhāvoyeṅva vippaṭisāro nāmāti veditabbo. Ettha ca diṭṭhiggahaṇena dvāsaṭṭhi diṭṭhiyo, diṭṭhinirodhagāminipaṭipadāgahaṇena sotāpattimaggo gahitoti.

## 2. Purisagatisuttavaṇṇanā

55. Dutiye **purisagatiyoti** purisassa ñāṇagatiyo. **Anupādāparinibbānanti** apaccayanibbānaṃ. **No cassāti** atīte attabhāvanibbattaṃ kammaṃ no ce abhaviṅssa. **No ca me siyāti** etarahi me ayaṃ attabhāvo na siyā. **Na bhavissatīti** etarahi me anāgatattabhāvanibbattaṃ kammaṃ na bhavissati. **Na ca me bhavissatīti** anāgate me attabhāvo na bhavissati. **Yadatthi yaṃ bhūtanti** yaṃ atthi yaṃ bhūtaṃ paccuppannakkhandhapañcakaṃ. **Taṃ pajahāmiti upekkhaṃ paṭilabhatīti** taṃ tattha chandarāgappahānena pajahāmiti vipassanupekkhaṃ paṭilabhati. **Bhave na rajjatīti** atīte khandhapañcakaṃ taṇhādiṭṭhihi na rajjati. **Sambhave na rajjatīti** anāgatepi tatheṅva na rajjati. **Atthuttari padaṃ santanti** uttari santaṃ nibbānapadaṃ nāma atthi. **Sammappaññāya passatīti** taṃ saḅvipassanāya maggapaññāya sammā passati. **Na sabbena sabbanti** ekaccānaṃ kilesānaṃ appahīnattā saccapaṭicchādakassa tamassa sabbaso aviddhaṃsitattā na sabbākārena sabbhaṃ. **Haññamāneti** saṇḍāseṅva gahetvā muṭṭhikāya koṭṭiyamāne. **Antarāparinibbāyīti** upapattisaṃmanantarato paṭṭhāya āyuno vemajjhaṃ anatikkamitvā etthantare kilesaparinibbānena parinibbuto hoti. **Anupahacca talanti** ākāsatalaṃ anupahacca anatikkamitvā (3.0173), bhūmiṃ appatvā ākāseyeṅva nibbāyeyyāti imāhi tīhi upamāhi tayo antarāparinibbāyī dassitā.

**Upahaccaparinibbāyīti** āyuvemajjhaṃ atikkamitvā pacchimakoṭṭiṃ appatvā parinibbuto hoti. **Upahacca talanti** jalamānā gantvā ākāsatalaṃ atikkamitvā pathavītalaṃ vā upahanitvā pathaviyaṃ patitamattāṅva nibbāyeyya. Asañkhārena appayoṅgena kilese khepetvā parinibbāyīti **asañkhāraparinibbāyī**. Sasañkhārena sappayoṅgena kilese khepetvā parinibbāyīti **sasañkhāraparinibbāyī**. **Gacchanti** nirāraḅkhaṃ araññaṃ. **Dāyanti** sārakkhaṃ abhayatthāya dinnaṃ araññaṃ. Sesameṭtha uttānattameṅva. Imasmiṃ sutte ariyapuggalāṅva kathitāti.

## 3. Tissabrahmāsuttavaṇṇanā

56. Tatiye **bhikkhuniyoti** mahāpajāpatiyā parivārā pañcasatā bhikkhuniyo. **Vimuttāti** pañcahi vimuttīhi vimuttā. **Anupādisesāti** upādānasesaṃ aṭṭhapetvā pañcahi vimuttīhi anavasesāhipi vimuttā. **Sa-upādiseṅva vā sa-upādiseso** Ti sa-upādāna-

sese puggale “sa-upādānaseso ayan”ti. Itarasmimpi eseva nayo. **Tissoti** therassa saddhivihārikabrahmā. **Anulomikānīti** paṭipattiyā anulomāni vivittāni antimapariyantimāni. **Indriyānīti** saddhādīni vipassanindriyāni. **Samannāyamaṇoti** samannāhāre ṭhapayamāno. **Na hi pana teti** idaṃ kasmā ārabhi? Sattamassa puggalassa dassanatthaṃ. Sattamo hi saddhānusāripuggalo na dassito. Atha bhagavā balavavipassakavasena taṃ dassento evamāha. Tattha **sabbanimittānanti** sabbesaṃ niccanimittādīnaṃ. **Animittanti** balavavipassanāsamādhim.

#### 4. Sīhasenāpatisuttavaṇṇanā

**57.** Catutthe **maccharīTi** pañcamaccherayutto. **Kadariyoti** thaddhamacchariyo, paresaṃ diyyamānampi vāreti. **Anuppadānaratoti** punappunaṃ dānaṃ dadamānova ramati. **Anukampantāti** “ko ajja amhehi anuggahetabbo, kassa deyyadhammaṃ vā paṭiggaṇheyyāma, dhammaṃ vā deseyyāmā”ti evaṃ cittaena anukampamānā.

#### 5. Arakkheyyasuttavaṇṇanā

**58.** Pañcame (3.0174) **nimittanti** dhammanimittampi puggalanimittampi. Ayañhi attanā desitadhamme ekapadampi durakkhātaṃ aniyyānikaṃ apassanto dhammanimittaṃ na samanupassati, “durakkhāto tayā dhammo na svākkhāto”ti utṭhahitvā paṭippharantaṃ ekaṃ puggalampi apassanto puggalanimittaṃ na samanupassati nāma. Sesadvayepi eseva nayo. Chaṭṭhasattamāni uttānāneva.

#### 8. Pacalāyamānasuttavaṇṇanā

**61.** Aṭṭhame **pacalāyamānoti** taṃ gāmaṃ upanissāya ekasmiṃ vanasaṇḍe samaṇadhammaṃ karonto sattāhaṃ caṅkamanavīriyena nimmathitattā kilantagatto caṅkamanakoṭiyam pacalāyamāno nisinno hoti. **Pacalāyasi noti** niddāyasi nu. **Anumajjitvāti** parimajjitvā. **Ālokasaññanti** middhavinodana-ālokasaññaṃ. **Divāsaññanti** divātisaññaṃ. **Yathā divā tathā rattinti** yathā divā ālokasaññā adhiṭṭhitā, tathā naṃ rattimpi adhiṭṭhaheyyāsi. **Yathā rattim tathā divāti** yathā ca te rattim ālokasaññā adhiṭṭhitā, tathā naṃ divāpi adhiṭṭhaheyyāsi. **Sappabhāsanti** dibbaccakkuñṇatthāya sahobhāsaṃ. **Pacchāpuresaññīti** purato ca pacchato ca abhiharāṇasaññāya saññāvā. **Antogatehi indriyehīti** bahi avikkhittehi anto anupaviṭṭheheva pañcahi indriyehi. **Middhasukhanti** niddāsukhaṃ. Ettakena ṭhānena bhagavā therassa middhavinodanakammaṭṭhānaṃ kathesi. **Soṇḍanti** mānasoṇḍaṃ. **Kiccakaraṇiyānīti** ettha avassaṃ kattabbāni kiccāni, itarāni karaṇiyāni. **Maṅkubhāvoti** nittejatā domanassatā. Ettakena ṭhānena sathārā therassa bhikkhācāravattaṃ kathitaṃ.

Idāni bhasse pariyantakāritāya samādapetuṃ **tasmātihāti**-ādimāha. Tattha **viggāhikakathanti** “na tvaṃ imaṃ dhammavinayaṃ ājānāsī”ti-ādinayappavattā viggāhi-

kakathā. **Nāhaṃ moggallānāti**-ādi pāpamittasaṃsaggavivajjanatthaṃ vuttaṃ. **Kittāvatā nu khoti** kittakena nu kho. **Taṇhāsaṅkhayavimutto hotīti** taṇhāsaṅkhaye nibbāne taṃ ārammaṇaṃ katvā vimuttacittatāya (3.0175) taṇhāsaṅkhayavimutto nāma saṃkhittena kittāvatā hoti. Yāya paṭipattiyā taṇhāsaṅkhayavimutto hoti, tameva khīṇāsavassa bhikkhuno pubbabhāgapaṭipadaṃ saṃkhittena desethāti pucchati. **Accantaniṭṭhoti** khayavayasaṅkhātāṃ antaṃ atītāti accantā, accantā niṭṭhā assāti accantaniṭṭho, ekantaniṭṭho satataniṭṭhoti attho. **Accantayogakkhemīti** accantaṃ yogakkhemī, niccayogakkhemīti attho. **Accantabrahmacārīti** accantaṃ brahmacārī, niccabrahmacārīti attho. Accantaṃ pariyosānamassāti purimanayeneva **accantapariyosāno**. **Seṭṭho devamanussānanti** devānañca manussānañca seṭṭho uttamo. Evarūpo bhikkhu kittāvatā hoti, saṅkhepeneva tassa paṭipattiṃ kathethāti yācati.

**Sabbe dhammā nālaṃ abhinivesāyāti** ettha sabbe dhammā nāma pañca-kkhandhā dvādasāyatanāni aṭṭhārasa dhātuyo, te sabbe paṭipattivivajjanasena abhinivesāya nālaṃ na pariyattā na samattā na yuttā. Kasmā? Gahitākārena atīṭṭhānato. Te hi niccā sukhā attāti gahitāpi aniccā dukkhā anattāva sampajjanti. Tasmā nālaṃ abhinivesāya. **Abhijānāti** aniccaṃ dukkhaṃ anattāti ñātapariññāya abhijānāti. **Parijānāti** tatheva tīraṇapariññāya parijānāti. **Yaṃkiñci vedananti** antamaso pañcaviññāṇasampayuttaṃ yaṃkiñci appamattakampi vedanaṃ anubhavati. Iminā bhagavā therassa vedanāvasena ca vinivaṭṭetvā arūpapariggahaṃ dassesi.

**Aniccānupassīti** aniccato anupassanto. **Virāgānupassīti** ettha dve virāgā khaya-virāgo ca accantavirāgo ca. Tattha saṅkhārānaṃ khayaṃ khayato passanā vipassanāpi, accantavirāgaṃ nibbānaṃ virāgato dassanamaggañāṇampi virāgānupassanā. Tadubhayasamaṅgipuggalo virāgānupassī nāma. Taṃ sandhāya vuttaṃ-“virāgānupassī”ti, virāgato anupassantoti attho. **Nirodhānupassimhipi** eseva nayo. Nirodhopi hi khayanirodho accantanirodhoti duvidhoyeva. **Paṭinissaggānupassīti** ettha paṭinissaggo vuccati vossaggo. So ca pariccāgavossaggo pakkhandanavossaggoti duvidho hoti. Tattha **pariccāgavossaggoti** vipassanā. Sā hi tadaṅgava-sena kilese ca khandhe ca vossajati. **Pakkhandanavossaggoti** maggo. So hi nibbānaṃ ārammaṇato pakkhandati. Dvīhipi vā kāraṇehi so vossaggoyeva, samuccedavasena khandhānaṃ kilesānañca vossajanato nibbāne ca pakkhandanato. Tasmā (3.0176) kilese ca khandhe ca pariccajatīti pariccāgavossaggo. Nirodhāya nibbānadhātuyā cittaṃ pakkhandatīti pakkhandanavossaggoti ubhayampetaṃ magge sameti. Tadubhayasamaṅgī puggalo imāya paṭinissaggānupassanāya samannāgatattā paṭinissaggānupassī nāma hoti. Taṃ sandhāyetaṃ vuttaṃ. **Na kiñci loke upādiyatīti**

kiñci ekampi sañkhāragataṃ tañhāvasena na upādiyati na gaṇhāti na parāmasati. **Anupādiyaṃ na paritassatīti** aggaṇhanto tañhāparitassanāya na paritassati. **Paccattaṃyeva parinibbāyatīti** sayameva kilesaparinibbānena parinibbāyati. **Khīṇā jāti-**ti-ādinā panassa paccavekkhaṇā dassitā. Iti bhagavā saṃkhittena khīṇāsavassa pubbhāgappaṭipadaṃ pucchito saṃkhitteneva kathesi. Idaṃ pana suttaṃ therassa ovādopi ahosi vipassanāpi. So imasmimṃyeva sutte vipassanaṃ vaḍḍhetvā arahattaṃ pattoti.

## 9. Mettasuttavaṇṇanā

**62.** Navame mā, bhikkhave, puññānaṃ bhāyitthāti puññāni karontā tesam mā bhāyittha. **Mettacittaṃ bhāvesinti** tikacatukkajjhānikāya mettāya sampayuttaṃ paṇītaṃ katvā cittaṃ bhāvesinti dasseti. **Samvaṭṭamāne sudāhanti** samvaṭṭamāne sudaṃ ahaṃ. **Samvaṭṭamāneti** jhāyamāne vipajjamāne. **Dhammikoti** dasakusala-dhammasamannāgato. **Dhammarājā**ti tasseva vevacanaṃ. Dhammena vā laddharajjattā dhammarājā. **Cāturantoti** puratthimasamuddādīnaṃ catunnaṃ samuddānaṃ vasena cāturantāya pathaviyā issaro. **Vijitāvīti** vijitasaṅgāmo. Janapado tasmim thāvariyaṃ thirabhāvaṃ pattoti **janapadatthāvariyaṃ appatto**. **Parosahassanti** atirekasahassaṃ. **Sūrāti** abhīruno. **Viraṅgarūpāti** vīraṇaṃ aṅgaṃ vīraṅgaṃ, vīriyassetam nāmaṃ. Vīraṅgarūpametesanti vīraṅgarūpā. Vīriyajātikā vīriyasa-bhāvā vīriyamayā viya akilāsuno divasampi yujjhantā na kilamantīti vuttaṃ hoti. **Sāgarapariyantanti** cakkavālapabbataṃ sīmaṃ katvā ṭhitasamuddapariyantaṃ. **Adaṇḍenāti** dhanadaṇḍenapi chejjabhejjānusāsanaena satthadaṇḍenapi vināyeva. **Asatthenāti** ekatodhārādīnā paraviheṭhanasatthenapi vināyeva. **Dhammena abhivijiyāti** ehi kho, mahārājāti evaṃ paṭirājūhi sampaṭicchitāgamano “pāṇo na hanta-bbo”ti-ādinā dhammeneva vuttappakāraṃ pathaviṃ abhivijinitvā.

**Sukhesinoti** (3.0177) sukhapariyesake satte āmanteti. **Suññabrahmūpagoti** suññabrahmavimānūpago. **Pathaviṃ imanti** imaṃ sāgarapariyantaṃ mahāpa-thaviṃ. **Asāhasenāti** na sāhasikakammena. **Samena manusāsītanti** samena kammena anusāsīṃ. **Tehi etaṃ sudesitanti** tehi saṅgāhakehi mahākāruṇikehi buddhehi etaṃ ettakaṃ ṭhānaṃ sudesitaṃ sukathitaṃ. **Pathabyoti** puthavisāmiko.

## 10. Bhariyāsuttavaṇṇanā

**63.** Dasame **kevaṭṭā maññe macchavilopeti** kevaṭṭānaṃ macchapacchiṃ otā-retvā ṭhitaṭṭhāne jāle vā udakato ukkhittamatte macchaggāhakānaṃ mahāsaddo hoti, taṃ sandhāyetaṃ vuttaṃ. **Sujātāti** visākhāya kaniṭṭhā. **Sā neva sassuṃ ādiya-**tīti sassuyā kattabbavattaṃ nāma atthi, taṃ na karoti, sassūtipi naṃ na gaṇeti. **Na sasuraṃ ādiyatīti** vacanaṃ na gaṇhāti. Evaṃ anādaratāyapi aggahaṇenapi na ādiyati nāma. Sesesupi eseva nayo. Evaṃ anāthapiṇḍiko suṇisāya ācāraṃ gahetvā satthu purato nisīdi. Sāpi sujātā “kiṃ nu kho ayaṃ seṭṭhi dasabalassa santike mayhaṃ guṇaṃ kathessati udāhu aguṇaṃ”ti gantvā avidūre saddaṃ

suṇantī aṭṭhāsi. Atha naṃ satthā **ehi sujātetī** āmantesi.

**Ahitānukampinī** na hitānukampinī. **Aññesūti** parapurisesu. **Atimaññateti** omānāti mānavasena atimaññati. **Dhanena kītassāti** dhanena kītā assa. **Vadhāya ussukā** vadhituṃ ussukkamāpannā. **Yaṃ itthiyā vindati sāmiko dhananti** itthiyā sāmiko yaṃ dhanam labhati. **Appampi tassa apahātumicchatī** thokatopi assa harituṃ icchati, uddhane āropita-ukkhaliyaṃ pakkhipitabbataṇḍulatopi thokaṃ haritumeva vāyamaṭi. **Alasāti** nisinnaṭṭhāne nisinnāva ṭhitatṭhāne ṭhitāva hoti. **Pharusāti** kharā. **Duruttavādinī** dubbhāsita bhāsini, kakkhaḷaṃ vāḷakathameva katheti. **Uṭṭhāyakānaṃ abhibhuyya vattatī** ettha uṭṭhāyakānanti bahuvacanavasena viriyuṭṭhānasampanno sāmiko vutto, tassa taṃ uṭṭhānasampattiṃ abhibhavivā heṭṭhā katvā vattati. **Pamodatī** āmoditapamoditā hoti (3.0178). **Koleyyakāti** kulasampannā. **Patibbatāti** patidevatā. **Vadhadaṇḍatajjitāti** daṇḍakaṃ gahetvā vadhena tjjitā, “ghātesāmi nan”ti vuttā. **Dāsīsamanti** sāmikassa vattapūrikā dāsīti maṃ bhagavā dhāretūti vatvā saraṇesu patitṭhāsi.

## 11. Kodhanasuttavaṇṇanā

**64.** Ekādasame **sapattakantāti** sapattānaṃ verīnaṃ kantā piyā tehi icchitapa-tthitā. **Sapattakaraṇāti** sapattānaṃ verīnaṃ atthakaraṇā. **Kodhaparetoti** kodhānugato. **Pacuratthatāyāti** bahu-atthatāya bahuhitatāya. **Anatthampīti** avuddhimpī. **Attho me gahitoti** vuḍḍhi me gahitā.

**Atho atthaṃ gahetvānāti** atho vuddhiṃ gahetvā. **Anatthaṃ adhipajjatīti** anattho me gahitoti sallakkheti. **Vadhaṃ katvānāti** paṇātipātakammaṃ katvā. **Kodhasammadasammattoti** kodhamadena matto, ādinnagahitaparāmaṭṭhoti attho. **Āyasyanti** ayasabhāvaṃ, ayaso niyaso hotīti attho. **Antarato jātanti** abbhantare uppannaṃ. **Atthaṃ na jānātīti** vuddhi-atthaṃ na jānāti. **Dhammaṃ na passatīti** samathavipassanādhammaṃ na passati. **Andhatamanti** andhabhāvakaraṃ tamaṃ bahalatamaṃ. **Sahateti** abhibhavati.

**Dummaṅkuyanti** dummaṅkubhāvaṃ nittejataṃ dubbaṇṇamukhataṃ. **Yato patāyatīti** yadā nibbattati. **Na vāco hoti gāravoti** vacanassapi garubhāvo na hoti. **Na dīpaṃ hoti kiñcananti** kāci patitṭhā nāma na hoti. **Tapaniyānīti** tāpajanakāni. **Dhammehīti** samathavipassanādhammehi. **Ārakāti** dūre. **Brāhmaṇanti** khīṇāsava-brāhmaṇaṃ. **Yāya mātu bhatoti** yāya mātaraṃ bhato posito. **Pāṇadadiṃ santinti** jīvitadāyikaṃ samānaṃ. **Hanti kuddho puthuttānanti** kuddho puggalo puthu nānākāraṇehi attānaṃ hanti. **Nānārūpesu mucchitoti** nānārammaṇesu adhimucchito hutvā. **Rajjuyā bajjha miyantīti** rajjuyā bandhitvā maranti. **Pabbatāmapī** kandareti pabbatakandarepi patitvā maranti.

**Bhūnahaccānīti** (3.0179) hatavuddhīni. **Itāyanti** iti ayaṃ. **Taṃ damena samucchi-ndeti** taṃ kodhaṃ damena chindeyya. Katarena damenāti? **Paññāvīriyena diṭṭhiyāti** vipassanāpaññāya ceva vipassanāsampayuttena kāyikacetavīriyena ca maggasammādiṭṭhiyā ca. **Tatheva dhamme sikkhethāti** yathā akusalaṃ samucchi-ndeyya, samathavipassanādhammepi tatheva sikkheyya. **Mā no dummaṅkuyaṃ**

**ahūti** mā amhākaṃ dummaṅkubhāvo ahoṣīti imamatthaṃ paṭṭhaya mānā. **Anāyāsā**ti anupāyāsā. **Anussukā**ti katthaci ussukkaṃ anāpannā. Sesam sabbattha uttānamevāti.

Abyākatavaggo chaṭṭho.

## 7. Mahāvaggo

### 1. Hiri-ottappasuttavaṇṇanā

**65.** Sattamassa paṭṭhame **hatūpanisoti** hata-upaniso chinnapaccayo. **Yathābhūta-ñāṇadassananti** taruṇavipassanā. **Nibbidāvirāgoti** balavavipassanā ceva maggo ca. **Vimuttiñāṇadassananti** arahattavimutti ca paccavekkhaṇā ca.

### 2. Sattasūriyasuttavaṇṇanā

**66.** Dutiye yasmā ayaṃ sattasūriyadesanā tejosamvaṭṭadassanavasena pavattā, tasmā tayo samvaṭṭā, tisso samvaṭṭasīmā, tiṇi samvaṭṭamūlāni, tiṇi kolāhālānīti ayaṃ tāva āditova imassa suttassa purecārikakathā veditabbā. Sā visuddhimagge (visuddhi. 2.403) pubbenivāsānussatiniddese vitthāritāva. **Etadavocāti** aniccakammaṭṭhānikānaṃ pañcannaṃ bhikkhusatānaṃ ajjhāsayena upādinnakānaṃ anupādinnakānaṃ saṅkhārānaṃ vipattidassanattamaṃ etaṃ “aniccā, bhikkhave, saṅkhārā”ti-ādisattasūriyopamasuttantaṃ avoca. Tattha **aniccāti** hutvā abhāvaṭṭhena aniccā. **Saṅkhārāti** upādinnaka-anupādinnakā saṅkhāradhammā. **Addhuvāti** evaṃ aciraṭṭhena na dhuvā. **Anassāsikāti** (3.0180) asassatabhāvena assāsa-rahitā. **Alamevāti** yuttameva.

**Ajjhogāḷhoti** uduke anupaviṭṭho. **Accuggatoti** udakapiṭṭhito uggato. **Devo na vassatīti** paṭṭhamaṃ tāva upakappanamegho nāma koṭisatasahassacakkavāḷe ekamegho hutvā vassati, tadā nikkhantabijaṃ na puna gehaṃ pavisati. Tato paṭṭhāya dhamakaraṇe niruddhaṃ viya udakaṃ hoti, puna ekabindumpi devo na vassatīti upamānadhammakathāva pamāṇaṃ. Vinassante pana loke paṭṭhamaṃ avīcīto paṭṭhāya tuccho hoti, tato uṭṭhahitvā sattā manussaloke ca tiracchānesu ca nibbattanti. Tiracchānesu nibbattāpi puttabhātikesu mettaṃ paṭilabhivā kālakatā devamanussesu nibbattanti. Devatā ākāseṇa carantiyo ārocenti- “na idaṃ ṭhānaṃ sassataṃ na nibaddhaṃ, mettaṃ bhāvētha, karuṇaṃ, muditaṃ, upekkhaṃ bhāvēthā”ti. Te mettādayo bhāvetvā tato cutā brahmaloke nibbattanti.

**Bijagāmāti** ettha bijagāmo nāma pañca bijajātāni. **Bhūtagāmo** nāma yaṃkiñci nikkhantamūlapaṇṇaṃ haritakaṃ. **Osadhitiṇavanappatayoti** ettha **osadhīti** osadharukkhā. **Tiṇāti** bahisārā tālanāḷikerādayo. **Vanappatayoti** vanajeṭṭhakarukkhā. **Kunnadiyoti** ṭhapetvā pañca mahānadiyo avasesā ninnagā. **Kusobbhā**ti ṭhapetvā



satta mahāsare avasesā rahadādayo. **Dutiyo sūriyoti-**ādīsu dutiyasūriyakāle eko udeti, eko atthaṅgameti. Tatiyakāle eko udeti, eko atthaṅgameti, eko majjhe hoti. Catutthakāle catukulike gāme cattāro piṇḍacārikā dvārapaṭipāṭiyā ṭhitā viya honti. Pañcamādikālepi eseva nayo. **Palujjantīti** chijjivā chijjivā patanti. **Neva chārikā paññāyati na masīti** cakkavāḷamahāpathavī sinerupabbatarājā himavā cakkavāḷa-pabbato cha kāmasaggā paṭhamajjhānikabrahmalokāti ettake ṭhāne daḍḍhe accharāya gahetabbamattāpi chārikā vā aṅgāro vā na paññāyati. **Ko mantā ko saddhātāti** ko tassa saddhāpanatthāya samattho, ko vā tassa saddhātā. **Aññatra ditṭhapadehīti** ditṭhapade (3.0181) sotāpanne ariyasāvake ṭhapetvā ko añño saddahissatīti attho.

**Vītarāgoti** vikkhambhanavasena vītarāgo. **Sāsanam ājāniṃsūti** anusitṭhim jāniṃsu, brahmalokasahabyatāya maggaṃ paṭipajjiṃsu. **Samasamagatiyoti** dutyattabhāve sabbākārena samagatiko ekagatiko. **Uttari mettaṃ bhāveyyanti** paṭhamajjhānato uttari yāva tikacatukkajjhānā paṇītaṃ katvā mettaṃ bhāveyyaṃ. **Cakkhumāti** pañcahi cakkhūhi cakkhumā. **Parinibbutoti** bodhipallaṅkeyeva kilesa-parinibbānena parinibbuto. Evaṃ aniccalakkhaṇaṃ dīpetvā satthari desanaṃ vini-vaṭṭente pañcasatāpi te aniccakammaṭṭhānikā bhikkhū desanānusārena ñāṇaṃ pesetvā nisinnāsanēsuyeva arahattaṃ pāpuṇiṃsūti.

### 3. Nagaropamasuttavaṇṇanā

67. Tatiye **yato** Ti yadā. **Paccantimanti** raṭṭhapariyante raṭṭhāvasāne niviṭṭhaṃ. Majjhimadesanagarassa pana rakkhākiccaṃ natthi, tena taṃ na gahitaṃ. **Nagara-parikkhārehi suparikkhatanti** nagarālaṅkārehi alaṅkataṃ. **Akaraṇīyanti** akattabbaṃ ajiniyaṃ. **Gambhīranemāti** gambhīra-āvāṭā. **Sunikhātāti** suṭṭhu sannisīdāpitā. Taṃ panetaṃ esikāthambhaṃ iṭṭhakāhi vā karonti silāhi vā khadirādīhi vā sāraru-kkhehi. Taṃ nagaraguttatthāya karontā bahinagare karonti, alaṅkāratthāya karontā antonagare. Taṃ

iṭṭhakāmayam karontā mahantaṃ āvāṭam katvā cayaṃ cinitvā upari aṭṭhaṃsaṃ katvā sudhāya limpanti. Yadā hatthinā dantehi abhīhato na calati, tadā sulitto nāma hoti. Silāthambhādayopi aṭṭhaṃsā eva honti. Te sace aṭṭha ratanā honti, caturatanamattam āvāṭe pavisati, caturatanamattam upari hoti. Soḷasaratanavīsa-tiratanesupi eseva nayo. Sabbesañhi upaḍḍham heṭṭhā hoti, upaḍḍham upari. Te gomuttavaṅkā honti, tena tesam antare padaramayaṃ katvā kammaṃ kātum sakkā hoti, te pana katacittakammā paggahitaddhajāva honti.

**Parikhāti** (3.0182) parikkhipitvā ṭhitamātikā. **Anupariyāyapathoti** anto pākārassa pākārena saddhim gato mahāpatho, yattha ṭhitā bahipākāre ṭhitehi saddhim yujjhanti. **Salākanti** saratomarādinissaggiyāvudham. **Jevanikanti** ekatodhārādise-sāvudham.

**Hatthārohāti** sabbepi hatthi-ācariyahatthivejjahatthibandhādayo. **Assārohāti** sabbepi assācariya-assavejja-assabandhādayo. **Rathikāti** sabbepi rathācariyara-thayodharatharakkhādayo. **Dhanuggahāti** issāsā. **Celakāti** ye yuddhe jayaddhajaṃ gahetvā purato gacchanti. **Calakāti** “idha rañño ṭhānaṃ hotu, idha asukamahāma-ttassā”ti evaṃ senābyūhakārakā. **Piṇḍadāyikāti** sāhasikamahāyodhā. Te kira parasenaṃ pavisitvā piṇḍapiṇḍamiva chetvā chetvā dayanti, uppatitvā niggaccha-ntīti attho. Ye vā saṅgāmamajjhe yodhānaṃ bhappāniyaṃ gahetvā pavisanti, tesampetaṃ nāmaṃ. **Uggā rājaputtāti** uggatuggatā saṅgāmāvacarā rājaputtā. **Pakkhandinoti** ye “kassa sīsaṃ vā āvudham vā āharāmā”ti vatvā “asukassā”ti vuttā saṅgāmaṃ pakkhanditvā tadeva āharanti, ime pakkhandantīti pakkhandino. Mahānāgā viya **mahānāgā**, hatthi-ādīsupi abhimukhaṃ āgacchantesu anivattiya-yodhānaṃ etaṃ adhivacanaṃ. **Sūrāti** ekasūrā, ye sajalikāpi savammikāpi samuddaṃ taritum sakkonti. **Cammayodhinoti** ye cammakañcukaṃ vā pavisitvā saraparittāṇacammaṃ vā gahetvā yujjhanti. **Dāsakaputtāti** balavasinehā gharadā-sayodhā. **Dovārikoti** dvārapālako. **Vāsanalepanasampannoti** vāsanena sabbaviva-rapaṭicchādanena sudhālepena sampanno. Bahi vā khāṇupākārasaṅkhātena vāsanena ghanamaṭṭhena ca sudhālepena sampanno puṇṇaghaṭapantiṃ dassetvā katacittakammaṃ paggahitaddhajo. **Tiṇakaṭṭhodakanti** hatthi-assādīnaṃ ghāsathāya gehānañca chādanatthāya āharitvā bahūsu ṭhānesu ṭhapitaṭṭhañca, gehakaraṇapacanaḍīnaṃ atthāya āharitvā ṭhapitakaṭṭhañca, yantehi pavesetvā pokkharāṇīsu ṭhapita-udakañca. **Sannicitam hotīti** paṭikacceva anekesu ṭhānesu suṭṭhu nicitaṃ hoti. **Abhantarānaṃ ratiyāti** antonagaravāsīnaṃ rati-atthāya. **Apari-tassāyāti** (3.0183) tāsam anāpajjanatthāya. **Sāliyavakanti** nānappakārā sāliyo ceva yavā ca. **Tilamuggamāsāparaṇṇanti** tilamuggamāsā ca sesāparaṇṇaṅca.

Idāni yasmā tathāgatassa nagare kammaṃ nāma natthi, nagarasadisam pana ariyasāvakaṃ, nagaraparikkhārasadise ca satta dhamme, catu-āhārasadisāni ca cattāri jhānāni dassetvā ekādasasu ṭhānesu arahattaṃ pakkipitvā desanaṃ vini-vaṭṭessāmīti ayaṃ upamā ābhatā. Tasmā taṃ desanaṃ pakāsetum idaṃ **evameva khoti**-ādi āraddham. Tattha **saddhammehīti** sudhammehi. **Saddhoti** okappanasad-dhāya ceva paccakkhasaddhāya ca samannāgato. Tattha dānasīlādīnaṃ phalaṃ saddahitvā dānādipuññakaraṇe saddhā okappanasaddhā nāma. Maggena āgata-

saddhā paccakkhasaddhā nāma. Pasādasaddhātīpi esā eva. Tassā lakkhaṇādihi vibhāgo veditabbo.

“Sampakkhandanalakkhaṇā ca, mahārāja, saddhā sampasādanalakkhaṇā cā”ti (mi. pa. 2.1.10) hi vacanato idaṃ saddhāya **lakkhaṇaṃ** nāma. “Tīhi, bhikkhave, ṭhānehi saddho pasanno veditabbo. Katamehi tīhi? Sīlavantānaṃ dassanakāmo hotī”ti-ādinā (a. ni. 3.42) nayena vuttaṃ pana saddhāya **nimittaṃ** nāma. “Ko cāhāro saddhāya, saddhammassavanantissa vacanīyan”ti (a. ni. 10.61) ayaṃ panassā **āhāro** nāma. “Saddhāpabbajitassa, bhikkhave, bhikkhuno ayaṃ anudhammo hoti, yaṃ rūpe nibbidābahulo viharissati”ti ayamassa **anudhammo** nāma. “Saddhā bandhati pātheyyaṃ, sirī bhogānamāsayo” (saṃ. ni. 1.79). “Saddhā dutiyā purisassa hoti” (saṃ. ni. 1.36). “Saddhāya tarati oghaṃ” (saṃ. ni. 1.246). “Saddhā bījaṃ tapo vuṭṭhi” (su. ni. 77; saṃ. ni. 1.197). “Saddhāhattho mahānāgo. Upekhāsetadantavā”ti-ādīsu pana suttesu etissā baddhabhattapuṭṭhādi-sarikkhatāya anekasarasatā bhagavatā pakāsītā. Imasmiṃ pana nagaropamasuttante esā acalassuppatiṭṭhitatāya esikāthambhasadisā katvā dassitā.

**Saddhesikoti** saddhaṃ esikāthambhaṃ katvā ariyasāvako akusalaṃ pajahatīti iminā nayena sabbapadesu yojanā kātābā. Apicettha hirottappehi tīsu dvāresu saṃvaro sampajjati, so catupārisuddhisīlaṃ hoti (3.0184). Iti imasmiṃ sutte ekādasasū ṭhānesu arahattaṃ pakkhipitvā desanāya kūṭaṃ gahitanti veditabbaṃ.

#### 4. Dhammaññūsuttavaṇṇanā

**68.** Catutthe **kālaṃ jānātīti** yuttappattakālaṃ jānāti. **Ayaṃ kālo uddesassāti** ayaṃ buddhavacanaṃ uggaṇhanakālo. **Paripucchāyāti** atthānatthaṃ kāraṇākāraṇaṃ paripucchāya. **Yogassā** Ti yoge kammaṃ pakkhipanassa. **Paṭisallānassāti** nilīyanassa ekībhāvassa. **Dhammānudhammappaṭipanno** Ti navannaṃ lokuttara-dhammānaṃ anurūpadhammaṃ pubbabhāgapaṭipadaṃ paṭipanno. **Evaṃ kho, bhikkhave, bhikkhu puggalaparoparaññū hotīti** evaṃ bhikkhu puggalānaṃ paroparaṃ tikkhamudubhāvaṃ jānanaśamattho nāma hoti.

#### 5. Pāricchattakasuttavaṇṇanā

**69.** Pañcame **pannapalāso**ti patitapalāso. **Jālakajātoti** sañjātapattapupphajālo. Tassa hi pattajālañca pupphajālañca saheva nikkhamati. **Khārakajātoti** pāṭiyekkaṃ sañjātena suvibhattena pattajālakena ca pupphajālakena ca samannāgato. **Kuṭumalakajātoti** sañjātamakuḷo. **Korakajātoti** avikasitehi mahākucchīhi sambhinnamukhehi pupphehi samannāgato. **Sabbapāliphulloti** sabbākārena supupphito. **Dibbe cattāro māseti** dibbena āyunā cattāro māse. Manussagaṇanāya pana tāni dvādasa vassasahassāni honti. **Paricārentīti** ito cito ca indriyāni cārenti, kīḷanti ramantīti attho.

**Ābhāya phuṭaṃ hotīti** tattakaṃ ṭhānaṃ obhāsenā phuṭaṃ hoti. Tesañhi pupphānaṃ bālasūriyassa viya ābhā hoti, pattāni paṇṇacchattappamaṇāni, anto

mahātumbamattā reṇu hoti. Pupphite pana pāricchattake ārohanakiccaṃ vā aṅku-  
sakaṃ gahetvā namanakiccaṃ vā pupphāharaṇatthaṃ caṅgoṭakakiccaṃ vā  
natthi, kantanakavāto uṭṭahitvā pupphāni vaṇṭato kantati, sampaṭicchana-  
kavāto sampaṭicchati, pavesanakavāto sudhammaṃ devasabhaṃ paveseti, sammajjana-  
kavāto purāṇapupphāni nīharati, santharaṇakavāto pattakaṇṇikakesarāni rañjento  
santharati. Majjhaṭṭhāne dhammāsanam (3.0185) hoti yojanappamāṇo ratanapa-  
llaṅko upari tiyojanena setacchattena dhāriyamānena, tadanantaram sakkassa  
devaraṅṅo āsanam atthariyati, tato tettiṃsāya devaputtānam, tato aññesaṃ mahe-  
sakkhānam devānam, aññataradevatānam pupphakaṇṇikāva āsanam hoti. Devā  
devasabhaṃ pavisitvā nisīdanti. Tato pupphehi reṇuvaṭṭi uggantvā uparikaṇṇikaṃ  
āhacca nipatamānā devatānam tigāvutappamāṇam attabhāvam lākhārasaparika-  
mmasajjitaṃ viya suvaṇṇacuṇṇapiṇjaram viya karoti. Ekacce devā ekekaṃ  
pupphaṃ gahetvā aññamaññaṃ paharantāpi kiḷantiyeva. Paharaṇakālepi mahātu-  
mbappamāṇā reṇu nikkhamitvā sarīram pabhāsampannehi gandhacuṇṇehi sañja-  
tamanosilārāgam viya karoti. Evaṃ sā kiḷā catūhi māsehi pariyosānam gacchati.  
**Ayamānubhāvoti** ayam anupharitum ānubhāvo.

Idāni yasmā na satthā pāricchattakena atthiko, tena pana saddhiṃ upametvā  
satta ariyasāvake dassetukāmo, tasmā te dassetum **evameva khoti**-ādimāha.  
Tattha **pabbajjāya cetetīti** pabbajissāmīti cinteti. **Devānamvāti** devānam viya. **Yāva  
brahmalokā saddo abhuggacchatīti** pathavitalato yāva brahmalokā sādhu-kārasa-  
ddena sabbaṃ ekasaddameva hoti. **Ayamānubhāvoti** ayam khīṇāsavassa  
bhikkhuno anupharaṇānubhāvo. Imasmim suttē catupārisuddhisīlam pabbajjāni-  
ssitaṃ hoti, kasiṇaparikkammaṃ paṭhamajjhānasannissitaṃ, vipassanāya saddhiṃ  
tayo maggā tīṇi ca phalāni arahattamaggasannissitāni honti. Desanāya heṭṭhato  
vā uparito vā ubhayato vā paricchedo hoti, idha pana ubhayato paricchedo.  
Tenetaṃ vuttaṃ. Saṅkhepato panettha vaṭṭavivaṭṭam kathitanti veditabbaṃ.

## 6. Sakkaccasuttavaṇṇanā

70. Chaṭṭhe **parisuddhā ca bhavissantīti** bhiiyosomattāya parisuddhā bhavi-  
ssanti nimmalā. **Sakammāragatoti** ettha sa-kāro nipātamattaṃ, kammāragato  
kammāruddhanagatoti attho.

## 7. Bhāvanāsuttavaṇṇanā

71. Sattame (3.0186) **ananuyuttassāti** na yuttappayuttassa hutvā viharato. **Seyya-  
thāpi, bhikkhave, kukkuṭiyā aṇḍānīti** imā kaṇhapakkhasukkapakkhavasena dve  
upamā vuttā. Tāsu kaṇhapakkhūpamā atthassa asādhikā, itarā sādhu-kāti sukka-  
pakkhūpamāya eva attho veditabbo. **Seyyathāti** opammatthe nipāto. **Apīti** sambhāva-  
natthe. Ubhayenāpi seyyathāpi nāma, bhikkhavi dasseti. **Kukkuṭiyā aṇḍāni attha  
vā dasa vā dvādasa vāti** ettha pana kiṅcāpi kukkuṭiyā vuttappakārato unādhikā-  
nīpi aṇḍāni honti, vacanasiliṭṭhatāya panetaṃ vuttaṃ. Evañhi loke siliṭṭham

vacanaṃ hoti. **Tānassūti** tāni assu, bhaveyyunti attho. **Kukkuṭiyā sammā adhisayitānīti** tāya janettiyā kukkuṭiyā pakkhe pasāretvā tesam upari sayantiyā sammā adhisayitāni. **Sammā pariseditānīti** kālena kālaṃ utuṃ gaṇhāpentiyā suṭṭhu samantato seditāni, usmīkatānīti vuttaṃ hoti. **Sammā paribhāvitānīti** kālena kālaṃ suṭṭhu samantato bhāvitāni, kukkuṭagandhaṃ gāhāpitānīti attho.

**Kiñcāpi tassā kukkuṭiyāti** tassā kukkuṭiyā imaṃ tividhakiriyākaraṇena appamādaṃ katvā kiñcāpi na evaṃ icchā uppajjeyya. **Atha kho bhabbāva teti** atha kho te kukkuṭapotakā vuttanayena sotthinā abhinibbhijjituṃ bhabbāva. Te hi yasmā tāya kukkuṭiyā evaṃ tihākārehi tāni aṇḍāni paripāliyamānāni na pūtīni honti. Yopi nesaṃ allasineho, so pariyādānaṃ gacchati, kapālaṃ tanukaṃ hoti, pādanakhasikhā ca mukhatuṇḍakañca kharaṃ hoti, sayampi pariṇāmaṃ gacchati. Kapālassa tanuttā bahiddhā āloko anto paññāyati, tasmā “ciraṃ vata mayaṃ saṃkuṭita-hatthapādā sambādhe sayimha, ayañca bahi āloko dissati, ettha dāni no sukhavihāro bhavissati”ti nikkhamitukāmā hutvā kapālaṃ pādena paharanti, gīvaṃ pasārenti, tato taṃ kapālaṃ dvedhā bhijjati. Atha te pakkhe vidhunantā taṃkhaṇānurūpaṃ viravantā nikkhamantiyeva. Nikkhamantā ca gāmakkhetaṃ upasobhaya-mānā vicaranti.

**Evameva** (3.0187) **khoti** idaṃ opammasampañipādanaṃ. Taṃ evaṃ atthena saṃsandetvā veditabbaṃ- tassā kukkuṭiyā aṇḍesu adhisayanāditividhakiriyākaraṇaṃ viya hi imassa bhikkhuno bhāvanaṃ anuyuttakālo, kukkuṭiyā tividhakiriyā-sampādanena aṇḍānaṃ apūtibhāvo viya bhāvanaṃ anuyuttassa bhikkhuno tividhānupassanāsampādanena vipassanāññāṇassa aparihāni. Tassā tividhakiriyākaraṇena aṇḍānaṃ allasinehapariyādānaṃ viya tassa bhikkhuno tividhānupassanāsampādanena bhavattayānugatanikantisinehapariyādānaṃ, aṇḍakapālānaṃ tanubhāvo viya bhikkhuno avijjaṇḍakosassa tanubhāvo, kukkuṭapotakānaṃ nakhatuṇḍakānaṃ thaddhabhāvo viya bhikkhuno vipassanāññāṇassa tikkhakharavippasannasūrabhāvo, kukkuṭapotakānaṃ pariṇāmakālo viya bhikkhuno vipassanāññāṇassa pariṇāmakālo vaḍḍhikālo gabbhaggahaṇakālo, kukkuṭapotakānaṃ pādana-khasikhāya vā mukhatuṇḍakena

vā aṇḍakosaṃ padāletvā pakkhe papphoṭetvā sotthinā abhinibbhidākālo viya tassa bhikkhuno vipassanāñāṇagabbhaṃ gaṇhāpetvā vicarantassa tajjātikaṃ utu-  
sappāyaṃ vā bhojanasappāyaṃ vā puggalasappāyaṃ vā dhammassavanasa-  
ppāyaṃ vā labhitvā ekāsane nisinnasseva vipassanaṃ vaḍḍhentassa anupubbā-  
dhigatena arahattamaggena avijjaṇḍakosaṃ padāletvā abhiññāpakkhe pappho-  
ṭetvā sotthinā arahattappattakālo veditabbo.

Yathā pana kukkuṭapotakānaṃ pariṇatabhāvaṃ ñatvā mātāpi aṇḍakosaṃ  
bhindati, evaṃ tathārūpassa bhikkhuno ñāṇaparipākaṃ ñatvā satthāpi-

“Ucchinda sinehamattano, kumudaṃ sārādikaṃva pāṇinā;

santimaggameva brūhaya, nibbānaṃ sugatena desitan”ti. (dha. pa. 285)-

Ādinā nayena obhāsaṃ pharitvā gāthāya avijjaṇḍakosaṃ paharati. So gāthāpari-  
yosāne avijjaṇḍakosaṃ bhinditvā arahattaṃ pāpuṇāti. Tato paṭṭhāya yathā te  
kukkuṭapotakā gāmakkhettaṃ upasobhayamānā tattha vicaranti, evaṃ ayampi  
mahākhiṇāsavo nibbānārammaṇaṃ phalasaṃpattim appētvā saṅghārāmaṃ upa-  
sobhayamāno vicarati.

**Phalagaṇḍassāti** (3.0188) vaḍḍhakissa. So hi olambakasaṅkhātaṃ phalaṃ  
cāretvā dārūnaṃ gaṇḍaṃ haratīti phalagaṇḍoti vuccati. **Vāsijaṭeti** vāsidaṇḍakassa  
gahaṇaṭṭhāne. **Ettakaṃ me ajja āsavānaṃ khīṇanti** pabbajitassa hi pabbajjāsa-  
ṅkhepena uddesena paripucchāya yonisomanasikārena vattapaṭipattiyā ca nicca-  
kālaṃ āsavā khīyanti. Evaṃ khīyamānānaṃ pana nesaṃ “ettakaṃ ajja khīṇaṃ  
ettakaṃ hiyyo”ti evamassa ñāṇaṃ na hotīti attho. Imāya upamāya vipassanāni-  
saṃso dīpito.

**Hemantikenāti** hemantasamayena. **Paṭippassambhantī** Ti thirabhāvena parihā-  
yanti. **Evameva khoti** ettha mahāsamuddo viya sāsanaṃ daṭṭhabbaṃ, nāvā viya  
yogāvacaṃ, nāvāya mahāsamudde pariyāyanaṃ viya imassa bhikkhuno ūnāpa-  
ñcavassakāle ācariyupajjhāyānaṃ santike vicaraṇaṃ, nāvāya mahāsamudda-uda-  
kena khajjamānānaṃ bandhanānaṃ tanubhāvo viya bhikkhuno pabbajjāsaṅkhe-  
pena uddesaparipucchādīhiyeva saṃyojanānaṃ tanubhāvo, nāvāya thale ukkhitta-  
kālo viya bhikkhuno nissayamuttakassa kammaṭṭhānaṃ gahetvā araññe vasana-  
kālo, divā vātātapena saṃsussanaṃ viya vipassanāñāṇena taṇhāsinehassa  
saṃsussanaṃ, rattim himodakena temanaṃ viya kammaṭṭhānaṃ nissāya uppa-  
nnena pītipāmojjena cittatēmanaṃ, rattindivaṃ vātātapehi ceva himodakena ca  
parisukkhaparitintānaṃ bandhanānaṃ dubbalabhāvo viya vipassanāñāṇapītipā-  
mojjehi saṃyojanānaṃ bhiyyosomattāya dubbalabhāvo, pāvussakamegho viya  
arahattamaggañāṇaṃ, meghavutṭhi-udakena nāvāya antopūtibhāvo viya āradha-  
vipassakassa rūpasattakādivasena vipassanaṃ vaḍḍhentassa okkhāyamāne  
pakkhāyamāne kammaṭṭhāne ekadivasaṃ utusappāyādīni laddhā ekapallaṅkena  
nisinnassa arahattaphalādhigamo. Pūtibandhanāya nāvāya kiñci kālaṃ ṭhānaṃ  
viya khīṇasaṃyojanassa arahato mahājanaṃ anuggaṇhantassa yāvatāyukaṃ  
ṭhānaṃ, pūtibandhanāya nāvāya anupubbena bhijjitvā apaṇṇattikabhāvūpagamo  
viya khīṇāsavassa upādinnakkhandhabhedena anupādisesāya nibbānadhātuyā  
parinibbutassa apaṇṇattikabhāvūpagamoti imāya upamāya saṃyojanānaṃ dubba-

latā dīpitā.

## 8. Aggikkhandhopamasuttavaṇṇanā

72. Aṭṭhamam (3.0189) atthuppattiyam kathitam. Atthuppatti panassa heṭṭhā cūlaccharāsaṅghātasuttavaṇṇanāya (a. ni. aṭṭha. 1.1.51 ādayo) vitthāritā eva. **Passatha noti passatha nu. Ālīngitvāti** upagūhitvā. **Upanisīdeyyāti** samīpe nissāya nisīdeyya. **Upanipajjeyyāti** upagantvā nipajjeyya. **ĀrocayāmīTi** ācikkhāmi. **Paṭivedayāmīti** paṭivedetvā jānāpetvā kathemi. **Vālarajjuyāti** assavālagovālehi vaṭṭitarajjuyā. **Paccorasminti** uramajjhe. **Pheṇuddehakanti** pheṇam uddehitvā, ussādetvāti attho. **Attatthanti** attano diṭṭhadhammikasamparāyikalokiyalokuttaram attham. **Paratthobhayatthesupi** eseva nayo. Sesamettha yaṃ vattabbaṃ siyā, taṃ sabbaṃ cūlaccharāsaṅghātasuttassa (a. ni. 1.51 ādayo) atthuppattiyam kathitameva. Idañca pana suttaṃ kathetvā satthā cūlaccharāsaṅghātasuttaṃ kathesi. Navamam uttānatthameva.

## 10. Arakasuttavaṇṇanā

74. Dasame **parittanti** appam thokam. Tañhi sarasaparittatāyapi khaṇaparittatāyapi ṭhitiparittatāyapi parittameva. Lahum uppajjitvā nirujjhanato **lahukam**. **Mantāyam boddhabbanti** mantāya boddhabbam, paññāya jānitabbanti attho. **Pabbateyyāti** pabbatasambhavā. **HārahārinīTi** rukkhanaḷaveḷu-ādīni haritabbāni haritum samatthā. Sesam sabbattha uttānatthamevāti.

Mahāvaggo sattamo.

## 8. Vinayavaggo

### 1. Paṭhamavinayadharasuttavaṇṇanā

75. Aṭṭhamassa paṭhame **āpattiṃ jānāti**ti āpattiṃyeva āpattiṃti jānāti. Sesapadesupi eseva nayo.

### 2. Dutiyavinayadharasuttavaṇṇanā

76. Dutīye (3.0190) **svāgatānīti** su-āgatāni suppaguṇāni. **SuvibhattānīTi** koṭṭhāsato suṭṭhu vibhattāni. **Suppavattīnīti** āvajjitāvajjitatṭhāne suṭṭhu pavattāni daḷhappaguṇāni. **Suvinicchitānīti** suṭṭhu vinicchitāni. **Suttasoti** vibhaṅgato. **Anubyañjana-soti** khandhakaparivārato.

### 3. Tatiyavinayadharasuttavaṇṇanā

77. Tatiye **vinaye kho pana ṭhito hotīti** vinayalakkhaṇe patiṭṭhito hoti. **Asaṃhīroti** na sakkā hoti gahitaggahaṇaṃ vissajjāpetuṃ.

### 9. Sathusāsanasuttavaṇṇanā

83. Navame **ekoti** adutiyo. **Vūpakaṭṭho**ti kāyena gaṇato, cittena kilesehi vūpakaṭṭho vivekaṭṭho dūrībhūto. **Appamattoti** sati-avippavāse ṭhito. **Pahitattoti** pesitatto. **Nibbidāyāti** vaṭṭe ukkaṇṭhanatthāya. **Virāgāyāti** rāgādīnaṃ virajjanatthāya. **Nirodhāyāti** appavattikaraṇatthāya. **Vūpasamāyāti** kilesavūpasamāya appavattiyā. **Abhiññāyāti** tilakkhaṇaṃ āropetvā abhijānanatthāya. **Sambodhāyāti** maggasāñkhātassa sambodhassa atthāya. **Nibbānāyāti** nibbānassa sacchikaraṇatthāya.

### 10. Adhikaraṇasamathasuttavaṇṇanā

84. Dasame adhikaraṇāni samenti vūpasamentīti **adhikaraṇasamathā**. **Uppannu-**  
**ppannānanti** uppannānaṃ uppannānaṃ. **Adhikaraṇānanti** vivādādhikaraṇaṃ anu-  
vādādhikaraṇaṃ āpattādhikaraṇaṃ kiccādhikaraṇanti imesaṃ catunnaṃ. **Sama-**  
**thāya vūpasamāyāti** samathatthañceva vūpasamanatthañca. **Sammukhāvinayo**  
**dātabbo ...pe... tiṇavatthārakoti** ime satta samathā dātābbā. Tesāṃ vinicchayo  
vinayasamvaṇṇanato (cūḷava. aṭṭha. 186-187 ādayo) gahetabbo. Apica dīghani-  
kāye saṅgītisuttavaṇṇanāyampi (3.0191) (dī. ni. aṭṭha. 3.331 adhikaraṇasamatha-  
sattakavaṇṇanā) vitthāritoyeva, tathā majjhimanikāye sāmagāmasuttavaṇṇanā-  
yāti (ma. ni. aṭṭha. 3.46).

Vinayavaggo aṭṭhamo.

Ito parāni satta suttāni uttānatthāneva. Na hettha kiñci heṭṭhā avuttanayaṃ  
nāma atthīti.

Manorathapūraṇiyā aṅguttaranikāya-aṭṭhakathāya

Sattakanipātassa samvaṇṇanā niṭṭhitā.